





Digitized by the Internet Archive
in 2016

Josephus Baptirelli



IUSTI LIPSI
ADMIRANDA,

sive,

DE MAGNITUDINE
ROMANA

LIBRI QUATTUOR.

AD SERENISSIMUM PRINCIPEM
ALBERTUM AUSTRIUM.



ANTVERPIÆ,
EX OFFICINA PLANTINIANA,
Apud Ioannem Moretum.
M. D. XCVIII.

Cum Privilegiis Casareo & Regio.

Collegij Amerini S. Ang. Congreg. S. Somasche

A DALLMAN

DE MONTVINE

JOHN DALLMAN

JOHN DALLMAN
JOHN DALLMAN

JOHN DALLMAN
JOHN DALLMAN

JOHN DALLMAN
JOHN DALLMAN

JOHN DALLMAN
JOHN DALLMAN

JOHN DALLMAN
JOHN DALLMAN

JOHN DALLMAN
JOHN DALLMAN

SER^M° PRINCIPI
ALBERTO AVSTRIO
IMPERATORIS FILIO,
NEPOTI, FRATRI,
S. R. E. CARDINALI,
BELGICÆ SUPREMO GVBERNATORI,

I. LIPSIVS *dedicat consecrâtque.*



INTER Historiarum fructus, SER^M° PRINCEPS, ego illum eximium habeo, qui ad Sapientiam & rerum in orbe ADMIRANDARVM cognitionem ducit. Quis enim paullò altior & attentior eas legit, qui non diuina illa opera obseruet, magna imperia stabilita, aut diruta: & in iis imaginem quamdam Prouidentiae simul & Potentiae diuinæ? Ita profectò se res habet. sicut vnus in superis Deus est, qui machinam hanc totam moderatur & temperat: sic in terris velut Curatores & Vicarios quosdam suos constituit, qui in partibus eam tueantur & administrent. Atque horum quosdam crescere voluit in magnas opes, copias, opera:
* 2 quid

quid nisi in imagine ostendens, cælestem illam & sine fine ac modo potentiam, quam ipse habet, & per riuulos ac canales illos deducit? Ut igitur cælum & micantia illa astra cùm intuemur, ab iis ad puram, primam, & inaccessam quamdam lucem ducimur: sic ab humanâ istâ MAGNITVDINE, ad auctorem illius & fontem Deum. Quis ille fuit, qui Assyrios terris & gentibus imposuit? qui Persas, Macedonas, Romanos? quis qui iterum loco mouit & deiecit? magnus ille auriga & rector vniuersi, qui habenas in hoc mundano curru temperat; qui impellit, qui sistit, & poëtæ verbo

Diuisque mortalesq; turmas

Imperio regit unus a quo.

Quod magis sentio, & in animum demitto, cùm in ipsâ potentiâ & magnitudine infirmitatem istorum video, aut breuitatem. Quid enim illa omnia nunc, aut vbi sunt? abierunt. vbi supra fidem cumulatę opes? defluerunt. vbi cælo certantia opera? non appārent. Heu res mortalium vel maximorum paruæ! heu validissimorū instabiles! imò omnia illa somnium, vmbra, nihil, si cum Æterno & Æternitate comparentur. Sicut Solem istum assidue vel nubes aliqua subducit, vel nox denique condit: talis omnis hic splendor & felicitas, rapitur aut euanescit. Hæc & similis co-
gita-

gitatio SER^M PRINCEPS, iamdiu me impu-
lit Imperiorum magna & ADMIRANDA
colligere: atq. vt decuit, orsum à ROMANO.
Nam fallor, aut non alia maior magisq; fun-
data, addo & laudata MAGNITUDO; quam
quattuor his libellis in parte expressi, & ad
SER^{TEM} TVAM multis de caussis misi. Omitto
beneficia in patriam publica, in me priuata:
ipse titulus & argumentum palàm ad te du-
cebant. ROMANI imperij descriptio cui po-
tius aut iustius debebatur, quàm Principi è
tot ROMANIS Imperatoribus nato? Res cer-
ta & inter ADMIRANDAS est, ex vnâ AVSTRIA,
verè aureâ, stirpe vestrà, decem Imperatores,
intra hos trecentos circiter annos, orbi Chri-
stiano affulisse: atque id sanguinis & nata-
lium serie, sine vlllo fulcro adoptionis. Quid
in omni retrò Principum classe simile? duo,
tres, in vnâ domo, & vix fuerunt: in primâ
ipsâ Iulij, nec vltra sextum etiâ adoptio pro-
rogauit. Iterùm dico, mirabile. & quid nisi à
Dēo tacita vox & testimonium, datam hanc
familiam & demissam è cælo in terras esse, ad
imperia terrarum? Iam & ADMIRANDORVM
ille titulus, an non ad te traheret in variâ vir-
tute sic ADMIRANDVM? Priuatam tuam vi-
tam si video; Pietas & Religio occurrit, quæ
vel sacerdotem deceat; Castitas, quæ Vesta-
lem; probitas, & vitæ totius ordo ac compo-
sitio,

fitio, quæ ipsum cælum. Nec enim sidera illa profecto magis ordinato & certo cursu incedunt, quàm tuæ actiones. Quid prudentia in ciuili aut militari administratione? quid altitudo consiliorum incredibilis? quid tranquillitas animi & vultus (proprium bonum Austriacæ gentis) in omni euentu aut fortunâ? ADMIRANDA sunt. & quæ Regi nostro, sapientissimo rerum hominumque arbitro, causam dederunt tui inter alios eligendi, quem ad maxima imperia & Præfecturas admoueret. Ecce Lusitania adiecta Hispaniæ suæ fuit, & multa in concussio eo corpore adhuc ægra: te elegit qui lapsa erigeres, dilapsa colligeres, exanimata recreares. Et sanè ita fecisti, & præfuiisti, vt pænè optandum fuerit illi regno tam validè cōcuti, vt te pacatorem fundatoremque æterni deinceps otij haberet. Quis in discessu tuo non ingemuit? nobilitas patronum, plebs parentem, leges custodem, pietas vindicem visa est sibi amisisse. At noster Rex recepisse: & expertus quàm benè humeris tuis imperium federet, porrò te misit in Belgicam nostram, id est in ipsum mare & Oceanum (ignosce patria sic loquenti) diffusionum & turbarum. Heu qui hîc fluctus? adeò vt alibi ciuilia atque externa bella fuisset & transisse dixerim, hic sedisse & habitasse. Opportunitas scilicet locorum fecit, & simul

simul conspiratio eorum qui magnitudini
 Regiæ sunt infensi, vt consilia & arma verte-
 rentur in has partes , & in nostrâ istâ patriâ
 certamen certaretur, penè dicam, de Europâ.
 Ergo missus es & venisti in medium discrim-
 en: quid autem fecisti? quod ne hostes su-
 spicari, nec nos sperare, imò vix nunc credere
 possumus cùm est factum. Aggressus es vr-
 bem naturâ , opere , milite munitam , & op-
 portunitate inter Galliæ primas. Urbem di-
 co, quam * Eduardus ille felix & animosus * Anno
 Anglorum Rex, vñdecim mēsiū spatio vix ^{1347.}
 expugnauit; quam * Philippus Bonus tuus * Anno
 proauus, cum quadraginta millium exercitu, ^{1436.}
 nec expugnauit: tu, inquam, aggressus cum
 modicis copiis, in paucis diebus claudis, op-
 pugnas, capis. Quæ hæc vis animi, vel beni-
 gnitas fortunæ? vtraque enim adfuit: & illa
 vt auderes dedit, hæc vt posses. Scipio Afri-
 canus olim (nec alium iustius tecum confe-
 ram) cùm in Hispaniam missus esset, vel fero-
 ciâ Pœnorum ereptam, vel infortunio Ro-
 manorum alienatam, vidit rem longi & infi-
 niti operis, bellum circumferre per singulas
 & minutas partes. Quid facit diuinus iuue-
 nis? Carthaginem Nouam, vbi, arma, cōmea-
 tus, opes hostiles erant , situ & mœnibus (ita
 putabatur) inexpugnabilem, subitò & igna-
 ris omnibus exercitum rapit. Venit, aggredi-
 tur,

tur, ingreditur: & in vnâ vrbe captâ, animos
suis sociisq. reddidit, hostibus ademit. O fa-
ctum Scipione dignum! & quid nisi prolu-
dium frangendæ Carthaginis, & stabiliendi
mox imperij pariter ac pacis? A te similia ex-
spectamus, ô noster Princeps: & ab hoc initio
vince aut paca hostes, iunge diuulsos aut re-
belles. Hos ipsos quàm terres statim facto no-
uo pariter, & inopinato? Abducis ab iis locis
copias, & alia agens ac præferens, Hulstum
adducis. Quod istud Hulstum? non opidum,
sed insulam: nec insulam modò, sed propu-
gnaculis variis magnisque, id est verâ æstima-
tione, totidem opidis inessam. Quid facis ô
consideratissime Princeps? quis ardor te ab-
ducit? non Mars solùm ea loca, sed Neptu-
nus tuetur & vindicat: & magnus ille Ocea-
nus, ruptis aggerum claustris immissus, vnâ
cum suis filiis latè dominatur & regnat. Vbi
naues, quibus peruadas? vbi alæ quibus trans-
uoles? defunt: at non tentandi tibi animus,
& patrandi item fortuna. O quàm nunc de-
nique didici, angustè vires vestras expendi, si
quis ea tantùm quæ fieri possunt à vobis ex-
spectat! Audetis non audenda, facitis non
facienda, humano quidē iudicio: sed Deum
adhibetis in consilio, & vos magni cum ma-
gno illo Numine participantes, legitis, (si fas
dicere) in tabulis Fatorum. Itaque inuitis aut
dis-

diffuadentibus omnibus, inuadis, peruadis,
vincis. Hæc tua sunt sub initium opera, cùm
alij vix operum solent ponere fundamenta.
Et quæ non maiora magisq̃ue A D M I R A N D A
à te, vel in te, exspectemus? Memini legere
A L B E R T V M I I. inter maiores tuos Austrios,
vno tempore atque adeò vno anno, factum
Regem Bohemiæ, & Hungariæ, & R O M A -
N O R V M. O quæ ista felicitas! sed quàm bre-
uis felicitas! biennio enim non toto impera-
uit, & optimum Principem Deus cælo inue-
xit, quia terra virtutum illarum parum capax
erat aut digna. Tibi pariter A L B E R T O omi-
namur & vouemus similia, sed firmiora: & an
non iam nunc clara signa Deus & Rex dede-
runt? sed parco dicere, etsi non optare. O dies
ille exorere, nō lætus solum sed salutaris Bel-
gis; nec Belgis tantum, sed vicinis; nec vicinis,
sed dissitis, & quicunq; sunt in religione aut
orbe Christiano. Plura vellem: sed vt ij qui
apud Deum verba faciunt, corpore, gestu, ser-
mone modici sunt ac reuerentes: sic nos de-
cet apud vos Principes, & colere atque A D -
M I R A R I magis, quàm laudare. Facio in ani-
mo, & illo dico atque impleo, siquid ore aut
stilo omisi. Louanij, Kal. Martiis. ∞ . 15. XCVIII.

AD LECTOREM.



AD MIRANDA in Imperiis, Lector, qua olim colligere coepimus, nunc disponere, ut vides, & vulgare. Orsumus à ROMANO, quod quatuor his libellis damus: an totum? negabit aliquis, & scio esse quæ possint addi. Sed an debeant, nescio: non certè pro meâ mente, cui propositum fuit eminentia tantum & verè MAGNA colligere, atq; ea ipsa dumtaxat ostendere in primo vultu, & designare. Omnia si penetrassem, aut delineassem, præsertim quæ ad Opera, quis finis fuisset? Sed architectonica etiam hac cura sit, non nostra; nec libuit supra plantam, quod dicitur, euagari.

* nec fuit
vngam
Omnibus
in rebus
gnarū vñ
esse atque
scientem.

* — ἐδ' ἀεὶ πως ἦν

Εν πάντεσ' ἔργοισι δαίμονα φῶτα χυέας.

Et verè fateor, nimia iam etiam curâ an curiositate peccari à plerisque nostrum, qui omnia hac antiqua auidè scrutamur, & in maris illo fundo panè dicam arenas. Ah, quis fructus est? Vita & mores præcant, tum prudentia, sed & elegantia quædam accedat: tamen ultima hac cum modo. Peccauimus & nos fortasse olim: sed nunc cum aliis annis mens est alia, & clamo liberè, Quædam esse quæ malo ignorare, quàm discere. Timonis illud sæpè mihi in mente:

* Multiscientia, ut haud quidquam vel vanius existat!

* πλὴν μαθησομένης ὡς ἐκ νεώτερον ἄλλο.

Sed siquid tamen scitu dignum omisi, alius explebit me volente & addet, ut fiat illud Homericum

* melius multorum opus.

— * πλεόνων δ' ἐστὶ ἔργον ἀμεινον.

Et se

Et si quadam tamen seposita mihi, non omiſſa, & in al-
terâ ADMIRANDORVM parte opportunè reddenda. Atqui & alia mihi culpa, aut certè nota, deprecanda
est, in attollendo nimium fortasſe alibi fuiſſe. Si ita eſt,
excusetur: & quis nescit, ubi animus & ſtilus incaluit,
*trahere hoc ſecum has * πονυόεις? Et tamen non ar-* * laudatio-
cem è cloacâ feci, ut ait ille, nec lapidem è nes
ſepulchro veneratus ſum pro Deo; ſed res lau-
datiſſimas laudari & extuli: ſi nimis, tu moderare
& deprime, quiſquis frigore & ſedatiore affectu hac le-
gis. Denique in clauſulâ, magnum etiam imperium mi-
ratus ſum, & approbavi: cur contra hodiernum mo-
rem (dicet aliquis) fortasſe & uſum? Nam diuiſiones
iſta facta iam dudû, & inueterauerunt, & moueri ſine
motu Chriſtiani orbis vix poſſunt. Non temerè igitur
ſuadeo, nec ſanè innouo: ſi tamen Fatis & Deo uſum,
hodiernam aliquam & nouam MAGNITVDINEM
dare, cur culpa ſit laudare & approbare? Multiplex
ratio eam commendet: & firmiſſimè iſta. quòd etiam-
nunc, quidquid tranquilli & pacati eſt in re Chriſtiana,
id manat ab unico illo capite, quod auctoritate ſacrâ
nobis præſt. Romanus ille Dictator, ut ſic appellem, &
Pontifex, fulcrum aut vinculum eſt, quod ſuſtinet, quod
ligat, labentes aut diſſentientes in malè compacto hoc
ædificio partes. Abite non impij ſolùm, ſed imperiti, qui
aliter. nobis conſtat hanc ipſam Romam, & ſacrum in
eâ imperium, fuiſſe & eſſe velut anchoram flu-
ctuantî diu Europæ. Mira Dei benignitas in hanc
urbem! cùm legionum vim eripuit, legum attribuit;
cùm

cum armis imperare noluit, sacris indulgit: & sic quoque fecit eam decus, tutelam, columnam rerum. Atqui Senatus ille vetus non est, inquiunt. Non ille, sed alius: & vide mihi in istâ purpurâ ex omni nostro orbe selectos procures, moribus, prudentiâ, annis spectandos. Si vetus ille Cyneus redeat, & hunc confessum videat, nihil ambigat vel cum Regibus iterum, vel cum Heroibus comparare. Quid Tributa? non tam multa, sed magis innoxia & ultronea sunt. Quid Legationes gentium? nec ea desunt, & ex noto ignotâque orbe (tanta diffusio maiestatis huius est) concurritur, & iura ac leges sacrorum hinc petunt. Ipsi Reges & Principes adeunt & inclinantur, & obnoxia capita uni huic capiti submitunt. Quid Principes aut homines loquor? ipsi aërei, terreni, inferi spiritus siue Genij verentur ac trepidant, & caelestem illam in terris potestatem vel multi ac reluctantes agnoscunt. Gaude igitur non maior, sed melior iam ROMA; non cultior, sed sanctior; & diu sedes & habitaculum sacri huius imperij (ex animo vovemus) esto.

I. L I P S I
A D M I R A N D A,
sive,
D E M A G N I T V D I N E
R O M A N A.

L I B E R I.

C A P. I.

Occasio & ingressio sermonis.



I E S æstuosus erat, & quales Iulio
mense per Caniculam solent. Venit
ad me A V D I T O R, & Numquid
turbo? inquit, non opinor. Otiari te
cùm tempus, tùm & mos iubet, qui
publicas Ferias nunc indixit. L I P S.

Otiatur. non ob causas à te dictas solùm, sed ob quam
minimè vellem. Ea valetudo est, semper molesta, nunc
magis in isto æstu. O si Spada me habeat! quàm me re-
creem & refrigerem ambulando, bibendo! A V D. Omit-
te Spadam, illam cursus tui palæstram. Satis nobis, se-
mel sic pro te timuisse. Nam quid propiùs factum,
quàm vt nobis eripereris, ad alios translatus? L I P S. Fa-
ctum. nec vnquam ego propior periculo fui, nec mani-
festiore Dei manu ereptus. Ille me tuitus est, & reddidit
vobis. Vtinam & eos redderet iungeretque per bonam
pacem, qui sic abiuncti! O quàm suavis vita sit! quàm
iuuet communione illâ terrarum hominumque frui!
A V D. Ne despera.

*Nondum
ather mē-
ses, nec vol-
uerē desit
annos.
Theocr.*

* Οὐπω μῆνας ἄγων ἔκαμ' ἔργονός, οὐδ' ἐνιαυτούς.

Dies, inquam, ista componet & dabit, aut deniq; Deus.

L I P S. Certè Dei hoc opus : quem toto pectore inuoco
venerorq; vti velit. Respiciat afflictam Belgicam tot
iam lustris, & satis sit accisam eam, non excisam. Sed
quid tu volebas? A V D. Fabulari. L I P S. Publica habes?
A V D. Curiosè ea non curo : sed tamen & publica tan-
git, quod volebam. L I P S. Dic autem. A V D. Sponde au-
tem. L I P S. Quid istud est? captas me? A V D. Non nego.
vtinam ceperim! Iamdiu est quod DE MAGNITVDI-
NE ROMANA polliceris aliquid dicere, siue scribere.
Si hoc nondum potes, illud fac quod potes. L I P S. Hòc
cine agebas, & eò ibas? & hoc illud otium, quod sua-
debas? A V D. Agebam, ibam, suadebam. Et quid tibi
hìc magni negotij? scio iamdiu talia & obseruata tibi,
& prompta. L I P S. Prorsus. ecce, os aperiam? sponte se
effundent. O te bellum! scilicet memoriâ, dispositione,
ad eas res non opus, etiam quas notas iam habeas & pa-
ratas. A V D. Non nego. sed priorem Deus tibi dedit, al-
teram iudicio semper assumpsisti. In scriptis tuis hoc
me delectat, ordinem & seriem rerum videre: interdum
earum, quarum ordo nec videbatur. L I P S. Maluses.

A V D. Quid ita? L I P S. Quia verè captatorem agis, &
blandiris, sed vt in retia tua compellas. - * γέρων δ' ἀλώ-
πηξ (ait verbum) οὐχ ἀλίσκεται. A V D. Imo patiare te
capi vel meâ hac cupidine, quam amare & laudare in-
adolescentiâ nostrâ soles. L I P S. Non nego, adamo: sed
& argumentum inuitet, quod valdè item amo. Quo-
modo non veterem illam Romam? tot ingeniorum, ar-
tium, virtutum, vel matrem vel sedem? Nam potentia
quidem & militia ADMIRANDA sunt, & magni illius
imperij

* - vulpe-
culahand
capitur
senex.

imperij opes: virtutes amandæ. AVD. Nequæ aliud à te volo, quàm in vmbra quasi & imagine repræsentari formam faciemque illam veterem: & qualis, & quanta Roma fuit. LIPS. Ego verò sic subitò nec vmbra tibi ausim polliceri, fortasse ymbellam, & imaginem aliquam imaginis, vt sic loquar. AVD. Quidlibet, iuuabit & docebit. LIPS. Sic volendo, volentem & me facis. Sub hac trichilâ vmbrosâ igitur sedeamus, & ducamus MAGNITVDINIS ROMANÆ vmbas.

CAPVT II.

Communiter Roma & eius Potentia laudata, per elegia pauca veterum.

EGO inter Imperia & Magnitudines, quas Deus à condito orbe esse voluit, eminere censeo & primas ferre hanc ROMANAM. Hoc è *Finibus, Copiis, Opibus, Operibus*, denique *Viris & Virtutibus*, liquere posse arbitror: quibus rebus singulis, aut & iunctis quibusdam, aliæ fortasse gentes se ostenderunt; nulla sic omnibus, vt nunc ostendam. Tu Deus lux temporum, rerum, hominum, scintillam aliquam tui, si non radium, in mentem hanc immitte: vt eâ videre, adire, sed & referare possim, thesauros Antiquitatis & Memorix, quos in Æui diffuso implexoq; sinu, reponis & seruas. Priusquàm igitur distinctè de quinque illis Magnitudinis partibus dicam, lubet vniuersè aliquid de totâ eâ præfari; & quàm istam, vnâ mecum, illustres magnique omnes viri admirati sint. Atque illa vulgata omitto, *Romanos rerum dominos: Romam mundi caput: Mundi miraculum: Mundi compendium: Arcem nationum ac regum, lumen gentium*: magna sunt, & à magnis: sed

compendio laudasse eam magnificè Martialis videtur,

Terrarum Dea Gentiumq, Roma,

CVI PAR est nihil, & nihil SECUNDVM.

Subtiliter nec falsò vult, nihil accedere ad eam, nihil vel sequi. Quod an ab illo mutuatus Frontinus est? in cuius libro de Aquæductibus legimus: *Regina & domina orbis, quæ terrarum dea gentiumque consistit, cui par nihil, & nihil secundum.* Sed vereor vt allitum adscriptumve alienâ manu sit, & grauis atque eruditus reliquus Frontini stilus non probat aut amat lasciuiam poëtarum. Compendio igitur Martialis: sed pulchrè item & vbertim Claudianus.

*Quâ nihil in terris complectitur altius æther,
Cuius nec spatium visus, nec corda decorem,
Nec laudem vox ulla capit. quæ luce metalli
Æmula vicinis fastigia conferit astris.*

*ARMORVM LEGVMQVE PARENS, quæ fundit in omnes
Imperium, primique dedit cunabula iuris.*

Hæc est exiguis quæ sinibus orta, tetendit

IN GEMINOS AXES, paruaq, à sede profecta

Disperisit CVM SOLE manus. hæc obuia fatis,

Innumeras vno gereret cùm tempore pugnas,

Et Gallum terris prosterneret, æquore Pænum,

Numquam SVCCVBVIT DAMNIS, & territa nullo

Vulnere, post Cannas MAIOR Trebiamq, fremebat.

Habes pleraque versibus iis ab alto & animoso poëta (talis fuit) inserta, quæ ordine meo imus laudatum. Sed Erinna etiam poëtria audienda est: quam vixisse oportuit, vt hoc carmen est, sub Pompeij, aut circiter, æuum. Nam alioqui plures eo nomine fuisse, non debes nescire. Ea igitur, ad ipsam Romam:

Χαῖρέ μοι Ρῶμα θυγατὴρ ἄγνη,
 Χρυσέοιμιτρα, δαΐφρων ἀνάσσει,
 Σεμνὸν ἀναίεις ἔπ' ἡ γαῖς Ὀλυμπον
 Αἰὲν ἄθραυσον.

Σοὶ μόνῃ πρόσβιζα δέδωκε μοῖρα
 Κῦδος ἀρρήκτω βασιλῆον δ' ἑχῆς,
 Ὄφρα κοιρανῆον ἔχουσα κάετ' ὅ
 Ἀγεμονίδης.

Σᾶ δ' ὑπὸ ζύγῳ κρατερῶν λεπιδίων
 Στέρνα γαίης καὶ πολιᾶς θαλάσσης
 Σφίγεται. σὺ δ' ἀσφαλῆως κυβερνᾷς
 Ἀΐεα λαῶν.

Πρώτα γ' σφάλλων ὁ μέγιστος αἰὼν,
 Καὶ μεταπλάσων εἶσι' ἄλλοι' ἄλλως,
 Σοὶ μόνῃ πλησῆσιον οὐρεν δ' ἑχῆς
 Οὐ μεταβάλλει.

Ἡ δ' ἐν πρώτων σὺ μόνῃ κρατίζουσ
 Ἀνδρας αἰχματὰς μεγάλως λοχθεῖς,
 Εὐσαχίῳ δάματρός ὅπως δυνεῖσα
 Καρπὸν ἀπ' ἀνδρῶν.

*Filia ὁ Martis, mihi Roma salve,
 Aureo Regina decora cultu,
 Qua vel in terrâ stabiles Olympi
 Incolis arces.*

*Nam dedit soli tibi cana Parca
 Regium sceptrum, minimè atterendum,
 Ut potens rerum domineris una,
 Imperitesq̃.*

*Ad tuum currum, retinente frano,
 Colla telluris tumidiq̃ ponti
 Illigas, εἰ tu populos gubernas
 Firma per animum.*

*Ipsa quæ gaudet variare cuncta,
Resq; transformans hominum, vetustas,
Spirat hæc uni tibi semper auram à
Puppe secundam.*

*Denique, in cunctis populis valentem
Procreas bellis sobolem. utq; lata
Surgit è terrâ seges, ipsa abundas
Fruge virorum.*

Atque heust tu, virile & plenum spiritus muliebre hoc carmen est; & cur talia tam multa perierunt? Sed Poëtarum hæc laudatio est: audi Historicum. *Nulla unquam Respublica nec MAIOR nec SANCTIOR, nec bonis exemplis ditior fuit.* Laudat à duplici illo capite quod nos attigimus, & in sermone persequemur, Potentiæ & Virtutis. Quod ipsum vtrumque Ammianus: cùm *Romam IMPERII VIRTUTVMQVE omnium Larem* appellat. Et plura se offerunt, quæ differo, in suis locis opportuniùs reddenda. Hieronymi elogia audiamus, æuo iam inclinante: *Urbs POTENS, urbs Domina, urbs Apostoli voce laudata, interpretare vocabulum tuum. Roma aut FORTITVDINIS nomen apud Græcos est, aut SVBLIMITATIS apud Hebræos.* Duplicem interpretationem nominis rei aptam reddit: ego & tertiam, quam dederit lingua nostra: quia * *Roma, Gloria & fama* nomen est Germanis. Quid, quod apud Orientales Indos *Rumes* appellantur (Osorio ita traditum) milites boni & fortes: an quasi Romani, & admiratio vetus apud eos mansit? an vox indigena id quoque notat? Sed ad rem partesque nostras eamus, aliquid tamen à te præstipulati. AVD. Quid illud est? LIPS. Assensum & fidem. AVD. Tibi non dem, aut habeam? vel nutu me ducas,

Li. I.

Lib. II.
adu. Iouin.

* Rom.

ducas, quò velis. LIPS. Memento. nam erunt quædam inopinata, & verè ADMIRANDA. Poëta iure cecinit: Propert.

*Omnia Romana cedant MIRACVLA terræ,
Natura hîc posuit, quidquid VBIQVE fuit.*

CAP. III.

Fines imperij Romani; quando maximi; & Prouincia breuiter adnumerata.

INITIA nos tenent: nec temerè iam olim dictum, *Portam itineris longissimum esse*. At seriò viam ingredior, & quidem per eos limites siue terminos, quos antè obiter posui, *Potentia ac Virtutis*. In Potentiâ considero, *Fines, Copias, Opes, Opera*: & in hanc quadrigam, nisi fallor, subiungam & veham, quidquid ea secum trahit. Ergo de *Finibus* primò. ij. verò quàm amplissimi fuerunt, & spatia terrarum ac maris, vno velut sinu & iunctim inclusa, quanta in vlllo priorum aut posteriorum imperiorum, nego fuisse. Itaque attollunt, haud vanè hæc veteres, & magnificè loquuntur, vt Cicero: *Nulla gens est, que non aut ita subacta sit, vt vix exstet; aut ita domita, vt quiescat; aut ita pacata, vt victoriâ nostrâ imperioque latetur*. Et passim illi sermones, *Romanos orbis dominos: Solem utrumque in eorum imperio currere*: & talia, animosè magis, quàm superbè dicta. Petronius:

Orbem iam totum victor Romanus habebat,

Quà mare, quà terra, quà sidus currit utrumque.

Dionysius Halicarnassæus planè cū ipso, etsi ante ipsum: ἡ δὲ ῥωμαίων πόλις ἀπάσης μὴ δέχεται γῆς, ὅση μὴ δὲ ἑμέλει ἐστίν, ἀλλ' ὥς ἀνθρώπων κατέκειται. πάσης δ' κρατεῖ θαλάσσης, οὐ μόνον τῆς ἐντὸς ἡρακλείων σελῶν, ἀλλὰ καὶ τῆς ὠκεανίτι-

δὲ ὅσην πλείων μὴ ἀδιώατος ἐστὶ, πρώτη καὶ μόνη τὰν ἐν τῷ παν-
 τὸς αἰῶνι μνημονουμένων, διὰ τῶν καὶ δύσεις ὄρας ποιοσα-
 μὲν τῆς διωασιᾶς: *Romana urbs imperat toti terra, quæ
 quidem inaccessa non sit, habitaturque ab hominibus; sed
 & toti mari imperat, non solum huic intra columnas Her-
 culeas, sed ipsi Oceano, quacumque est navigabilis; primaq;
 & sola ab omnis cui memoriâ terminos sibi potentia fecit,
 Orientem & Occasum.* Vbi terras omnes & maria tri-
 buit, sed ut decuit historicum bonæ fidei, cum aliquâ
 restrictione aut exceptione: seiungitque inaccessa aut
 inhabitata loca, itemque maria ignota. Enimvero, si
 propius inspicias, nec habitata quidem omnia loca sub
 imperio habuit: non hercules: & multa sub Partho-
 rum iure ad Orientem fuere, multa libera, aut sub regi-
 bus ad Septemtrionem ac Meridiem: sed ut ego quo-
 que pro vero magis coëriceam, quidquid opportunum
 aut dignum vinci videbatur, vicit. Cetera non tam non
 potuit, quàm contempsit, & iudicio reliquit. Sed illud
 nemo negauerit, florem Asiæ, Africæ, Europæ in hoc
 imperio fuisse: ipsa gentium robora, ingenia, opes.
 Quod ut clariùs tibi liqueat, in triplici hac mundi pla-
 ga quid habuerint, strictim & per indicem dicam: at-
 que id cùm imperium maximum & in culmine suo
 fuit, ut ab Augusto ad Traianum. Termini igitur fines-
 que imperij sub Augusto erant, ab Oriente *Euphrates;*
 à Meridie *Nili catarracta, & Deserta Africa, & mons
 Atlas;* ab Occidente, *Oceanus;* à Septemtrione, *Danu-
 bus & Rhenus.* Ita enim ipse, bono consilio, instituit,
 claudere imperium naturæ aliquibus limitibus, & cu-
 stodes ac milites ad eos habere. Hoc Tacitus in eo lau-
 dat: *Clausum mari, aut amnibus longinquis imperium.*
 Atque

Atque idem scribit, Augustum libello, quo Rationes imperij conscripserat, *consilium addidisse coërcendi intra terminos imperij, incertum metu, an per inuidiã*. Nolebat, inquam, posteros Augustus proferre terminos: siue quia satis iam partum videbatur, & metuendæ bellorum ac fortunæ vices; siue per inuidiam, & ne gloriam suam vincerent, vt Tacitus suspicatur. Sanè posteri neglexerunt, nec solùm regna aliquot, defunctis aut euersis sociis Regibus, imperio adiecerunt; sed etiam, vltra terminos, noua quæsiuerunt. vt Claudius, qui *Britannias* in ipso Oceano deuicit; vt Traianus maximè, qui ab Oriente, *Arabiam, Armeniam, Mesopotamiam*; à Septentrione, *Daciam* subegit. Ita moti prolatique tunc termini, trans Euphratem, ad *Tigrim*: iterumque parte aliã, ad *Mare rubrum*; & trans Danubium ipsum, tota *Dacia* addita fuit. Hoc est, quod Tacitus noster in illo Principe laudat: *Ventum inde Elephantinen ac Sienen, claustra* 11, Ann.
olim Romani imperij, quod nunc Rubrum ad mare patescit. Sed, inquires, quæ hæc dictio est, quasi pro magno ad *mare Rubrum* ventum nunc esse: nõne & antea fuit? Ipsa illa *Siene* & *Elephantine* ad Nili catarractas, ostendunt quidquid Ægypti interiacet Nilum & Sinum Arabicum, iam olim Romanorum fuisse. Atqui Sinus ille, *Rubrum mare*. Respondeo, latiùs olim Rubrum mare patuisse, & paullo aliter, quàm vt vulgò hodie, appellatum. Nam in Taciti, & aliorum veterum verbis, in hoc nomen venit *mare Indicum*, vastum illud & magnum, quod ab extremo Sinu Arabico, siue ab Africa eã, in *Auream* Ptolomei *Chersonesum* se protendit. Itaque Pomponius Mela, duos Sinus in mari Rubro agnoscit, *Arabicum* & *Persicum*. Et Seneca Tragicus, *Tigrim in*
B
mare

mare Rubrum exonerat atque immittit: Curtius *Indum* & *Gangem*: quos certum est in magnum illud mare, longè à Sinu Arabico, euolui. Hæc vera & clara sunt: promoti igitur termini ad mare Rubrum siue *Indicum*, per Arabas adiectos. Eadem mens Græci scriptoris in Suidâ: qui terminos imperij ad Orientem facit *Indos* & mare Rubrum; & *Nili Catarractas*, & lacum *Maotin*. Sicut & Appianus ita capiendus, cùm in Præfatione operis sui, distinctè Romanum imperium limitat: *Tendit*, inquit, *ab Occasu* & illo Oceano occiduo, *ad Caucasum montem*, & *flumen Euphratem*, & *ad Æthiopas superiores*, *per Ægyptios* & *Arabas*, *ad Orientalem Oceanum*. Hic Oceanus Orientalis, non aliud quàm *Mare Indicum* siue *Rubrum*, iam dictum. Sed obiicies, Si ista de Traiani terminis Appianus; quid ita *Euphratem* ponit, *Tigrim* omittit? Hoc idèd, quia Hadrianus Imp. (sub eo Appianus scripsit) statim à morte Traiani, hoc mutauerat. de quo Festus Rufus: *Inuidens*, inquit, *Traiani gloria*, *sponte Armeniam*, *ac Mesopotamiam*, & *Assyriam reddidit*, *ac medium inter Persas & Romanos Euphratem esse voluit*. A V D. Sed & alia dubitatiuncula, de *Mesopotamiâ*. quam tu & Rufus ab Traiano adiectam imperio significatis; at Aurelius Victor iamdiu à Claudio. LIPS. A Claudio? nemo hoc dixit, nec potest. A V D. Imò verba Victoris sunt: *Retenti fines, seu dati, imperio Romano, per Orientem Mesopotamia*; *Rhenus Danubiusq; ad Septentrionem*, & *à meridie Mauri accessere provinciis*. LIPS. Hoc eo sensu, vt ipsa Mesopotamia finis esset, non vt in finibus contineretur. Eousque, inquam, productum imperium, non & vltra ipsam. Ea mens Victoris; aut si alia, est error. Et habes ecce in istis finibus,

bus, quid? per Indicem, si placet, videamus, & per singulas orbis partes.

IN ASIA:

IN AFRICA:

<i>Colchidem,</i>	<i>Armeniam,</i>	<i>Ægyptum,</i>
<i>Iberiam,</i>	<i>Syriam,</i>	<i>Cyrenaicam,</i>
<i>Albaniam,</i>	<i>Arabiam,</i>	<i>Marmaricam,</i>
<i>Pontum,</i>	<i>Palestinam,</i>	<i>Gatuliam,</i>
<i>Bosphorum,</i>	<i>Ciliciam,</i>	<i>Africam propriam,</i>
<i>Cappadociam,</i>	<i>Pamphyliam,</i>	<i>Numidiam,</i>
<i>Galatiam,</i>	<i>Lydiam, &</i>	<i>Mauretaniam,</i>
<i>Bithyniam,</i>	<i>Asiam totam</i>	<i>Aliásque minores</i>
	<i>minorem.</i>	<i>aut ignotiores.</i>

IN EVROPA:

<i>Italiam,</i>	<i>Macedoniam,</i>
<i>Hispanias,</i>	<i>Epirum,</i>
<i>Gallias,</i>	<i>Graciam,</i>
<i>Inalpinos,</i>	<i>Thraciam,</i>
<i>Rhetiam,</i>	<i>Masiam,</i>
<i>Noricum</i>	<i>Daciam,</i>
<i>Illyricum,</i>	<i>Pannoniam.</i>

Habes hîc, dico, optima terrarum, latissima terrarum: & magnam tamen partem consultò omisi, quidquid *Insularum* mari ambitur. Ex quàm multæ, & magnæ quædam, in toto illo mari mediterraneo fuerunt, à Columnis Herculis, ad Pontum vsque? profectò, quæ vel quintam partem penè prouinciarũ terrestrium equent, si *Britannias* in exteriori mari (vt debes) adiungas. Pulchra autem ista facies, & non nisi à Prouidentiâ sic ordinata & ornata: quam mecum vide. Vtrimque ad hoc mare Prouinciæ se porrigunt & extendunt; ipsum in medio, tot partibus & insulis distinctum, quasi via &

limes est, per quem commerciis iungantur. Nec aliud mihi pulchrius commodiusque videtur in hoc imperio, quàm iste velut in medio corpore balthæus, bullis insularum interstinctus: qui & diuidit, & constringit. Dabis mihi aliud tale, & tantum? non dabis. AVD. Imò Lipsi, *Turcicum*, & Regis quoque nostri *Hispanicum* imperium, haud longè absunt. LIP S. De Turcico, fatendum est, in Asiâ & Africâ latè se extendisse: sed in validissimâ Europâ nostrâ quid habet, aut non habet? Certè vel sola Italia, Hispania, Gallia iunctæ, opibus viribusque pares sint, aut superent illum hostem. O si Deus daret! adeò nec prouinciæ illæ Orientales, propibus & frequentia priscâ, sunt; & nostræ istæ, florem nunc habent & vigorem. Quid de Germaniâ dicam? illa olim horrida & rerum inops, quàm artibus, opidis, copiisque exulta est, & abundat? AVD. Mirificè. & hæc tamen Imperio tuo etiam deest. LIP S. Non sic, vt opinare. Nam si terminos meos cogitas, videbis ad Danubium vsque *Ratias*, *Noricum*, *Carnos*, *Pannonos* inclusos: & parte alterâ ad Rhenum, *Heluetios*, *Rauracos*, *Argentoratenses*, *Nemetes*, *Vangionas*, *Treuiros*, *Vbios*, *Menapios*, *Batavos*, ad Oceanum vsque. Quæ pleraque omnia Germaniæ hodiernæ nomen, & linguam, & leges etiam, habent: at detracta, vides quàm eam arctent, & pulcherrimis membris spoliata relinquant. Certum autem, hæc postrema omnia, cis Rhenum, Galliæ fuisse accensa. Sed de *Hispanico* imperio quod aiebas; id sanè, spatia terrarum si consideras, præsertim in Nouo illo orbe, Romanum vel superat: sed iunctio & deuinctio prouinciarum, viri & copiæ, quàm deficiunt & delinquent? Nunc quidem. nam postea quid futurum

rum sit, nescio : florebunt, crescent fortasse. & sensum meum tibi dicam? Nescio quo Prouidentiaē decreto, res & vigor ab Oriente (cōsidera, si voles) in Occasum eunt.

CAPVT IIII.

De copiis & præsidiis sparsim circā limites, itēque in ipsā vrbe.

ISTI Fines igitur Romani: & quidem mari, amnibus, montibus clausis ac muniti, sed Milite & *Copiis* multo magis. Nam Romanus mos & institutio, duplici viā prouincias munire, *Copiis* & *Coloniis*: de quibus vtrisque breuiter dicendum. *Copias* intelligo, perpetuum militem, qui ad tutelam imperij, ex instituto Augusti, fuit. Triplices reperiō, *Prouinciales*, *Urbanas*, *Classicas*: illas maximas, alteras satis validas, & tertias vtilis atque opportunas. Omnia hæc ab Augusto; qui sapienter pleraque in nouo imperio aut instituit, aut restituit, vt res visæ postulare. Hoc autem inter noua: & in laudibus Augusti iam mortui Tacitus ponit, *Legiones, prouincias*, ^{1. Annal.} *classes, cuncta inter se connexa*. Narrat & Suetonius: *Ex militaribus copiis, legiones & auxilia prouinciatim distributa*. Sed benè Tacitus, *cuncta connexa*: nam ita ordo & dispositio fuit, vt limitanea loca militem haberent, interiora vix haberent: & essent, vt in magnā vrbe, circā mœnia dispositi & vallum. Cohærebant autem prouinciæ; ideoque & legiones, per cohortes suas & alas sparſæ, & inter se vicinæ. AVD. Sed non igitur Arces in locis interioribus saltem erant, si non legiones? LIPS. Apagē à Romano hoc more. nusquam in iis præsidium aut spes posita Martiali huic populo, sed in milite tan-

tum & armis. Et sanè de Arcibus variè disputari potest: sed non tempestiuè in hoc loco. pergamus. Miles igitur ad Limites, vbi minimo oneri subditis, maximovsui in hostes esset. Quantus? sub Augusto & Tiberio viginti quinque legiones fuerūt, ex Dione & Tacito: quin postea tamen auxerint, vix dubito, & sub Traiano atque Hadriano certum fuisse *triginta*, aut & suprà. Columella, in quâ legionum nomina, tum & alia quædam hoc euincunt: diximusque aliquid in *Analectis Militiæ Romanæ*, illîc, si lubet, videndum. Hæ legiones, Augusti & Tiberij æuo, sic dispositæ:

In Hispaniâ, legiones III. In Syria ad Euphratem, IIII.

In Galliâ ad Rhenum, VIII. In Mæsiâ ad Danubium, II.

In Africâ, II.

In Pannoniâ ad Danub. II.

In Ægypto, II.

In Dalmatiâ, II.

Sed mutabant interdum, quod Tacitus in IIII. Annalium notat, & ob causas huc atque illuc ibant, aut sedebant. Quædam autem legiones & in opidis erant, etsi pleræque in castris: sed in opidis dico, quæ valida aut magna, & ideò motui aut rebellionis opportuna. Talis *Alexandria* in Ægypto: de quâ Strabo. *Sunt tres in Ægypto legiones. quarum una in urbe collocata est, aliæ per regionem. Præter has, sunt & novem cohortes Romanorum, tres in urbe item, tres in Æthiopia sinibus ad Syenen, præsidium locis; tres in aliis partibus. Sunt & ala equitum tres.* Simile de Beryto Syriæ, idem Strabo: *Hæc eversa fuit à Tryphone, instaurata & suscitata à Romanis, duas legiones suscipiens, quas Agrippa ibi collocavit.* Causa fuit, sedes item urbis ad ipsum mare, & locorum eorum claustrum. Ita à tergo aliæ legiones Syriam defendebant aut premebant, hæc sita in fronte. In Hispaniâ,

vt idem Strabo, Bætica quæ populi erat, milite vacabat: reliqua Hispania habebat. Similia adnotare plura possum, & causas dare aut tangere: sed diffusionem non gaudeo, vbi res non poscit. Hoc magis è primis illis Strabonis obseruo, *socias etiam cohortes alasq̃* fuisse, præter ipsas Legiones: & vt illic vides, numero satis grandi. Enim uerò *nouem illæ cohortes* (sociales fuisse dico, etsi ipse *Romanas* appellat: sed hoc ideo, quia militabant sub Romanis signis) pænè Legiones tres æquarunt, nec minores eas *millenariis* fuisse opinamur. Tacitus id quoque dixit: *apud idonea prouinciarum, socias triremes, & alas, auxiliæque cohortium, nec multo secus in iis virium fuisse: sed persequi*, inquit, *incertum fuit, cum ex usu temporis, huc illuc mearent, gliscerent numero, & aliquando minuerentur*. Ecce disertim, *haud secus*, id est, non minus in iis virium fuisse, quàm in legionibus ipsis: imò plus interdum, idem ostendit. vbi legionis *Decimaquarta auxilia*, ^{111. hist.} *octo cohortes Batavorum* facit. Atq; alibi, in minoribus prouinciis, solæ cohortes aut alæ fuerunt, vt in Rætiâ, Iudæâ, talibus, & quæ Procuratoribus coërcebantur. Interdum & in opidis interioribus, ad coërcendum: vt Lugduni in Galliâ, Tacitus *cohortem* xviii^{am} locat; idem Foroiulij *Ligurum cohortem, vetus loci auxilium*. Et tale alibi. Huc equidem Iosephi verba referam, alioqui paraloga, non solùm paradoxa: apud quem Agrippa ad Iudæos loquens adserit, Galliam illam tam validam, tam latam, *mille ducentis militibus in officio contineri*. Profectò octo legiones totæ fuerunt; sed quia istæ in extremâ Galliâ, ipse copias modò numerat, quæ introrsus in eâ. Hæc ita sub Augusto: vt ramen tetigi, creuerunt. & primùm Claudius Imp. Britannia domitâ, legiones in eâ

in eâ tres locauit, manseruntque. Tum Vespasianus *duas* etiâ in Cappadociâ : & Traianus deinde in Daciâ *duas*. Istæ *Prouinciales* copiæ : *Urbana* fuerunt, quæ sedem Romæ & in ipsâ dominâ vrbe habuerunt. Quo fine? duplici, vt Principem in eâ tuerentur, & vt ipsam vr-
bem. Principis custodiæ triplex miles fuit, *Prætoriani*, *Euocati*, *Batani*. Primi in *nouem* cohortes diuisi ab Augusto, flos militum, fide, robore, & gente. Exemplum instituti huius fuit, à Prætoriiis cohortibus in exercitu, quæ circà ipsum Imperatorem, & ad eius tutelam erant. Augustus in bellis ciuilibus plures habuit, & victor quoque retinuit in pace, contrà motus subitos, & ad plebem Romamq; coërcendam. Nam fuere *nouem millia* militum, non robore solùm, vt dixi, sed stirpe & domo eximij : nec capti nisi ex *Etruriâ*, *Vmbriâ*, *Latio*,

Lib. I.III.
Annal.

& *Coloniis antiquis*, quod Tacitus ita etiam notauit. Gloriabantur igitur hoc sanguine : & ideò Otho iis

Tac. I. Hist.

blandiens, & in cōcione alloquens, *Italia*, inquit, *alumni*, & *Romana* verè *iuuentus*. Nam legionibus aliis, exterii iam & ciuitate donati, crebri miscebantur. *Nouem*

Lib. LV.

dixi fuisse : idque apertè Tacitus : at Dio *decem* scribit. Nam ita in rebus Augusti : οἱ σωματοφύλακες μύριοι ὄντες, καὶ δεδ' αὖ τεταγμένοι. *Custodes corporis Augusti* (Prætoriani) *decem mille erant*, atque ij in *decem partes*, siue cohortes *diuisi*. Hæc dissonant : & fallitur Dio? an pro suo æuo dicit? Illud potest, hoc vix potest : quia eius æuo (vixit, sub Alexandro Seuero, & prioribus) iam plures denis illis erant. Exemplum à Vitellio, qui primus, opinor, auxit. Tacitus de eo, Romam ingressio : *Confusus prauitate, vel ambitu, ordo militia. Sedecim Prætoria, quatuor Urbana cohortes scribebantur, quibus* SINGVLA MIL-

II. Hist.

LIA *inessent*. Sed an ille tamen primus? an non Claudius Imp. antea fecerat? Lapis vetus (quid contra eum dixerim?) affirmat: C. GAVIO. L. E. STEL. SILVA-VANO TRIB. COH. II. VTGILVM. TRIB. COH. XIII. VRB. TRIB. COH. XII. PRAETOR. DONIS. DONATO. A. DIVO. CLAVDIO. BELLO. BRITANNICO. En, ille verò sub Claudio vixit, & *donis ab eo donatus* in Britannia: & tamen *Tribunus* scribitur *Duodecima Prætoria cohortis*. Sculptor errat? sed idem est in *Urbanis*, vbi *Decimatertia* nominatur. Quid? an hic Gaius potius, iuuenis Britannico bello interfuit, & tum senior sub Vitellio militauit? Omnino dixerim: nec tempora refragantur, potuitque vel sub illo, aut statim ab illo, Tribunatus hos gessisse. Nam eam auctionem opinor mansisse: argumento eorundem lapidum, in quibus crebrò, grandiore numero, sic legas. Istis *Castra Prætoria* fuere, ad Portam Vinianalem: vt arctius, & in disciplinâ haberentur, secreti à ciuibus & vrbe. Sed *Euocatos* iam addo: de quibus Tacitus, atque alij, silent (quod equidem obseruauerim) at non Dio Cassius, qui adiungit apertè. *Euocatis*, inquit, *Angu-* Lib. LV.
stus uti iam cæperat in *Antonium* olim, eosque & postea seruauit. *Sunt autem hodièq; propria quadam & separata manus, & vites ferunt, instar Centurionum*. Hoc ille, vbi ex professo de custodiâ Principis scribit. Facere huc videtur, quod Suetonius in Galbâ notat, *dilexisse eum, equestris ordinis iuvenes, qui manente aureorû anulorû usu, EVOCATI appellarentur, excubiâsq; circa cubiculum suum, vice militum, agerent*. Instituisse hoc eum planè dixeris, exemplo custodiæ Principalis, quæ Principem nunc agebat: etsi non veteranos quosdam milites, sed Equi-

tes elegit. An non ibidem & munus istorū Euocatorum expressum? nempe vt *circà cubiculum Principis excubias agerent?* ego omnino opinor: etsi valdè miror, nusquam (nec occasio defuit in vrbanis illis motibus, aut Principum cædibus) nusquam, inquam, à Tacito vel Suetonio, vel ipso Dione alibi, nominatos. Tamen quod in lapidibus crebrò legitur, *E V O K A T V S A V G V S T I*, me iudice haud aliò est referendum. Tertij sunt *Bataui*, equites peditesque. Dio Cassius: *Sunt & exteri Equites selecti, quibus Batavorum nomen est, itque equitandi peritissimi.* A V D. Da veniam, interpello te: Bataui equites? hoc est simile, ac si dicam Venetos equites esse. Et Bataui sanè nostri, aliis illis equis veliuolis & ligneis, per Neptuni æquor optimè discurrunt: hosterrestres, parcè aut parum dextrè tractant. LIPS. Vètera loquimur: gens ea tunc Martem potiùs, quàm Mercurium colebat. Et quæ gloria * vicinis illorum in equite, nostrà etiam memoriâ, fuit: ea ipsis olim. Credo autem intellegi tunc quoque superiores illos Batauos maximè, qui Geldriæ nunc accensentur: nam inferi & ad mare, nec ipsi, nec regio eorum equis satis facti, aut apti. Sed Bataui igitur boni Equites: fuère & Pedites, etsi Dio filet. Tacitus aliique dicent, qui tamen hos modò Batauos, modò Germanos appellant: sed dixeris Dionis æuo Pedites non fuisse. Caussa, quia Galba *Germanorum cohortem, institutam iam olim à Cæsaribus, ad custodiam corporis, & multis experimentis fidißimam, dissoluit, ac sine ullis commodis remisit in patriam:* quod Suetonius in eo scribit. Dicit *Cohortem*: ergo pedites fuère: & addit ab ipso solutam militiâ ac dimissam, nec postea fortasse restitutam. Non reperio quidem vltra nominari: & in

Noti-

* Mena-
pius &
Geldris.

Notitiâ imperij, dumtaxat *Bataui equites, Seniores Juniorēſque*. Vtraque autem hæc manus quanta fuerit, & Dio ignorare ſe fatetur: *Batauorum*, inquit, *numerum*, ſicut nec *Euocatorum*, ſatis certò poſſim dicere: quid ergo nos conemur? Puto tamen Batauos haud minùs duabus alis plenioribus fuiſſe, & vt minimùm *mille Equites*: Pedites etiam olim ad *mille*. Euocati, ij quoque cohors vna millenaria ſunto. Alter nunc miles in vrbe, duplex eſt: *Vrbana, & Vigulum cohortes*. De prioribus Tacitus: *Quamquam inſideret urbem proprius miles, tres urbana cohortes*: & mox oſtendit eam quoque lectam, & non niſi Italam manum fuiſſe. Sed tres ipſe dicit, Dio in Auguſti diſpoſitione, *quattuor*. οἱ τῆς πόλεως φεγγεγῖ, inquit, ἑξακίχίλιοι, καὶ τετραχῖ νεμεμηδῖοι: *Urbis cuſtodes ſex millia, & in quattuor partes diuiſi*. Miror & hîc diſſenſum, nec concilio. Si tamen numerus tantus, vides grandes iſtas Cohortes fuiſſe, atque etiam ſuprà Prætorianas. In Taciti antè verbis, de Vitellio, notare potuiſti, ab eo denique factas *quattuor urbanas cohortes*, ſed quæ non niſi *ſingula millia* haberent. Intricata hæc fateri oportet, & mihi pænè libido in Tacito ibi legendi, *quattuordecim urbana cohortes*. Cùm enim tam largiter Prætorij militem auxerit, cur non pariter & Urbis? Vnica iſta cohors adiecta, in paruo ſit: & facit validè, quòd lapides ab illo æuo, grandiorẽ hunc numerum ſuadent. In illo ſuperiùs recitato erat, TRIB. COH. XIII. VRB: & in alio ſub Antonino Imp: C. CESTIO. C. F. STEL. SABINO. TRIB. COH. XIII. VRB. DONAT. AB. IMP. ANTONINO. AVG. HASTA. P V R A. Pluribus etiam lapidibus hi tales numeri in vtriſque cohortibus, ſed nomina Imperatorum aut æui

dispositos, cùm eius Iurisdictione ad centesimum lapidem porrigeretur. Quod autem Præfectus caput, in Tacito clarè scriptum, de Flauio Sabino, qui tunc in eo munere: *Esse illi PROPRIUM militem cohortium urbanarum:* III. Hist.
nec defuturas Vigilum cohortes. Quas nunc adiungo (Vigilum dico:) & moneo eas quoque ab Augusto esse. p. 4. 111
 Nam is cùm crebra incendia in magnâ illâ & frequenti vrbe videret; remedium quæsiuit firmum & perpetuum, militemque ex libertinis collegit, & in septem cohortes digessit. Id factum anno vrbis DCCLIX. Minus lecta hæc manus fuit, & ministerio potius quàm militiæ facta: tamen vt regi melius iuberique possent, digesti in Cohortes, & Centuriones Tribunosque suos accepere.

CAPVT V.

De Copiis in mari, aut fluminibus; de Classibus variis, earumque sedibus.

TERRESTRI milite satis limites, & vitalia imperij, id est Romam ipsam, muniuimus: nunc & maritimo, siue fluuiatili etiam, muniamus. Nam cùm mare medium per totum illud imperium iret, vt diximus; cùm etiam flumina magna clauderent vel ambirent; utile censuerunt, *Classes* perpetuas in vtrauis parte esse, quæ & piratas cohiberent, & hostes excluderent, & suis etiam transitum aut transuectionem, cùm opus esset, statim darent. Prudens & pulchra inuentio: fueruntque *Classes in ipso mari* quattuor; in *Fluminibus* tres, nisi fallor. Videbimus ordine, & quod occurreret, dicemus. Primæ duæ maiores se offerunt, & *Prætoriarum* dictæ, *Misenensis* & *Rauennas*. Quare *Prætoriarum*? (scæpe enim ita

in lapidibus:) opinor dignitatis causâ , & quia inter minores alias, vt Prætoria aliqua nauiſ, eminerent. Nam Præfectus ſanè earum non fuit Prætor. Hoc quoque ab Auguſto inſtitutum, notante Suetonio : *Clasſem Miſeni, & alteram Rauenna, ad tutelam ſuperi & inferi maris collocauit.* Et Tacitus de iſdem: *Italiam vtroque mari duaſ clasſes, Miſenum apud & Rauennam, præſidebant,* Sed diſtinctiſſimè Vegetius , qui numerum & plura aperit, his verbis: *Apud Miſenum & Rauennam, SINGVLÆ LEGIONES cum claſſibus ſtabant , ne longiùs à tutelâ urbis abſcederent, & cum ratio poſtulaſſet, ſine morâ, ſine circuitu, ad omnes mundi partes peruenirent. Nam Miſenatiũ claſſis, Galliam, Hiſpanias, Mauretaniã, Africã, Ægyptum, Sardiniam, atque Siciliã, habebat in proximo : claſſis autem Rauennatiũ, Epiron, Macedoniam, Achaïã, Propontidem, Pontum, Orientem, Eretam, Cyprum, petere directâ nauigatione conſueuerat. Ait ſingulas legiones in ſingulis fuiſſe: pro more ſui æui, aut parũ conſpectè, locutus. Non enim Legiones propriè erant, ſed dumtaxat Cohortes, ex quæ decem, & Tribunos ſuos ſiue Chiliarchos (à numero cui præerant) habebant, item quæ Centuriones. Enimuerò Tacitus non ſemel oſtendit, Claſſiarios militiam legionariam, vt honeſtiorẽ petiſſe: & aliquando impetraſſe: non ergo habebant. Quomodo autem? exteri plerique, & nec ciues erant. Tacitus de claſſe Rauennate: *Ambiguos militum animos, quòd magna pars Dalmatæ Pannoniæq; erant.* Et in Tabulâ, quæ Venetiis adſeruatur: HADRIANVS. IMP. IIS. QVI. MILITAUERANT. IN. CLASSE. PRÆTORIA. MISENENSI. SEX. ET. VIGINTI. STIPENDIIS. EMERITIS. DIMISSIS. HONESTA.*

MISSIONE. IPSIS. LIBERIS. POSTERISQUE. EORVM. CIVITATEM. DEDIT. Si dedit, non antè habebant. Clara & vera hæc sunt, ac naualis militia, vilis semper & vilium, apud Romanos. De Miseni igitur classe, liquet apud Misenum, pulcherrimo sinu, eam stetisse. Virgilius doctè indicauit, cùm Misenum illïc sepelit Æneas,

Imponit suâque arma viro, remûmque tubâmque.

Nam & *Remum* & *Tubam* dat, præsignificans locum hunc futurũ vbi & Remiges & Milites in classe essent: Milites, quos Tuba notat. Et si autem naues ibi & classis, tamen Castra etiam in terrâ & ad portũ ipsum fuisse, commoditas eorum exigit, & lapides qui sæpe effodiuntur, dicunt. Inter eos isti:

D. M. *Senio Severo Maniplario* D. M.
C. IVLIO. QVARTO. TI. PETRONI. CELERIS
VET. EX. PR. N. GALLO. NAT. ALEX. EX. III. ISIDE
D. M.

C. SENIO. SEVERO. MANIPLARIO
EX. III. FIDE. NATIONE. BESSVS.

Notæ breuiiores in iis, hoc volunt: *Veterano ex Prætoriâ naue Gallo.* item: *Natione Alexandrino, ex tertiâ fide.* iterumque: *Ex tertiâ Fide.* Gallus autem, *fis*, *Fides*, nomina nauium sunt, ab imagine aut tutelâ. In his item portibus, præter Castra, *Pharos* siue Turres quasdam ad prælucendum noctu fuisse, Plinius mihi suggerit: ille Plinius, qui ipse fuit classis Misenatium Præfectus.

Usus Phari, nocturno nauium cursui ignes ostendere, ad prænuncianda vada, portûsve introitum: sicuti compluribus iam locis flagent, vt Puteolis, & Rauenna. Pharos Puteolana, ad hanc Misenensem fuit. At verò altera, sicut

& ipsa Classis, *Rauenna*. Notum & nobile etiam opidum, ob sedem ibi postea regni Gothorum. Et ipsam, & Classem autem, Iornandes optimè notificat, ex Dione: *A meridie*, inquit, *Padus*, qui & *Eridanus*, ab *Augusto Imp.* altissimâ fossâ demissus: qui septimâ sui aluei parte mediam insuit ciuitatem: ad ostia sua amœnissimum PORTVM habens, qui CLASSEM ducentarum quinquaginta nauium, Dione referente, tutissimâ dudum, credebatur recipere statione. Qui nunc, ut *Fabius ait*, quod aliquando portus fuerat, spatiosissimos hortos ostendit, arboribus plenos, verùm de quibus pendeant non veld, sed poma. In fronte verborum vides, Augustum aptasse locum & portum, fossâ percussâ: in medio, Dionem auctorem, de nauibus CCL. quæ illuc caperent. Sed vbi hoc Dio? nusquam in libris qui nunc sunt, sed dixit (opinor) in *Vitellij rebus*, vbi multa mentio classis *Rauennatis*, ob transfugium eius & turbas, quas & in *Tacito* habes. In ultimo ostendit, esse desuisse & portum & classem. Atq; hæ duæ sunt *Maiores* illæ classes *maritimæ*: sequuntur duæ *Minores*. prior in *Galliâ*, coloniâ & portu *Foroiulensi*. Tacitus de eâ, eiusque auctore: *Gallia proximum Litus* ROSTRATÆ naues presidebant, quas *Actiacâ victoriâ captas Augustus in opidum FOROIVLIENSE* miserat, VALIDO cum remige. Habes Augustum auctorem, habes *Rostratas* & bellicas, itemque *Validum remigium*. Satis ergo & grandis, & instructa ea classis: cuius idē Tacitus in rebus belloq; *Othonis* cum *Vitellio* meminit. Est autem hoc *Forum Julij* in *Galliâ Narbonensi*, loco quem *Strabo* designat: *Nauale*, inquit, *Cæsaris Augusti*, quod *Forum Julium* vocant. Situm est inter *Olbiam* & *Antipolim*, abestque *Massiliâ* stadiis

stadiis circiter sexcentis. Notat *nauale* siue receptaculum classis esse: ideoque & à Plinio ipsa vrbs *Classica* dicta, itemque *Colonia Octauanorum*, quod octaua legio eò deducta. Altera minor in ipso *Ponto*: id est, in capite & fonte mediterrei maris. De eà Tacitus capiendus: *Mu-* 11. Hist.
cianus classem è Ponto Byzantium adigi iussit. Ergo statio ei suprà Byzantium fuit: sed vbi, ignoro. Numerum eius è Iosepho possum dare: *Pontica*, inquit, *omnes gentes* Lib. 17. Excid.
tribus millibus militum subduntur, & quadraginta naues
longe (rostratæ) illud asperum & in nauigabile pelagus tu-
tum pacatumque præstant. An non & tertia etiam Ostiæ? Suetonius suggerere videatur in Vespasiano: *Classiarios*
qui ab Ostiâ & Puteolis Romam per vices pedibus com-
meant. Nam Classiarios Ostiæ ponit: & fortasse Claudius instituit, portu eo instructo. Sed certum non habeo: & potuit esse ibi pars è classe Misenenfi. Potest & sensus esse, vt Puteolis Ostiam nauibus venerint, inde pedibus Romam ad res celeriter nunciandas. Transeo ad *Classes fluminum*: & prima est in Rheno. de quâ Panegyricus: *Cùm totus ARMATIS NAVIBVS Rhenus*
instructus sit. Ait *totum Rhenum*: ergo diuisam per partes censeo, vt & militem ipsum terrestrem. Florus ostendit, Bonnæ & Geldubæ (si proba modò lectio) fuisse, ex instituto Drusi: *Bonnam & Geldubam pontibus iunxit,*
CLASSIBVSQVE FIRMAVIT. Ergo ibi pars, pars & certò ad exitum fluuij, vbi *Pharus* olim, & nunc *Arcem Britannicam* vocant. Hanc opinor esse, quam *Classem Britannicam* Tacitus in bello cum Ciuili appellat. Sed tota classis communiter *Germanica* dicta: & sic in eodem Tacito leges, *Julium Burdonem, Germanica classis Præfectum.* Hæc partitio classium Taciti loca aperiet,

v. Histor.

aut conciliabit, quæ pugnaturire inter se videntur. *ut* cum scripsit, *Uniuersam quattuor & viginti nauium classem transfugisse (ad Ciuilem) aut captam esse.* An igitur *uniuersa* ea, non nisi tot nauium? Imo postea iterum facit Cerialem nauibus pugnasse, etsi numero impari, sed magnitudine earum potiore. Atqui struere tam citò non potuit: sed nempe ex aliâ parte, atque adeò grandiores triremium, quæ ad Oceanum & Pharum, sumpsit. De his nauibus Hegesippus ex Iosepho ita scribit: *Rhenus itaque iam non Germanorum copiis repletur, sed Romanorum liburnis, quæ pererrantes tot usque ad mare bicornis amnis fluentia, quondam liberæ gentes seruitio premunt.* Legendum autem illuc, *Copulis Germanorum*: estque nauium minorum genus, quod ipsi Germani sic à * vinciendo & ligando dicebant. Dicit earum loco *Liburnas* iam rostratasque Romanorum esse: credo, biremes. quas & *pererrasse* totum amnem identidem scribit: & an ideò *Lusorias* dictas? Vox crebra in Ammiano, Vegetio, aliisque. Altera classis Fluiatilis, in Danubio. de qua Tacitus: *Vannius funditur praelio, & ad classem in Danubio operientem perfugit.* Nominantur & Vegetio *Lusoria*, quæ in Danubio COTTIDIANIS utuntur EXCVBIIS. In Codice Theodosiano titulus, *De Lusoriis Danubij.* In Nouellâ quadam: *castrorum quinetiam ipsis, luxuriarumque curam mandamus: legendum, Lusoriarumque.* Credo & tertiam fluiatilem in *Euphrate* fuisse: quidni in magno flumine, & contra Parthos? Ammiani aliquot loca suadent, etsi non cogunt: nec alibi certò legi. Habes totam munitionem imperij, terrâ marique: an non validam, vtilem, opportunam? sed & adspectu aut cogitatu pulchram, cum

imagi-

* Koppe-
len.

xi. Annal.

imaginem proponis (*Aristide delineante*) *magna urbis, cuius fossæ, flumina essent; turres & propugnacula, militaria in finibus castra aut castella; ipsa mœnia, non è latere ullo aut lapide, sed ære ac ferro tot prætendentium legionum.*

A V D. Mehercules delector, & cogitatione peragro ac iungo, quæ locis situque diuisa. Sed ipsam summam totius præsidij cur non expressisti? L I P S. Facile est, & per te possis: quantum quidem certus partium dictarum est numerus. Vbi non, diuinetur. Aio igitur in prouinciis copias non minùs fuisse, *Legionum, Cohortium, Alarum, ducentis quinquaginta millibus*, aut circa: & sic, vt legiones nec plenissimas, sed I I I I. millium accipiamus. In Vrbe, ponere liceat in vniuersum ad xxvi. millia militum: & post Seuerum, vel ad *sexagena*. In classibus omnibus, haud minùs *centum millibus* militum remigumque. Ita fiant in vniuersum, supra *quadringenta millia* ordinariorum: etsi Agathias Historicus plures etiam, & largiter, fuisse adseueret. Nam de Iustiniani æuo loquens, *negat copias Romanorum tantas, quantas olim esse: nec iam sufficere tutela imperij, contra hostes. Cùm enim, inquit, ad SEXCENTA QUADRAGINTA QVINQVE MILLIA militum vniuersas eas colligere, oporteret; vix tunc in centum quinquaginta millibus consistebant.* Hæc ille scriptor, & credo vera atque explorata (cùm tam curiosè numeret) attulisse. A V D. Nempe legiones fortasse plures faciendæ sunt, & vel ad xliiii. ordinariæ sub Augusto ac deinceps locandæ. Hoc enim & Orosius & Appianus dicere videntur: & vir doctissimus ita adfirmat. L I P S. Errat ille vir doctissimus: nec aliter sub Augusto fuit, ac dixi. De Orosio & Appiano, hoc saltem dicunt, *Sexto Pompeio in Sicilia victo xliiii. legiones,*

iunctis omnibus copiis (& Lepidi nempe, & Sexti, & ipsius) *in uniuersum, Augustum habuisse*: sed hoc non addunt, & *seruasse*. Ille verò non seruauit, sed sparsit, & in *Colonias* misit, de quibus ordo & hæc admonitio suadent iam dici.

CAP. VI.

De Coloniis, & modus fructusq̃, deducendi.

PRÆMISI verò, Præsidia militum in longinquis limitaneisque locis fuisse, pauca aut nulla in provinciis mediis: imò multæ earum sine milite aut armis vllis. Quid ergo tuebatur interiora, & quieta præstabat? *Coloniarum* deductio, optimo & sapientissimo Romuli inuento. Nam ad illum consensu referunt. qui victis finitimis opidis aut gentibus, partem earum solitus in urbem & ad se traducere, partem illuc relinquere, sed sic ut Romanos suos misceret, custodiam & regimen, nequid mouerent. Eos ita missos, *Colonos* appellauerunt, & *ab agrorum nouæ dedicatione cultura* (ait Hyginus) *ipsas Colonias appellauerunt*. Ratio & modus erat, ut agri diuerentur viritim: idque à *Triumuiris*, quos graues & prudentes viros huic rei legere solebant. qui & sedes, agrosque, & ipsum opidum (si condendum esset) disponebant, & iura ac formam nouæ quasi reip. dabant. Sic tamen, ut omnia Romam & urbem matrem referrent. ipsis quoque locis, Fora, Capitelia, Tempia, Curia pro illâ imagine essent; & in gubernatione, *Duumuiri* plerisque locis, quasi duo Consules, *Ædiles* item, & *Decuriones* pro Senatu. Varia in hoc instituto utilitas, quam licet percurramus. Prima, quòd alleuabatur vrbs ipsa princeps, & superfluam nimiamque multitudinem, ut
fan-

sanguinem emittebat. Ita victus facilior, ita turba minor, & turbæ quoque, faciles oriri inter tam confertos. Sed & soboli magis vacabant libentiusque, sic vacui: non aliter quàm arbores aut plantaria magis se diffundunt & propagant, vbi in arcto non stipantur. Altera vtilitas, ipsos hostes aut subditos tangit. Vbi enim Coloniae sic collocatae, loca frequentabantur, colebantur, poliebantur etiam maximè, nouorum hospitem aduentu, & artium inuectu. Diuina Prouidentia hoc fine Græcos olim in Asiam, Europam hanc nostram, vsque in Hispaniam, per maritima loca misit & disposuit: vt rudes ferocesque humanitate & elegantia percolerent, atque ad mitiora studia & mores transferrent. Quod idem Romani mox fecere: & iis cultum hunc omnem, debet pulcherrimus Europæ tractus. Tertia vtilitas, quæ præcipuè in oculis Romulo & Romanis, Præsidium in subiectos. Sparsa hæc tot opida, locis opportunis, & in iis Romanus sanguis: quid nisi tot arces & propugnacula erant imperij Romani? Dicamus quidlibet: nihil tam validum, quàm talis aliqua deductio: & vbi ij qui agros in alieno accepere, semper obligantur aut tueri iura imperiumque donantium, aut pelli, si & ij pellantur. Atque hic primus, vt dixi, præcipuusque aspectus: accessere mox, valde auctâ re Romanâ, duo alteri. Prior, vt plebem inopem & grauem sic exhaurirent: ab illis, vt militibus emeritis præmia largirentur. Nam in tantâ vrbe, & crescente ciuium tenuiorum numero, per tot manumissiones: quæ ratio alendi aut subsistendi fuit, nisi vt emitterent? non aliter, quàm vbi aluearia plena, noua examina in alia & noua transfunduntur. Sic &, occulto Politico consilio, sentina & fex vrbis

educebatur : purior meliôrque pars asseruabatur. Iam verò in militibus pulchrum. & quis non libens in eam Militiam se impenderet, vbi & post eam tam magna & certa præmia essent? Agri & sedes dabantur, regimen illíc & honores, pecunia etiam (nam sic Augustus instituit) ad instrumenta, iumenta, & siquid opus, coëmendum. Ego verò dixerim, nec isto æuo Militiam satis bonam, fidam, facilemque futuram, nisi tali præmiorum ratione : nec difficile, cum magno bono publico, excogitare. Ista igitur deductio Coloniarum, & caussæ in quibus tamen tyranni aut violenti aliquot ciues fraudem & iniuriam miscuerunt. vt Corn. Sulla, qui non, vt olim, agros ex hoste captos distribuit, sed in ipsa Italiâ, quod sciebat milites appetere, sedes iis dedit. Quod fieri non potuit, nisi pacatis fidisque populis, per summam iniuriam & scelus, expulsis. Appianus auctor est *vigintitres* legiones ab eo sic deductas, quæ facerent (si probè commemini) *centum viginti millia*, cum iis qui adiuncti. Simile & Cæsar Iulius, in pace & Consulatu fecit, qui agrum Campanum & Stellatam *viginti millibus* ciuium, coloniâ Capuam deductâ, diuisit. Idem iam Dictator, *in transmarinas colonias octoginta millia ciuium distribuit*, Suetonio auctore: id est, in Carthaginem maximè & Corinthum. Quod noto, vt numerus videatur deductorum: qui sanè grandis fuit, siue è ciuibus togatis, siue è militibus veteranis. Augustum *centum viginti millia* deduxisse sub *quintum Consulatum* suum. (bellis Ciuilibus iam finitis) lapis Ancyranus ostendit: & postea multa millia adiunxit. Nam huius Principis plurimæ Coloniae, & in toto orbe terrarum fuerunt: quod ipsa agnomina earum ostendunt. Denique paullatim

tanta frequentia, vt negem regionem, imò vix region-
culam fuisse, in quâ Coloniae aut Colonia non esset.
Tot illis vinclis miramur orbem compeditum & ad-
strictum, in Romanâ ditione & imperio mansisse? Non
ego: sed nec Velleij iudicium valdè probo, *inter perni-
ciosissima Gracchi habentis, quòd extra Italiam colonias
posuerit.* Equidem planissimè contrà sentio: & ad hunc
coërcendi finem, aliter oportuit, aut nec imperium extrâ
Italiam proferre. Timorem quem timet, nequa Colonia
potentior matre suâ fiat, sic longinqua: nullus est, & cer-
tè locum in Romano aliquo imperio non habet. Sed
nec Hispano: & prudentissimè eos cenfeo. Nouum or-
bem coloniis impleffe. Quarta alia atque alia genera
tamen erant, & quædam *Romani*, aliæ *Latini*, quædam
& *Italici* iuris. Reperiò & *Patricias*, & *Equestres* agno-
minatas; haud dubiè, in quam digniores ciuium mili-
tùmve deducti. A V D. Sed de numero igitur, nihil certi
aut definiti habes? L I P S. In Italiâ solâ *centum quinquaginta*
fuisse reperiò; in Africâ, circiter *sexaginta*; in Hi-
spaniis, ad *triginta*; paullo minùs in Galliis. & idem iu-
dica de reliquo orbe. Difficile enim hæc adnumerare
firmiter: cùm & aliqua legentem fallant, & non omnia
hodie in libris legenda. Hoc Senecæ tibi suffecerit: *Po-*
pulus Romanus quot Colonias in OMNES provincias mi-
sit? VBI CVM QVE VICIT Romanus, HABITAT. A V D.
Quæro etiam, ecquid seriò probes hoc ius siue morem
colonicum? L I P S. Dixi, & probo: atque adeò magnis
Regibus adfuadeam imitari. A V D. Tūne? in tam apertâ
iniuriâ? nam certè aliena eripiebant, possidebant, po-
steris tradebant. L I P S. Quid tum? utilitas publica ma-
gna, vt in aliis, exiguum hoc iniquum diluit, vel absor-
bet.

Ad Helu;
Consolat.

bet. Etsi cur iniquum? qui iniuriam intulit, iustè malum & poenam habet. Coërcendi hoc modo sunt, & ne in posterum noxam noceant, refrænandi.

CLAPVT. VII. I.

Multitudo Romanorum, & ratio adsciscendi gentes, aut transferendi.

AV D. Sed mihi hîc admiratio & quæstio, Vnde Romanis ea copia, & sic assidua, vel Militum vel Colonorum? Nam cùm intueor & examino, examina habuisse hominum debuerunt, quæ vel conscriberent, aut transferrent. L I P S. Haud de nihilo petis, & satisfaciam scito. Romanos primùm pauculos fuisse, & cùm Romulus militiam & remp. ordinauit, vix ad *millia terrena* peditum (alij *bina millia* volunt) censa, & equitum *trecentos*. At idem ille, cùm è viuis abiit, peditum reliquit *XLVI. millia*, & equitum *mille*. Tantum viri ope, quæ creuerant in annis circiter, quibus Romulus regnauit, *triginta septem*. Res mira est. & quibus artibus aut industriâ ille hoc affecutus? Apertione asyli; quæ haud dubiè aliquid adiuuit, & è vicinis, etsi non optimos, elicuit. Lege de liberis latâ, quâ iussit quidquid natum esset tolli, modò ne mutilum aut monstrosum. Receptione in ciuitatem, quam non exteris solùm confluentibus, sed victis & hostibus dedit. Laudant cùm alij hoc institutum eius, tum Claudius Imp. apud Tacitum: *Quid aliud exitio Lacedæmoniis & Atheniensibus fuit, quanquam armis pollerent, nisi quòd victos pro alienigenis arcebant? At conditor noster Romulus tantum sapientiâ valuit, vt plerosque populos eodem die hostes, dein ciues*

ciues haberet. Atque id sanè diu retentum Romæ, vt è prouincialibus honestissimos, hoc beneficio ciuitatis obligarent; & simul se augerent, simul discrimen, & tacitum pænè * diffidium, inter illos conciliarent. Clau-

*Ob amu-
lationem
inter re-
cepas, &
non rece-
ptos.

Hæc est, in gremium victos qua sola recepit,

Humanumq; genus communi nomine fouit,

Matris, non domina, ritu: ciuesq; vocauit

Quos domuit, nexuq; pio longinqua reuinxit.

Ita, quod ex illo apparet, diffusum latè aut vndique iam hoc beneficium: & ciues Romani facti, quicumque in orbe Romano essent, ex constitutione Imp. Antonini. Excluduntur ergo soli serui & barbari. quo sensu Sido- Lib. i.
nius scripsit, & appellauit *Romam verticem mundi, patriam libertatis, in quâ unicâ totius mundi ciuitate soli* BARBARI & SERVI peregrinantur. Itemque passim alij *Communè patriam:* & ad eam his versibus Rutilius:

Fecisti patriam diuersis Gentibus vnâ,

Profuit iniustis te dominante capi.

Dumq; offers victis proprij consortia iuris,

VRBEM fecisti, quod prius ORBIS erat.

Hæc ita posteriori æuo, nec optimo scilicet, nec optimè: præstabat electio illa & secretio, ob varias causas. Sed tertia etiam ratio augendi ciues, ex instituto non Romuli, sed Seruij Tullij. Ille cùm videret plerosque tunc seruorum, aut bello captos, aut è prædâ emptos esse; atque eos ferè è liberis & ingenuis, & antè liberos: humanum bonumq; putauit in ciuitatem eos recipere, si qui à dominis manumissi essent. Nam & Romanis moribus ingeniisq; assuefacti iam erant; & sic fore prouidebat, vt semper, tanquam ex fonte domestico, proles scaturi-

ret ad belli aliosque vsus. Difficile id persuasum primò
ciuibus, & inquinari eo consortio videbantur: sed nem-
pe ostendit & origine bonos eos esse, & iamdiu ipsos
etiam hostes in hoc ius admissos: ita cur non idem do-
mesticis & fidis seruis indulgerent, caussam nullam ef-
fe. Maximè, cum in eorum manu totum hoc benefi-
cium, & videre posse, vt nec temerè manumittendo da-
rent; & illos adnifuros, vt omni sedulitate ac fide eme-
rerentur. Amplius, futuros eos nihilominus velut in cu-
rà & clientelâ Patronorum: & sic nobiliores ciues, in-
comitiis aut suffragiis, semper manum aliquam fauen-
tem & obnoxiam habituros. Ita illis persuasum, sed
Regi in oculis præcipuè, frequentia & multitudo ci-
uium, fundamentum omnis potentia & diuturni sta-
tus. Nec tamen ij æquiparati statim dignioribus, & ve-
teribus ciuibus: reiecti in quattuor urbanas tribus fuê-
re, & inuenta ratio, vt minimum in suffragiis, aut aliâ
publicâ re, pollerent. Quin & à militiâ legionariâ &
honestiore exclusi sunt: donec paullatim, nepotes ac
pronepotes eorum, verè iam Romanus sanguis, perue-
nirent. Liberti ipsi & Libertini (veteri quidem republi-
câ) arcebantur. Hoc institutum, incredibile est, quan-
tum ciuitatem auxerit: in quâ aliquot seruorum millia
pauculis annis manumissa. Neque negandum est, vtile
initio & præclarum fuisse: sed lapsu temporis, vt fit in
humanis rebus, hîc quoque lapsus: cum iam Syri, Cap-
padoces, Asiatici, Græci, Barbari in seruos recepti, &
multi ex iis facinorosi & perditî; qui pretio, blanditiis,
aut & foedis obsequiis libertatem meriti, quam collu-
uiem in ciuitatem inuexerunt? Imò per eos effectum, vt
egregia illa animi ac morum, Romana olim plebs, vilif-
sima

lima facta hominum sit, & vno verbo, cloaca ac senti-
 na vitiorum. Sed ista sæculis aliquot post Tullium. in-
 terea profuit largiter institutum, & effecit, vt cum pri-
 mo censu ac lustrò Ser. Tullij, LXXIII. ∞. censa essent,
 illo qui sub primis Consulibus fuit (nam Tarquinius
 Superbus intermiserat) CXXX. ∞. censerentur: idque
 eorum qui puberes, & in virili togâ essent. Largus tibi
 hic numerus videtur: nihil est. cum post aliquot ætates,
 id est, anno Urbis ccccxiii. censa sint ciuium cclx. ∞:
 & paullo ante bellum Marficum, anno Urbis dcxxxix.
 circiter *quadringenta* millia, paullo minus. At post id
 bellum, sociis iam in ciuitatem paulatim receptis, cre-
 uit valdè numerus, & ad *nongenta* millia censa * alibi
 nobis doctum. Quid iam sub Augusto: ipse de se in la-
 pide Ancyrano clarè hoc dicit, IN. CONSVLATV. SVO.
 SEXTO *Lustrum condidisse*, QVO. LVSTRO. CENSITA.
 SVNT. CIVIVM. ROMANORVM. CAPITA. QVA-
 DRAGIENS. CENTVM. MILLIA. ET. SEXAGINTA.
 TRIA. Immanis herclè numerus: & quis iam de copiis
 miretur coloniisque? At etiam creuit assiduè, & sub
 Claudio Imperatore, Tacitus ac fidi auctores accēsent,
sexagies nouies centena sexaginta quattuor millia. Vltrà
 quærere, superuacuum sit, cum iam passim in ciuitatem
 totæ vrbes regionesque receptæ. AVD. Neque hercules
 quæro, affatim habeo quod mirer. Sed illud lubet scire,
 an ex solis igitur illis ciuibus copię scriptæ? L I P S. Non
 è solis. olim & è Latino nomine, vt scis: ac postquàm
 ij ciuitate donati, Principum temporibus maximè, cœ-
 perunt & è prouinciis auxilia scribi. Augusti id inuen-
 tum, & caussam occultam etiam habuit, subditos sic
 exarmandi, & quasi obsidibus traditis in fide conti-

* In i. Elect.
 cap. XXVII.

111. hist.

nendi. Nam quotannis dilectus istos habebant, & optimum ac robustissimum quemque abducebant. Ita enerues provinciæ; & illi qui dilecti, in longinquas & diffitas oras consultò trahebantur. Non enim facile res novas audere aut mouere, inter ignotos & alienos. Ciuilis, qui Batauos ad rebellionem traxit, hoc quoque telo eos incitat: *Instare dilectum* (verba Taciti) *quò liberi à parentibus, fratres à fratribus, velut SUPREMVVM diuidantur.* Idem Galgacus, dux Britannorum, in eodem Tacito: *Liberos suos cuique ac propinquos natura carissimos esse voluit: hi per dilectus ALIBI seruituri, auferuntur.* Atque eiusmodi auxiliorum, è variis gentibus, magna copia. quod & *Notitia Imperij* indicat, & Taciti hæc verba: *Nil validum in exercitibus, nisi quod externum.* Iterumque: *Prouinciarym sanguine prouincias vinci.* A V D. Artem video, & simul auxilia bello scripta, simul materiem subductā rebellandi. Sed ista profectò translatio dura: & quo exemplo? L I P S. Haud facilè dixerim: nisi quòd similia iam olim noto. Romulus ipse populos vicinos in urbem suam transtulit, Tullus Hostilius Albanos. Sed hæc leuia, & alio quodam fine. quid si totas gentes translatas doceam, eâdem illâ non rebellandi, aut coërcendi, causâ? Fecit Augustus in Sugambis & Sueuis, quorum *quadringenta millia* (hoc verius censeo ex Eutropio, quàm quod in vulgatis Suetonij libris *quadraginta* editur) tot inquam illa millia *traiecit in Galliam, iuxtaque ripam Rheni, sedibus adsignatis, collocauit.* Ita & Galliam impleuit, & ex hoste socium auxiliaremque fecit. Sed iudicio & consilio in hac re opus, ne plures suscipiantur aut traducantur, quàm coërcere possis: peccatumque à secutis Imperatoribus (maximè post

post Constantinum) qui Barbaris receptis, imperium
 & urbem prodiderunt. Alioqui multum commodi aut
 tutelæ translatio hæc habere possit. quâ Philippum Ma-
 cedonem (callidum illum regnandi) vsum Iustinus pro-
 didit: scribitque eum, *ut pecora pastores, nunc in hiber-
 nos, nunc in æstiuos saltus traiciunt; ita populos & vrbes,
 ut illi vel replenda vel derelinquenda quæq; loca videban-
 tur, ad libidinem suam transtulisse.* Parabat & Alexander
 simile, firmando imperio, nisi mors interuenisset. Nam
 in Commentariis eius inuentum Diodorus tradit, sta-
 tuisse *ut ciuitatum aliarum in alias migrationes fierent;*
itemque hominum traiectiones ex Asia in Europam, ex
hac in illam: & causam addit, *ut gentes connubiis, com-
 merciis, & amicitia inter se iungeret:* quæ ipsa haud va-
 na planè est, aliam tamen & intimam non expressit.
 Antipater, qui in partem potentiæ successit, in idem hoc
 consilium: & Atheniensium urbis potens, ipsam eiús-
 que regimen ditioribus honestioribusque concessit;
 tenues, & quidquid inopiâ turbidum, eduxit, & ad
 xx. ∞. eorum in Thraciâ, agris datis, collocauit. Lego
 & Tigranem regem, cui bellum Pompeius fecit, *trecen-
 ta millia* è Ciliciâ & Cappadociâ in Armeniam & Me-
 sopotamiam traduxisse, ad ea loca frequentanda & me-
 liori genere implenda. Et vt vicina magis temporibus
 locisque tangam, Carolum Magnum satis scitum est,
 Saxones sæpe rebelles translatione domuisse, & in Bel-
 gicæ nostræ oris posuisse. Ludouicus etiam xi. Galliæ
 rex, Atrebatium fidei infensus, & quia à vitâ diuelli
 quàm à Burgundiaco imperio malebant, sparsit eos per
 Galliæ vrbes aliquot, & suos in locum introduxit.
 Quid in nouo illo orbe etiam video? Reges Perüiani

tractus, quos *Jngas* ipsi appellant, pro firmamento status habebant, populos victos statim, cum totâ sobole, transferre ad interiora loca, & in illa limitanea alios suos fidôsque supponere. Hoc genus *Mitimaes* patriâ linguâ vocabant. Habes de multitudine, & eius caussis. Ac quædam his inesse magnis Regibus imitanda ego scio: qui si exhauriunt semper (vt fit in militibus aut colonis emittendis) nec addunt: quid nisi fontem ipsum exhaurient & siccabunt? Serio, serio prouidendum est. Tu abi nunc, & cetera cras, si Deus volet, dabo. A V D. Haud libens, sed tamen pareo, & valetudini tuæ tenui parco. Vale, & firmare.

I. L I P S I
DE MAGNITVDINE
ROMANA.

LIBER II

CAPVT I.

*De Priscis populi Romani vectigalibus, Decumis,
Quintis, Scripturâ, Portoriis.*



I P S. Mature sanè ades. A V D. Si pro meo voto, maturius, & vel conuiua in prandio tibi fuisset. L I P S. Licuit. & delectarer sanè vel assiduo hoc sodalizio, si Romanæ aliquæ mihi O P E S. Ad quas sermo nos nunc duxit, & de iis videamus. Eas *Publicas* & *Privatas* considerabo: & in Publicis, *Vectigalia* siue *Tributa*, tum & *Triumphales*
manus-

manubias, denique & *Liberalitates* aut *Erogationes*. In-
 sistamus ordine, & primùm in *Vectigalibus*: quæ olim
 triplicia ferè, è *Decumis*, è *Pastione*, è *Portoriis*. Quod ad
 priores duas, ita de iis & origine earum Appianus: Ro- i. Ciuil.
mani nunc hos, nunc illos Italia populos superando ac sub-
ijciendo, partem agri iis auferabant, atque opida & colonos
condebant; aut si opida opportunè iam condita, hos induce-
bant. Agri igitur quod cultum erat, colonis ferè adsigna-
bant; quod incultum (ut multa per bellum) id aliis cupienti-
bus elocabant, parte decimâ fructuum sibi retentâ in agris
satiuis; in plantariis aut arboretis, quintâ; in pastionibus
autem, certum pretium definiebant in capita minoris peco-
ris maiorisque. Pulcher & distinctus in eam rem locus:
 & quanquam de Italiâ dicit, tamen & producere ad
 prouincias licet, quas multas ita habitas, ex aliis scripto-
 rum locis liquet. Etsi quædam arctiùs pressiusque ha-
 bitæ; & præter hæc, Tributa etiam quædam capitis pen-
 debant. Sed quod ad hæc tria, etiam in Asiâ ea sic & in
 Siciliâ fuisse, Cicero alibi ostendit, & in his vectigalium
 summam ponit. Notabiliter in laudatione Pompeij:
Publicani familias maximas, quas in Salinis habent, quas
in Agris, quas in Portibus. Nam quod ad Salinas, viri
docti iam diu emendarunt Siluas, ut ad Pastiones refe-
ratur: etsi Saltus ego malle, viciniore litterarû lapsu.
 In eadem oratione enim aliquoties hæc tria repetit, &
 iungit: etsi vectigal è Salinis quoque fuisse, sed non inter
 prima & magna, scimus. Et quod ad frumenti omnis
Decumas, idem Cicero in Verrinis satis dixerit, quid in
 eâ re fuerit: nec obscurum est vel ex moribus hodiernis.
 De fructuum *Quintâ* in Appiano, id obscurius, imò in-
 certius: quoniam idem Cicero in Verrem disertè nomi-
 nat,

nat, *Vini & Olei decumas*, ostenditque Sículos ita dedisse. Quomodo igitur *Quintas*? nam ego ex vite, oleâ, ficu, pomo, nuce, intellegi & redigi Appiani vectigal velim; nec aliunde video posse. Nisi tamen de siluâ cæduâ intellegit: quod in medio relinquo. Sed in priore sententiâ si perseverare lubet, dicendum est, mitius leniusque habitos Sículos, & peculiare id ibi fuisse. E *Pastionibus* genus alterum est, quod propriè & vulgò *Scripturam* appellabant. Exempla obuia, & iam aliis notata: caussam vocis Festus explicat: *Scripturarius ager*, inquit, *publicus appellatur, in quo ut pecora pascantur, certum as est. quia publicanus SCRIBENDO conficit rationem cum pastore.* Cicero igitur de hoc vectigali capiendus: *fi taneque ex Portu, neque ex Decumis, neque ex Scripturâ vectigal conseruari potest.* Tertium est *Portorium*: quod scilicet in euehendo aut inuehendo (ἐξαγωγικὸν καὶ εἰσαγωγικὸν) pendebant. Res nota est: an & illa, quòd *Portarium* etiam fuerit antiquis? In Glossis lego, cum discrimine: *Portorium*, τέλϑ ἐν λιμνῇ, id est, vectigal in portu: *Portarium*, τέλϑ πύλης, id est, vectigal in portâ. Et verò hoc quoque fuisse videtur, æuo præsertim inferiore, & sub Principatu: ut & in pontibus, & in viis, & portis adeò opidorum dederint, pro transgressu aut ingressu. Italia hodie, sed & Belgica, hæc non ignorat: & apud Senecam lego: *Nec indignabitur sapiens aliquid impendere, ut limen transeat, cogitans & in pontibus quibusdam pro transitu dari.* Herodianus quoque ostendit exactiones fuisse, ἐπὶ τε ὄχθους ποταμῶν, καὶ λιμένσι πόλεων, ἐν τε ὁδῶν πορείαις: in ripis fluminum, portibus opidorum, & viarum transgressibus: sed inter tyrannica habet, quia noua aut grandia, opinor, & à Pertinace salubriter sublata.

CAP. II.

De Tributis & Capitatione. tum inquisitum in Modum vectigalium, & quid videantur reddidisse.

HÆc illa vetera sunt, & *Vectigalia* propriè dicta: quibus dies, & sagacitas, addo & necessitas, aliquid semper addiderunt. A V D. Hæcne propriè *Vectigalia*? atqui plura in id nomen video includi. L I P S. Plura, sed hæc primò: aut ne mentiar, solum ipsum *Portorium* primò, quia id scilicet è *vecturâ*: vnde *Vectigal*. Græcis etiam hîc discrimen aliquod, quibus *Vectigal* propriè est τέλϷ, *Tributum* φόρος. Sed & in re ipsâ differunt, quòd illud res & fundos magis spectat & ligat; hoc capita ac mobiles opes. Sed quorsum ego ista? semel & seriò tibi dico, verba nunc non lustro, nec obfita aut tricola antiquitatum quæro; satis, in luce aliquâ tibi ponere Romanam œconomiam, circâ publicas has exactiones. Ergo Tributa, vt dixi, caput ferè tangebant: atque ita pessima conditio eorum, qui *Stipendiarij*, ipsi atque agri, vt Cicero alibi loquitur, essent. Tales Poeni, Hispani, & plures, qui per vim vltimam & bello pertinace victi. Appianus hoc ita expressit, vbi Scipio cum decem Legatis leges dant Carthagini victæ: *Hos*, inquit, In Lybie *premiis afficiunt, socios populos aut reges; Tis δ' ἄλλοις φόρον ὠρεσσαν Πρὶ τῇ γῆ καὶ Πρὶ τοῖς σώμασιν: alijs (hostibus scilicet) tributum definierunt in agros, & in corpora eorum.* Duo manifestò dicit, & Corpora siue *Capita* (vt Latini magis loquuntur) onusta, & terram ipsam. Tertullianus quoque ea iungit: *Agri tributo onusti, viliores; & hominum capita stipendio censa, ignobiliora. nam hæc sunt* NOTÆ CAPTIVITATIS. Adiungit eruditissimus scriptor,

F hoc

hoc non nisi in verè victos, & vi subditos, vsurpatum: olim quidem, sed Imperatores, & ipse Augustus produxerunt, & valdè hæc Tributa dilatarunt. Ac *Capitum*, vel *Capitationis* satis frequens mentio in posteriorum scriptorum, sed & Iuris libris: vbi non *Hominum* solùm *capita*, sed & *Animalium* leges: & quædam, quæ fateor in subnubilo mihi esse. At tu vniuersè hæc nunc noueris: videamus, quod nos quærimus, ecquid *Opes* ex his annuas liceat vestigiis odorari. Quæ vestigia tenuiter impressa fateor, tamen persequar & indagabo. Ac primum de antiquis, & liberæ reip. opibus, locum esse volunt in Plutarcho istum. De Pompeij triumpho è Syriâ & Asiâ agit: dicitque, *Pralatum titulum, qui litteris indicaret antea quidem Vectigalia reddidisse ad bis millies Hs. ex iis autem quæ ipse acquisisset, redire ad ter millies quadringenties*. Prior summa, nobis efficiat quinque miliones (iuuat his compendiis, vulgariter magis quàm eleganter vti) altera, octo miliones cum semisse. Viri docti iam, & inter hos verè primus Budæus, existimant scripto hoc indicasse Pompeium: quòd ante id tempus, vniuersi reditus è vectigalibus non pluris essent, ab ipso autem iidem aucti plus triente, & facti vt in extremo scriptum. Enimuerò libido, an ratio, mihi est dissentienti? sed dissentio, & nego Plutarchum vel Pompeium de *vniuersis* sensisse. Nullū tale in Græco Plutarcho verbum est: quod moneo, ne temerè interpretibus, qui addunt, hoc accredas. Quæ ergo nostrâ mente scripti illius mens? nempe pro re subiectâ, & cùm de transmarinis illis triumpharet Pompeius, nec nisi ibi tunc res gessisset; verba eòdem referenda, & de Asiâ saltem finitimisque capienda. Quomodo? aliter etiam, quàm

viri docti, in clausulâ. Duo enim dicit, & Asiam, quæ
 sola ibi ante Pompeium prouincia, aut præcipua, illam,
 inquam, è vectigalibus *bis millies* dedisse: at verò eas
 prouincias, quas ipse super eam quæsisset, solas reddere
ter millies & quadringenties. Puto me rem tangere, si quis
 iudicio inspicit: & do rationes. Primò, credetne quis-
 quam è tot, tamque ditibus populi Romani tunc pro-
 uinciis, non plus *quinque millionibus* redisse? Quod vna
 Hispania hodie, vna Gallia, vel duplum donet. Am-
 pliùs, *Decumas* vnius Siciliæ Cicero, *atque eas tenuiter*
æstimatas, fuisse dicit *nonagies* HS: quod nobis est, *ccxxv.*
millibus Philippicûm. *Decumas* dico frumenti: & *hor-*
dei non computat, & *leguminum*: quid iam *Vini*, *Olei*?
 quid *Portoria*, & *Pastiones*? Valdè tenui ore atque ani-
 mo est, qui non ausit concipere hæc vniuersa ex pro-
 portione, suprà *quadringenties*, siue vnum millionem.
 Atqui Sicilia, an Vicesima aut Quadragesima pars fuit
 Romani orbis? profectò non fuit. Ampliùs de ipsâ Asiâ
 nostrâ, Appianus scribit, Corn. Sullam, per bella Mi-
 thridatica, *imperasse illi quinque annorum vectigalia, sed*
statim danda. Quantum igitur imperauit? ecce in Plu-
 tarcho hoc expressum, *viginti millia talentum*: ij sunt
duodecim *milliones* nostri. Age iam, diuide in quinque
 partes, n'onne paullo minùs *millies* HS. annuo habemus?
 Atqui duplum oportuit, inquires. Ita, pro me & Plutar-
 cho: sed hoc ipso tamen firmiter illos refuto, qui ex toto
 orbe *bis millies* colligunt, cùm ego dimidium ex Asiâ
 iam solâ. Res clara est. Sed quomodo igitur plus Pom-
 peij æuo? nec id difficile dictu: siue quia ratio colligen-
 di iam melior firmiorque, siue quia bella resederant, &
 ipsa Asia cultior feraciorque. Produci hæc talia semper

v. Ciuil.

solere, præsertim in pace, nec hodie est nouum. Docebo hoc clariùs? ex ipso iterum Appiano. apud quē M. Antonius triumphauit, post pugnam Philippensem, in Asiam missus ad pecunias colligendas, in concione sic eos affatur: *Ne urbibus agrisque pellamini, pecunia danda est in usum militum: nec ea maxima, sed quā auditis libenter acquiescatis. Dediſtis hostibus nostris, Cassio & Bruto, in duobus annis tributa decem annorum: ea suffecerint & nobis, nisi quod danda sunt in uno anno. Quid hinc efficiamus? nectimus iterum Plutarchi verba, qui ducenta millia talentum ab Asiā tunc data scripsit. Atqui diuide in decem annos: quid trepidas? viginti millia annua surgunt, id est duodecim milliones. Et profectò, noli ambigere, præpotens & diues illa Asia dedit. In quā tamen obiter moneo, res sæpe mutatas: & primò, cum testamento Attali Romanis relicta, Vectigalia imposita, id est Decumas, Portoria, Scripturam, solenni more. Sed cū publicani iniurijs, pro more suo essent, & sine publico bono, sibi attererent ac tondèrent, C. Julius Caesar, & iniurias, & iniurios ipsos sustulit, ac permisit ipsis fructus colligere ab agricolis, ac Tributa induxit. Hæc ita ferè (et si ipsa verba, quia pluscula, omisi) in eadem oratione Antonius apud Appianum dixit. Quando autem à Iulio*

Lib. XLII.

id factum, & de re ipsā, apertiùs sic Dio Cassius: *Αὐτὸς Πομπεῖοι, cū Asiam obiter lustraret, τοὺς τελῶνας πικρότατοι σφοῖσι χρωδρόους ἀπαλλάξας, ἐς φόρου σωτέλειαι τὸ συμβαῖνον ἐν πᾶσι τελῶν κατενόησε*: Publicanos, qui acerbissimi in Asiaticos fuerant, remouit, & in Tributi collationem, id quod ex Vectigalibus redibat, mutauit. Pulchra nota: & re ipsā quidem melius leuiùsque erat Decumas & talia dare: quare? quia pro anni prouentibus dabant, plus aut

aut minus, vt ipsi accepissent, nec vltrà grauabantur: ac
 eò tamen rem redegerat Publicanorum iniquitas (quos
 nulli Præsides aut leges satis domabant) vt omnes præ-
 optarent magnum & certum aliquid dare in Tributo.
 Similis mens, vt addam, in Taciti loco: *Achaiam ac Ma-* 1. Annales
cedoniam onera deprecantes, leuari Proconsulari imperio,
tradique Cæsari placuit. Videntur enim Publicani tunc,
 pro veteri more, in populi prouinciis fuisse, & cū iis ra-
 pinæ; in Cæsaris nō fuisse. Et iam in Plutarchi loco satis
 tibi factum, aut dictum? A v d. In priore membro satis,
 in altero quid adfers? Firmamentum ab ipso Pompeio,
 qui eodem illo tempore in Senatu gloriatus, *Asiam se,*
quam ultimam Prouinciarum accepisset, mediam reddidisse.
 Ergo plurimum adiecit: & nominatim *Syriam* to-
 tam, illam diuitē, item *Phœnicen, Palestinam, Iudeam,*
Ciliciam, Pamphyliam, Phrygiæ partem, Bithyniam, Pon-
tum, Propontidem. Hæc tanta, mirabimur tanto plus
 quàm Asiam dedisse? Sed ex Portoriis etiam liquere in
 in parte potest magnitudo istorum Vectigalium. Cice-
 ro in Verrem scribit, *Socios* (id est Publicanos) *ex Verris*
exportationibus perdidisse sexaginta HS. idque ex Vicesima
portus tantum Syracusani, & in pauculis mensibus. Sunt
 valdè notanda. Si vnus ille portus, si in vno homine, &
 in solâ euectione, & in paucis mensibus, tantum adfer-
 re potuit: quid reliqui portus, in omni euectione, inue-
 ctione, & in totum annum? Sunt autem illa *sexaginta,*
 more nostro, circiter *mille quingenti* Philippæi. Et Cice-
 ro quidem non nisi *Vicesimam* disertè ibi in Portorio
 agnoscit: tamen *Octaua,* & qui eam accipiunt *Octava-*
ry, in Codice Iustinianæo memorantur. At in Quincti-
 liano & Symmacho, *Quadragesima.* Sed opinandum

est, pro locis, aut mercibus, sed & temporibus variasse: maximè tamen pro mercibus, & vt grauius vectigal peregrinæ soluerent, ad delicias magis aut pompas, quàm vsum inuectæ. C. Cæsar eius rei auctor, ex Suetonio: *Portoria peregrinarum mercium instituit.* Quæ haud dubiè ipsa Italia etiam pependit, etsi reliqua portoria, lege Metelli, in eâ sublata essent: quod Cicero malo publico factum notat, & recitat item Dio. Hæc sanè magna fuisse, quis potest ambigere, ex pretio & copiâ rerum? Nam gemmæ, lapides, vestes, ebur, mancipia, aromata, vnguenta, & plura eiusmodi exotica inferebantur: quibus si *Ostauam* imponis, quanti ea sint? Argumento

Lib. XII.

aliquo è Plinij hisce verbis: *Arabia felicius mare est. margaritas enim mittit: MINIMAQUE COMPUTATIONE millies HS. annis omnibus India, & Seres, Peninsulæque*

* Duomil
liones, &
semis.

illa, imperio nostro adimunt. Si * *millies HS. emptæ eæ* merces, pluris mox æstimatæ & venditæ, ergo & Portorium ex iis grande. A V D. Sed commemini alterius Pliniani loci, qui minuit, & à summâ illâ abit. Nam vbi de

Lib. VI.
Cap. XIII.

Indiâ sermo, *Indigna res, nullo anno imperiis nostris minus quingenties HS. exhaurient India, & merces remittente, quæ CENTVPLICATO vaneant.* Nam hîc *Quingenties* modò, id est dimidium habes LIPS. Sed nempe ex Indiâ solâ: at alter ille locus Arabiam & Seres item iungit, & ex iis quidni alterum dimidium? Sed nota quòd ait, *centuplicato vniisse*: quod rei nostræ facit. Cur enim tanti? cur mercatorum tam improbum lucrum esset? non fuit: sed duo sunt, quæ pretium sic accenderunt, Itinerum difficultas, & Portoria. Quod ad illa, Plinius eodem illo loco describit, & addit *quotannis nauigari, sagittariorum cohortibus impositis.* Ea res & tu-
tela,

tela, mercatoribus ad impendia accedebat. Iam Portoria iis grandia. quod Strabo impressè notat in rebus Ægypti: scribitque, *olim quidem pauculas naues ausas* Lib. xvii. *extrà Sinum Arabicum ire, at nunc maximas classes navigare in ipsam usque Indiam, & ad ultima Æthiopia: unde pretij maximi merces aduehant, & rursus aliò exportent.* Ita fieri, ut DUPLEX PORTORIVM pendant, Inuectionis & Euectionis: atque ipsum portorium estimatarum istarum mercium grande item esse. Hæc ita Strabo. & mirum igitur non sit, à duplici illo aspectu, Itineris & Portorij, pretia sic creuisse: maximè cùm & in Italiam aut aliò inuehenda, credam iterum soluisse.

CAP. III.

*Inquisitum item in Capitationis modum, & pensum
vniuersorum Tributorum.*

DE Vectigalibus priscis hoc nunc satis: ad Tributa venio, siqua ea possim extricare. Metuo, & hæreo statim in eo *Capitationis*, quod vel maximum certissimumque fuisse arbitror: sed in modo, tenebras & nubes suas habet, nunc à me non pellendas. Fuitne indifcretim vniforme in omnia capita? an potiùs ex censu? Nam si illud; iniustitia manifesta adhæret. ut si quis pauper, liberos & familiam multam habeat, contrà diues, & cælebs sit & orbus. In Appiano strictura aliqua lucis affulgere videbatur, sed fortasse fallax. nam ait, *Judaos sapius rebellasse, eoque tributum capitis grauius iis im-* In Syriac; *positum, quàm reliquarum facultatum.* Esse autem & Syriæ & Cilicibus annuam Centesimam, pro modo census vnicuique. Verba Græca sunt, si fortè examinare tecum velis:

lis: Καὶ διὰ τούτ' ἐστὶν Ἰουδαίῳ ἀπασιν ὁ φόρος τὰν σωματίων
 βαρύτερος τῆς ἄλλης περιστάσεως ἐστὶ καὶ σύρσις καὶ κίλιξις, ἐτή-
 σις ἐκὰς τὴν τὸ πμήματ' ἐκάσω. Ego ad verbum tibi pæ-
 nè reddidi: & efficiatur ex sermonis nexu, Iudæos *Cen-
 tesimam* dare, sicut & Syros ac Cilices, pro Capitis tri-
 buto. Quo sensu? inquires. vt magis capias: soluere qui-
 dem illos & pro Agris, & pro Opibus, sed æstimatione
 omnium factâ, etiam *Centesimam* pro ipso capite dare.
 Hoc tale est. vt, si decem millia aureorum in censu ha-
 beam, soluam ex iis annua centena. Hoc placeat ob æ-
 qualitatem, & quia pauperes aut tenues sic non pressi:
 sed alia sunt quæ refellunt, aut certè morantur. Quid
 enim tum seruis fiet? quid filiis familias grandioribus?
 Dico grandioribus. nam vt & hoc addam, Vlpianus
 notauit, *In Syriis à Quattuordecim annis masculos, à
 Duodecim feminas, usque ad Sexagesimum quintum tribu-
 to Capitis obligari.* Atqui Serui & Filij tales, peculium
 suum nullum habent. Sed de seruis responderi potest,
 Dominum dependisse in suo capite, dum eorum æsti-
 matio Censibus eius accedit. Et serui alioqui in iure, *ca-
 put non habere*, scribuntur. Quod ad filios, certum est
 parentes pro iis exsoluisse: sed quâ taxatione, an non &
 eâ aliquâ pro parentum censu, hoc ignoro. Vellem, &
 res facta esset. Sed soluisse, in Panegyrico ita scribitur:
Tunc certè parentes ADULTORVM non pœnitent filiorum,
quorum onera remissa sibi latantur. Vides filios parentes
 suos onerare, sed *adultos* iam & grandiores, ex Vlpiano
 suprâ. Imò alibi, non ante *Vigesimum* annum capite ob-
 ligatos, lego. Caussam autem opinor huius remissionis
 in ætate vel Puerili vel Senili: quòd etiam Romani olim
 Impuberes non censebant, & immunes à Tributo ha-
 bebant.

bebant. Addi potest, quòd hæc Capitatio, non aliud quàm quasi redemptio munerum & operarum seruilium fuit, quas populi scilicet victi, & serui facti, Romanis iam debebant. At pueri ad eas operas, aut senes, non idonei: ergo nec pro iis soluant. Hæc sunt, si pro Censu Tributum hoc datum. Sed aliquis mallet, vniforme aliquid, & in omnia capita æquale. Nam sic Iudæi leguntur *Didrachmum* pependisse: & Christus ipse in Matth. cap. xvi. 1. Euangelio soluit. Quod Hieronymus quidem & Beda istuc retulisse videntur: sed alij tamen veriùs (inter hos Hilarius) ad Tributum, quod templo Iudæi debebant, in eo modo à lege diuinâ definitum. Exodum vide. Et Cap. xxx. Iosephus sanè ac Zonaras, sed & Xiphilinus, diserte scribunt *Vespasianum demum hoc instituisse, ut omnes ubique Iudæi duas drachmas Ioui Capitolino Romæ penderent, quas ante à TEMPO Hierosolymitano solebant.* Nihil clarius: & Christi ipsa responsio, à Tributo Cæsariano nos abducit. Sed aliquis etiam opponat Lampridij hæc in Alexandro: *Vectigalia publica ita contraxit, ut qui decem aureos sub Eliogabalo præstiterant, tertiam partem aurei præstarent. tuncq; primum Semisses aureorum formati sunt, & Tremisses. dicente Alexandro, etiam Quartarios futuros, quòd minus non posset. quos etiam formatos in monetâ detinuit, expectans, ut si Vectigal contrahere potuisset, eos ederet.* Hæc euincere videntur, certum genus nummi cūsum ad Tributa: & nisi fallor, Capitis, quæ sola certitudinem & vnitatem poterant habere. Nam in agris, animalibus, aut opibus, id planè variabat. Faciat aliquid Hesychius, qui scribit: Κείσθ' & εἶδ' & νομισματός, Πίκεφάλαιον: *Census, genus numismatis, capitatio.* Sed & in Sacris legitur, *Numisma census.* Tamen ob

Matth. cap.
xxii.

multa hæreo, nec temerè in hanc partem eo. Quid: *decem* igitur *aurei* in Lampridio, Capitatio fuisset? & postea *Triens*? In ipso Euangelio, vbi *numisma census* quæritur: mox subiicitur, *Denarium obtulisse*. An ergo ille tantum æqualiter in capita? ridiculum, nisi si *Denarius aureus* fuit. Quid firmiter definiam nescio, res tenebras, vt dixi, habet, nec nostrâ nunc curâ illustrandas. Pluscula cogitavi aut collegi, fateor: sed intricatis, aut merè litterariis, non nunc locus. Dico igitur breuiter, Lampridij locum hoc tantum efficere, *Contracta omnia vectigalia: adeò vt qui* (pro exemplo) *decem ante à daret, nunc Semissem aut Tremissem*: & quia immunita illatio erat, in eius rei memoriam voluisse & nummos minores Alexandrum cudi. Sententia autem tota & vera, *cōtraxisse eum Tribut a pleraq, ad Trientem, conatum & ad Quadrantem: nec infrâ potuisse*. Quod si quis pertendit, nummos pro modo Tributi ita cufos: vbi igitur illi sunt? cur prægrandes aliqui non exstant? Denique statim infinitos cufos oportuit, ad pensiones totius orbis. Nihil est: & Hesychij aut Christi verba hoc modò volunt, ipsum illud quod ex censu in Tributum darent, *Censum* appellatum; atque adeò pecuniam, siue grandis ea siue pauca esset. Quin hoc totum pro priore sententiâ magis sit, quòd Capitatio fuerit ex censu. Plura sunt: sed differo, & nunc inquiri, quod cœperam, in Capitationis fructum. Multum rediisse ex eâ, multitudo capitum dicet, quæ in Romano orbe. Iosephus de solâ Ægypto scripsit, *habere eam septingentas & quinquaginta myriadas hominum*: idq, *liquere ex tributo quod in capita singuli pendunt*. Postrema hæc ita palàm Græcè habent: etsi interpretes leuiter aliò deflexit. Sed argumen-

tatur

tatur & colligit de Capitem numero, ex ipsâ Capitatione, & tabulis scilicet Censualibus, quas inspexit; aut ab iis qui inspexêre, haufit. Nam etsi non Pueri aut Senes conferrent, vt prædixi: tamen & eorum nomina scripta probabile est, contrâ fraudes, & pro ceterâ diligentia aut curiositate Romanorum. Si igitur talis ille Ægyptiorum numerus (& *Alexandria incolae* etiam excipit, qui ipsi ad centena aliquot millia:) facile intellectu est, in quantum creuerit capitarium hoc vectigal. Adde enim alias prouincias in partem: quarum omnium in populis numerum sub Augusto voluit Suidas exprimere, atque vtinam is locus rectè haberet! *Augustus*, In verbo, *Augustus*, inquit, omnes subditos viriim adnumerare voluit, vt sciret quanta multitudo esset. Καὶ διεσκεύοντο οἱ τὸν ῥωμαίων οἰκούντες ὑμυριάδες καὶ χίλιοι ἱ. δώδεες: & reperti sunt Romanam ditionem incolentes quadringentæ & decem myriades, mille & septemdecim viri. Falsi planè numeri, & perexigui: cùm sola Ægyptus vltrâ donet. Emendare tamen, non nisi eius est, qui diuinandi artem certò tenet. Vt Capitationem igitur omittam, de vniuersis Tributis aliquid, dum siluas & lustra excutio, videor indagasse: & ponam. Velleius, vbi de auctis finibus imperij, & prouinciis adiectis, ita ait: *Diuus Augustus, præter Hispanias aliasq; gentes: quarum titulis Forum eius prænitet, PAENE IDEM, factâ Ægypto stipendiariâ, quod pater eius Galliâ, in ærarium redditus contulit.* Verba ea tollo & appendo, *penè idem* soluisse Ægyptum, quod Galliam: ergo ista plus etiam dedit. Quid si inueniam Tributum igitur Ægyptiaci modum? propemodum in Strabone, qui sic tradit: *Ciceronem in oratione quapiam scriptum*, Lib. xvii. *reliquisse, tributa ex Ægypto rediisse Ptolomeo illi qui*

*Cleopatra pater fuit, talenta annua duodecim millia & quingenta. Vbi hoc Cicero, nescio: hodie non exstat, & puto tamen fuisse in eâ pro Rabirio Postumo, quia argumentum eius tale aliquid vel admittit, vel petit. Sed parum hoc ad rem: illud maximè, quod Strabo adnectit, his verbis: Si igitur ille rex neglegenter & ignauè imperans, tantum redegit: quid NVNC censendum est, cum omnia tantâ diligentia & ordine administrantur, itèmq; Troglodyticâ & Indicâ negotiatione sic auctâ? Satis præit nobis & adferit, multo plus in Tributis Ægypti suo, id est Augusti vel Tiberij, æuo fuisse: quàm olim sub Ptolomæis. Atqui si tunc tot illa dicta talenta (ea faciunt septem milliones & semissem:) quidni ad decem aut duodecim milliones producamus in sequenti æuo? nec nimium censeo me dixisse. A V D. Censeo te dixisse Lipsi, censeo. Nam primùm Strabonis illud Diodorus refellit, qui lustrasse sub id tempus Ægyptum scribit, & accepisse ab iis qui res rationesque Regias tractabant, illum accipere supra sex millia talentum annua. Iam de Galliâ etiam habeo quod dicam: sed tu de isto priùs. L I P S. Semper mihi res cum Diodoris? amo scilicet hoc nomen, ob vnum illum virum. Sed tu scito breuiter, Diodorum si ab Ægyptiis hoc accepit, Ægyptiaca igitur talenta etiam intellexisse, quæ maiora Atticis, & habent minas siue libras octoginta: quod Plinius ex Varrone scripsit. Ita igitur si consideras, haud nimis ea sex millium summa à Duodecim abit, etsi tamen abit. Sed addit Diodorus, plus etiam accepisse: quod ipsum nos iuuet: & denique Ciceroni ac Straboni lubet meritò, præ Diodoro, credere atque adhærere. Enimuerò opes Ægypti magnæ, redditusque: & Iosephi verba tu hæc audi. *Tributorum, inquit, multo amplius**

Lib. xviii.

f. Excid.

amplius Romanis per singulos menses pendit, quàm vos, ô Judæi, toto anno: & præter pecuniam, annonam frumentumque quattuor mensium urbi Roma. Ita Agrippa rex in cōcione Iudæos alloquitur: & duo ex iis discas, grande aliquod Aegyptios intulisse; & Iudæos vix duodecimam eorum partem. Sed vt cœperam dicere, si tantum istud Aegyptus: quid iam Gallia, quæ plus, ex Velleio, & ratione (nam multo grandior laxiorque est) plus, inquam, longè dedit? An minus igitur, quàm xv. aut xx. *milliones?* A V D. Et hîc erat Lipsi, in quo volebam te non reprehensum fortasse, sed repressum. Quid clamas de Galliâ? os tibi claudit Suetonius, vel te restituente: *C. Cæsar Gallia cccc^o. hs. in annos singulos, Tributi nomine, imposuit.* Hoc tu ita ex libris veteribus: hoc & Eutropius idem dicit. Atqui *quadringenties* illud, quid nisi *unus millio* est? vt videas corruere tot illos à te superstructos. L I P S. Ego tamen firmiter satis struxi: nec machina hæc tua deiicit, aut quatit. Nam restitui ita, fateor, libros secutus: sed quid si in numeris aberrantes? non insolens est: & hîc, cum inquirō & penetro, planè est factum. Dic sodes tu aut alius, illa ampla, illa diues Gallia (sic enim semper habita & laudata) non nisi *millionem* annum in tributo dederit? O clementiam imperij Romani! ô illos benè meritos de vrbe, quam ceperant; de populo, quem ad extremū armis prouocant! Non sunt ista profectò: & audeo adfirmare Suetonium atque Eutropium scripsisse ∞ ∞ ∞ ∞. id est, *quater millies*. Ea summa *decem milliones* reddit: minus inquires, quàm Aegyptus: ita est, sed addo, & ratio comprobat, aucta hæc Tributa largiter, & vel in duplum, ab Augusto esse. Nam ille censum per Gallias instituit,

opus nouum & inadſuetum Gallis (vt Claudius in Oratione apud Senatum loquitur) & eâ ratione immenſum auxit. Quod fecit idem in aliis prouinciis, & in Syriâ etiam, vt ex Euangeliftâ notum: itemque in Hispaniâ, ſed temporibus diuerſis. At iam, mi Auditor, ſi ſolæ Aegyptus & Gallia ad xxx. aut circiter *milliones* pependerunt: quid totus orbis reliquus? An non Syria & Aſia tantum? Africa & Hispania? Græcia & Illyricum? Inſulæ omnes ſimul? & multa omitto: & concipere ſummas vereor, ſed ſuprà *centum quinquaginta milliones* fuiſſe, animo hoc ſentio, & ore etiam promo.

CAPVT IIII.

De Aerario militari, & Vigefimâ, Vigefimaquintâ, Centefimâ ad id explendum.

OPE ſimmenſas cùm conſidero! & maximè in diligentiâ eâ quam Strabo cōmemorat, cuius exemplum etiam iocoſum, lubet dare. Scribit idem alibi, *Gyarum ſe veniſſe* (non inſulam, ſed ſcopulum) à pauculis piſcatoribus habitatam. atque eos ipſo illo tempore quo adfuit, Legatum ad Caſarem miſiſſe, deprecatum gravitatem tributi. Nam impoſitos ſibi *centum quinquaginta denarios*, cùm agrè *centum poſſent pēdere*. Turides licet: ſed vides quàm nihil eos fugerit, & ſaxa & rupes etiam habuerint ſub tributo. Nec de magnis ſanè prouinciis hoc Senecæ acceperim: *Caium Caligulam centies HS. abſumpſiſſe*, vt prouinciarum tributum una cena fieret. Mediocrium dico aut tenuium prouinciarū: nam ampliores, quanto amplius? Et finem ego hīc putabam: ſed tamen alia etiam ſe obiiciunt & occurrunt, ſine fraude magnâ

magnâ *Ærarij* non omittenda. Nam Augustus ille, qui valdè rem Romanam auxit, etiam onera, & hîc quoque pro nomine suo fuit. Nam is *Ærarium militare* seorsim instituit, & ad id explendum redditus novos & certos. Suetonius ita: *Quidquid ubique militum esset, ad* Cap. XCII.
certam STIPENDIORVM PRÆMIORVM QVE formulam adstrinxit: definitis, pro gradu cuiusque, & temporibus militia, & commodis missionum; ne aut etate, aut inopiâ, sollicitari ad res novas possent. Vtq; perpetuò, ac sine difficultate, sumptus ad TVENDOS eos PROSEQVENDOS QVE suppeteret, Ærarium militare cum VECTIGALIBVS NOVIS instituit. Notandum est, duplici pecuniâ opus fuisse, ad *Stipendia* & ad *Premia*: quod seorsim Suetonius dixit, addiditq; ad *Tuendos*, in militiâ scilicet; & ad *Prosequendos*, nempe post militiam, & à missione. Quid autem? inquires, an tot igitur illa tributa non sufficiebant alendo & ornando militi? Suffecissent omnino, nisi & alia publica onera, eaq; immensa fuissent, in populo pascendo, in ludis dandis, in operibus, in magistratibus & officiis: & quæ distinctè aut accuratè dicere, non sit huius loci. Vtinam Appiani liber exstaret, qui hæc omnia fuit complexus! Ita enim ipse, initio operis, ubi id diuidit & disponit: *Vltimus liber*, inquit, *habebit COPIAM MILITAREM, quam & quantam Romani habeant; tum & PROVENTVS PECVNIAS QVE, quas per singulas gentes capiunt; item quid in CLASSES impendant, & siquid erit huiusmodi.* O pulchrum, ô desiderabilem illum librum! sed periit: scire tamen Appianus illa potuit, tum quia & ipse in Republicâ, tum quia moris rationes illas imperij in publico edi. Suetonius de Caligulâ: *Rationes imperij ab Augusto proponi solitas, sed à Tibe-*

à Tiberio intermissas, PVBLICAVIT. Rationarium, siue & Breuiarium imperij, hoc idem Suetonius alibi appellat: & Tacitus explicat describitque, cum *prolatum* à Tiberio *libellum* scribit, quo OPES PVBLICÆ continebantur. quantum ciuium sociorumque in armis, quot classes, regna, prouinciae; tributa aut vectigalia, & largitiones ac necessitates. O hunc quoque laudabilem morem! cum Princeps rationes quasi cum Republicâ ponit, & ostendit nihil sibi quæri propriè, aut infumi. Sed ab eo à mearé, admiratione talium: & semel dicenda fuerunt. Nos igitur iterum suspenso gradu quæramus quæ perierunt, aut in obliuionis aquis latent. Dixi *Ærarium militare* institutû nouiter ab Augusto, & ad id implendû quæsitos fontes. Tres repperit, *Vicesimâ*, *Vicesimam quintam*, *Centesimâ*. *Vicesima* fuit *hereditarium*: de quâ in hunc finem institutâ apertè ita Dio, in actis anni DC CLIX.

Lib. LV.

Postquàm multa pecuniaria rationes propositæ, & spretæ fuissent, ad Ærarium militare: placuit tandem seditque, ut Vicesima esset hereditarium & legatorum, quæ cuique obuenissent testamento: exceptis tamen aut sanguine valdè iunctis, aut admodum pauperibus, quos hoc onere liberarût. Duo venisse in hanc vicesimam vides, Hereditates & Legata: Deus bone, quanta & quàm crebra ea, vel in Româ tantùm? Quot illîc diuitiæ, & quoties, per capturas & aucupia, ad externos translatae? Soluebant igitur sæpè Vicesimam: & nemo ambigat fuisse incredibile Vectigal. Excipiuntur tamen hîc Proximi, vel Pauperes: & Nerua ac Traianus etiam, postea mitigarunt, quod in Plinij Panegyrico diffusè est videre. Fons alter, Vicesima quinta mancipiorum. de quâ Tacitus: Vectigal Quinta & vicesima venalium mancipiorum (à Nerone)
remis-

Lib. XLII.
Annal.

remissum: specie magis, quàm vi; quia cùm venditor pende-
 re cogeretur, in pretium emptoribus accrescebat. Id autem
 Aerario militari accessisse, Dio item scribit, anno post
 Vicesimam institutam. Cùm etiam pecuniâ, inquit, opus
 esset, & maximè ad Vigilum cohortes iam institutas, Au-
 gustus vectigal Quinquagesima, in venditione mancipio-
 rum, induxit. Dico Quinquagesima: & sic in Græco est,
 τὸ τέλϑ πεντηκοστῆς: an non tamen πεντακοστῆς rescriben-
 dum, leui mutatione, id est Vigesima quinta, pro verbis
 claris Taciti, est considerandum. Magis est, vt putem sic
 fuisse, & Romano scriptori accredam. Quanti hoc ve-
 ctigal fuerit, is agnoscet, qui crebra mancipia in Roma-
 no orbe, crebram mutationem, & maxima deinde eo-
 rum pretia cogitabit. De crebritate, alibi dicemus: de
 pretiis, quis nescit Daphnidem vœniisse (in Plinio) tre- Lib. VII.
 centis millibus & septingentis sestertiis? id est, septem mil-
 libus quingentis septemdecim Philippæis: grâde pretium
 in vno fluxo & mortali homine, & quem solus Gram-
 matici titulus commendabat. Caluissius etiam Sabinus
 (in Senecâ) plures anagnostas habuit, & singulos centum
 millibus emptos. Qui sunt duo millia quingenti Philippæi.
 Quot aurei igitur prodeunt è talibus singulis? quot ex
 millenis aliquot, qui, cottidie dixerim, vœniebant? Et
 Iurisconsulti quidem pretia seruorum definiunt: in
 communi aliquo viginti aureos; in artifice, medico, notario,
 eunucho, triginta, quinquaginta, sexaginta: & quanquam
 Romani aurei sunt (id est duplices nostri) tamen modi-
 ca illa æstimatio, nec in venditione locum habet, quæ
 nimis sæpe excessit. Alio fine à Iurisconsultis ea sunt
 scripta: & fortasse ad Portoria aliquis etiam trahet. Sed
 tertius fons, Centesima, quæ rerum vanalium fuit: de quâ

Tacitus, in Tiberij rebus. *Centessimam rerum vœnalianum deprecante populo, edixit Aerarium militare eo subsidio niti.* Si omnium autem vœnalianum, quæ & quàm infinita summa fuit? Si in auctione tantum; minor, sed & sic grandis. Suetonius quidem sic restringere videtur, qui in Caligulâ *Centessimam auctiorum* appellat, & remissam *Italiae* ab eo Principe notat. Finiui de Aerario militari: ad alia imus.

CAPVT V.

De Metallis, & argenti, auri, aliarumq; rerum fodinis.

AVD. An & aliud igitur restat? LIPS. Aliud, aliaq; potius, vt dixi. AVD. Hem, quousque accumulabimus? & vide ne patientiam omnem illis excutias tot onera ferendi. Patientiam? imò & mihi pænè fidem. LIPS. Confide, benè & firmiter imponam, & testimoniorum suis vinculis ligabo. In istâ re pecuniariâ, an ipsam eius materiem, id est *Metalla* omittam? nefas. magni ex iis reditus, & in variis locis: & reditus quidem innoxij, iusti, & sine onere subditorum. Terra, benigna illa mater, hæc quoque nobis donat. Cassiodorus pulchrè: *Metallarij sine furto diuitias rapiunt, optatis thesauris sine inuidiâ perfruuntur, & soli sunt hominum, qui absque ullâ nundinatione, pretia videantur acquirere.* Iterumque mox addit: *Aurum per bella quarere, nefas est; per maria, periculum; per falsitates, opprobrium; in suâ verò naturâ, iustitia.* Nescio tamen, ô bone Cassiodore, nescio de *Iustitiâ*: & an non Sæuitia aliqua admixta? certè, vt illi tunc quærebant. Nam multa millia hominum huc adigebant, quosdam mercede conductos, plerisque damnatos ad metalla: quos in subterraneo illo carcere,

cere, fames, labor, vapor, & ruina sæpe etiam necabat. Ipse Cassiodorus non dissimulat: *Intant homines caliginis profundas, viuunt sine superis, exsulant à sole: Et dum sub terris compendia querunt, nonnumquam lucis gaudia derelinquunt.* Ægyptiorum hoc inuentum fuit. quorum reges (ait Diodorus) omnes criminis damnatos, item Lib. 1. ex hostibus captos, siue quis regem offendisset, ipsum & totam cognationem interdum, auro effodiendo deputabant: simul & facinorum pœnam sumentes, simul & quantum vberem ex eorum labore capientes. Atque hi tali interdum numero, vt Polybius ad Carthaginem Nouam, fodinis in Hispaniâ, non minus XL. millia hominum scribat assidue in opere versari. Plinius etiam notat, *Censoriam legem fuisse fctimulorum aurifodina in agro Vercellensi, quâ cauebatur, ne plus quinque millia hominum in opere Publicani haberent.* Nec id credito miseratione aut curâ pereuntium factum: sed cautione, & dispensatione operis, vt ne in vnâ conductione Publicani totum aurum exhaurirent. Itaque lex in elocatione dicta fuit, de numero operarum. Strabonis locus est, qui abdicare à Rep. aut Principe Argenti omnes fodinas videtur, relinquere tantum Auri. Verba: *Εσι γ' καὶ νῦν τὰ δ'εργασίαι, ἃ μὲν τοῖς δημοσίοις, οὔτε γ' ἐν ταῖς πόλεσιν, οὔτε ἐν τοῖς ἄλλοις τόποις, ἀλλ' εἰς ἰδιωτικὰς μετὰ τὴν πόλιν ἐκτίσταις. τὰ δ' χρυσεία δημοσιόδεταί τὰ πλείω:* Lib. xxiij. cap. iiii. *Sunt autem & nunc Argentariae in Hispaniis, non tamen publicae, neque ILLIC neque in ALIIS LOCIS, sed ad priuatas redempturas sunt redactae. Aurariae autem pleraque publicè exercentur.* Ambigua mihi hîc sententia est, velîne venditas Argentarias priuatis, certâ pensione aut illatione, an dumtaxat elocatas, vt olim solet. At in Aurariis aliter, quas ob lucri magnitudinem ipsi

Principes exercent. Ex hac quoque metallariâ parte igitur, magnum vberemque factum quæstum, & nostra ætas doceat: maximè cum pulcherrimas fœcundissimasque Fodinas variè haberent. vt in *Hispaniis, Galiliis, Norico, Salaßis, Jlyrico, Pannoniâ, Thraciâ, Macedoniâ, Proconneso*: quarum singulatim testimonia dare possim, sed fidei meæ nunc hoc credes. Habuit & Italia, putatque Plinius, *aliam nullam fœcundio rem metallorum quoque tellurem esse*: sed interdicto Patrum cautum, vt ei, velut parenti, parceretur. Præter hæc, fuerunt & *Cretaria, & Picaria, & Salinaria, Æraria, Ferraria*: & nullum genus quæstus è terrâ omissum.

CAP. VI.

De Urinario vectigali & Chrysargyro, item de Meretricio.

IAM & alia video. A V D. Bonâ veniâ Lipsi, etsi auidè audio, tamen tædere incipit tot illationum. Quid faciemus his opibus, & quin potiùs erogamus? LIP S. Alia, alia: & ab Augusto & priscis ad nouiores, atque adeò auidiores, veniamus. Exordium à Vespasiano (nam Caligulam consultò omitto, qui multa & insana instituit, sed mortua cum ipso) à Vespasiano, dico: qui, vt communiter de illo Suetonius, A V X I T tributa provinciis, nonnullis & D V P L I C A V I T. In paucis verbis quanta accessio rerum, attritio subditorum? Et quidni ille solita augeret, vel duplicaret, qui instituit & excogitauit etiam pudenda? Nam *Vrina vectigal* commentus est, quod idem scriptor tradidit: & notus, cum filio pecuniam ad nares admouisset, in eâ recius iocus. Origo huic

huic Vestigali & causa, quòd in publico amphoræ aut dolia stabant ad Vrinam reddendam: quam Fullones, opinor, vertebant deinde in suum vsum. Tunc rides? A V D. Largiter. & vah Vespasiane, non alia tua sagacitas in excogitando? L I P S. Sed Principes etiam securi tenuerunt, siue auxerunt: & videtur hoc fuisse triste illud *Chrysargyrum*, historiis decantatum. Georgius Cedrenus quidem eò trahit apertè. *Chrysargyri pensio fuit, inquit, talis, ut quisque mendicus aut pauper, meretrix siue iam emerita, omnis seruus itemq; libertus, inferrent in ararium pro VRINA & STERCORE, iumentorum etiam & canum: siue in agris, siue in opidis habitarent. Et homines quidem vtriusvis sexus, Nomisma argenteum, equus, mulus, bos tantumdem; asinus & canis, folles sex. Cum Cedreno Constantinus Manasses facit: Chrysargyrum sustulit Anastasius Imperator. quod erat, ut omnes viri, femine, pueri, serui, liberi, nummum argenteum, nomine STERCORIS ET VRINÆ fisco darent. Idem muli, equi, boues. Proh sancta fides! quanta hæc pecunia fuisse debuit, ex omni genere pænè viuientium? & quæ vnquam Capitatio accessit? Miror, & simul indignor, hæc tam foeda & tristia à Constantino nostro Magno instituta: si tamen ille. Nam Zosimus asserit, & eum culpat: * Euagrius ex professo negat, & hunc ut hostem optimi Principis inuadit. Sanè videtur à Vespasiano exemplum, quicumque auxit & produxit. A V D. Phui, phui hæc talia! & odor mihi nares spurcat. L I P S. Quid tu auertisti? viri procures & reip. primi hoc munus colligendi ambibant, non aliter (Euagrij verba) quàm militarem aliquam Prefecturam, aut Civilem magistratum. O indignitas! sed Princeps dignitatem addebat, qui & in Sacrum*

* Vide lib.
111. Eccl.
Hist. cap.
XXIX.

ararium hanc pecuniam recipiebat. Idem ille Euagrius notat: nec miremur Iuuenalem iam olim scripsisse, de iis quos fortuna amaret:

Conducunt foricas. & cur non omnia? cū sint,

Quales ex humili magna ad fastigia rerum

Extollit, quoties voluit Fortuna iocari.

Atque isti pudendarum sordium lucrique exercitores aut conductores sunt, quos *Foricarios* Iurisperiti appellant. *AVD.* Mihi ridere hūc lubet res humanas. *LIPS.* Quid ita? *AVD.* Nam qui pulchriores ludi sunt, quā vel institui tributum in hæc talia? vel collectores eis honestissimos admouere? An istud non est illudere & insultare, non dicam dignitati, sed libertati? *LIPS.* Tibi sic videtur, & nobis hodie: & tamen, vt nunc quoque mores aut cupidines, aliquis seueriorum fortasse fuisset inter illos *Foricæ* cādidos. Sed aliquid occurrit. quid? turpe & pudendum item, & dignum suo auctore. *Caligula ex capturis Prostitutarum vectigal instituit, quantum quaq; vno concubitu mereret.* Ita *Suetonius*: sed quod credo cum illo periisse: etsi postea quoque sub *Heliogabalo Lenonum vectigal, & meretricum, & exoletorum.* Ista foeda, & Romano nomine indigna: nec sustulit tamen optimus Imp. *Alexander Seuerus*, sed dumtaxat in *Sacrum ararium* vetuit inferri, & ad *inſtaurationem Theatri, Amphitheatri, Circi* deputari. Ex quo verè dixeris, magnum & hoc *Vectigal* fuisse, cū ad tantorum operum restitutionem conferret. Sed mittamus, & finiamus. Nam ad posteros Imperatores & *Græcanicos*, non lubet ire: multa & ij inuenerunt aut collegerunt, & quidam eorum diuitias mirandas.

Lamprid.

CAP. VII.

*De opibus Byzantini imperij : & clausula ac finis
Tributorum.*

AVD. Quî verò id potest, imperio iam tenui, diuî-
so, & sic minuto? LIPS. Potest: nec in rationes
aut vias omnes pecuniæ lubet inquirere, ipsam tibi da-
bo. Basilius Imp. (vixit sub annum Christianum octin-
gesimum) à Zonarâ scribitur, *impletse totum Aera-
rium, & ipsos aditus viasque, pecuniis confertim stipatis.*
*Habuit, inquit, in thesauris DVCENTA MILLIA talen-
tûm auri. Nam alterius pecuniæ NEC NUMERVS iniri
poterat, adeò vt terra eam infoderet, arariis aut reposito-
riis ubique repletis. Quin & ARCVLAS habuit lapillis
gemmisque pretiosis plenas, cum aliis, tum illis quæ cudent,
& quas Margâretas propriè appellamus. In quibus du-
centa illa millia talentûm auri, quid reddunt? ipsos mille
& ducentos milliones. Vbi nunc argentum illud infini-
tum & innumerum? ego non arbitror infrâ aurû fuisse.*
Vbi gemmæ & lapilli in arculis: itidem æquasse.
*O mira, ô reiicienda, nisi è dictis & dicendis fidem ca-
perent, & mutuò sibi attestarentur! Enimuerò hoc
grâde in Græcanicis, Iudæus etiam scriptor longè pòst,
affirmat: cuius Itinerarium, Beniamini nomine, Arias
Montanus edidit, vir plurifariam doctus, & nobis per-
amicus. Is ante annos circiter cccc Europam, atq; alia,
peragrait, & scribit se Constantinopolim quoque ve-
nisse. In eâ vrbe, inquit, vidi res atque OPES INENAR-
RABILES. Deferuntur enim in Principis palatium quot-
annis Tributa, quibus TVRRES implentur coccineâ purpu-
reaq; veste, & auro: ita vt NVLLVBI TERRARVM par
con-*

congesta pecunia exemplū reperiri possit. Affirmatur etiam ipsius SOLIVS VRBIS vectigal, ex Foris vanalium, & Portu ac mercatorum pensionibus collectum, ad VIGINTI MILLIA AVREORVM IN SINGVLOS DIES accedere. Quid tu facis? quò abis? AVD. Fugio. LIPS. Sane bellus comisque es: postquam benè te sermone saturavi & excepi, abis, nec vel salutas. AVD. Salus te amet Lipsi, sed magis Veritas. Ego vt hæc tam vana, tam monstrosa, stans patiensque audiam? Fugio. nam in os tibi resistere aut refellere, pudor me arcet. LIPS. Exsoluo te hoc vinculo, fac si potes. AVD. Nam satis attendisti Lipsi (vt *Turres auri, & Gemmarum arculas* omitam:) vnā urbem, in vnumquemque diem, dare *vicena millia*? LIPS. Attendi. AVD. *Aureorum* etiam? LIPS. Aureorum, & fortasse veterum, qui duplices fuere ad hos nostros. AVD. Proh Deus, vbi terrarum sum? & tu etiam auges? LIPS. Es hîc in meo solo. Sed age, gratiam augmenti fecero: sint menstrua *sexcenta millia* aureorum nostrorū, sint annui *septem milliones*, & pænè quadrans. Quid hoc te percutit? maiora diximus. AVD. Sed non in vnâ vrbe. Prouinciarum, & quidem grandium, hoc tributum sit: atque hodie, regnorum. LIPS. Non abnuo. sed nempe Byzantium, id est *Nova Roma* hoc dedit: & tunc quidem in suo flore. Sed ego sanè hoc non nimis miror: illud magis, quæ opes esse potuerint, in tam exiguis tunc finibus, ad pompam & apparatus illum Principalem. Lege Curopalatem, si vis, *De officiis aula Constantinopolitana*, & adiunge Græcos alios: videbis Persas, & Medos omnes, vinci ab his Byzantinis. Atego tamen assensum tibi non impero: auctores meos dedi: tu aut alius, huc aut aliò ite. AVD. Sed vnum etiam,

etiam, Lipsi, quærere liceat. Cùm sic vrges tanta eos dedisse: quî potuerunt miseri, & fuerunt oneri ferundo? Nam nos hodie non possumus. LIPS. Non possumus? dico ego nos facere. AVD. Nugaris, vt liberè loquar. nam vbi hodie Principum etiam magnorum istæ opes, aut ærarij vbertas? LIPS. Non est, fateor: & causæ aliæ etiam sunt, sed & illa quam, pro meâ nunc mente, dicam. Non vni Regi aut Principi, quisque in suâ prouinciâ, damus, vt olim: sed variè magis & diuisim, ita vt summa magna ad vnum non redeat, magna tamen contribuantur. Quomodo? in exemplo nostro vide. Conferimus hodie Principi quædam, post eum, Ordinibus, post hos, Magistratibus opidanis; post istos, Toparchis municipiorum aut pagorum. Denique Ecclesiæ etiam & Ecclesiastici, quàm multa à nobis habent? & iustissimè quidem, atque ex lege diuinâ, sed tamen habent. Hæc igitur omnia si conferas, & in aceruum iungas: affirmo tibi nos paria, aut plura dare. Quid, quòd concussionēs & raptus militares omitto? quæ maxima ratio est, & misera nostra Belgica satis sentit. Negabis in vnâ cænâ militarem, rusticum aliquem plus imputasse, quàm in annum tributum? Atque hæc non semel eueniunt, ô quando tollenda? quando securitas & pax erit, aut saltem disciplina militibus? quando œconomia & ordo in acceptis expensisque? Ista sint, fortiter & audacter dicam, tondeant accidantque nostri Principes, renascemur.

CAP. VIII.

Pecunia è Triumphis, & aliquot eorum inspecti, æstimatique.

AT satis in totâ re *Tributariâ* iam dixi: alia via se ostēdit & aperit (quoniâ de militibus tetigi) *Militaris*. Quæ ea est? lata, trita, & per quâ cumulatq; acerui pecuniarum inuecti. Pecuniarum? imò vasorum, coronarū, vestium, gemmarum, & quidquid dici appetendū, aut æstimandū potest. Ne teneam te, intellego *Opes* quæ è Prædâ & manubiis, per *Triumphos* inferebantur. Quot isti fuerunt? quàm multi, suprà modum & fidem, vberes diuitesque? Liuius distinctè plerosque eorum recenset, & describit: mihi quid opus est? satis sit, opinor, tangere, & specimen eorum aliquod, per ætates, dare. Fuère Triumphi à Romulo, vsque ad extrema Augusti, circiter *trecenti duodecim*: & ex his primi non nimis vberes, tamen modici, & magis magisque creuerūt. Vt ecce sub Regibus L. Tarquinij Superbi triumphum reperiō, qui victâ *Suessâ Pometiâ* & captâ, *tantum præda rettulit*, (notante Dionysio) *ut sacrata diis decimæ explerent quadringentorum talentorum numerum*. Ergo fuit in cumulo, *quater mille talentum*: id est, *vicies quater centena millia* Philippicorum. Post eiectos deinde Reges, insignis L. Papirij Cursoris, de Samnitibus, habetur ab ipso Liuiō: qui sic describit. *Triumphauit in magistratu, insigni, ut illorum temporum habitus erat, triumpho. Nobiles aliquot captiui, clari suis patrumque factis ducti. Aeris grauis magna vis transuecta, vicies centum millia, & quingenta triginta tria millia. Id æs redactum ex captiuis dicebatur. Argenti quod captum ex*

Lib. II.

VRBIBVS erat, pondo mille trecenta triginta. Omne as argentumq; in ararium reconditum, militibus nihil datum ex prædâ est. Verba pluscula dedi, vt videas vnde etiam ea præda manubiæque parari solent: & ferè è Captiuis, quos ingenti numero sub coronâ vænumdabant; aut è Spoliis opidorum publicis priuatisque. Summa autem illa Æris efficit. *viginti quinque millia trecentos triginta Philippæos: Argenti, tredecim mille trecentos.* Actales ferè, aut minores, omnes illi vsq; ad Tarentinum, triumphî: qui incidit in annum Urbis CCCCLXXIIX. De quo ita Florus: *Nec enim VLLVS PVLCHRIOR aut speciosior in urbem triumphus intrauit. cùm ANTE HVNC DIEM nil nisi pecora Volscorum, greges Sabinorum, carpenta Gallorum, fracta Samnitium arma vidisset. Tum, si pompas aspiceres, aurum, purpura, signa, tabulae, Tarentinaq; delitiæ.* Et valdè ipse quidem aut nimis (vt est ille scriptor affectuum aut excessuum) nimis, inquam, veteres illos abiicit: & hunc tamen non immeritò attollit. In eâ vrbe & parte Italiæ, gustauit Romanus Græcanicas delicias & diuitias, quas affatim postea hausit. Sed nota in iisdem Flori, *purpuram, signa, tabulas* illata: quod verum fuit, & deinceps etiam solenne. Atque adeò (digna obseruatu res) quidquid notabile aut optabile orbis, aut in eo vrbs aliqua haberet; per hanc viam portamque Triumphalem id Romam ferè inuectum: & quædam etiam extrâ bellum, vi aut persuasione magistratuum. Iam verò, postquam copiæ & arma extrâ Italiam missa, in grandes illas, & priscis opibus, aut victoriis quoque, inclytas regiones: quid auri, argenti, spoliiorum non relatum? P. Scipio ecce ex Hispaniâ (in Liuius) *ar-* Lib. i. cap. xviii.
genti præ se in ararium tulit XIII. millia pondo, trecenta,
I 2
qua-

Lib. xxi.

Lib. xxii.
cap. xi.

quadragenta duo: & signati argenti magnum numerum.
 Ea pondo faciunt, *centum quadraginta tria millia, quadringentos, viginti Philippæos.* Et si ille tamen Triumphus non fuit (nam sine magistratu eas res gesserat Scipio) sed pecunia Triumphalis. Idem iterum, victâ Carthagine (pariter in Liuiio) *intulit in ararium argenti pondo centum millia triginta tria.* Si ita accipis, vt sint *triginta tria millia* etiam, voce *δύο κοινός* repetitâ (vt equidem opinor) tum erunt nobis *terdecies centena triginta millia Philippûm.* At alter Scipio, victâ & dirutâ eâdem Carthagine, rettulit (vt Plinius adnotauit) non nisi *quater millies CCCC. LXX. M. pondo.* & addit: *Hoc argenti tota Carthago habuit, illa terrarum imperij amula, quod NVNC IN MENSARVM est apparatus.* Qui numeri tamen parum probi sunt: & si tot illa millia legas, quâ potest verum esse, mensæ alicuius priuatæ ministerium tanti fuisse? Quin exiguas opes Plinius indicare voluit, scripsitque meâ sententiâ: *quattuor millia, quadringenta, septuaginta pondo.* Ea efficiunt *quadragenta quattuor millia Philippicûm, & septingentos.* Quod inibi etiam sequitur, in pari mendâ est: *Posteâ victâ Numantiâ, idem Africanus in triumpho militibus XVII. millia pondo dedit. O viros illo Imperatore dignos, quibus hoc satis fuit!* Nam quomodo laudet vel parcimoniâ Scipionis, vel modestiam militum, si maior summa diuisa, quàm tota Carthago habuit? Et essent ea pondo, *centum septuaginta millia Philippæorum:* quæ redderent in *viginti millia militum* (vt ponamus tot fuisse) circiter *octo Philippicos cum dimidio viritum.* Nimis magna hæc largitio in illo æuo restricto sit: nec sanè pro Plinij mente. Sint *septem millia pondo:* & plus satis erit. Sed quid facio? per Triumphos
 omnes

omnes ibo? finis non fit: & Liuius distinctè ac descriptè in plerisque temporum horum fecit. Lustra si voles: iuuabit videre, & magis, si quis in summam & aceruum colligat triumphales omnes opes. Ego, vt institui, per ætates aut sæcula quosdam tangam. Vt hunc L. Aemilij de Macedonibus: *qui (vt Velleij verba dem) tantum priores excessit, vel magnitudine regis Persei, vel specie simulacrorum, vel modo pecunie, vt bis millies hs. arario contulerit, & omnium antea actorum comparationem amplitudine vicerit.* Simulacra ibi fuisse super ceteros vult: & quid mirum? cùm prisci illi Macedones, quidquid hoc elegantiarum esset, ex Græciâ totâ & Asiâ iam diu collegissent? Pecuniæ etiam modum producit ad *bis millies*: id est, *quinguagies centena millia* Philippum. A v. d. Magna summa est, & ex vno triumpho: sed quod fugere te non puto Lipsi (si fugit, suggero) Liuius eam atterit, & ad *millies* reducit. Ita enim legitur: *Summam omnem captiui auri argentiq; translatis* Lib. xlv.
hs. millies ducenties fuisse Valerius Antias tradit. Magis etiam Plinio minuitur, in quo ista: *Intulit & Æmilius* Lib. xxxiii.
cap. iiii.
Paullus, Perseo rege deuicto, prædæ pondo trium millium, à quo tempore populus Romanus tributum pendere desit. Lips. Hæc reiicimus, & Critico naso damnamus. Meritissimè. tu putas Valerium illum Antiatem, qui omnia augere solet, & suprà verum sæpe euehere (in Liuius non semel notatur) hinc ita parcum & oris modicum fuisse? Non arbitror, & minimum *bis millies ducenties* scripsisse: etsi ipse Liuius addat, *maiorē etiam summam, ex numero plaustrorum, ponderibusq; auri & argenti generatim ab ipso scriptis, effici.* Quod ad Plinium: is verò numerus rideri magis, quàm carpi meretur. Et itane

tria millia pondo auri (vt ponamus vel id solùm fuisse)
 nec ampliùs , Macedonia dederit? Hoc erat, cur popu-
 lus Romanus Tributo liberaretur? cur iste, super omnes
 priores triumphos, censeretur? Atqui *tria millia pondo au-
 ri*, faciunt *trecenta millia* sola Philippæorum. Quin tu,
 me arbitro, cum libris quibusdam priscis lege, è *Ma-
 cedonicâ prædâ sestertiûm ter millies*. Est veritas. nec mo-
 uet, quòd minus in Velleio sit: fortasse & ille augendus:
 in Suidâ quidem lego, *reperta in thesauris Regis Persei,
 in auro argentóque, sex millia talentûm*: id est, *tricieffexies
 centena millia* Philippûm: quid in reliquâ prædâ publicâ
 opidorum, aut priuatâ hominum fuit? At verò Corne-
 lius Sulla, etsi splendido triumpho, minus intulit: scri-
 ptumq. in Plinio, *transtulisse auri pondo xv. millia, argen-
 ti pondo centum quindecim millia*. Excessit omnes deinde
 Cn. Pompeius, in illo quẽ de rege Mithridate & oriente
 duxit. Velleius de eodem : *Magnificentissimum de tot
 regibus, per biduum, egit triumphum: longèque MAIOREM
 OMNI ante se illatâ pecuniâ, præterquam à Paulo, ex ma-
 nubis intulit*. Quid tamen istud, vicisse omnes, præter
 Paullum, in modo pecuniæ? Ille verò & Paullum vicit:
 si verè Plutarchus, *viginti millia talentûm in ararium in-
 tulisse*. Nam ea sint, *centies vicies centena millia* Philip-
 pûm. Et verè Plutarchus: & in Velleio emendandum,
præterquam Capitolio: vt mox dicam. Vicit ergo Paul-
 lum: non tamen iterùm sine nodo, quem ipse Plutar-
 chus ligat & nobis iniicit, dum in Catone minore scri-
 bit: *Gloriatum eum, quòd tantum argenti ex Cypro, cum
 nec vnum militem haberet, reip. contulisset, quantum nec
 Pompeius è tot bellis, & concusso orbe terrarum, rettulisset*.
 At enim Cato rettulit, non nisi *septem talentorum millia*,

Lib. xxxiii.

In Pom-
peio.

in eodem Plutarcho : quid ergo dicemus? Illud in Ca-
tonis illatione, minutum & corruptum esse, ad *viginti-*
septem millia aut circiter reformandū. De Pompeij qui-
dem grandibus manubiis quis dubitet, cū & in solos
milites largitum, donatiui triumphalis nomine, *xvi.*
millia talentū. Appianus scribat? Magna hæc omnia
sunt, & verè illo *Magno* digna : sed hunc hīc quoque
C. Cæsar, vti acie, vicit & superauit. Appianus ait *qua-*
ter eum triumphasse (nam quintum differt:) & *intulisse*
sexagintaquinque millia talentorum. Scis tu quid hoc ef-
ficiat? *trigintanouem* nobis *milliones*: plus triplo eius,
quod Pompeius intulisset. Tu me respicis, & vultu ar-
guis: quid est? A V D. Ex fide Latini scriptoris, hæc non
sic esse: tu Græco magis accedis? Nam Velleius de om-
nibus Cæsaris triumphis, id est quinto illo Hispaniensi
etiam addito: *Pecuniam ex manubiis latam, paullo am-*
plius sexies millies HS. disertè scribit: qui sunt dumtaxat
milliones quindecim. Et sanè, meo animo sufficiunt.

L I P S. Credo equidem tuo animo, & arcæ etiam tuæ,
si quis inferat: sed non sufficiunt, pro magnitudine tūc
vel Romanâ, vel Iulianâ. Imò tu rescribe meo animo,
deciessexies millies: conuenientissimè ad Appianum.
Nam ista sint *quadraginta milliones*: atque aliquid scili-
cet accesserit ex præda Hispaniensi. Ex paucis his vides,
immensas opes in Aerario cumulas à Triumphis: quos
paucos, nec decimam partem dedi. Ergone Plinij libris
fides aut puritas sit, dum scribitur C. Cæsar iste, initio
ciuilis belli, Aerarium compilasse, & *protulisse ex co la-*
terum aureorum. *xvi. millia*, & *in numerato pondo tre-*
centa? Profectò non sit: & perexigua ista, & quasi fur-
fures aut folia, pro totâ illâ massâ, & tam vetustâ, auri
argen-

argentiq̃ue. In veteribus legitur: *Laterum aureorum* xv. *argenteorum* xxxv. millia, & in numerato Hs. *quadringenties*. Sed nec ea summa pro tot triumphis: etiam si in laterculo quoque *decem pondo* imputes, quod Budæus fecit. Sed diuinare tamen omitto, cū fulcrum non est cui innitar. Lucanum, si vis, lege furtum hoc Iulianum valde exaggerantem.

CAP. IX.

De Auro Coronario, & Coronis dictum.

TRIVMPHALIA habes: mētiōr: largiter etiam restat. Quid illud? *Aurum Coronarium*, quod specie triumphorum vel oblatum, vel exactum. Origo fuit, vt focij & amici, victori Imperatori *Coronas aureas* offerrent, quasi gratulantes, & meritum ei caput cingentes. Itaque primò quidem *Corona* ipsæ datæ, aut missæ: postea inualuit, vt pro iis Pecunia offerretur. Hęc accepta à Sociis, aut Subditis: & sicut manubias ab hostibus legebant, sic spolia ista occulta ab amicis. Mos planè vetus, & à Græcis, nisi erro, ad Romanos imitatione translatus. Apud Athenæum quidem Chares, in rebus Alexandri magni, ait, post victum Darium, missas *CORONAS partim à Legatis gentium, aliisque, æstimatas decem millibus ac quingentis talentis*. Iam apud Romanos, crebrum. vt in Liuiο, cū Cn. Manlius Gallogrecos vicisset, eoq̃ue terrore Asiam liberasset; missæ undique legationes non gratulatum modò venerunt, sed *CORONAS etiam AVREAS, pro suis quaq̃ facultatibus, attulerunt*. Itaque idem Manlius in triumpho tulit (apud eundem Liuium) *coronas aureas ducentas duodecim, pondo: id est, vt singulæ fuerint librales*. In triumpho, inquam:

Lib. x. 1.

Lib. xxviii

Lib. xxxix.

quam: & ita obtinuerat, vt ex coronæ ante ipsum victorem latæ, populo ostenderentur. De eo Festus: *Triumphales coronæ sunt, quæ Imperatori victori aureæ PRÆFERVNTVR, quæ antiquis temporibus propter paupertatem laureæ fuerunt.* Iamantè etiam in Quinctij Flaminij triumpho Liuius: *Coronæ aureæ, DONA ciuitatum, translata centum quattuordecim.* Itemq. in Scipionis Asiatici, numerat aureas coronas ducentas trigintaquattuor. At verò Appianus in Cæsaris, *his mille octingentas viginti duas, easq. pondo viginti millium quadringentorum quattuordecim:* ita vt decem pondo plerasque necessum sit fuisse. Neque equidem pro magno aut vero habeo, quòd Plinius quasi inter raræ magnificentiae exempla scripsit: *Claudius cum de Britannia triumpharet, inter Coronas aureas, vnā VII. pondo habuit, quam contulisset Hispania citerior, alterā IX. quam Gallia comata, sicut titulus indicauit.* Minuta, minuta hæc sunt; nec vel Claudio, vel tam ditibus prouinciis, ad ostentandum, digna. Vt minimum, fuit DCC. pondo, iterumq. DCCCC. vel potius ∞. Etsi non ad vsum tales, sed pompam modò fuisse sciamus. Ideoq. & de his Tertullianus capiendus, libello de Coronâ: *Sunt & prouinciales aureæ, imaginum iam, non virorum, capita MAIORA quærentes.* Benè Prouinciales, quia ab iis datæ. Nec coronæ solùm ipsæ, sed aurum ac pecunia ad coronas: atque id propriè *Aurum coronarium*, de quo & titulus est in Codice Iustinianeo. Seruius ad hoc Virgilij: *Dona recognoscit populorum,* notat: *Aurum coronarium dicit, quod hodie à victis gentibus datur. Imponebant autem hoc Imperatores propter concessam vitam.* Non rectè omnino, nec ab ipsis iam victis ob vitam datum, sed à sociis amicisque, vt

dixi. datū tamen in pecuniā, titulo coronario. Vt apud Polybium (in Fragmentis) οἱ γεραῖοι ἐσεφάρωσαν τὸν δα-
 τίον τὸν βασιλέα πεντακοσίοις ἀργυρίου ταλάντοις : *Geraei*
coronarunt Antiochum regem quingentis argenti talentis.

Vt apud Liuium populus quidam Asiae, Manlio ingre-
 dienti fines vt cohiberet à populatione militem, in coronā au-
 reā xv. talenta offerūt. Et hoc pretextu rapinas extorsio-
 nesq. vsurpatas, quis nō colliget? Cicero Pisoni obiicit:

Mitto aurum coronarium, quod lex ē decerni ē accipi
vetat, nisi Imperatoribus ex prouinciā decedentibus, ad de-
corandum triumphum. Sed istas leges spernebant. & Dio

Cassius quosdā notat, cū res leuiculas gessissent, trium-
 phum sibi, vel à Cesare vel ab Antonio, impetrasse: καὶ

Lib. XLIX. ἦν τῇ ἐσφάσει ταύτῃ, inquit, χερσίον πολὺ πρὸς τῶν δῆμων
 ἐς τοὺς σεφάρους ἐστέργον. *Est istò hoc pretextu, multum au-*
ri à populis, quasi ad coronas, colligebant. Imò verò & ab
 ipsis Italis, qui tamen immunes talium videbantur esse.

Lib. XLII. Cæsar quidem ita fecit. de quo idem Dio, cū ex Asia,
 victo Pharnace, rediisset: ἔβι quoque (Romæ) magnā pe-
 cuniā coactā, quam partim titulo DONI, vt erant CORO-
 NÆ, statua, & talia, collegit; partim mutui nomine acce-
 pit. Decretis enim coronis statuisque, pecuniam ipsam
 dari sibi curabant. Ideò miretur fortasse aliquis, ipsum
 illum Græcum posteà scribere, de L. Antonio M. fra-

Lib. XLVIIJ. tre: quòd is, cū triumphasset Kalendis Ianuariis, in qui-
 busdam Mario se comparabat, aut ē praponebat. in eo
 maximè, quòd is Marius aut nullam, aut unicam omnino
 coronam accepisset; sibi verò cū alijs, tum populus tributim
 (quod ante ipsum nemini) coronas dedissent. Ait nemini
 id contigisse: atqui, nōne ipso narrante, iamante Cæ-
 sari? Sed obseruetur, tributim: in eo nouitas, & est hoc
 quod

quod Cicero irridet, *Patronum quinque & triginta tribuum fuisse*. Ideò igitur & *tributum* dederunt, nouo more. Sanè Italos dedisse, vel ex eo liqueat, quod Augustus de se in lapide Ancyrano dicit: MVNICIPIIS. ET. COLONIIS. ITALIAE. CONFERENTIBVS. AD. TRIUMPHOS. MEOS. QVINTVM. CONSVL. REMISI. ET POSTEA. QVOTIESCVMQVE. IMPERATOR sum appellatus, AVRI. CORONARIVM. NON. ACCEPI. Gloriatur verè. & consonat in illo ipso quinto consulatu Dio Cassius, qui notat, *eum tunc benè audisse vulgò, ὅτι ἀπὸ τῶν πόλεων, τῶν ἐν τῇ ἰταλίᾳ, τὸ χρυσίον τὸ τοῖς σεφάλοις προσήκον, ὃν ἐδέξαντο*: quod ab opidis *Italiae*, aurum, ad coronas conferri solitum, non accepisset. Cuius exemplo Hadrianus (in Spartiano) *aurum coronarium Italiae remisit, in prouinciis minuit*. Sed & Ammianus, inter testimonia liberalitatis Iuliani ponit, *tributorum indicta admodum leuia, & coronariū remissum*. Eò enim paullatim iam ventum erat, vt hoc *Coronarium* non minus tributis ferè attereret, nec in triumphis modò, sed in lætitiâ quacumque, & primordiis imperij, daretur. In Ammiano scriptum, *Tripolitanos misisse legatos, Victoriarum aurea simulacra Valentiniano, ob imperij primitias, oblaturos*. De ipsis coronis Synesius, qui se quoque Legatum à Cyrenensibus ad Arcadium missum ait, *σεφάλοισιν χρυσῶ μὲν τὴν κεφαλὴν, φιλοσοφίᾳ δὲ τὴν ψυχὴν*: coronaturum auro quidem caput Imperatoris, philosophiâ verò eius mentem. Apertissimè item Capitolinus in Antonino Pio: *Aurum coronarium, quod adoptionis suae causâ oblatum fuerat, Italicis totum, medium prouincialibus reddidit*. Atque ex hoc licet intelligere, quæ sit & quanti Oblatio: cùm inter Tributi genera

Orat. de
Regno.

recentent, *Canonem, Oblationem, Indictionem*: etsi, alio quoque titulo & specie, Oblationes. Sed de hoc nostro, Suidas: *σεφαικὸν τέλεσμα. ὡς ἄροδιος οὕτως ἐκαλεῖτο. ἐπειδὴ αὐτόνομοι ἦσαν οἱ ῥόδιοι, βραχὺ δὲ ἡμέρη ῥωμαίοις ἑπὶ ἡμῖν πέμποντες ἐτήσιον, ὥς οὐ φόρον ἡγεμόσι μάλλον, ἢ σέφαιον φίλοις διδόντες*: *Coronarium vectigal apud Rhodios ita dicitur, quoniam liberi sunt Rhodij, exiguum autem aliquid Romam quot annis mittunt, non ut tributum dominis, sed quasi coronam amicis dantes*. Notetur illud quotannis: nam & hoc ita factum, ac velut honorarium tributi genus exactum. Procopius de Theodato notat, rege Gothorum: *pactum eum cum Petro, Justiniani Imperatoris Duce, decedere Siciliâ totâ, & quotannis coronam auream mittere Justiniano trecentarum librarum*. Quid, quòd lego ciuitates in aliâ occasione, atque etiam tristi, coronas has misisse? Appianus in Sullæ funere *suprà bis mille coronas aureas, magna celeritate confectas, pralatas* scribit, atque addit expressè, *dona ciuitatũ aut legionum quibus præsuerat*. Habes & intellegis, opinor, de Coronis & Coronario. A v d. Satis. sed quid iis, post prælationem, factum aueo equidem scire. L i p s. In templis, & Capitolio maximè, videntur dicata. Plinium eò traxerim, de Coronis: *Inde natum, ut etiam triumphaturis conferrentur, in templis dicandæ*. Nam etsi de aliis ibi coronis, tamen in occasione tangit hunc morem. Lib. xxiij. uius, de legatis Saguntinorum: *Non grates tantum agere iussi sumus, sed donum hoc etiam, si vos permetteretis, coronam auream, in Capitolium, victoriæ igitur, ferre*. Quod igitur suprà, in Velleio erat: *Præter quam Capitolio intulit*: huc referri potest, ut non venerint in rationes illas *Coronæ*, & alia dona siue aurum, quæ Ioui Capito-

Lib. 1. de
Goth.

Lib. xxiij.

pitolino Pompeius intulit, aut dedit. Mos ita fuisse videtur: vel ex Suetonij de Augusto notâ. quem ait *xvi. millia pondo auri, vnâ donatione, in cellam Jouis Capitolini contulisse*: quod fecit sanè ab Ægyptiaco triumpho. Imò & Triumphale ipsum aurum interdum, aut pars eius, ibi condita. ex Plinio, qui *duo millia pondo auri* Lib. xxxij. cap. 1. *perisse, Pompeij tertio Consulatu, è Capitolini Jouis solio, à Camillo ibi condita*, scribit: fortasse vt religio magis seruetur. Atque ad hoc etiam tale aurum referendum videatur, quod Suetonius in Cæsare notat: *Eum primo consulatu tria millia pondo auri furatum è CAPITOLIO, & tantundem inaurati aris reposuisse*. Planè hoc est. nam de Ærario compilato, ad alterum Consulatum facit, nec id quoque in Capitolio. Solent tamen & alia templa Auro coronario exornare. vt Augustus de se, in lapide Ancyrano: *In Capitolio, & in ade Diui Julij, & in ade Apollinis, & in ade Vestæ, & in templo Martis Ultoris consecraui, quæ mihi constituerunt circiter millenis AVRI CORONARI pondo, trigintaquinque millibus*. At prior Cæsar, Coronas suas in triumpho ductas vendidit, & ex earum pretio militibus promissa persoluit. quod ita Appianus.

CAP. X.

*Impensa publica in Militem, Magistratus, Populum:
& de Frumentatione.*

PERAGRAVI & emensus sum *Triumphalem* viam: tempus desinere, nec addere ultra, sed erogare. Nónne videtur Auditor? *AVD.* Certè videtur. nam ego censeo, nisi expendimus largiter, omnem Romam iam illationibus tot auri non suffecturam. *LIPS.* Ego

verò exhauriam, & expendam non loculis, sed totis sac-
cis: vt ipsum iterum miraturus sis, vnde ad tot Expen-
sas vllæ Opes. Oceanus si Aerarium fuisset, dixisses de-
siccandum. Impendia igitur sub Principibus (vltiora
omittam) Duplicia fuere, *Necessaria, & Arbitraria*. Il-
la trium generum: in *Militem*, in *Magistratus*, in *Pop-
ulum*. De militibus, res clara est; Stipendiis alendos,
Emeritis prosequendos: & id perpetuò, in legionibus
& præsiidiis perpetuis iam factis. Hæc partitè non exse-
quor, satis à me in *Romanâ Militiâ*, & * alibi, factum.
De Magistratibus, intellego duplices fuisse, in quos lar-
giter & statim expendendum: *Urbanos & Prouinciales*.
Urbanis quidem Augustus instituit, ad onera suble-
uanda, ad ludos præbendos, & talia, aliquid dare: præ-
fertim Prætoribus, quasi ex lege. *Prouinciales* autem,
vel plurimum auferebant, vt ipsi plures, & per prouin-
cias dispersi. Nam ita Suetonius: *Auctor & aliarum re-
rum Senatui fuit, in quibus, vt PROCONSULIBVS ad mulos
& tabernacula, qua publicè locari solebant, CERTA PE-
CVNIA constitueretur*. Et quanquam *Proconsules* mo-
dò nominat, tamen lōgius spectauit, & *Præsidibus* com-
muniter, aut & *Procuratoribus*, aliisque *Officiis* datum.
Quanta ea expensio fuit? immensa, vel hoc argumen-
to: quòd Cicero L. Pisoni obiicit, eunti in Macedo-
niam, vt Proconsuli, *sestertium centies octogies, quasi Va-
sarij nomine, datum*. Ad sola Vasa, inquam, id est orna-
tum & instructum, tot illa sestertia data scribit, & obi-
cit, non quia contrà morem fuerit, sed quia suprà mo-
dum. Nimium ad significat, collusionē quadam, ad tri-
butum. Quid igitur? esto vel * *Centies* tantum summa
ordinaria: esto vel *Quinquagies*: in tot illis talibus, nōn-

Comment.
ad 1. Annal.
Tac.

cap. XLVI.

250000.
10000.
Phil.

ne immensum accrescet? Et plura accedunt huic generi, vt *Curatores* variorum munerum alendi, vel ornandi, vt *Legati* exterarum gentium admittendi, & munerandi: & quæ scimus in omni Republicâ esse. Iam de *Populo*, perpetui etiam & certi in eum sumptus: & præsertim ad Alimenta. Nam iam antè institutû, Principes tenuerunt, vt plebem egenâ aut tenuem perpetuâ frumentatione pascere; atq; eâ magno labore & sumptu parandâ, aduehendâ, & tum gratis distribuendâ. Mira hæc res sit, si quis consideret: & planè inter omnis æui, omniumq; gentium, ADMIRANDA. Sed tractauì olim in *Electis*, quid nunc retractem? AVD. Imò obsecro Lipsi, hîc ei suus locus est: & quid si aliquid firmitus aut plenius tibi obseruatum? LIPS. Obseruatum, non nego: vt in talibus dies diei est doctor. Breuiter dicam, quæ pro nostro argumento. Frumentatio igitur vetus Romæ, & ab ipso etiam Senatu. Ille in rebus & annonâ arctâ, quasi benignus pater, miseritus plebis, frumentum aliquando diuisit, non tamen nullo, sed modico ære. Accessere Tribuni statim, & hoc tam popolare sibi vindicarunt, variis Frumentariis legibus latis. Vltimus in hac re Clodius, *Annonariam legem tulit, vt frumentum, quod antea populo semisse eris ac trientibus in singulos modios dabatur, GRATIS daretur*. Ita Asconius: atque hæc origo deinde & continuatio gratuiti frumenti fuit. Senatus quidem, statim à coniuratione Catilinæ, largitione hac tali vsus erat, auctore ipso Catone: sed nescio, an sine vlllo pretio. In Plutarcho hoc sic narratum, sed verbis quæ pensitanda sunt. Ait, *C. Casarem in Praturâ res nouas tentasse, populo suspensio & mobili, ob Catilinaras illas turbas. Cato igitur, vt præueniret, ἐπεισε τὸν βουλευόμενον*

διὰ λα-

ἀναλαβεῖν τὸν ἀποργὸν καὶ διέμενον ὄχλον εἰς τὸ σιτηρέσιον. ἀνα-
 λώμας μὲν οὐτὶ ἐνιαυτοῦ χιλίων καὶ διακοσίων καὶ πεντή-
 κοντα ταλάντων: *suasit Senatui assumere egenum & indivi-*
sum populum ad frumentationem, et si sumptus esset mille
ducentorum quinquaginta talentorum. Id fit trecenties Hs.
 more Romano; nostro, *septingenta quinquaginta millia*
Philippicorum. Vides igitur impendium in hanc rem,
 quod illo ævo fuit: si tamen plenum id impendium, &
 hæc mens iis verbis. Nam alter Plutarchi locus, de ipso
 hoc Catonis facto, in Cæsare, ambiguum me reddit.
 vbi sic: ὁ κατὰν ἐπεισε τὴν σύγκλητον ἀπονεῖμα σιτηρέσιον ἔμ-
 μηνον. ἔξ οὗ δαπανῆς μὲν πεντακοσία πεντήκοντα μυριάδες
 ἐνιαυτοὶ ἀποσπείρονται τοῖς ἄλλοις ἀναλώμασιν: *Cato suasit*
Senatui distribuere frumentum menstruum, ex quo sum-
ptus accessit ad reliqua septingentarum quinquaginta my-
riadum drachmarum. Ea summa non reddat, nisi *ducent-*
ties vicies Hs: id est, *quingenta quinquaginta millia Phi-*
lippicūm: atque ideo visa vitis doctis, & mihi olim, ne
 Plutarchus cum Plutarcho pugnet, ad priorem refor-
 manda, scribendumque ἐπτακοσία πενήκοντα: *septin-*
genta quinquaginta. Nunc nonnihil addubito, & an
 non mens in priori quidem loco: *Catonem suasisse fru-*
mentum dari iis qui antè non acceperant, & assumpsisse
novam turbam, διέμενον, ut verbum Græcum est, indivi-
uisam, indescriptam, & nondum inter frumentantes rela-
tam. Id autem noui sumptus additum, etsi iam antè tot
 illa talenta in hanc rem expensum. Posterior deinde lo-
 cus indicet & notet adiectionis illius summam, paullo
 minorem scilicet veteri, & quæ fuisset. Hæc dixerit ali-
 quis: sed sunt vel sola illa priora talenta in vniuersum,
 magnæ satis expensæ sint, præsertim cū tunc Clodij
 illa

illa lex, totum gratificans, lata nondum esset. Paulo autem post fuit : nec dubitemus impendiū creuisse. Manfit sub Imperatoribus , nisi quod per ciuilia bella numerus accipientium cū immensum creuisset, Iulius Cæsar recidit. de quo Suetonius: *Ex viginti trecentisq; millibus accipientium frumentum è publico, ad centū quinquaginta retraxit* : aut si Dionem audis, *ad centum sexaginta* : quia dicit ad *mediam partem redactos*. Paruum discrimen : sed Augustus deinde auxit, & *ducenta millia* fecit. an & Tiberius? etsi ille minimè popularis : tamen recenset in Senatu (apud Tacitum) *quibus è prouinciis, & quanto maiorem quàm Augustus, rei frumentariæ copiam aduectaret*. Ergo & in plures, nisi fallor, distribuendam. AVD. Mehercules Lipsi, grandis hic numerus : & tot illi Romæ pauperes? LIPS. Pauperes, aut saltem qui subleuari gauderent : inter quos liberti, & id genus, maximè fuere. Dionysij locus notabilis, admonentis multos ideo manumitti, *ὥστε τὸν δημοσίως διδόμενον σίτον λαμβάνοντες πρὸς μῆνα, καὶ εἴπερ ἄλλη πᾶσι τῶν ἡγουμένων γίγνοιτο τοῖς ἀπόροις τῶν πολιτῶν φιλανθρωπία, φέρωσι τοῖς δαδωκόσι τὴν ἐλασθερίαν* : *ut frumentum, quod publicè datur, accipientes in menses singulos, & si qua alia liberalitas Principum in pauperes fiat, id totum Dominis ferant, à quibus facti sunt liberi*. Vides fraudes, quæ etiam factæ : aut saltem, quomodo, quos puderet ipsos è publico pasci, id fecerint succidaneâ libertorum personâ. AVD. Aliquoties iam audio de *menstruo frumento* : ergone ea distributio? LIPS. Illa ipsa, & in cuiusque mensis initio (siue *Nonis*, vt Suidæ visum, vnde & *Annonas* ridiculè deriuat) accipiebant. Quomodo? per *Tesseras* : quique eas habebat, ad *Curatores frumenti diuidendi*

Lib. LIIII.

ibat, munus institutū ab Augusto. Quattuor uiri enim erant, iique ex honestioribus, & qui ante quinquennium Prætura functi essent: quod Dio notauit. Et si *Præfectus* etiam *annonæ* proprius, illustri honore: sed qui de aduehendo & adseruando in horreis satageret, non propriè de diuidendo. Multa circà hanc rem: sed minuta quid opus exsequi? de numero iterum aliquid videamus: in quem videtur Seneca tenuiores omnes ciues inclusisse. *Frumentum*, inquit, *publicum*, tam *fur*, quàm *periurus*, & *adulter accipiunt*, & *sine discrimine morum*. QVIS QVIS CIVIS est. Sed ita tamen accipio, vt admitti debuerint & inscribi: neque id factum nisi certo numero, & alij deinde assiduè in demortuorum locum allecti. Sed quin Principes secuti numerum illum Augusti auxerint, non videtur dubitandum. Certè modus ipse frumenti, qui distributus, hoc dixerit: de quo in Spartiani Seüero aliquid, sed mendosè legas. *Moriens*, inquit, *Seuerus septem annorum canonem, ita vt COTTIDIANA LXXV. millia modiorum expendi possent, reliquit*. Dico parum hoc esse, & valdè augendum. A V D. Parum? tot illa modia in diem? Atqui ea sint vel ad *septingenta millia* hominum pascenda largiter: cùm Modius habeat XXVI. libras. L I P S. Dico & repeto parum esse, & conuincam. Ex Africâ & Aegypto hoc frumentum aduectum præcipuè (aliunde enim etiam non nego, vt ex Siciliâ, Sardinia, Italiâ ipsâ) sed præcipuè ex duobus iis locis, docui in Electis. Et classis huic rei fuit, Africana & Alexandrina. At verò Ægyptus sola (quod Victor scripsit) *urbi ANNV A ducenties centena millia frumētī inferebat*: quid ergo iam Africa? Largiùs etiam, & ipsum duplum. Hoc ita Iosephus mihi dicit in

in Oratione Agrippæ: *Africam per octo menses populum Romanum pascere, Ægyptum autem per quaternos.* Notandus sanè locus: & quid efficitur? ex Victoris illo calculo, *quadringenties igitur centena millia modiorum Africam intulisse.* Iunge ista, sunt *sexcenties centena millia* in annum: quid in diem? Diuide, reperies *centum, sexagintaquattuor millia trecenta octogintatria.* Itaque vix ambigo, quin centenariâ notâ additâ, in Spartiano rescribam: *cottidiana CLXXV. millia.* Paulo ampliùs, fateor, quàm è duabus prouinciis dixi confici: sed paullò, & miretur aliquis numeros sic cõuenire. Quod redundat autem, aliunde scilicet aduenerit: aut post Augustum (nam de eius æuo Victor) aucta sit illatio Ægypti. Quod dixerit etiam aliquis, ex iis quæ Socrates in Ecclesiasticâ historiâ scribit: quem vt intellegas, præmittam. Constantinum Magnum, cùm sedem suam & affectum Byzantium transtulit, etiam Frumentationis partem transtulisse, & Ægyptiam classem atque annonam, Romę veteri ablatam, ad eam vrbem & populum applicasse. Hæc certa sunt, & variis scripta: sed ecce, quod nunc ad rem, Constantius eius filius in parte frumentationem hanc abstulit, offensus plebi Constantinopolitanæ, ob seditionem motam, in quâ & Hermogenes Dux ab Imperatore missus, esset interfectus. Hæc igitur rem cùm narrasset Socrates, addidit: Εζημίωσε ὁ τῷ πόλει ἀφελὼν τοῦ σιτηρείου τὸ πρῶτον καὶ τὸ πατρὸς αὐτοῦ ἡμερισίον, ὑπὲρ τεσσαρὰς μυριάδας. ὅπως γὰρ ἐξ ἑὸς μυριάδες ἐχορηγοῦντο πρὸς τὸν πόλιν, ἐκ τῆς ἀλεξάνδρειας κομιζομένου πόλεως: *Mulctauit urbem, auferens frumenti, in dies singulos à patre eius adtributi, super quattuor myriadas.* Octo enim circiter myriades præbebantur

Lib. II.
cap. X.

* octoginta.

Lib. III.
cap. VI.

Lib. IX.
cap. VII.

tur frumenti, ex *Alexandrinâ* urbe aduecti. Habes clarè tot* millia (Modiorum an *Medimnorum*, non exprimit: sed ego *Modios* ceperim) *cottidiana*, eaq; è solâ *Ægypto* maximè: vt appareat omnino *Ægyptum* plus paullò tunc dedisse: nisi si & alicunde illatio etiam facta. Consentit *Sozomenus* de ablato isto *dimidio frumento*: sed numeros non expressit: expressit *Nicephorus* in eâdem narratione, sed cum lato errore, si tamen sic ipse. Nam *Græcum* non vidi: *Latina* ita habent. *Octo enim myriades medimnorum frumenti quotannis à Constantinoplebi data fuerant*, cuius *dimidiam partem Constantius diminuit*. Dicit *Medimnos*: & dubito, ac vereor vt nimis crescat. Dicit *Quotannis*, & non dubito quin falsò hoc siue ipse, siue interpretes. In *Socrate* expressè est, *ἡμετέριον, diurnum*: & res planè poscit. Sed in eodem *Socrate*, nequem interpretes item fallat, qui *quattuor myriades* (quod in *Græco*) reddidit, *quadragiescentena millia medimnorum*: quàm supino calculo, & mente dormitante? *AVD.* Miror, & quomodo ad hæc talia, & splendida, non paullò plus intendunt? Sed tamen mihi altera etiam admiratio non excutitur *Lipsi*, in grandi hoc frumenti diurni numero: & pro tuâ correctione *CLXXV. millium modiorum*, ali in diem potuerint vel *sexdecies centena millia* hominum, aut suprâ. Atqui non tot, opinor, inter frumentantes. *LI PS.* Non tot adscripti fortasse, sed cogita *Patresfamilias* plerosque fuisse, ac pro se & suis cepisse. Deniq; de numero frumenti satis iam dictû videtur. An hoc quoq. moneo, posteriore instituto *Principum* factum, vt non frumentum ipsum, sed panis daretur? Qui in gradibus distribuebatur, atque idè *Gradilis* dictus. Idem & *Fiscalis*, opinor, in veteri *Com-*

men-

mentario Persij : ad illud — *populi cribro decussa farina. Panem non delitiosius cribro discussum, sed plebeum de populi annonâ, id est, Fiscalem dicit. Eos panes bilibres fuisse, ex Vopisci Aureliano dicam. Nam Aurelianus, inquit, eo tempore quo proficiscebatur ad Orientem, bilibres coronas populo promisit, si victor rediret. Et cum aureas populus speraret, neque Aurelianus aut posset, aut vellet, coronas eum fecisse, de Panibus, qui NVNC Siliginei appellantur, & singulis quibusque donasse. ita ut Siligineum suum COTTIDIE toto auro suo unusquisque reciperet, & POSTERIS SVIS dimitteret. E quibus inspectis planè affirmaveris, Bilibres, & in Capita sic datos fuisse. A V D. O ingentem, vel immensam potiùs, in immenso illo populo largitionem ! LIPS. Quid si accumulo, & obsonium etiam addo? Nam idem Aurelianus (Vopisci item verba) & porcinam carnem populo Romano distribuit, quæ HODIEQVE diuiditur. Quando hodieq? ad tempora vsq; Constantini. Simile in Oleo fuit, quod perpetuum populo dedit & instituit Imp Seuerus. Vinum etiam, ut nequid deesset, Aurelianus statuerat, sed morte præreptus non fecit. Satis hæc mi Auditor, cetera in Electis meis vide.*

CAP. XI.

Impensa in Ludos carptim ostensa.

TRANSIMVS ad *Arbitraria* impendia: quæ trium item generum maximè fuerunt. In *Ludos, Opera, Dona*. In *Ludos* singulatim si persequar, aut exempla accumulem; seorsim Theatrum mihi struendum sit, & noui aliquot sermones. Capita impendiorum dicam. de quibus vniuersè sic Lactantius : *Quid dicendum est*

L b. vi.
Instit.

*de iis, qui populari leuitate ducti, vel MAGNIS VRBIBVS
suffecturas opes, exhibendis MVNERIBVS impendunt?*

Serm. lxxxi. Item Ambrosius: *Magistratus in theatris, mimis, &
athletis, gladiatoribus, aliisque huiusmodi generibus homi-
num TOTVM PATRIMONIUM suum largitur & pro-
digit, ut vnius hora fauorem vulgi acquirat. Meritò dam-
nant Patres damnosam hanc insaniam, & quæ priuatos
homines bonis per ludum exuit; Principes ipsos atten-
nuat & delibat. Atque id discere cùm ex frequentia eor-
um potes, tum ex apparatu. Vnus Augustus fecisse lu-
dos se dicit, suo nomine quater & vicies; pro aliis magistra-
tibus, qui aut abessent, aut non sufficerent, ter & vicies. Ego
vix arbitror, vltos ex istis Principalibus ludis minoris
quingenties, aut & millies sestertio stetisse: quod Appara-
tus & Pompa facilè persuadebunt. Nam ecce in ipso
Theatro, Amphitheatro, aut Circo adornando qui sæ-
pe sumptus? cùm semper gratia aliqua & illicium noui-
tatis in ipsâ formâ quæreretur: & Nero (pro exemplo)
Theatrum totum, non Scenam eius tantum, auro illeuit &
obtexit. Sed & quidquid illatum fuit, & omne instrumen-
tum ac choragium, aureum: itemq; vela quæ supernè contrâ
solem obumbrabant, purpurea tota, & aureis stellis inter-
flecta. Ex quo & dies ille Aureus appellatus. Dio Cas-
sius hoc in Nerone. & Plinius id ipsum ad significauit:
Nero Pompeij theatrum operuit auro, in vnum diem, quò
Teridati regi Armenia ostenderet. Quid Iulius Cæsar,
ante Neronem, & nondum Princeps? Is primus in Ædi-
litate, munere patris funebri, OMNI APPARATV arene
ARGENTEO vsus est: ferasq; argenteis hastis laceffere,
tum primum visum. Mox, quod etiam in MVNICIPIIS
emulantur, C. Antonius ludos scenâ argenteâ fecit. Cæsar
igitur*

Lib. lxxij.
cap. 111.

Plin. ibid.

igitur hoc *primus* : sed non vltimus. & quod Plinius addidit, passim & in Coloniis ac Municipiis Argentæ iam scænæ. Ideò non possum, vt rarioris operæ aut magnificentiæ admirari, quod Plinius, vt tale, scripsit eodem isto loco : *Item L. Murena, & Caius Princeps, in Circo pegma duxit, in quo fuere argenti pondo CXXIII.* Tu hoc Plini notabile duxisti? *centum vigintiquattuor* pondo argenti, quis ex equite, & pænè dixerim plebe, tunc non insumpserit? Lege, C ∞ IIII. id est, *centum millia quattuor* : nec id ipsum pro Caio aliquo est magnum. Plura eiusmodi ornamenta aut instructus erant, & quædam in libello nostro Amphitheatrali diximus : & vis nunc vnum & extremum furorem? Heliogabalus Imp. (ait Lampridius) *fertur in Euripis vino plenis nauales Circenses exhibuisse*. Tu cogita quantum vini profusum, fossis illis & Euripis in Circo ita eo plenis, vt naues inter se concurrere, ac certare de velocitate possent. Quid iam dicam tot *Gladiatorum* millia, tot *Ferarum* ex toto orbe quæsitaram? tot equorum nobilium? in vitâ actisq; Principum assidua hæc legis. Addo huc *Missilia & Sparsiones* in populum, id est Tesseræ ligneas cum notis rerum, aut interdum res ipsas, magno certamine diripiendas. Quæ item velut legitima iam erant in omnibus ludis, ad populum illiciendum. Horum pretia & sumptus, ex Neronianis istis colligantur, apud Suetonium : *Sparsa & populo missilia omnium rerum per OMNES DIES, singula cottidie millia cuium, cuiusque generis multiplex penus, tessera frumentaria, vestis, aurum, argentum, gemma, margaritæ, tabule pictæ, mancipia, iumenta, atq; etiam mansuetæ feræ: nouissimè NAVES, INSVLÆ, AGRI.* Notetur hæc iactatio, quanti ea, & quan-

quantarum rerum? Præter aurum, gemmas, margar-
 tas, *Insulas* & totos *Agros* dedit: *Insulas* nempe vrba-
 nas, & habitabiles domos. O res vix Suetonio fidissimo
 testicredendas! Sed accedit & Dio similia asserere: *Om-
 nia*, inquit, *delicatissima quæ homines comedunt* (ad *Pe-
 num* Suetonij pertinet:) *omnia pretiosissima, equos, man-
 cipia, esseda, aurum, argentum, variam vestem, hæc da-
 bat per symbola quadam & tesseras. Globulos enim par-
 uos inscriptos, ut quaque eorum erant, hos iaciebat in po-
 pulum, & reipsâ mox dabatur, quod quisque eorum in
 tessera haberet. Neque Nero hæc solus: de more fiebat,
 etsi alius largius parciusque præberet. Titus sanè Vespa-
 sianus filius, item profusissimè, in ludis quos per cen-
 tum dies, dedicatione Amphitheatri sui, fecit. Dio Cas-
 sius de eo: παρέχε δὲ πινὰ καὶ ἐς ἀφέλειαν φέροντα αὐτοῖς. σφαι-
 ρία γὰρ ξύλινα μικρὰ αὐτῶν εἰς τὸ θέατρον ἐρρίπτει σύμβολον
 ἔχοντα, τὸ μὲν ἐδωδίμου πινός, τὸ δ' ἐδῆτος, τὸ δ' ἀργυροσκόδρας,
 ἄλλο χρυσοῦ, ἵππων, ὑποζυγίων βοσκημάτων, δούρα πύδων, ἅ-
 ρπασσόντας πινὰς ἔδει πρὸς τὰς δοτῆρας αὐτὰν ἀπνεγκεῖν, καὶ
 λαβεῖν τὸ ἡπιεγραμμένον: Dedit & quadam, utilitatem,
 non solum voluptatem, spectantibus præbentia. Nam
 globulos ligneos quosdam de loco superiore in theatrum ia-
 ciebat, qui symbolum haberent, hic alicuius esculenti, ille
 vestis, alius argentei vasi, alius aurei, equorum, iumento-
 rum, mancipiorum; quæ oportebat eos, qui rapuissent, fer-
 re ad Curatores ludorum, & ab iis accipere quamque rem
 inscriptam. Credis tu hæc per tot illos centenos dies fieri
 potuisse, sine impensâ bis terq; millies Hs.? ego non opi-
 nor. & vbi sumptus ludorum reliqui? Neque miror
 iam profectò Hadrianum, cùm in adoptione Ceionij
 Commodi multa in populum profudisset per hos lu-
 dos,*

dos, & in militem: atque is Ceionius ægro corpore, vitalis non videretur: sæpe dixisse, *Perdidimus quater milies HS. quod populo & militibus dedimus.* Qui sunt ipsi nostri *decem* milliones. Sed dices, Principum virorum modò hæc fuisse. Erras. de Milone, hoc iam olim Cicero, *tria patrimonium in has res effudisse*: de Messallâ quodam Vopiscus, cum stomacho ista narrat: *Legat hunc locum Junius Messalla, quem ego liberè culpæ audeo.* Ille enim patrimonium suum scenicis dedit, heredibus abnegavit. *matris tunicam dedit mima, lacernam patris mimio: & rectè, si auia pallio aurato atq; purpurato, prosyrmate tragædus uteretur.* Jam quid Lineas petitas *Ægypto loquar? quid Tyro & Sidone tenuitate perlucidas, micantes purpurâ, plumandi difficultate pernobiles? Donati sunt ab Atrebatibus birri petiti, donati birri Canusini, Africana opes, in scena non prius visa.* Et hæc quidem iccirco ego in litteras misi, ut futuros editores pudor tangeret, ne patrimonium suum, proscriptis legitimis heredibus, mimis & balatronibus deputarent. Et de Ludis hæc quoque sufficiant in specimen: de * *Operibus*, in proximum sermonem differo * *Lib. III. toto.*

CAPVT XII.

Dona Principum effusa, & primò Julij Cæsaris.

DONA sequuntur, magnitudine suâ & frequentia non iam inter ADMIRANDA, sed STUPENDA. Siquis Midas fuisse fingatur, qui omnia tactu faciat aurea; defecerit inaurare, quantum isti sunt largiti. Per Principes aliquot lubet ire, & hoc ostendere: ordiarque à capite ipso *Cæsare Julio.* De illo vniuersè ita Suetonius: *Nullum LARGITIONIS aut officiorum genus in QVEM-*
M QVAM,

QVAM, PVBLICE PRIVATIMQVE *omisit*. Vis magis partitè? Idem scriptor: *Militibus singula interdum MANCIPIA vel PRÆDIA viritim dedit*. Ecce, vbi vos Curij aut Fabricij, qui ipsi Imperatores vix *septena iugera* habebatis? nunc miles aliquis capit ab isto donatore *Prædia* tota. Hæc & plura (mox dicenda) in militem: quid in Senatum & digniores? Idem iterum Suetonius: *Parte magnâ Senatus gratuito, aut leui scænore, obstrictis, ex RELIQUO quoque ordinum genere vel inuitatos, vel sponte ad se commeantes, VBERRIMO CONGIARIO prosequabatur*. Nec hic finis: extra urbem quoque & Italiam ea largitas se diffudit. & *non minore studio* (idem Suetonius) *Reges atque Prouincias per ORBEM TERRARVM illiciebat: aliis captiuorum MILLIA dono offerens; aliis quò vellent, & quoties vellent, Auxilia submit- tens. superq₃ Italia, Galliarumq₃, & Hispania, Asia quoque & Græcia potentissimas* (siue placet, *potissimas*) *urbes præcipuis OPERIBVS exornans*. Quid tibi iste vir videtur? mihi, nil nisi nouus quidam Triptolemus, qui sublimi vectus curru, semina non frugum, sed liberalitatis suæ, per terrarum orbem spargit. Atque hæc, quò magis mirè, priuatus Cæsar fecit, & ille paullo antè ære alieno oppressus. AVD. Affatim miror: & vnde Cæsari, nondum Cæsari, opum ista vis? LIP s. Gallias nostras vide: iste fons, è quo hausit. Diuites tunc herclè Prouincias, sed quas fulmen istud afflauit & ambussit. Nam quomodo se in iis gesserit, breuiter Suetonius: *In Galliâ, sacra templaq₃, Deûm, donis refert a, expilauit; urbes diripuit, sæpius ob prædam quàm ob delictum*. Denique è tot præliis, accessit ingens captiuorum multitudo, è quâ diuenditâ pecuniam redegit. Sed lubétne singillatim inspicere

cerè viri dona? Ecce, instante ciuili motu, in Galliâ cum esset, *L. Paullum Consulem designatum, mille quingentis talentis flexit, ne contrà se staret: Curionem, qui æ alieno obrutus, maiore etiam summâ, vt pro se staret.* Illa tot talenta reddunt, *nongenta millia Philippicûm: id est pænè millionem, in virum vnum.* Quid iam in Curionem? amplius longè dedit, vt Appianus dixit (nam eius ea verba scito:) & nisi fallor, ipsum æs alienum eius totum exsoluit. Nec fallor, & Dionem clarè Lib. xi. hoc ita memini scripsisse. Atqui æs illud fuit *sexcenties* Hs. quod Valerius Maximus prodidit: quî minus ergo dedit? Itaque Velleio numerale mendum inhæsit, cum de istâ re, *Curionem centies* Hs. scribit accepisse. Ille verò *sexcenties*: & ita hîc rescribe. Ea faciunt *quindecies centena millia* Philippicûm, quid nisi plurium Senatorum census? Nec largitiones eius aliæ in primum ordinem scriptæ exstant: etsi fuerunt, quod in Suetonio audisti: & in magnos illos semper magnæ. Sequuntur Milites, quibus vnicè se dedit: atque id ipsum priuatus. Certè adhuc in Galliâ, cum Pompeius duas legiones, colore belli Parthici reuocaret; ipse vt animos sibi pigneraret, singulis abeuntibus *ducentas quinquaginta drachmas* diuisit; quod Plutarchus, aliique prodiderunt: id est, *viginti quinque* Philippicos nostros. Cogita iam duplum in Centuriones, triplum quadruplumque in Præfectos, & Tribunos: valdè ea largitio crescit. Sed quid in ipso iam bello ciuili? priuatim haud dubiè multa; communiter hæc largitio fuit, Suetonio expressa. *Veteranis legionibus, præda nomine, in pedites singulos, super binâ sestertia, quæ initio ciuilis tumultus numerauerat, vicena millia nummûm* dedit. Rectè ita locus habet, & in

Lib. VIII.

optimis libris: quid opus argutari, aut interpolare? Examinemus. *Veteranis legionibus*, inquit: non enim nouélisaliis: etsi & hæc, credo, aliquid habuerunt. Veteranæ autem illæ, *decem*. In *pedites singulos*, inquit: cur igitur equites omittit? quia non opus: sicut nec Centuriones adiecit, quos notum scilicet erat duplum accepisse, de more. Etsi de equitibus hoc æuo, dubito: & olim quidem triplum etiam soliti accipere: sed post Socios ciuitate donatos, palàm video nec honorem nec præmia tanta equitibus fuisse, qui plerique iam è Latinis. Pergit, *Super bina sestertia*. Ea sunt, de quibus Hirtius: *Militibus singulis ducenos sestertios, Centurionibus duo millia nummum, præda nomine, condonanda pollicetur*. Nam *bina* HS. idem quòd *duceni* HS: siue Philippici *quinque*: at *duo millia nummum* (Suetonio omissa) *quingenta* istos reddunt. Super hæc igitur, dedit, inquit, *vicena millia nummum*. Ea sunt, ipsi Philippici *quingenti*: atque ij viritim, & in gregarios milites diuisi, cùm duplum Centurionibus esset, Tribunis Præfectisque alarum quadruplum. Proh fidem! (nam sæpe exclamo, & cogor) quæ hæc, præter stipendia, & alia lucella aut raptus, largitio est? quanta in tam multos? Ne milites nostri audite, & exempla hæc aut cupite aut sperate. Vnde enim Iulius, vnde Romanæ opes? AVD. Vnde & tibi animus sic ista credēdi, & affirmandi? Nam alij viri docti trepidant, & in lectione commutant. LIPS. Nihil est. incoquantia hoc facit (imperitiam nolo dicere) veterum & largitionum, & diuitiarum: quibus alia exempla mox attestabuntur. Etsi in hac re satis Græci scriptores, qui cū Tranquillo planissimè in summâ concordant. Nam Dio breuiter, sed clarè, *militibus quinque millenas solidas*.
Drac-

Drachmas datas scribit. Appianus fusiùs & distinctissimè: *Militibus à triumpho, superans etiam ea quæ promiserat, legionariis drachmas Atticas quinque mille, Ordinum ductoribus duplum, Tribunis & Alarum præfectis iterum duplum dedit.* Vísne aliquid apertius? & cur huic consensui repugnemus? Nota autem nec Appianum aliquid seorsum de Equitibus, vt nec Tranquillum, dixisse. Sed quæ hæc *Promissa* sunt, quæ Appianus signanter scribit *eum superasse?* Opinor esse, quòd in pugná ad Pharsalum, *singulis millenas Drachmas* promiserat: iterumque, vt volentes in Africam sequerentur, *alteras millenas.* quod vtrumque in Appiano leges. Largiter igitur excessit, nisi quid in ipsâ Africâ aut alibi etiam promisit. A V D. Audésne in fasce dare has summas omnes, vt magis attendam? L I P S. Licet. Fuerunt legiones decem, sed veteranæ, & ideò parum plenæ. Sunt igitur *triginta millia militum:* & singulis *quingenti Philippici:* faciunt, *quindecim nostros milliones.* Vbi nunc Centuriones, Tribuni, Præfecti, atque ipsi Equites? Regum opes expensas dices in donatione hac vnâ. Atqui an finis est? imò sub ipsum idem tempus, largitionem ad Populum extendit. & vt Suetonij verbis hoc quoque dicam, *Populo, præter frumenti denos modios, ac totidem olei libras, trecenos quoque nummos, quos pollicitus olim erat, viritim diuisit, ac centenos pro morâ.* A V D. Hîc mihi vocem opus tollere, nec comprimo. Viritim toti populo tantum frumenti, olei, pecuniæ? L I P S. Moderor, ne clama: toti populo frumentanti, nec vltra. Dio Cassius ita restrinxit: τὸ ὅχλῳ τὰ σιτοδοτυμὶνῳ: id est, *Populo, qui frumentum acciperet.* Ergo tenuiorem populum intellegit: & semel nota, Suetonium hîc atq; aliàs

populi voce (præter morem antiquum) plebeculã istam ieiunam, & hirudinem ærarij intellegere. Qui tamen ipse numerus grandis, & sub hoc tempus *trecenta viginti millia* erant, qui è publico pascerentur: quod antè dixi. Totus ergo ille populus accepit *quadringentos* nummos viritim: id est, *Minam*, vt Appianus expressit. Sunt Philippici *decem*: ergo in summam, *tres milliones ducenta millia*. Vbi olei deinde modus, vbi frumenti? Mi Auditor, ad Ouidium eundum nobis est vt transformemur, & animos veteres, pro veteri æuo, capiamus. Nostri homulli hodie, dicant mera mendacia me flare.

CAP. XII.

Augusti Principis dona.

SEd vnum etiam Iulium vidimus, quid tot Cæsares qui secuti? & vt aliis minimè, tamen in liberalitate consecuti, aut prægressi. Avd. Difficile creditu est. nam hic homo mihi videtur de se, quod olim Liuius Drusus posse dicere: *Nihil se cuiquam ad largiendum, præter calum & cœnum, reliquisse.* LIPS. Non ita est: opes istæ Vectigalium, & quas diximus, inexhaustæ erant, & vt perennes quidam fontes fluebant. Itaque ad *Augustum* veniamus, qui non diuturnitate solùm imperij, sed vereor vt liberalitate patrem superarit. Dona eius quædam ante imperium, alia in ipso sunt: & illa magis miranda. Primùm *militibus & Euocatis*, quos contraxit metu Antonij, aditâ hereditate *Julianâ*, dedit *singulis quingenas Drachmas*. Ita ipse Appianus: interpretis eius parum prouidè *sestertios* vertit. Is numerus Euocatorum, ad *dena millia* fuit: ergo *quingenta* hîc
Phi-

Philippæorum *millia*. Amplius. eodem pænè tempore, cum legiones Quarta & Martia ad se trássissent ab Antonio, dedit singulis *totidem illas Drachmas*: iterumque cum in armis decurrissent, & speciem prælii peritè assimilassent, *alteras totidem*: quæ certè fuerunt ad dictam facilè summam; & suprà, si Equites & Centuriones (quod nec antè feci) suo more computentur. Iam verò in ipso primo Consulatu, cum signis à Mutinâ motis urbem intrauit, dedit qui se deduxerant, singulis *bis mille quingentas drachmas*, siue *ducentos quinquaginta* Philippæos: atque ex octo legiones fuerunt. Minimâ legionum frequentiâ, surgent *sex milliones*, & Equites ac Ducatores omittentur. Vbi autem prædæ quas egit, aut spolia quæ cepit? adhuc nulla. Quò magis in ADMIRANDIS hæ donationes tres, à priuato Octauiano, & solâ spe futuræ magnitudinis, susceptæ & perfectæ. Atque hîc notandum in vltimâ, transisse eam velut in legem; & solenne donatium hoc habitum, quoties legiones postea Principem in urbem deduxissent. Certè Spartianus in Seuero tradit, *Milites per seditionem dena millia poposcisse à Senatu, exemplo eorum, qui Augustum Octavianum Romam deduxerant, tantumque acceperant*. O peritos historicos vel antiquarios, & in rem suam lecta aptantes! Sed quarta etiam donatio à priuato, in quâ lingua mihi hæret. AVD. Quâne obscœna aut turpis? LIPS. Non, sed quia immensa, aut certè immodica, & vereor refragatorem. AVD. Non me. vt ij qui de cælo tacti sunt, silent & stupent: sic iam pænè ego. perge. LIPS. In Philippensi igitur prælio, vbi de Principatu actum vel Libertate, hic ipse Octavianus cum Antonio promiserunt viritim *quinque mille Drachmas*. AVD. Hoc illud

illud erat? at Cæsar iamantè totidem, & docuisti. LIPS. Sed Cæsar *decem* legionibus tantùm: isti *nouemdecim*, quæ in pugnâ erant, & aliis *quadraginta*, quæ in præsidiiis aut Italiâ sparsæ. Appianus quidem ita narrat, vel apud eum Antonius (oratione ad Asiaticos) sed addit: *attritas eas iam & minutas ad XXVIII. rediisse, quæ (inquit) cum suis additamentis efficiunt virorum supra centum septuaginta millia: præter EQVITES, & item ALIUM militem.* Quis iste *alius miles*? opinor Auxilia, quæ haud longè infrâ legiones. Itaque qualis & quanta hæc summa conficiatur, ingenuè fateor, vix ego ausim promere: & scito esse *suprà centum quinquaginta milliones.* Vbi estis qui Nouum orbem, & nouas in eo diuitias repperistis? Huc ite, ostendent & effundent eas. Duumviri isti vnicâ largitione. Atque hæc ille fecit ante Principatum: in ipso tenuit & cucurrit eundem liberalitatis cursum. A VD. At hîc mihi votum & cogitatio. LIPS. Prome. A VD. Si eo sæclo ego viuam, quid nisi miles sim? ita omnes ad eos opes adfluunt & concurrunt. LIPS. Vera narras. & scito ab hoc militum tunc seminario, Senatorias & diuites plerasque familias ortas. Hæc præmia in ciuili bello iis sunt: cùm homines vt ad imperium veniant, imperium pænè ipsum donant. Quid donant? perdunt certè: & quomodo tot isti pecuniarũ cumuli, sine apertâ pernicië prouincialium ciuiumque, colligi potuère? Sanè id factum est: sed Pax postea, cùm copix suo cornu reposuit omnia & reparauit. Sed Augustus, vt cœperam dicere, in Principatu quoque perliberalis. Lapidem Ancyranum lubet proponere, in quo aliquot donationes eius ordine exsculptæ.

LIBRI. ROMANI. VIRITIM. CENOS. I.
 NVMERAVI. EX. TESTAMENTO. PATRIS.
 MEI.

ET. NOMINE. MEO DRINGENOS. EX. II.
 BELLORVM. MANVBIIS. CONSVL.
 QVINTVM. DEDI.

ITERVM. AVTEM. IN. CONSVLATV. III.
 DECIMO. EX. PATRIMONIO. MEO. BIS.
 QVADRINGENOS. CONGIARI. VIRITIM.

ITERVM. ÆRE. MERV. ET. CONSVL. IV.
 VNDECIMVM. DVODECIM. FRVMEN-
 TATIONES. FRUMENTO. PRIVATIM.
 COLVMEIO. EMENSVS. SVM.

ET. TRIBVNITIA. POTESTATE. DVO- V.
 DECIMVM. QVADRINGENOS. NVM-
 MOS. TERTIVM. VIRITIM. DEDI.
 QVALI. MEA. CONGIARIA. FRVMEN-
 TI... NVM. NVMQVAM. MINVS. QVIN-
 QVAGINTA. ET. DVCENTA SIA.

DVODEVIGINTESIMVM. CONSVL. VI.
 TRECENTIS. ET. VIGINTI. MILLIBVS.
 PLEBIS. VRBANÆ. SEXAGENOS. DE-
 NARIOS. VIRITIM. DEDI.

ET. QVINIS. MILITVM. MEORVM. VII.
 CONSVL. QVINTVM. EX. MANVBIIS.
 VIRITIM. MILLIA. NVMMVM. SIN-
 GVLA. DEDI. ACCEPERVNT. ID. TRI-
 VMPHALE. CONGIARIVM. IN. CO-

LONIAS. HOMINVM. CIRCITER. CENTVM. ET. VIGINTI. MILLIA.

VIII. CONSVL. TERTIVMDECIMVM. SEXAGENOS. DENARIOS. PLEBI. QVÆTVM. FRVMENTVM. PVBLICVM. ACCE..... DEDI. EA. MILLIA. HOMINVM. PAVLLO. PLVRA. QVAM. DVCENTA. FVERVNT.

Vides, siue audis lapidem, vtinam peritè satis aut fideliter descriptum! Insigne monumentum antiquitatis est, & historiæ Augustæ. Sed multa in eo corrupta, & quædam lacera: percurram lucis, & alibi medicinæ, causâ.

In primâ donatione est: LIBRI ROMANI. An id fuit, TRIB. P. ROMANI? id est, *Tribubus populi*. Res quidem eas tangit, & legauit Cæsar testamento viritim Romano populo, *trecenos sestertios*, vt Suetonius scripsit; vt autem Dio, *centenos vicanos*, & adducit ipsum Augustum eius rei testem. Et scripserat hoc Augustus fortasse in Commentariis rerum suarum: sed & hîc ita in Breuiario isto fuit. Explendum igitur, CENTENOS. VICENOS. Ii sunt, *tres Philippici* in singulos: si in totum populum, immensum est; si in frumentantes, magnum.

In II. *Quadringeni nummi* viritim dati, item in populum: qui sunt Philippici *decem*. Id factum in *quinto Consulatu* eius, vt hîc scribitur: id est, statim post Actiacam & Alexandrinam victoriam, sub triumphum. Dio Cassius ipsum notat, in hoc anno, & in summa consentit: sed auget acceptores, & non *viros puberesq;* tantum, sed etiam *pueros*, in gratiam Marcelli, sororis filij, scribit *adiectos*. Hoc si fuit, vt fuit, quis non videt supra,

prà duplum ferè donationem crescere, & vt minimum fuisse ad *sexcenta millia* capientium? Fiunt in pecuniâ impensâ *sex milliones*.

In III. Consulatu decimo, scribit se item populo dedisse, congiarium *bis quadringenos*. An simul, vt *otto-genos* dederit? an magis significat, bis se dedisse? sicut & paullo pòst, *tertium quadringenos*. Quæ iterationes valdè sunt liberalitati augendæ: & tu attendes.

In IV. Quid sit illud *ÆRE. MERVI*. quæro. Vnum hoc assequor, in Vndecimo consulatu datas *duodecim Frumentationes*: quas ita appellat, quæ singulis mensibus dari solebant. In caritate igitur annonæ, has extrâ ordinem, & de suo, vt scribit, addidit. Nam legendum, inibi *PRIVATIM. COEMPTO*. vt dudum monui, cùm Lapidem hunc vulgaui.

In V Tribunicia potestas duodecima, incidit in annum vrbis DCCXLI. cùm peregrè & à Galliâ rediit. Tunc igitur plebi refouendæ & conciliandæ, d. sribuit ter vno anno *quadringenos*: id est, Philippicos *decem*. Verba aliquot in vitio, an sic emendenda? *QVALI. MEO. CONGIARIO. FRUMENTI. MODIVM. NUMQVAM. MINVS. QVINQVAGINTA. ET. DVCENTA. MILLIA.* vt adsignificet, tantum frumenti se quoque dedisse.

An verius, *FRUMENTANTIVM. NUM. NUMQVAM. MINVS. QVINQVAGINTA. ET. DVCENTA. MILLIA?* vt dicat *numerum* (id valet *NUM.*) qui frumentum acciperent, & ex consequenti congiarium, tantū tunc fuisse. Sed postea alius numerus, dices: haud moueor, quia sæpe id per recensum mutauit. Cogitetur tamen. Vir doctissimus & acutissimus legebat, *QVINQVAGINTA. ET. DVCENTA. SESTERTIA. & refe-*

rebat ad Suetonij hæc verba: *Congiaria populo frequenter dedit, sed diuersa ferè summa: modò quadringenos, modò treceños, nonnumquam duceños quinquageñosq; nummos.* Sed refellit hoc ipse lapis statim, qui dicit bis datos *sexageños denarios*: quos non nisi in *duceños quadrageños* nummos resoluas. Quomodo ergo *numquam minus* dederit, vt hîc sculptum? Sed & Dio in anno DCCXLVII. adnotat datos *Denarios sexaginta*.

*Sunt octo-
decies cente-
na M.

In VI. sunt *sexagena denarij in trecenta viginti millia capita*: quæ ad duos millones, * paullo minùs, se attollit. In VII. tenebræ. videtur militaris donatio esse, sed iis qui in colonias missi, aut mittendi.

In VIII. notetur numerus frumentantium, qui tunc fuit. Ista de Augusto sufficiant: etsi liberalitates eius plures ex facili dederim, vt ipse dare facilis, etiam per ludum & iocum. Cuiusmodi ista in Macrobio: *Omni- bus qui secum pilâ lusissent, sestertia centena dari Cæsar Augustus iusserat, soli Calio quinquagena.* Hîc ille, *Quid ergo? inquit, ego vnâ manu ludo?* locus lepidus: sed donatio magna in ludicrâ istâ causâ, singulis bis mille quingenti Philippici. Iterum totidem Græculo cuidam, pro carmine, & audaculo dictorio, factoque: sed tu factum fortasse noscere vis, aut potiùs recognoscere. Græculus fuit, qui Cæsari carmen obtulerat, atque ille acceperat, & nihil vltrâ. Græculo iterum paranti dare, præuênit, & carmē à se dedit, vt ostēderet talia & domi sibi nasci. Hic Græculus legere, mirari, & tandē manu in pauperem bulgam demissâ nūmos, an denarios aliquot, Augusto offerre, cum dicto: *Si plus haberem Cæsar. plus darē.* Exemplo ostendit & commonefecit, quid ille deberet: nec frustrâ. Nam statim Augustus delectatus libero & acuto facto, *sestertia centena* dari ei iussit.

CAP. XIII.

Aliorum Principum dona.

NON sit modus, si omnia Augusti tollam : omitto, & aliorum carptim aut saltuatim quædam tango. In *Tiberio* pauca sunt, parcâ ille manu & restrictâ fuit: atque ita moriens in thesauris reliquit, **viciessepties mil-* *Id est, sexa-
lies HS: quod Caligula, non toto vertente anno absumpsit. ginta sex mil-
 Ita enim hoc Suetonius : sed in Dione paullo aliter : & liones, &
 ait, *quosdam dicere ter & vices millies relictum; alios au-* quingagin-
tè ter & tricies.* Sanè pro meo sensu, posteriori parti ac- ta M. Phil.
 cedam, qui fatis iam imbibit Romanas opes. Nec in- *Sunt octo-
 tempore absumptæ à Caligulâ pecuniæ Dio dissentit à ginta & v-
 Suetonio, si sic legas : *ἐδὲ εἰς τὸ τρίτον ἔτος μέρους ἀπ' αὐτῶν* nus miliones
πιδέσμεται : nec vel in tertiam anni partem quidquam Ca-
ligula ex his seruauit. Quod sanè cum Tranquillo & ve-
 ritate conuenientius, quàm vt sit, *εἰς τὸ τρίτον ἔτος, in ter-*
tium annum. Ille verò statim exhaustus & egens, atque
 ad rapinas se vertit. In *Claudio*, notatur prima liberali-
 tas in auspiciis imperij, cùm militibus *quinadena* HS.
 promisit. Ea sunt *trecenti septuaginta quinque* Philip-
 pæi : si tamen Suetoniana illa scriptio (ex eo sumpsit) est
 certa. Nam Iosephus adauget, & *vicena* promissa ait,
 siue vt ipse numerat, *quina millia drachmarum* : qui sunt
quingenti Philippæi. & addit, *omnibus ubique militibus*
idem promissum. Quomodo hæc quidem donatio, su-
 peret omnes iam dictas, & fortasse dicendas. *Nero* se-
 quitur : quid de eo dicam ? qui, vt Suetonius ait, *diui-*
tiarum & pecunie non alium fructum putabat, quàm pro-
fusionem. Itaque nepotinos eius sumptus frustra colli-
 gam : in Suetonio atque aliis, patent : quædam addam

quæ magni & laudabilis animi sunt visa. *Militi Prætoriano* (in Dionis compendio) *ob causam aliquam iusserrat centies HS. numerari*: id est, *ducenta quinquaginta millia Philippicûm*. Et cum *Agrippina mater*, mirata improvidam fortasse liberalitatem, iussisset totam eam pecuniam, ipso coram, in mensâ exponi & expandi, ut sic vel aspectu pœnitentiam eliceret: ille magno animo, iussit alterum tantum addi, & *Nesciebam*, inquit, tam exiguum me dedisse. Egregia vox: quam cur tu rides? *AVD.* Non ipsam, sed meam cupidinem: & ô si quis hoc exiguum mihi? *LIPS.* Auidus ô homo es, nec accipies: hodie liberalitatis eius nec vmbra manet. Hoc *Nero in* militem: sed quid in regij sanguinis *Teridatem*? quod vix ipsi *Suetonio* credibile videatur, octingenta nummorum millia diurna in eum erogavit, abeunti que super HS. millies contulit. Ut hoc & capias, & ponderes; scito *Teridatem* per nouem menses continuos Romæ, aut in finibus Romanis, fuisse: & toto eo tempore immunem habitum ab omni sumptu. Decreta igitur ei in diem octingenta millia: quæ sunt viginti millia Philippæorum. Numera in mensem: quid ea nisi sexcenta millia? In nouem menses: quinque milliones quadringenta millia. Iam abeunti datum, millies HS. quasi in viaticum: quod iterum efficit duos milliones & dimidium. An potius in *Suetonio*, bis millies scribendû? augeatur altero tanto, & palam *Dionis compendium* (numeri autem in Græcis magis veri) hoc suadet. Atque ista conspicua & signata liberalitas *Neronis* est: quid minores aliæ & sparæ, sed coalescentes in grandem summam? De quibus *Tacitus*: *Bis & vicies millies HS. donationibus Nero effuderat*: & addit, *Patres censuisse, ut repeterentur ab iis qui cepissent*. Ea sunt

sunt quinquagintaquinque milliones, nisi calculus me fallit: quod & alibi vereor, & ignoscendum est in sermone hoc cursu & calore. Adiungo *Nymphidij*, post *Neronem*, promissum: non Principis, sed pro Principe tamen factum. Ipse vt *Urbanum omnem militem* & *Prætorianum Galba* adiungeret, promisit iis * septem mille & quingentas drachmas viritim; reliquis extrâ urbem, * mille ducentas quinquaginta. In *Plutarcho* hoc ita leges, ingentem donationem, & qualis antea in hoc genere nec fuit. Nam priores illæ *Drachmæ* in *Urbanos*, faciunt nobis septingentos quinquaginta *Philippicos*: alteræ in *Legionarios*, centum viginti quinque. Quò hoc ascendat in plura quàm viginti millia *Urbanorum*: in amplius ducentena *Exteriorum*? vt *Classes*, & talia, omittam. Iure igitur *Plutarchus* exclamat & queritur, plusquam *Neronem hunc renatum*, nec potuisse eam pecuniam molem exstrui, nisi vt omne *Romanum imperium* attereretur aut euerteretur: præsertim post tot & tam recentes à *Nerone* ictus. Infinitæ deinde sunt largitiones in militem, vel in populum: sed, nisi memoria imponit, infra iam dictas. Ideò nec pono, vnam *Seueri Imp.* tantum libo. *Dionis* compendium: Celebravit *Decennalia imperij sui*, & dedit populo qui frumentum solet accipere (nota semper ferè de *Populo frumentario*) itemq; *Prætorianis* decem aureos. Quâ in re se iactabat. reuera enim NEMO vnquam antea tantum SIMVL dederat, effusumque hac donatione * bis millies HS. Decem istos Aureos, scito Romanos fuisse: id est nostros viginti, aut paullo amplius. Ita magna vis assurgit, & expressa est à *Dione* summa: sed hæreo an satis ex vero additum, numquam antea tantum datū. Nam & *Commodi Imperatoris* superfluens dona-

* Latine
esset, tria-
gingta ses-
tertia.

* Latine,
Quina
sestertia.

* quinque
milliones.

donatio fuit, in Lampridio notata: *Congiarium* dedit populo, singulis Denarios septingentos videnos quinos. Qui sunt Romani aurei *vigintinouem*: pænè triplum eius, quod Seuerus postea dedit. Nam quod vir doctus quidam hîc rescribit *septuagenosquinos*, valdè est præter rem & Lampridij mentem. Sed scilicet Dionem scribere, *Simul nunquam* tantum datû: id est, & Populo & Militibus. Alioqui & superiores aliquot donationes militares, valdè excedunt. De Donis peregi, & simul de *Opibus publicis*.

CAP. XV.

De priuatorum aliquot opibus, & materia huius finis.

TRANSEO ad *Priuatatas opes*, quæ & ipsæ magnæ fuerunt, & per multos sparsæ. Quis nescit Senatores aut Senatorios plurimos fuisse, & plures longè Equites Romanos? Atqui primis illis, census sub Augusto fuit *Decies HS*: siue *viginti quinque millia* Philippæorum. Istis, id est Equitibus; census *Quadringentorum*, quæ faciunt *decem millia* Philippæorum. Hic census, quem necessariò haberent: quàm multos, & plerosque omnes, putas excessisse? Ac lubet paulisper recensere hos diuites: inter quos quem priùs, quàm Crassum illum cognomento *Diuitem*? Cicero aliique de eo, atque etiam in eum Cicero ista: *Multi audierunt ex te, cum diceres, Neminem diuitem esse, nisi qui exercitum suis* FRUCTIBVS *alere posset. Ergo hoc proposito, numquam eris diues, antequàm tibi ex tuis POSSESSIONIBVS tantum reficiatur, ut ex eo tueri sex legiones, & magna equitum ac peditum auxilia possis.* Hæc vox Crassi fuit, opinor, negantis se *Diuitem*, etsi vulgò ita audiret: quia nemo

InParadox

mo sic dicendus, nisi cui tales opes. In Plinio hoc paullo contractius: *M. Crassus negabat locupletem esse, nisi qui* Lib. xxxiii. cap. x. *REDITV annuo tueri LEGIONEM posset. In agris suis HS. bis millies possedit, Quiritium post Sullam ditissimus. Qui locus inspectione, fortasse & correctione eget. Primum de Legione vnâ ait: quod Cicero palàm de pluribus (imò & sex nominat) & item Græci de exercitu tradunt. Itaque in Plinio quoque verius censeam, Legiones. Iam quod addit, bis millies in agris possedisse: quid ergo in aliis? in seruis, in pecuniâ, in vasis ac supellectile, denique in domibus, quantum habuit? Sanè alterum tantum dixerit aliquis, ex communi tunc ratione & proportionem opum. Plutarchus scribit, solos architectos & fabros eum in seruis habuisse, ad quingentos, quorum operam elocabat in vrbe ruinis vel incendiis obnoxia: quid deinde feruorum ad reliquos vsus, domi vel in agris? Hæc eò deduco, vt solicitem & quatiā lectionem Plinij receptam: & quia non arbitror in solis agris sic habuisse. Argumento ex Plutarcho, quod totus census eius, post Decumas Herculi datas, & epulum frumentumque plebi, non fuerit nisi septem millium & centum talentorum. Atqui longè hoc ab illo bis millies abest in solis agris. Facit & ipse Plinius, qui paullo post subiicit, Multos postea se cognouisse, seruitute liberatos, opulentiores. Libertos autem intellegit, qui ad ter millies, aut circà, peruenerunt. Non insisto: dico, legendum mihi videri in Plinio, nisi qui legiones tueri posset ex agris suis. HS. bis millies possedit. Vt vniuersæ opes eius fuerint bis millies, siue quinque millionum. Senecæ locus huc addatur: De vita beata, cap. xxi. *M. Cato possidebat ipse quadragies HS. minus sine dubio quàm Crassus, plus quàm Censorius Cato. Maiore spatio;**

si comparatur, proauum vicerat, quàm à Crasso vinceretur.
 Moneo legendum, *quadringenties* HS. quod certum est:
 deinde addo, ex hac comparatione elucere, quòd haud
 multo vltra *bis millies* Crassus potuerit habere. Alioqui
 nimium interuallum sit inter Catonem Vticensem, &
 ipsum: quod Seneca negat. A V D. At enim Lipsi, vis tu
 igitur Crassum ad reditum ex agris tantum respexisse?
 LIPS. Videtur. nam & Cicero scripsit, *nisi tibi ex POS-*
SESSIONIBVS tuis tantum reficiatur: & antè, *nisi qui*
exercitum FRUCTIBVS suis alere posset. Ea verò ad agros
 spectant: & ipsa Plinij vox, *Neminem LOCUPLETEM*
esse. Et si haud nego, multos Romanorum magna lati-
 fundia habuisse: sed summa hæc exorbitet. Alioqui
 L. Domitius ille, successor in Galliam Cæsari destina-
 tus, agris sanè abundare debuit, qui (in ipso Cæsare)
 Corfinij obsessus, ad animandos milites, *in concione*
agros ex SVIS POSSESSIONIBVS pollicetur, quaterna in
singulos iugera, & pro ratâ Centurionibus Euocatis q̃. At
 enim triginta cohortes ibi militum, id est *duodecim cir-*
citer millia. Ea sint igitur *quadraginta octo millia iuge-*
rum: quid iam in Centurionibus & Euocatis, quibus
 Lib. xviii. *duplum* debebatur? Lego & in Plinio: *Sex dominos se-*
missem Africa possedisse sub Nerone, quos ille interfece-
rit. Hi verè locupletes: & quorum fundos nec milui
 oberrauerint, vt ait poëta. Sed redeo ad vniuersè Diui-
 tes, inter quos L. Cornelius Balbus meritò locandus.
 Lib. xlvij. qui (vt Dio scripsit) *homines sue ætatis Diuitiis & Ma-*
gnitudine animi supergressus est, adeò vt moriens populo
Romano viritim legauerit denarios vigintiquinque, siue
Aureum Romanum unum. Quid putemus nunc here-
 des, & legatarios habuisse? Seneca etiam noster, ille do-
 ctrinæ

etrinæ & sapientiæ, id est internorum bonorum, ita di-
 ues, quàm rarâ forte, & externorum fuit? Eum *ter mil-*
lies HS. *possedisse*, amicus illi Tacitus scripsit, & inimici
 cum multâ inuidiâ obiecerunt. A VD. Quidni Lipsi? &
 ille vir maximus, hoc vno titulo apud me minuit, quòd
 sic in opibus abundet. Philosophum hoc decuit? & qui-
 dem Romanum, qui facta sibi vindicant, magis quàm
 verba? LIPS. Miserum Senecam, vt video. quare? quòd
 nō Virtus solùm ei, sed Fortuna fauerit: & in alio tamen
 aliquo hoc laudemus. Sed quia rara hæc coniunctio,
 præsertim in modesto & sapiente; & *bona mentis*, vt ille
 inquit, *soror est paupertas*: homines indignantur, li-
 uent, Senecam, equis, & quadrigis incurrunt. At meo
 iudicio, ô virum hoc ipso magnum, quòd capere
 potuerit, quòd vtî, quòd habere (vt vno verbo dicam)
 & non haberi! Quid, quod nec eas suspexerit? inter me-
 dia censuit, inter fluxa, & quæ si abirent, nihil aufer-
 rent, nisi semetipsas. Audi illum, ô Liuor, & file. *Pone*
me, inquit, *in opulentissimâ domo, vbi aurum argentumq;*
in promiscuo vsu sit. Non suspiciam me ob ista, quæ etiam si
apud me, tamen extrâ me sunt. In Sublicium rursus pon-
tem me transfer, & inter egentes abige: non idèò tamen me
despiciam, quòd in illorum numero consideam, qui manum
ad stipem porrigunt. Quid ergo est? domum illam splendi-
dam malo, quàm pontem. Hæc vera philosophia est: pos-
 se habere, posse carere, non cupere absentes, capere &
 præsentés: iisdem vtî benè, & bonis subleuandis. Sed
 quid euagor? diues Seneca, & nostro more *septuagies-*
quingies centena millia possedit: plus meruit (audi &
 hoc Liuor:) & *multi nequaquam eius artibus pares plus*
babuerunt, vt Nero ad eum dixit. Ecce Cn. Lentulus Au-

Apud Tac.
 xlii. An.

gur (ait ipse Seneca) diuitiarum MAXIMUM EXEMPLUM, *antequam illum liberti pauperem facerent, quater millies HS. suum vidit. Proprie dixi (inquit) nihil enim amplius, quàm vidit.* Hic stupor igitur possedit ipsos decem, *milliones*, Regum aut certè Regulorum opes. Sed indicat Seneca, libertos & plus habuisse. Ac fanè de Pallante Tacitus scribit, *sestertij ter millies possessorem* fuisse: quod *quater millies*, me volente, Dionis Breuiarium in Nerone expressit. Et hoc ipsum de colliberto eius Ælio Narcisso, idem Dio in Claudio narrauit. Sed aula hos beaui, inquires. Vis igitur & homines, non è Senatu vel aulâ? ecce è mediâ plebe vnum, è Plinio: C. Asinio Gallo, C. Marcio Censorino Cos. (id fuit sub Augusto) C. Cecilius Claudius Iffidorus testamento suo edixit, *Quamuis multa civili bello perdidisset, tamen relinquere seruorum quattuor millia centum sedecim, iuga bouum tria millia sexcenta, reliqui pecoris ducenta quinquaginta millia, in numero* *HS. * sexcenties. Funerari se iussit HS. undecim millibus.* Vide tu tot seruos, boues, pecudes, tantum numere rate pecuniæ: & miror agros non expressos, quos tamen suspicor habuisse, & villas, & edes. Sed vt ut sit, familiam illam solam seruorum vide: quis Principum habet? A V D. Valdè quidem isti copiosi in seruis, quod & in Crasso notaui. L I P S. Valdè. & Petronius ex more, si non ex vero, de Eumolpo suo facetissimâ narratiunculâ, scripsit: *Familiam quidem tam magnam per agros Numidiæ sparsam habere, vt vel Carthaginem posset capere.* Certè aliquot millia esse debuerunt eorum, qui armis apti: sicut & historicâ fide Vopiscus de Proculo tradit, *eo tempore quo sumpsit imperium, duo millia seruorum suorum armasse.* Quid Belisarius ille sub Iustiniano magnus

xii. Ann.

Lib. xxxij.
cap. x.* Decies-
quingies
centena
millia Phi-
lipp.

gnus

gnus? duodecim millia puerorum (ita loquuntur) habuisse propria, Aimoinus, Regino, aliique testantur. Nam illud quod in Athenæo adfirmatè scribitur, qualè est?

Quosdam Romanorum ad DECEM aut VIGINTI millia Lib. vi.

seruorum habuisse, nec ut QUÆSTVM ex iis facerent, sed ut affeclas aut subsequeas eos modò haberent. Hoc de ser-

uis, mihi ipsi timidè tardeque credendum, & tamen credendum. De aliis armentis, simile aliquid (etsi minus

est) in Vopisco item lego, de villâ Valeriani priuatâ. *in quâ quingenti serui, duo millia vaccarum, equæ mille, ovium*

decem millia, caprarum quindecim millia fuere. Quæ mea mens, cum ista cogito? vbi nostræ paupertinæ ville, nec

millesimis horum instructæ? Et quàm pauca tamen ta-

lia aut scripta sunt; aut si scripta, ad nos peruenerunt? Casu factū est, quòd Cæsar prodiderit (& mihi casu in-

cidit) T. Labienum Legatum suum in Galliis, *opidum* l. Ciuii.

Cingulum constituisse in Piceno, & suâ pecuniâ exadificasse. Vide opes & animum Principis, qui eas in tota opida struenda conuertit: quod & medici quidam apud

Plinium fecere. Sed vnum etiam exemplum, & desino. Capitolinus de Gordiano, adhuc priuato: *Ditissimus ac*

potentissimus, in prouinciis tantum terrarū habens, quantum nemo priuatus. *Quæsturam magnificentissimè gessit.*

Ædilitatis suæ tempore, duodecim populo Romano munera, id est per singulos menses singula DE SVO exhibuit.

ita ut gladiatorum nonnumquam quingena paria exhiberet, numquam minus centenis quinquagenis. Feras Ly-

bicas vnâ die centum exhibuit, vrsos vnâ die mille: & plura deinde animalium nominatim: *quæ omnia POPV-*

LO RAPIENDA concessit. Amplius de eo, auctore Cordo: *In OMNIBVS ciuitatibus Campania, Etruria, Um-*

bria, Flaminia, Piceni, DE PROPRIO illum per QVATRIDVVM ludos scenicos & Iuuenalia edidisse. Qui benè hæc tollit singula & pensitat, quiq̃ue scit quid sit ludos olim edere: nescio quàm trutinam reperiet ad tot illa ponderanda aut æstimanda. Diducere mihi non placet, placet abiungere: & Opes Romanas publicè priuatimq̃ue satis videor ostendisse. Tu abi, cæna, dormi.

I. L I P S I

DE MAGNITVDINE ROMANA

LIBER III.

CAPVT I.

Ad Opera Romana transitum, & primò de ligneis aut temporariis dictum.



V D. Malè mihi hac nocte fuit. L I P S. Quid ita? A V D. Quia herè nimium benè. Suaues illi sermones animo inhæserunt, & per cerebri huius spatium inerrantes, verè dico, ademerunt mihi somnum. L I P S. Aliter ego dixeram: & meministi, vltimi mei, *Dormi*? Atqui cautio erit ne sic in posterum: mittemus potius, aut suspendemus, hos sermones. A V D. Quin tu verbum hoc suspende: nam meruit. Itane sermones hos tollas, in quibus vnica mihi spes solatij? nam ne nescias, vt ij qui à scorpiis sunt icti, ab iisdem remedium habent: sic ego nunc affectus. Ad te propero, qui pupugisti. L I P S. Ad me? non ego

Scor-

Scorpius, sed Aspis: aurem claudio ad has cantilenas. A V D. Benè est, pungat me & hæc aspis, vt dormiam: & suavi veneno infundat somnum. L I P S. Age, age, medebor: sed non, vt censes, suauiter mi homo: ego verò vt fastidientes quosdam ægros medici, ad exercitia, & O P E R A te ducam. Ecce enim ea ordine sequuntur. Duplicia autem Romana istæc Opera, *Temporaria* & *Diuturna*. Illa, quæ subitò & in breue tempus aliquod excitabantur, è terrâ aut ligno plerumque: ista, quæ in longum, & mansura, è latere, lapide, & materie firmiore. *Temporaria*, duplicia iterum video, *In militia*, & *Extra eam*: atq; vtraque mereri iustam admirationem. Nam siue militiam videas; quis *Fossas*, *Vallos*, *Aggeres*, & talia terrea; iterumque materialia, *Turres*, *Testudines*, *Musculos*, *Vineas*, legit, tam multa, tam crebra; & aut industriam, aut vires hæc patrantium, non æstimat & admiratur? Siue extra eam quædam, in voluptatem aut splendorem structa; quomodo idem affectus non insinuet animo vel irrumpat? Et Militaria quidem mitto, * aliàs mihi explicata: pauca ex ciuilibus tangam. Quo in genere ludicra præcipuè fuêre: vt *Theatra*, *Amphitheatra*, *Circi*, & magnæ eiusmodi moles, structæ sæpe in paucos dies, & pænè vt deiicerentur. Duo exempla in Plinio, etiam cum eius, qui tam multa A D M I R A N D A viderat aut legerat, nimiâ admiratione. *M. Scaurus*, inquit, *fecit in Ædilitate suâ opus omnium MAXIMUM, QUÆ VMQVAM FVERE HVMANA MANV FACTA, non temporariâ morâ, verum etiam æternitatis destinatione. Theatrum hoc fuit. Scena ei triplex, in altitudinem CCCLX. columnarum. Imo pars scenæ è marmore fuit, media è vitro, inaudito etiam postea genere luxu-*

* In ipsâ
Miliâ,
& Me-
chanicis.

luxuria. Summa tabulis inauratis columnæ, ut diximus; imaduodequadragenum pedum. Signa ærea inter columnas, ut indicauimus, fuerunt tria millia numero. Cauea ipsa cepit hominum LXXX. millia, cum Pompeiani theatri, toties multiplicatâ urbe, tantoque maiore populo, sufficiat largè XL. millibus. Sed & reliquus apparatus tantus, Attalicâ veste, tabulis pictis, ceteroque choragio fuit, ut in Tusculanam villam reportatis quæ superfuerant, cottidiani usus deliciis, incensâ villâ ab iratis seruis, concremaretur ad HS. millies. Quid est? frigens, nec excitaris? AVD. Nihil. ipse Plinius me tepefecit, cum scripsit, non temporariâ morâ, sed æternitatis destinatione factum. Me tepefecit, te refellit, qui inter Temporaria hoc refers. LIPS. Tene tam læuè Plinium capere? præuidebam, & metuebam. Sed hoc ille dictum voluit, istud Temporarium eminuisse etiam inter firma illa, & quæ æternitatis spe facta. Non aliud sanè dixit: & ecce alibi eius verba. In M. Scauri adilitate, tria millia signorum in scenâ tantum fuere, temporario theatro. Audin, temporario? Iterum quæ alibi: Trecentas sexaginta columnas M. Scauri adilitate ad scenam theatri temporarij & vix vno mense futuri in usu, viderunt portari silentio legum. Quos locos libentiùs adfero, quia Plinius eosdem adspexit, cum hîc scripsit: ut diximus: & ut indicauimus: nempe his ipsis locis. Sed quod hîc etiam est: Imo pars scenæ è marmore.) explicat idem suprâ, in cap. v. Marmoreos parietes habuit scena M. Scauri, non facillè dixerim sectos, an solidis glebis politos, sicuti est hodie Jouis Tonantis ades in Capitolio. nondum enim secti marmoris vestigium erat in Italiâ. Vltimis item verbis, concremaretur ad HS. millies: è manuscriptis aliquis mallet, ad bis millies: nec nimium sit

Lib. xxxiii
cap. vii.

Lib. xxxv.
cap. ii.

fit pro reliquo luxu. Alias operis partes tu per te, & otiosè, si voles, inspice & adstupesce: ego alterū exemplum, ex eodem Plinio, qui dictis iam subnectit. *Aufert animum, & à destinato itinere digredi cogit contemplatio tam prodigæ mentis, aliâque connecti insaniam è ligno. C. Curio, qui bello ciuili in Casarianis partibus obiit, funebri patris munere, cum opibus apparatusque non posset superare Scaurum (unde enim illi vitricus Sulla, & Metella mater, proscriptionum sectrix?) cum iam ne ipse quidem Scaurus sibi comparari posset, quando hoc certè incendij illius premium habuit, cōuectis ex orbe terrarum rebus, ut nemo postea par esset insanæ illi. Ingenio ergo utendum fuit: opera pretium est scire quid inuenerit, & gaudere moribus nostris, ac nostro modo nos vocare maiores. Theatra duo iuxta fecit amplissima è ligno, cardinū singulorum versatili suspensa libramento: in quibus utrisque antemeridiano ludorum spectaculo edito, inter sese auersis, ne inuicem obstreperent scenæ; & repentè circumactis, ut contra starent; postremo iam die, discedentibus tabulis, & cornibus inter se cōeuntibus, faciebat Amphitheatrum, & gladiatorum spectacula edebat, ipsum magis auctoratum populum Romanum circumferens. Quid enim miretur quisque in hoc primum? inuentorem, an inuentum? artificem, an auctorem? ausum aliquem hoc excogitare, an suscipere? parère, an iubere? Super omnia erit populi furor, sedere ausi tam in fidâ stabilique sede. Quæ uilitas animarum ista? aut quæ querela de Cannis? quantum mali potuit accidere? Ecce populus Romanus uniuersus, velut duobus nauigiis impositus, binis cardinibus sustinetur, & seipsum depugnantem spectat, periturus momento aliquo, luxatis machinis. Disertè ista Plinius, & culpans simul*

ac laudans. Quid autem nos? Legimus, intelligimus, vix credimus (de meo sensu hîc fateor:) & qui quanti que illi *cardines singuli*, qui tota theatra sustinerent, verterent, iungerent, disiungerent que? De me, parum est: sed coëant ipsi artifices nostri & architectones, laborabunt in re non dicam conficiendâ, sed exputanda. Plura huius generis passim: sed in circumfusâ rerum copiâ, excerpimus pauca & eligimus, cum iudicio, vt possum.

A V D. Hîc non adhibes, quod cum pace tua dicam.

L I P S. Quid iam? A V D. Nam ars & ordo ita præcipit, in dicendo narrando que ascendere, &, vt ille ait, *ex fumo flammam, non ex flammâ dare fumum*. At tu culmina operum dixisti, & minora haud dubiè dabis. L I P S. Minora? aliter dices, cùm illa *Perpetua* & firma audies: quid si & nunc aliter in his Temporariis? Caij Caligule pons nescio an ingenio, mole certè & magnitudine vincit, sed & insanâ illâ ambitione siue periculi, siue nouitatis. Struxit eum in ipso mari, nauibus impositum, magnitudine *trium milliarium & quadrantis*: id est, toto illo spatio, quantum est à Puteolis ad Baulos. Per hunc, triumphantis ritu, cum Senatu militibus que incescit, spectante toto populo: in eodem epulatus, noctè etiam peruigilem egit, inter lasciuias & ludos. Addo autem *in paucis diebus* (nam & sic narrant) pontem hunc totum structum: vnde tam subitò nauibus, armamentis, trabibus, omnia aliâ materiâ conuectâ? Immensum opus perpendenti, sed cui laudem vanitas detrahit. nam quo fine structum, nisi vt destrueretur? Simile in *Caracallâ*, quem alterum *Caligulam* licet dicere. Is autem non suis solùm, sed alienis opibus proteruè abusus. cùm, vt Dio scribit, *adigeret homines Senatorij ordinis*, QV OTIES
Româ

Româ egrederetur, DOMOS & PRÆTORIA varia struere, item DIVERSORIA splendida: et si in plerisque non solum non acturus hæsurusve erat, sed nec ea visurus. Amplius, ubicumque hiematurus erat, aut etiam putabatur hiematurus, cogebantur AMPHITHEATRA & CIRCOS struere, nec in sumtum quicquam ab eo capientes: & ea ipsa mox deruenda. Quis cum hæc legit, siue audit, non admiratur opes & splendorem Senatorum, qui patrare hæc poterant? non item detestatur illius insaniam, qui iubebat? Olim in populi totius voluptates, Theatra & Circi structi: nunc in vnius imaginarium vsum. Nam nec vidit hæc omnia sæpe, vt Dio dixit.

CAP. II.

Diuturna opera, & caput omnium Roma. De situ eius, & in primis de magnitudine indagatum.

SED à damnosis istis & *Temporariis* ad stabilia & *vtilia* veniamus, & quæ *Perpetua* dixi. In hoc genere multa sunt Romanæ magnificentiæ, nec in vrbe solum aut ipsâ Italiâ, sed per terrarum orbem sparsa. Licet dicere. diuino munere Romanos datos, ad quidquid rude, expoliendum, ad quidquid infectum, faciendum; & loca hominesque, elegantiam aut artibus, passim exornandos. Quot *Opida* noua structa? vetera ampliata, aut reparata? in iis *Templa, Basilica, Fora, Porticus, Aqueductus, Via, Theatra, Circi*: & plura, quæ aut vsum haberent, aut amœnitatem. Quid iam *Prinata* structuræ, vt *Domus* aut *Villa*? omnia splendida, ab ingenio simul & pretio commendanda. Atque ego hîc hæreo. **AVD.** Quid tibi est? **LIPS.** Sine. **AVD.** Non pergis? **LIPS.** Ma-

ne inquam. A v d. In capite viæ sistimus? L I P S. In capite. immensa & vaga se aperit, nec satis scio quâ limitem eam aut stringā. Poëtæ animi causâ solent dicere,

Vnde tamen cepti iam surgat carminis ordo? ego ex vero : & incertus animi feror, vbi ordiar desinamque. Nam si vel singularia tantum ostēdenda sunt; per omnes prouincias, vrbes, agros eundū est: vbi que enim tale fuit. Infinita, inquam, ista sunt, & cum poëta principe,

*-quot folia aut flores in vire virecunt, Aut quot muscarū densarum examina multa.

* -- ὅσα τε φύλλα καὶ δῦτ' εὖ γίγνεται ὥρη,

Ὡς γε μυῶν ἀδινῶν ἔθνεα πολλὰ.

Sed cogitanti hoc fedet, solam *Roman*, tibi ostendere, omnium operum opus, vt sic appellem: & in quâ solâ fuit, quidquid vbi que fuit. Ipsam si in parte nosti (totam ne speres:) etiam illa prouincialia noueris, quæ pleaque facta ad hoc exemplar. Nam & colonix Capitolia sua, Fora, Basilicas, Theatra, & talia, habebant ad vrbis dominæ & parentis suæ ritum. Roma igitur faue, & te ostende: & paulisper è ruinis tuis, si fas est, veterem vultum attolle. Situm tuum primum video, & laudo: aut potius pro me Camillus ille apud Liuium, qui te bis condidit, & dum Gallis eripuit, & dum tibi ciues retinuit & firmavit. Nam absque eo abibant, & Veij iam Roma erant. Ille igitur: *Non sine causâ Dij hominēque hunc Vrbi condenda locum elegerunt.* saluberrimos colles; flumen opportunum, quo ex mediterraneis locis fruges deuebantur, quo maritimi conuentus accipiuntur; mare vicinum ad commoditates, nec expositum nimia propinquitate ad pericula classium externarum; regionum Italia medium. Videamus, Auditor, paulisper horum singula: & iuuabit me recitatio, & quasi in Româ iterum fiet. A v d. Bonâ veniâ, quot iam anni ex quo lustrasti? L I P S. Ipsi vigin-

vigintiseptem, cùm discessi : sed animum non auelli, & antiquitas amabilis, sed & religio venerabilis sæpe eò vocant. Quod ergo dicebam, Camilli ruminemur. *Saluberrimos colles.*) Hodie vix ita sunt: sed caussa, solitudo & desertio; tum & auræ è vicinis paludibus vel æstuariis, & quas alij indagent. *Flumen opportunum.*) Tiberis ille pater, qui vrbem secatur: *latus circà eam*, vt Dionysius monuit, *quattuor iugera*, (siue pedes cccc :) *profundus sic*, vt *maximas naues suscipiat, & portet*. Addit & *Mare vicinum.*) nam distat xvi. *millibus passuum*, vt Plinius & Antoninus metiuntur; siue, quod idem est, *centum viginti stadiis*, vt Dionysius. Non ergo Strabonem audies, qui *centū nonaginta* ea computat: sed numerorum & librarij sui errore. In Appiano an error talis, qui non nisi *centum* stadia computat? Nam verba Censorini Consulis sunt, suadentis siue iubentis Carthaginien- ses, dirutâ vrbe suâ, à mari abire: *A mari iubemus non nisi lxxx. stadia vos recedere*, cùm nos ipsi ab eo distemus *stadiis centum*. Ego tamen hoc non mutem, & verè dictum censeam: sed aspectu latæ & magnæ illius Romæ, quæ extrâ prima mœnia (mox dicam) in orbem se diffundebat. Ab eâ ille computat: etsi fortasse parùm adhuc verè aut decorè in Censorini personâ. Sed æuum suum, vt fit, aspexit. Claudit Camillus, *Italiæ medium esse.*) Ita, in longitudine. nam latitudinem si spectas, finem tenet. Hoc verius, quàm quod Vitruuius etiam *mundi mediam Romam* fecit: nec hoc nobis persuadebit, Lib. vi.
cap. 1. nisi sui fortasse & Romani mundi. Hæc Camillus: sed Rutilius Gallicanus, cuius Itinerarium exstat, ab infimo æuo non infimi carminis, hoc quoque in eâ miratur, quòd *munitissimo loco* sita, nec Alpibus solùm

ab omni vi subitâ , sed Apennino defensa.

Si factum certâ mundum ratione fatemur,

Consiliûmque Dei machina tanta fuit,

Excubiis Latiis pratexuit Apenninum,

Claustrâque montanis vix adeunda viis.

Inuidiam timuit Natura, parûmque putauit

Arctoïs Alpes opposuisse minis.

Sicut vallauit multis vitalia membra,

Nec semel inclusit quæ pretiosa tulit:

Iam tum multiplici meruit munimine cingi,

Sollicitôsque habuit Roma futura Deos.

Ista Rutilius pulchrè: sed nos à Situ *Formam* videamus.

Nec veterem illam reuoco, *Quadratam*, & qualis sub

Romulo fuit: perfectam & plenam considerasse sit fa-

tis. quæ rotunda propemodum fuit (etsi haud iustè ta-

men) & septem suos colles amplexa , grandem ambi-

tum fecit. Quem vtinam firmiter metiri tibi possim?

ah, ah. A V D. Quid suspiras? etiam iterum? L I P S. Ite-

rumque, & ab imo pectore. Ah, cur non Romæ nunc

paucos dies sum? cur non obambulo, video, metior?

cur non cum viris doctis inibi confero? firmiùs for-

tasse certiusque definirem. Sed vel sic conabor. A V D.

Ego in suspirio tuo rideo. Nam cur voues, quod potes,

imò quò impelleris, aut inuitaris? nōne Itali, & ipsa

Roma, hoc faciunt? L I P S. Faciunt, & gratiam pro iudi-

cio vel affectu debeo: sed quid dicam? Fatum meum

primò me tenuit: mox & Rex: illud occulto decreto,

hic apertâ benignitate. Ad summam, video Belgæ mi-

hi in Belgis moriendum: etsi de reuifendâ eâ obiter non

despero. Sed de nostro ambitu. scribunt veteres, Ser-

uium Tullium regem, ad quinque colles iam inclusos.

vrbi,

vrbi, duos addidisse *Viminalem & Esquilinum*, & talem tantamque deinceps fuisse Romam. Dionysius in eâ re apertè: *Ulterius verò NEQVE NVNC processit vr-* Lib. iiii.
bis ambitus, fato aut numine, ut aiunt, non permittente.
 Neque nunc, inquit: quando? Augusti ævo, quo ipse scripsit. Sed ille ipse ambitus igitur quantus? idem ita docere voluit, dum subiicit: *Quòd si quis metiri ambitum eius voluerit, conferat cum Athenarum vrbe, nec multo maior apparebit.* Quod idem & alibi iteravit. Voluit, in- Lib. viii.
 quam, docere: vix nos docuit, sed suos sanè Græcos, qui Athenas norant. Nos quid? & de huius ambitu quæramus. Lego quidem in Dione Chrysostomo, *Circuitum* Orat. de tyrannide.
Athenarum, cum Pyraeo & Longis muris, fuisse ducentorum circiter stadiorum: quæ nobis sint viginti quinque milliaria. Sed an Roma igitur tanta? non opinor, nec ausim dicere: & caussa est, quòd Dionysius disertè *Athenarum astu* siue urbem dixit, nec *Pyraeum*, opinor, aut *Longos muros* inclusit. Itaque iterum hæremus. A V D.
 Vis ego te transferam? L I P S. Gratia erit. A V D. Nam hodie ipsa res docet, & muri illi antiqui ambitum habent XIII. aut XV. milliarium, ut notant. Quid ergo ambigis? L I P S. Hos istos, veteres non fuisse. Multa sunt, quæ arguunt: sed ipsa maximè forma sic enormis, & alibi sinuans introrsus, alibi procurrens extrorsus: prorsus, ut non à priscâ illâ accuratione & elegantia, sed à nouitiâ aliquâ necessitate impositum & subitum opus videatur. Neque ambigendum est, ut mox dicam. Sed de veteri igitur ambitu, videamus ecquid Plinius iuuabit, qui ex professo describit: *MOENIA eius collegere, AMBITV, Imperatoribus Censoribusq; Vespasianis, passuum XIII. millia ducenta. Complexa montes septem, ipsa divi-*

diuiditur in *Regiones XIII. compita earum CCLXV. Eiusdem spatij mensurâ currente à Milliario, in capite fori Romani statuto, ad singulas portas, efficit passuum per directum xxx. millia, DCC. LXV. Ad extrema verò tectorum cum castris Pratoris, ab eodem Milliario, per vicos omnium viarum, mensura colligit paullo amplius LXX. millia passuum. Rem totam hîc habeas, si verba hæc aut tenebras suas, aut & vitia, non haberent. Inspiciamus. *Mœnia ambitu colligere facit passuum XII. millia. Sanè hoc sit pro hodiernæ Romæ modo, si modò lectio firma: quâ & Prisci libri sollicitant, xxx. millia scribentes; & Leander, atq. alij superioris ætatis, qui xx. millia legerunt, & defenderunt. Pergit, Eiusdem spatij mensurâ currente à Milliario.*) Intellego idem spatium, totum illum ambitum, & eo inclusum. Hoc, inquit, spatium si metiris: vnde? à Milliario: & intellegit * *Columnam illam Auream in foro Romano statutam, in quam Italia omnes via finiunt, ut ait Plutarchus. Augusti hoc institutum fuit, qui & posuit Columnam, & ab eâ voluit currere mensuras. Pro hoc igitur more Plinius metitur, non à portâ ad portam (ut video quosdam suspicari) sed palàm à Miliario, quod quasi in vrbe mediâ, ad singulas portas. Sed numerieius manifestò falsi sunt. Si xxx. millia ad quamque portam: ergo in totâ diametro LX. sunt: ergo in ambitu, cxxc. quo quid absurdius? Et simile erit, etsi minus, si à portâ ad portam xxx. sint, uti volūt. nam tunc certè triplicatâ diametro, ut solet, exsurgent millaria in ambitu nonaginta: an ipsis fatendum, aut nobis credendum? Iam in vltimâ mentione, ad extrema tectorum, inquit, ab eodem Milliario, LXX. millia passuum Id quoque quî potest? crescent suprâ modum hæc in ambitu,**

* De quâ
Dio, Tacitus,
& Icu.

bitu, nec video excusanda. Vt mihi nunc videtur (meliora auidè semper audiam, capiam, vel potiùs arripiã:) sed vt mihi nunc, Plinij numeri isti corrupti sunt, & sic reformandi. *Mœnia collegère ambitu passuum xxiii. millia.* Hoc primum pono, tantam fuisse Romam: aut si placet, xxii. parum in vno alteroque milliari est. Vnde doceo? ex Olympiodori quibusdam Excerptis Græcis: in quibus ad verbum est, *Romane urbis murus mensuratus ab Annone geometrâ, quo tempore Gothi primam invasionem fecere, habebat spatium unius & viginti milliarii.* Iste vno milliario minus, quod alius addit: & Martinus Polonus, qui Chronicon scripsit: *In circuitu, inquit, Romæ sunt milliaria viginti duo, præter Transiberim & Leoninam civitatem, cum quibus dicitur habere quadraginta duo milliaria.* Vnde hæc habes Martine? ex aliquo veterum: nam pro tuo ævo, vtrumque hoc planè est falsum. At pro veterum, & verbis Plinij, planissimè verum. Pro verbis, dico, Plinij corrigendis, & porrò videamus. Nam altera mensura erat, à *Milliario ad portas xxx. millia.* Ego dico scribenda $\infty \infty \infty$: id est, *tria millia.* Et quis nescit ex ignorantia harum notarum sæpe, cum in Plinio, tum Livio, & alibi, peccatum? Nam putarunt *Denarias* notas esse: & inde nata illa *millia xxx.* Atqui aliter est; & sic si emendas, quanta proportio & consensus? Roma habet in ambitu xxiii. milliaria: à milliario ad portam, *tria milliaria & passus septingentos sexaginta quinque:* ergo in plenâ diametro, *septem millia quingentos triginta:* hanc triplica, nonne xxii. & semis in ambitu redduntur? At Plinius neglexit aut insuper habuit de dimidio, & rotundè xxii. aut xxiii. dixit. Simile in mensurâ vltimâ, quæ ad extrema teñtorũ colligit Lxx.

Q millia.

millia. Tu verò fac *septem millia*: & rem factam habes. Dupliciter enim metitur. à milliariorum primùm ad ipsos muros portasque: deinde ab eodem, ad extrema recta. Quare hoc? liquet enim Romam quasi duplicem fuisse: & clausam muris; & alteram non clausam, quæ tamen in orbem circumiecta esset, & continentibus ædificiis instructa. Vtramque igitur dimensus, dicit hanc ultimam in semidiametro *septem miliaria* habere: duplicata, sunt *quattuordecim*: triplicata, erit ambitus iustissimè, *quadragesimorum*. Et nonne hoc ipsum est igitur, quod Martinus dicebat? Addo probationem huic numero alteram, ex Vopisco. Is de Aureliano Principe: *Muros urbis Romæ sic ampliavit, ut quinquaginta propè millia murorum eius ambitus teneant*. Quod tamen Zosimus Probo Imperatori perfectum opus adscribit. Si igitur tunc *quinquaginta propemodum* (nam id notat:) ergo iam tantè facile ambitus ille ædium extremarum, *quadragesimorum*: quia muri noui longius etiam paullo ab ædibus remoti. Ego in hac re nihil incerti vel infirmi video, nisi quòd opponi nobis possunt (nihil enim dissimulabo, & ipse subiiciam) duo. Prius, quòd *Milliarium* non videtur iustè fuisse in vrbe mediâ, atque ita mensuratio faller. Nam fuit in *capite*, ut Plinius ait, *fori Romani*: atqui ab eo ad Tiberim, non par reliquæ vrbi spatium videtur, & maximè quòd ibi *Campus Martius*, omnium consensu, extra urbem. Respondeo. ut nunc quidem Roma est, non planè medium illuc esse fortasse (metiar, si illuc sim: nunc tabulis credo:) sed olim videtur fuisse. Sanè Victor, & Notitia Imperij, in foro ipso Romano, nec longè à *Millario*, *Umbilicum urbis* ponunt. Sed esto tamen non exactè in medio: quid refert? non sic γεωμετρικῶς

nas omnia, & ad lineam regulamque veteres metiuntur. Non mouet me de *Campo Martio*, quem fateor extra pomoerium habitum, & intra moenia tamen fuisse. Nonne idem in *Auentino*? qui vsque ad Claudij tempora, in pomoerio habitus non fuit, & tamen à Regum tempore vrbi inclusus. Et campus quidem Martius etsi olim non erat, tamen Iulius Cæsar (quod Cicero ad Atticum scribit) destinabat eum includere: quum scio an non Augustus fecerit? nam & is pomoerium protulit: an denique non Nero? quem ego præcipuè puto in totâ Româ mutasse & innouasse. Et ab eo sanè facies & forma est, quam Plinius descripsit. Alterum, quod obiici potest. Olympiodorum non nisi *viginti & unum* milliaria attribuere sub Honorio, cum Roma capta fuit: vbi ergo illa *quadraginta duo* nostra, vel Aureliani *quinquaginta*? Respondeo, fuisse, & defuisse. Nam ecce cum Constantinus sedem imperij transtulit, & vnâ secum tot nobiles familias abduxit, frumenti etiam trientem abstraxit, denique seipsum & Aulam: nonne probabile est, Romam iterum valdè minuisse? idque in extremis & longinquis maximè, vt solet: atque ita reditum, collapsis aut disiectis Aureliani muris, ad veterem ambitum & modum. Alioqui & alterum mihi argumentum non inualidum pro tanto ambitu est, ex ipso Victore & Rufo, qui *Regiones vrbis* singillatim dimetiuntur. Sunt igitur quædâ, vt illa *Auentini*, quæ habent in ambitu *xxxiii. millia. cccc. lxxxviii. pedes*: nonne ea reddunt *sex milliaria* amplius & *semissem*? Quid in reliquis illis *xiii*? in quibus vna item aliqua *xxx. millia pedum* habet, aliæ ferè *xvi. xv. xii*: & minima omnium *xi*. Profectò ex his iunctis ingens ambitus exsurgit, & (computa si lubet)

propemodum ille noster. Sed tertio aliquis dixerit, quod tu antea, muros hodiernos contra nos esse. Sunto. tu veteres eos potes credere? & ita nescis toties dirutam, incensam, vastatam: iterumque instauratam & relectam esse? Noli arbitrari quod in iisdem vestigiis. nam quâ spe eiusdem frequentiae, aut felicitatis? Imò Honorius contraxit, post Belisarius, Narses, denique & Pontifices Romani. è quibus *Hadrianus Primus* (vt Blondus tradit) *muros eos, qui nunc exstant, centenis aureorum millibus è Thusciana contractis, exstruxit.* Sed hæc apud alios leges: ego sententiam meam sine fūco liberè, & item sine pertinaciâ (quod profiteor) dixi. Hic autem sistit me & percutit miserans quædam cogitatio. Ego te Roma illa vetus, & speciosa super omnes vquam aut vnquam vrbes, non solum non video, sed etiam quæ fueris, quæro? Quæ fueris? inò & vbi fueris: & quâ scio, an non & aliquando, vtrum fueris quæretur? Non magis hoc mirum, si sæcula plura current, quàm nunc de Thebis Ægyptiis aut Troiâ dubitari. Nam habet hoc ætas, vt formam primò tollat, tum rem, tum famâ & nomen. O spes & res humanæ, quid estis? quò itis? huc flectite. En potens & superba illa Roma, quæ VRBS ÆTERNA audiebat; quæ VICTVRA CVM SÆCVLIS; quæ DEORVM OPVS ET CVRA, tota periit, condita in ruinis suis iacet, & laboramus eruere, & adstruere magnitudini eius fidem.

CAPVT III.

Magnitudo Suburbiorum Romæ, & hominum in totâ Româ multitudo.

SED philosophandi alibi sit locus: curramus nūc institutū cursum. Romam igitur duplicem habemus, veteri ambitu, & nouo: est & tertia quædam sine ambitu, & quæ in suburbiis procurrit. Ea quoque ingens, & Plinij imagine ostendenda: qui ait, *exspatiantia tecta multas addidisse vrbes*. Plures, inquam, sunt vrbes, & tot quot suburbia ipsa. Quæ Tybur, Oriculum, Ariciam, atque aliò excurrerant, sed maximè Ostiam & mare versus. Illuc vel ad x.v. aut circiter milliaria procedebant: & fidem huic assertioni Neronis consilium ac destinatio faciat. cui ab hac causâ visum Ostiam tenus (ait Suetonius) *mœniâ promouere, atq; inde fossâ mare veteri vrbi inducere*: etsi non effecit. De hac magnitudine iam suo æuo Dionysius: *Omnia loca circa urbem habitata, sine mœnibus esse. in quæ si quis intuens magnitudinem, Romæ exquirere velit, frustrâ eum fore, & hasurum ubi desinat vrbs, ubi incipiat. Adeò suburbana, inquit, ipsi vrbi adherent & innexa sunt, & speciem IMMENSÆ LONGITVDINIS exhibent spectanti*. At maior etiam maiorque post illum. & Aristides Rhetor (sub Hadriano vixit, cum vrbs in summo flore) comparat eam nō ineptè cum Homericâ niue: *quæ excelsorum montium iuga operit, & agros item ac pingua virorum culta*. & addit: *Descendit etiam & porrigitur AD MARE ipsum, ubi commune est emporiū, & omnium è terrâ gignentium distributio*. Atque idem haud vanâ μεγαληγορία: *Tantam Romam esse, ut in quacumque parte quis constiterit, nihil im-*

pediat & in mediâ eum esse. Quem locum hæc talia habeant, nisi in magnitudine istâ adstructâ? At tu vultu renides, & fortasse animo dissentis. A V D. Etiam verbis, si licet. L I P S. Licet verò, atque adeò inuito. A V D. Nam quæ tu sic extollis & producis, Ostiam, Tybur, aliò; hæc omnia ego atque alius dixerit, non habitata ædificia, aut vrbis partes, sed Villas, Prætoria, & voluptarias eiusmodi domos fuisse. L I P S. Sanè alius hoc iam dixit: memini: sed quem reiicit, præter dicta, multitudo infinita hominum, quæ in vrbe hac totâ fuit. Opportunè enim & hoc argumentum addam pro magnâ meâ Româ. Possumusne igitur satis certò eam multitudinem colligere & adfirmare? possumus è vestigiis scriptorum, quæ sagaciter ibo indagatum. Ex lapide Augusti, sæpe iam nominato, item quæ è Suetonio constat, *trecenta viginti millia* aliquando fuisse plebis vrbane: plebis dico tenuioris, & quæ è publico victitaret: imò suprà. Considera, & institue ratiocinium: sit tanta multitudo inopum istorum, quanta iam etiam diuitû? Quot illi Senatores aut Senatorij, quot Equites, & ex ipsâ plebe honesti? Visne illos quoque *trecenta millia* fuisse? age, funto vel *ducenta* tantùm: quid conficitur? pueros feminasque addendas: & quo numero? profectò duplo triploque (si non vltrà) superarunt: & ita vbique gentium aut vrbium obseruamus. Si placet igitur, consumma: habemus iam nunc in nostrâ Româ (vix audeo dicere) *duos hominum milliones.* Quid tamen trepido? verum fortiter dicendum est, & plura etiam addenda. A V D. Plura? at vereor ne iam nunc extra veri metas iueris, certè opinionis. L I P S. Plura inquam, & vide. Nónne probabile est totidem seruos Romæ, quot liberos fuisse?

A V D.

A v d. Socratis instituto mecum agis, & interrogando inducis. Sed ego circumueniri metuo, tu tibi responde.

L I P S. Fiat. dico totidem, dico plures. Nam tenuium quotusquisque fuit (vt tunc mores) cui non vnus alterve seruulus? At diuites illi agmina eorum, *agmina* dico (& sic Ammianus loquitur) *post se trahebant*. Vnus Pedanius Costa in Tacito, *quadringentos* seruos sub tecto suo & domi habuit, cùm ab vno eorum est interfectus. Et crede mihi nemo diuitum istorum aut lautorum fuit, cui minus centenis aut ducenis: qui in varia sua officia aut munia diuisi. Sed quid ambio aut argumenta colligo? cape certum & fidei notum testem, Senecam. Is de suo æuo: *Dicta est aliquando sententia in Senatu, vt seruos à liberis cultus distingueret. Deinde apparuit, quantum periculum immineret, si serui nostri numerare nos cœpissent.* Quid clarius dici potest, seruos plures liberis fuisse? Nec sic ramen omnes habemus: adde.

A v d. Abeo. L I P S. Quid tibi est? A v d. Nam tres aut quattuor milliones mihi iam struis, quātum nec in prouinciis quibusdam aut regnis. Quis hæc ferat? L I P S. Si ferre non vis, deice: per me licet. Tamen rem tuam iam sum dicturus. A v d. Rem meam? L I P S. Tuam. peregrinos traduco iam Romam. A v d. Hem, hem maneo. ô siste me illic. L I P S. Ecce. dico Peregrinos ex toto orbe Romam olim venisse, alios negotij sui causâ, alios publici, multos & mansionis. Ita semper ea vrbs referta iis, cùm hi inirent, alij exirent: atque ipsa, vt mare, admitteret, emitteret, nec cresceret minueretve. Itaque Aristides Romam dicit esse, *velut cōmune totius terræ opidum.* Item, *omnes gentes, quasi viciatim diuisas, ad hanc suam arcem conuenire: quæ nunquam ulli se negat, sed vt terræ*
solum

solum fert omnes, sic hac omnes homines capit. Athenæus quoque cum eo: apud quem Orbis populus Romani dicuntur ab hac causâ: ipsa vrbs, Orbis compendium & epitome. Eadem vrbs urbium: quia videre in eâ est omnes vrbes collocatas. deinde addit: *Deficiat non vnus dies, sed quotquot habet annus, si quis adnumerare conetur OMNES VRBES IN CÆLESTI istâ vrbe positas: idq; ob nimiam copiam. Nam & TOTÆ NATIONES illic simul & confertim habitant: ut Cappadocum, Scytharum, Ponticorum, & aliarum complures. At tu iterum renides. A VD. Et renitor quoque. an Græcis his credam, & sic oratoriè loquentibus? Dies deficiat & annus numerantem: item, Tote nationes habitant: & ista, quæ tu scis dici in speciem, in re non esse. LIPS. In re non esse? audi, audi: quoniam Græcis parum apud te est fidei (etsi in hac re Romanâ & exterâ debebat) audi, inquam, Romanum igitur testem, & eum Romanâ fide accandore. Is est Seneca noster, qui sic ad Heluiam matrem: Aspice hanc frequentiam, cui vix urbis IMMENSA TECTA sufficiunt: MAXIMA PARS illius turba patriâ caret, ex municipiis, ex coloniis suis, ex TOTO denique ORBE TERRARVM confluxerunt. Quid ea verba tibi videntur? urbis immensa tecta vix capere incolas: item, maximam illorum partem, exteros esse: denique ex toto orbe eò concurriri. Et ista mox iterat: ac postquàm causas recensuit passim veniendi varias (lege, & iucunda sunt:) addit: NVLLVM non HOMINVM genus concurrat in Urbem, & virtutibus & vitiis magna premia ponentem. Jube hos omnes ad nomen citari, & Unde domo quisque sit, quare: videbis MAIOREM PARTEM esse, quæ relictis sedibus suis venerit in MAXIMAM quidem ac PVLCHERRIMAM urbem,*

urbem, non tamen suam. Nec verba hæc sunt nuda, neque illa quidem Athenæi de *totis nationibus*: quia & totæ, in certis partibus, Romę habitabant. Ita Iudæi trans Tiberim, alij alibi: atque etiam cœtus & concilia sua habuerunt. Suetonius indicat in Iulij funere: *In summo publico luctu, exterarum gentium multitudo, suo quoque more, lamentata est.* Vt iam igitur hoc claudam & definiam, putâsne & Seruos & Peregrinos minus *duobus millionibus* fecisse? Ita in vniuersum sint *quattuor* Romæ, & circa eam: nec mitius aut contractius, vt scripta veterum sunt, ego possum. Suspensum te animi video: & ego ipse pænè fluctuo: sed validi illi venti Auctoritatum nauim nostram huc impellunt, sistamus & in anchoris firmemus. A V D. Non sanè id potest. nondum in tranquillo es, ne puta. Mihi quoque adspirant venti, & ecce ab Oriente. Alexandria illa sic celebris, sic maxima, sic omnium confessione post Romam secunda, non nisi *trecenta millia* habuit *liberorum capitum*: quod Diodorus tamen quasi pro re magnâ posuit, & adfirmavit. Atquin ea nec multo Româ ipsâ minor. LIPS. Respondeo, Alexandriam longè Româ illâ triplici dictâ minorem esse: & cuius ambitus ex Iosepho & Strabone, vix *decem milliarium* sit (ponunt enim *triginta stadia* in longitudine, *decē* in latitudine:) aut si Plinio maius credere, *quindecim*: quò & ego inclino. Sed quanto nos iam plus habuimus? Deinde quæ comparatio est, vrbs Negotiatoriæ cum hac Imperatoriâ? in quâ vel Aulæ, vel Ludorum & Voluptatum causâ, plus pænè dixerim hominū fuisse, quàm quot Diodorus scripsit. Et tamen *libera capita* ille tantum scripsit: attende: & incolas tantum atque assiduos: vbi exteri aduentores?

vbi serui? quos longè superasse iam dictos licet affirmare. Nam alioqui nihil magnum Alexandria illa fuisset, cùm & Lutetia vicina nostra ad *quadringenta millia* nuper (nam nunc exaruit & defloruit) habuerit; ipsa Constantinopolis hodie ad *septingenta*. Quæ omnes quantum ab ambitu Romano absunt? quantum à magnis, continentibus, altisque illis ædificiis? A V D. Sed adde etiam Lipsi (& considerandum est) vacuis multis & inhabitatis ædificiis. Nam quot ea Romæ fuerunt? tot templa, porticus, basilicæ, theatra, circi, fora, balneæ, thermæ, cetera publica: quæ vel magnam partem, si non maximam, vrbis occuparunt. Deflecte aut resiste, si potes, huic etiam vento. L I P S. Resisto, plenis velis, prôrâ obuersâ. Nam ista quæ tu vacua perperam putas, ego aio plenissima fuisse. Balneas & Thermas nominasti: quid? an non in iis multitudo ministrantium, ad obseruandum, purgandum, aquam aggerendam, lauandum etiam, fricandum, vngendû, si quis seruum non habuisset? Templa autem, Basilicæ, Fora, suos custodes & ædituos habebant, satis grandi sanè numero, ob sacrificia, ob ornatum, & tutelam. Sed duo etiam ego omisi, valdè ad frequentiam vrbis, Milites, & Palatinos. Milites tot illi, in præsidio Principis aut vrbis erant: iis sui calones, & honestioribus serui plures: scito certò vel ad *centena millia* excreuisse. At Palatinos dico, totam Principis aulam: in quâ quot officia aut ministeria fuisse dicemus? Lapidés antiquos inspicere dicent in parte, & suggerent materiem tibi cogitandi. Est & tertium, sed verè recundè vix dico. Meretrices & scorta vtriusque sexus (proh pudor! sed res ita fuit) ingentem numerum reddiderunt, vt in vrbe quam multi cælibes, multi exteri

fine

sine vxoribus, inhabitarent aut frequentarent. Ad summam, mi Auditor, desine reflare ampliùs & opponere; aut, vides, longiùs longiusque res hæc ibit. A V D. Quiesco tuâ causâ, & credo (vt sic dicam) nec credens. Tamen vnum etiam quæsierim: si tot illic millena millia, vnde iis cibis? L I P S. Hoc meritò & quæris, & ego decîdam, sed paucis Senecæ verbis. *Cogitate*, inquit, *hanc civitatem, in quâ turba per latissima itinera, sine intermissione defluens, eliditur, in quâ consumitur*, QUID QUID TERRIS OMNIBVS aratur. Orbis, inquam, pænè totus hanc suam metropolim adibat, & alebat: quid ambigis alimenta suffecisse? Imò repete quæ suprâ dixi, de Frumentatione: tot milleni modij in diem, adstruunt pænè duos hominum milliones, dumtaxat tenuiorum. Nunc de Alimentis, & Aristidem audi: *Mare per medium vestrum imperium porrigitur, cui undique ample regiones adiacent, necessaria pleraque vobis subministrantes. Nam ex OMNI TERRA MARIQUE, quidquid vel anni tempora gignunt; vel regiones singula, fluvij, lacus, artesq; item Ingenia tum Græcorum tum Barbarorum proferunt*, ID OMNE ad vos defertur. Itaque si quis talia omnia videre desiderat; is vel per totum orbem peregrinetur necesse est, vel in vestrà istâ urbe versetur. Quidquid enim apud alios vel crescit, vel conficitur, hîc affluit & abundat. Tot autem & tantæ onerariæ naues singulis anni temporibus appelluntur, vt urbs * COMMVNIS QUÆDAM ORBIS OFFICINA videatur. Ecce, merces vndique habes, copias vndique, frumenta, fructus. Nec plura opus de alimentis: addámne duo argumēta etiam multitudinis, atque vnum ex iis iocosum? Lampridius scribit, Heliogabalum *seruis imperasse, vt omnes araneas*

* xci vbi rē
tūc vñs eg-
pūsiq; tot.

colligerent in vrbe : atque eos collegisse ad decem millia pond. additque Heliogabalum subiecisse, *Vel hinc intelligendum* QVAM MAGNA ROMA *esset.* Verum est : & quot domorum angulos excuti oportuit, ad hoc pondus ? & domorū per omnes angulos ferè habitatarum ? Alterum argumentū triste, & à peste. In Eusebij Chronico traditur, *Ingentem Romam luem factam, ita vt PER MULTOS DIES in ephemeridem decem millia mortuorum referrentur.* Exhausta fuisset in diebus aliquot Roma, si non Alexandriam, & quidquid dici potest, longè superasset. Concludo, & moneo, per hanc frequentiam Romæ factum, vt paullatim Italia pænè deserta esset; cū plerique eò confluerent, ob frumentationes, ludos, & alios vsus aut voluptates: in agris autem, Romanorum passim Prætoria & Villæ essent, & ipsa agrorum latifundia per seruos & ergastularios culta.

CAP. IIIL

De edificiis urbis Romae communiter, & eorum altitudo.

ET Roma quidem tanta & tam frequens fuit: inimus nunc ipsam, & perambulamus, & lustramus: **A**VD. O si quis Deus olim hoc mihi dedisset ! ô si quis nunc quoque vel per somnium in eâ sistat ! LIP S. Ego is ero, confide. somnia dicam, & vinbras, præut ipsa res & pulchritudo fuit. Periti viri est, mihi crede, non dicam describere, sed capere & credere qualis ea Roma fuit. Conabor, & minutula dicam : & vel sic fidem fortasse non inueniam. quid refert ? aëri & herbis meis hæc sim locutus. Tria in vrbe miranda canit Claudianus :

Quā nihil in terris complectitur ALTIVS aër,

Cum

*Cuius nec SPATIVM visus, nec corda DECOREM,
Nec laudem vox ulla capit.*

Altitudinem ecce laudat, *Spatium*, & *Decorem*. De *Spatio* dictum, duo alia exsequamur. Quæ est *altitudo*? siue in collibus ipsis ædificatio, pulchrâ specie, siue singillatim in operibus ipsis. Quod ad colles, quomodo non bellum, videre eos publicis priuatisque ædibus infessos; gradatim declinantes; & velut superas quasdam vrbes, vrbi inferæ imminentes? Omnino fuit ea facies: & pulchrè expressit Aristides. *Nec verò*, inquit, *superficiem solum soli occupat, sed longè supra exemplum in aëra altissimè ascendit. Et sicut vir aliquis, qui robore & magnitudine excellit, alios quoque in se sublato ferre gaudeat: ita & hæc non quiescit, nisi & alias aequales sibi superimpositas vrbes, alteram super alteram ferat: quod nominis eius fert ratio, totumq; hoc quod hîc videmus, robur & valentia est. Adeo* * *ut si quis eam diligenter vellet evolvere & diducere, & quæ nunc in sublimi sunt vrbes, aliam iuxta aliam humi collocare; quidquid Italia reliquum est, id impletum mihi iri videtur: imò futura una aliqua vrbs ad Jonium usque sinum.* Bellè & πομπῶς, non nego, attollit: sed hæ figuræ originem à re habent, nec quisquā putet elationes istas, nisi cum causâ & basi, esse. Itaque & Plinius, verus & seuerus taliû, cùm de magnitudine dixisset: quò, inquit, *si quis ALTITVDINEM tectorum addat, dignam profectò æstimationem concipiat, fateaturque NVLLIVS VRBIS MAGNITVDINEM IN TOTO ORBE potuisse ei comparari.* Quæ altitudo tamen in templis, aut publicis, fateor, maximè: vt in Rutilio, ad Romam.

*Exaudi genetrix hominum, genetrixq; deorum,
Non procul à celo per tua templa sumus.*

Significat altissimè in aërem ea surrexisse : & quidni, cum collibus etiam sæpe imposita ? Ceteræ ædes, non communiter sic altæ, nec humiles tamen fuerunt. Nam Augustus Princeps, cum ambitionem in ædificando videret atque altè attollendo, eamque cum discrimine & periculo ruinæ; siue etiam, quia aërem interciperent, & nimis inumbrarent: coërcuit, vt in Strabone scriptum est, & *septuaginta pedes* definiuit in modo ædificiorum. Nero hoc ipsum postea secutus, cum ab incendio Romanam instauraret; *cohibuit* (vt Tacitus ait) *altitudinem ædificiorum*. Sed modum non expressit noster: fueritque vel ille Augusti, quem obliteratum, vt solet, iam reuocauit; siue is qui Traiano postea adscribitur à Victore, *pedum sexaginta*. Sed de priore ego malim. Dices. ergone tam miranda hæc altitudo? & nonne hodie magis educimus? Interdum, non nego: sed nec sic communiter: & hoc quoque cogita multas ædes, & imprimis omnes publicas, extra legem hanc fuisse. Quid si autem & diuites illi nobilesque neglexerint? ego arbitror, siue gratiâ impetratâ, siue & eâ neglectâ. Et titulus sanè fuit. quia lex in futuras nouas ædes cauebat, structas non diruebat, & fas easdem sic reparare. Quidquid tamen sit, si vulgò ædes omnes *septuagenum* pedum, satis conspicua ea altitudo: præsertim vbi tecta compluuiata, aut testudinata, quod sæpe. Nostra hæc pectinata, & in angustum surgentia, aliquid de dignitate minuunt, sed & capacitatem tollunt. In tali autem illâ altitudine, quid minus quàm quaterna aut quina cænacula? quorū frequentia studebant. Vitruuius: *In eâ autem maiestate urbis, & ciuium* INFINITA FREQUENTIA, innumera-
rabiles habitationes opus fuit explicare. Ergo cum recipere
non

non posset area plana tantam multitudinem ad habitandum in urbe, ad auxilium ALTITVDINIS ædificiorum res ipsa cœgit deuenire. Itaque pilis lapideis, structuris testaceis, parietibus cementiciis, altitudines exstructæ, contignationibus crebris coaxatæ, & canaculorum summas utilitates perficiunt, & despectationes. Sed hæc de ædificiis, nunc non exsequor: & satis de Altitudine libasse.

CAPVT V.

Decor & ornatus ædificiorum. Excerpta quadam, & primò de templo Capitolino exactius dictum.

AD Decorem transeo, qui varius, in mole, in materiâ, in artificio, in symmetriâ, & siquid aliud elegantia aut peritia amat. In hac quoque parte, quin vrbs omnes orbis vrbes superauerit, nemo dubitet: fidi auctores dicunt, & opes atq; ambitio Romana facilè persuadent. Quidquid artificum insigniorum Græcia aut Asia habuit, Romam euocabantur, aut vltrò veniebāt. quippe hîc præmia: & quidam ex iis, quibus (vt Taciti verba vsurpem) ingenium & audacia erat, etiam quæ natura denegauisset, per artem tentare. Sed primus aut præcipuus Decoris huius auctor Augustus. qui urbem, vt Suetonius ait, neque pro maiestate imperij ornatam, & inundationibus incendiisq; obnoxiam, excoluit adeò, vt iure sit gloriatus, Marmoream se relinquere, quam lateritiâ accepisset. Alter ab eo, Nero Imperator. qui ambitione impulsus urbem incendit, vt nouam melioremque repararet. Videbatur enim, ait Tacitus, condenda urbis nouæ, & cognomento suo appellanda, gloriam querere. Itaq; eius iussu, urbis domus, non vt post Gallica incendia, nullâ dis-

stin-

ſtinctione, nec paſſim ereſta, ſed DIMENSIS VICORVM ORDINIBVS ET LATIS VIARVM SPATIIS, cohibita ædificiorum altitudine, ac patefactis areis, additisq³ PORTICIBVS quæ frontem inſularum tegerent. Eaſq³ porticus Nero ſuâ pecuniâ exſtructurum pollicitus eſt. Vides ibi quædã præclara & optanda in vrbe, Ordines vicorum, Latitudines viarum, Porticus protegentes. Vt non temerè idem Tacitus TANTAM reſurgentis vrbis PVLCHRITVDINEM miretur, & ſcripto conſignet. Quod tunc quidem publicè, ſed & priuatim in omni incendio factum Seneca adnotauit: Timagenes, felicitati vrbis inimicus aiebat, Roma ſibi incendia ob hoc vnum dolori eſſe, quòd ſciret meliora reſurrectura quàm ariſſent. Et ſanè ita fuit, præſertim ad Traianum uſque, cùm ab illo, & à Deo, culmen fuiſſe videtur pulchritudini vrbanae.

Lib. xxxvi.

Quam Plinius communiter ſic dilaudat: Ad vrbis noſtræ miracula tranſire conuenit, & ſic quoque TERRARVM ORBEM VICTVM oſtendere. quod accidiſſe toties pane, quot referètur miracula, apparebit. Vniuerſitate verò acernuat à, & in quemdam vnũ cumulum colleſta, non alia MAGNITUDO exſurget, quàm ſi MVNDVS ALIVS QUIDAM in vno loco narretur. Notentur ea & ad Decorem, & ad Magnitudinem malè controuerſam. Sed & Caſ-

Lib. vii.

fiodorus vero & magno ore, de iſtâc vrbe: Ferunt priſci ſæculi narratores, fabricarum ſeptem tantùm terris attributa miracula. Epheſi Diana templum; regis Mauſoli pulcherrimum monumentum; Rhodi Solis aneum ſignum, quod Coloffus vocatur; Jouis Olympici ſimulacrum, quod Phidias formauit; Cyri Medorum regis domum, quam Memnon fabricauit; Babylonie muros, quos Semiramis cõſtruxit; Pyramides in Ægypto. Sed quis illa vlteriùs præcipua

capua putabit, cum in unâ urbe tot stupenda conspexerit? Habuerunt honores, quia praeceperunt tempore: & in rudi saeculo quidquid emerisset novum, per ora hominum iure ferebatur eximium. Nunc autem potest esse veridicum, si

VNIVERSA ROMA dicatur esse MIRACVLVM. Ecce consona vtriusque iudicia, sed & voces: & Romam totam, ac per partes, Miraculum esse, & inter prima mundi spectacula, iure censent. Vis autem paullo distinctiùs membra pulcherrimi huius corporis videamus? A V D.

Te hoc quærere? non volo, sed aueo; non cupio, sed ardeo, vt verò verbo dicam. LIPS. Atqui ne nimis ardesce. nam ego non flumine te perfundam, sed leuiter aliquid aspergam è summis aquis. Tu te ingurgitabis, si voles, postea: viam designabo & præibo. Ego autem? an ducem potiùs alium quæram ex ipsâ antiquitate, qui ostendat? Esto Ammianus, qui Constantij ingressum in urbem Romam describens, ipsum intuentem & mirantem præcipua operum facit, atque ait: Proinde

Lib. XVI.

Romam ingressus, imperij virtutumq; omnium larem, cum venisset ad ROSTRA, perspectissimum priscae potentiae FORVM obstupuit: perq; omne latus, quò se oculi contulissent, MIRACVLORVM DENSITATE præstrictus, allocutus nobilitatem in CVRIA, populumq; pro tribunali, in PALATIVVM receptus fauore multiplici, latitiâ fruebatur optatâ. Deinde intrâ septem montium culmina, per accliuitates planiciemq; posita urbis membra collustrans, & suburbana, quidquid erat primum, id eminere inter alia cuncta sperabat: IOVIS TARPEII delubra, quantum terrena diuinis præcellunt; LAVACRA in modum prouinciarum exstructa; AMPHITHEATRI molem solidatam Lapidis Tyburini compage; PANTHEON velut regionem teretem spa-

*ciosa celsitudine fornicatam; elatosq; vertice scansili SV G-
GESTVS consulum, & priorum Principum imitamenta
portantes, & VRBIS. templum, FORVMQVE PACIS,
& POMPEII THEATRVM, & ODÆVM, & STA-
DIVM, aliaq; inter hac DECORA urbis aterna. En ha-
bes, qui digitum intendat, & ducat: tu sequere, & ardo-
rem (ita loquebaris) restingue. AVD. Iam risui & ioco
me habes palàm. LIPS. Egóne? AVD. Tu, tu, & si no-
ctua sim, sepius cantem. Nam nomenclatorem mihi das
locorum, & paucorum quidem: vbi designator, enarra-
tor, interpres? LIPS. Adest: ego pro copiâ & scientiâ ali-
quid dicam, sed nec ordine quidem Ammiani. Nam
etsi præcipua ille tetigit; non placet tamen ordiri à *Foro*
aut *Rostris*, sed potiùs à *Templis*. Diuina, à quibus re-
rum hominumque ortus, præeant; & totum hoc pul-
chritudinis agmen ipsa ducant. Nominat ille quattuor
templa, *Jouis Tarpeij*, *Pantheon*, *Urbis*, *Pacis*. Quàm
pauca è multis; nam primùm hoc moneo, *quadringenta*
vigintiquattuor *templa* Romæ fuisse, quod in *Notitiâ*
imperij proditum leges. Noli ambigere, quin pleraque
ex his magnifica, & aliter atq; aliter structa, vel instru-
cta: sed Ammianus satis habuit, dignitate vel opere pri-
ma eorum dare. Itaque à *Tarpeio* exorsus est, siue *Capi-
tolino*: nō quia pulcherrimum fortasse, sed quia prima-
rium, & Dei principis; itemq; quia multâ substruction-
um mole, & opibus, ac tempore pleraque præibat.
Alioqui Plinius, vbi magnifica operum recenset, hoc
omittit: imò idem quasi irridet veteres, quòd *Aggeris*
*vastum spatium, & Capitolij insanas substructiones mira-
bantur*. Sed id non eâ mente dictum, quâ videri possit.
non, inquã, deminuit aut abiicit Capitolij ipsum opus;
sed*

sed substructiones tangit, quas L. Tarquinius Priscus magnas, & *insanas*, ut ipse loquitur, circum collem fecit: dum prærupta eius adæquat, ab imo solo ingentibus lapidibus muro educto suffulcit, complanat deniq; in vertice, & fundamenta iacit. Hæc Plinius tægit, & Dionysius clarè exsequitur: quem vide. Alioqui ipsum opus & ædificium non miratur mirabile visum: quî id posset? cùm sit inter eximia & vrbis prima. Præter Ammianum in verbis dictis, etiam Cassiodorus sic attollit: *Capitolia celsa conscendere, hoc est* INGENIA HUMANA SUPERATA *vidisse*. Et res sanè dicit & facies, quam, etsi tenuiter, lineis aliquot adumbrabo. Mons *Saturninus* primò dictus fuit, in quo hæc ædes; tum *Tarpeius*, & mox *Capitolinus*, à capite hominis (cui viuo *Toli* nomen fuisse Arnobius tradidit) inuêto, dum fundamenta moliuntur. Sed hæc nota; non vulgo nimis illud, duplex *Capitolium* fuisse, *Vetus & Novum*. Illud in *Regione sextâ Circi Flaminij* Victor & Notitia Imperij locant; istud in *Regione octauâ Fori Romani*. Valerius illud intellexit certò, cùm inter facerrima & vetustissima loca, adiurans nominat: *Per Romuli casam, perq; Veteris Capitolij humilia tecta, & æternos Vesta ignes*. Ait *Vetus*, ait *humili tecto*: quod vltimum nullo modo in *Novum* & sublime illud conuenire potest. Puto & Martialem hæc distinguere, cùm in hominem ludit plurifariam habitantem:

Lib. 1111.
cap. 1111.

*Esquilis domus est, domus est tibi colle Diana,
Et tua Patricius culmina vicus habet.*

Hinc vidua Cybeles, illinc sacraria Vesta,

Inde NOVVM, VETEREM prospicis inde Iouem.

Cerni ab eo vtrumque Capitolium vult: *Vetus* è colle

Auentino siue Dianæ, *Nouum* ex Esquilis & Vico patricio. Et si fortasse *Nouum* *Iouem* Domitianum suum vocat, eiusque Palatium intellegit. Sed Varro de utroque apertius: *Capitolium* *Vetus*, quod ibi *Sacellum Iouis, Junonis, Minervæ*: & id antiquius, quam *edis* quæ in *Capitolio* facta. Ecce, dicit illud *Vetus*, æuo prius esse quam hoc *Nouum*, & ostendit in alio item loco fuisse. Sed dices, si prius, si alibi: unde *Capitolium*? nam vox ea non conuenit, cum nec mons tunc nomen istud habuerit, nec ipsum illud templum in monte. Respondeo, Varronem hoc occupasse & soluisse lectori vigilanti. Nam ideò, inquit, *Capitolium* non auctor aut conditor, sed posteritas dixit; quia ut in nouo & nobili illo *Capitolio*, tres illi dij Præsides colebantur. A similitudine igitur & hoc *Capitolium* est dictum, sed cum discrimine, *Vetus*. Quæras amplius, quis autem condidit? & hoc dicam, suggerente Cassiodoro. Nam ille in *Chronico*, Numæ rebus: *Capitolium quoque à fundamentis construxit*. Ignaro lectori tenebræ sint, & falsi Cassiodorum arguat, quis enim vnquam prodidit Numam auctorem *Capitolij*? Et sanè distinguere debebat, & addere, *Vetus*. Ita enim est: ille auctor illius, unde unde hoc hauserit Cassiodorus; sicut *Novi*, Tarquinius Priscus. Is complanato, ut dixi, monte, struere cœpit, ex voto quod vouerat bello Sabino: idque opido *Apiolis* capto, ut Plinius ex *Antiate* refert, è manubiis & prædâ. Sed fato præuentus, absoluendum nepoti L. Tarquinio Superbo reliquit, regum ultimo: etsi Seru. quoque Tullium aliquid addidisse, sociorum studio adiutum, Tacitus (sed solus, opinor) dixit. Præcipuus tamen auctor operis Superbus. qui, ut Liuius inquit, *Sues à Pometiâ*.

metiâ è Volscis captâ, diuenditâ pradâ, cùm quadraginta talenta argenti auriq; recepisset; concepit animo eam AMPLITVDINEM Iouis templi, quæ digna deûm hominumq; rege, quæ Romano imperio, quæ ipsius etiam loci maiestate esset. Scribit quadraginta talenta: quæ nobis XXIIII. millia Philippæorum essent: sed an non quadringenta rescribendum, aliquis ex Dionysio iure controuertat? Nam ille, vt in re non dubiâ: tantum pradæ, inquit, reperit, vt quinque minæ argenti obuenerint singulis militibus, decimæ autem diis sacratæ fuerint nō minus * quadringen- * In Pla-
t talenta. Ea essent, ducenta quadraginta millia Philip- tarcho
pæorum: pecunia, haud nego, satis grandis, præsertim è summa
solis decimis: sed res Italiæ & Latij tunc vberes & flo- eadem.
rentes (quod & alibi videre est) hoc persuadent, tum & ipsum opus eâ amplitudine institutum, quam Liuius deprædicat, & quam exiguâ summâ nemo fabricetur. Nec tamen vel Tarquinius supremam manum imposuit: & gloria operis (ait Tacitus) libertati reseruata. Pul- 1111. Hist.
sis regibus, Horatius Puluillus Consul dedicauit, eâ MAGNIFICENTIA, quam immensæ postea populi Romani opes ornarent potius, quàm augerent. Vides & à Tacito laudari, & consummatum hoc opus Puluillo adscribi. Quid igitur est, quod in Liuiio, multis annis pùst lego, in Tribunorum militarium imperio? Eodem anno, ne pri- Lib. vi.
uatorum tantum operibus urbs cresceret, Capitolium quoq; saxo quadrato substructum est, opus VEL IN HAC MAGNIFICENTIA VRBIS CONSPICIENDVM. Hoc narrat, post Romam à Gallis captam, & cùm ea instaurata à ciuibus fuit. Ergo ne tunc denique Capitolium saxo quadrato structum? nego de ipso edificio, fateor de monte. Itaque attende, substructum dicit, non exstructum.

Est illud ipsum opus, de quo prædixi, L. Tarquinij: quod tamen rudi lapide factum, nunc mutarunt, & secto quadratoque splendidius confecerunt. Igitur Pliniana illa, de quibus item antea, magis fuerit ad hoc posterius opus referri: & istæ sunt *insana illa substructiones*, è quarum ruinis vastos lapides erutos patrū etiam ætas vidit. Sed ipsum Tarquinij Capitolium quale fuit? Describit his ferè verbis Dionysius: *Situm est in altâ crepidine, habet q̃ in ambitu octo iugera: sic ut latera singula ducentorum ferè pedum sint, exigua latitudinis & longitudinis differentiâ, nisi quod ista illam vincit vix pedibus quindenis. Quâ parte frons eius meridiem spectat, triplici columnarum ordine circumcingitur, ab aliis lateribus, duplici. In ipso sunt tres cellæ, ex ordine, à lateribus communione parietum clausæ. Media est Jovis, utrimque altera Iunonis, altera Minerva, sub eodem laqueari eodemq; tecto. Ita Dionysius: & verba, si placet, examinemus. Octo iugerum ambitu fuisse dicit: id est pedum octingentorum: sed sic ut quadrum esset, imò pænè quadratum, nisi quod longitudo quindecim pedibus superaret. Fuit egregia capacitas, si consideras, & aptâ proportionem. Ait, frontem ad meridiem spectasse: id est, Forum Romanum & Palatium versus, frequentissimam vrbis partem. Ergo ab eâ quoque parte centum gradus, quibus (ut Tacitus, atque alij) superbè adibatur. Quos tamen continuos fuisse non arbitror, & retractiones suas habuisse, ut Vitruvius appellat: id est, areolas, ubi fessi pedem fingerent & respirarent. quas post singulos septem aut novem graduum ordines solere interponi, architecti notarunt. Gradus autem isti haud dubiè ad maiestatem: eoque & in aliis templis, etsi pauciores, soliti usurpari.*

Sed

Sed ibi ratio, hîc necessitas & locus editior voluerunt.

Addit *columnarum triplicem ordinem* : quas L. Sullam

Athenis aduexisse, è templo Iouis Olympij, Plinius nos Lib. xxxv.
cap. vi.

docet. Atque eas Dionysij tempore ipsas exstitisse, faciliè arbitror: post incendium, à Vespasiano mutatas, verbum Plinij dat suspicari. Quàm multæ eæ fuerint, haud

dixerim: quia varia proportio in collocandis, de quâ Vitruuius videndus. An tamen eiusdem locus non huc facit?

Lib. III. cap. III. Format *Pycnostylos, Systylos, Diastylos, Araostylos, Eustylos* ædium species : iis enim Græcis vocibus vtuntur : & in *Araostylis*, inquit, *nec marmo-*

reis nec lapideis epistyliis uti datur, sed imponenda sunt traves de materiâ perpetua: & ipsarum ædium species sunt

barycæ, barycephalæ, humiles, latæ, ornantque signis fictilibus, aut æreis inauratis fastigia earum, Tuscanico more.

uti est ad Circum maximum Cereris, & Herculis, Pompeiani item Capitolij. Sanè Pompeianum Capitolium

nemo legit, opinor; nec ipse Pompeius manum admo-

uit, aut potuit : nisi quis accipit de Capitolio, quod Pompeiis fuerit Campaniæ opido. Nam & coloniæ,

vti scimus, Capitolia sua habebant. Sed tamen, quia

vtitur hîc Romanis exemplis (vide alia:) non displiceat

distingui, *Herculis Pompeiani, item Capitolij.* Itaque Capitolium fuerit inter *Araostyla*, id est raris columnis distincta. Pergit Dionysius, *tres in ipso cellas esse*, siue vt

ipse appellat * *συνᾶς*. Ea res nota est, & versus Ausonij,

Trina in Tarpeio fulgent consortia templo.

Quod imitabantur item in coloniis : eoque Arnobius scripsit : *Nonne vides in Capitolis omnibus virginales*

esse species Minervarum? duos alios deos ibi omittit. An autem non alij dij in Capitolio? non quidem in isto

tem-

* Hesych.
Συνᾶς, ἐν δὲ
πρὸς τὸ πρὸς
τοῦ ἱεροῦ.

Lib. III.

De Spectac.

templo; excipio Iuuentutem, & Terminum: qui cedere scilicet noluerunt exaugurantibus. *Itaq; eorum ara* (ait alibi Dionysius) *continentur templi ambitu, atq; una in vestibulo cellæ Minervæ est, altera in ipsa cellâ iuxta pulvinar.* Quod igitur in Tertulliano legitur: *Capitolium omnium demonum templum est.* itemque in P. Victore: *Capitolium, ubi omnium Deorum simulacra celebrantur.* in Cicerone: *Deorum domicilium*: ea inquam omnia, de ipso monte capienda sunt, qui passim & pænè totus deorum aris, statuis, templis infessus: quod facile tibi inter legendum obseruitare. Sed dixerat etiam Dionysius, *cellas istas à lateribus communi pariete clausas.* Quid hoc est? ut nullum discrimen aut interpositio parietû fuerit? imò opinor fuisse, aut certè columnarum, & facelli atq. ædiculæ speciem singulas habuisse. Nam ita ipse Dionysius, *ἡ ἐν ἑκαστῇ τῶν αἱνῶν* (in verbis, quæ iam verti) *vestibulum templi Minervæ, & ut sic dicam protemplum.* Ita & Liuius: *Quadrige inauratæ posite in Capitolio, in cellâ Jovis, supra fastigium ædiculæ.* Plinius verò & *Delubrum* dixit: *Proserpine tabula fuit in Capitolio, in Minervæ delubro, supra ædiculam Iuuentutis.* Distinctio igitur: sed mens Dionysij, tres ipsas tamen cellas communi totius templi pariete clausas. Nisi quis etiã censet, *Ædículas* istas fuisse non nisi caua quædam in ipso pariete, ad statuas illocandas: quod in Panthéo videmus: quibus non accedam. Ista ex Dionysio: an & à me aliquid addo? faciam, si priùs distinxero inter Capitolia, quæ quattuor in hoc ipso loco, ex ordine, fuêre. Nam primum illud Tarquiniorum, bello ciuili Sullano, incendio periit, negligentiâ custodum. Alterum ipse Sulla instruxit: sed non dedicauit: *quod unum Felicitati suæ*

sua defuisse, ipse apud Plinium fatetur, & Tacitus adnotavit. *Lutatij Catuli nomen*, ait Tacitus, *inter tanta Caesarum opera, usque ad Vitellium mansit*. Et si Dio tamen scribit, *Cæsari Iulio, inter alia honorum, decretum à Senatu: ut nomen eius Capitolio inscriberetur, deletò Catuli: idque eum admisisse*. Sed Taciti assertio firmior, mihi quidem, fideliorque. Tertium fuit à Vespasiano. nam illud Catuli arsit ciuili iterum bello Vitelliano: atque iste reparauit iisdem vestigiis, sed & dedicauit. Dedicauit inquam, & Plutarcho scribenti hoc accredo: magis quàm Victori, qui Domitiano tribuit: *Multa*, inquit, *opera inchoata per patrem, vel fratris studio, atque in primis Capitolium, absoluit*. Non vinces hoc, ô Victor. Vespasianus absoluit, dedicauit: sed à morte eius, sub Tito, statim arsit (Suetonius, & Dio in Tito:) atque ita quartum Domitianus instaurauit. Habes igitur quaterna Capitolia, sed in eodem loco reposita semper, & inno-uata. Tacitus, & Dionysius quoque, id notarunt: sed verba illius: *Isdem rursus vestigiis situm est, postquam* 111. Hist. *interiecto ccccxxv annorum spatio, L. Scipione, C. Norbano Coss. flagrauerat*. Hoc de Sullano: de Vespasiani, idem: *Passim intacta fundamentis argenti aurique stipēs, & metallorum primitiæ nullis fornacibus victæ. Prædixere haruspices, ne temeraretur opus saxo auròve in aliud destinato*. ALTITVDO adibus adiecta. id solum religio annuere, & prioris templi magnificentia defuisse creditum, quo tanta vis hominum retinenda erat. Noto obiter religionem Romanorum, qui liberaliter contulerunt ad opus faciendum, stipibus coniectis. Ille enim finis. sicut & in Cicerone scriptum de illo Sullano: *id Capitolium publicè coactis fabris, operisque imperatis, GRATIS exadi-*

T
ficatum

ficatum atque effectum esse, ita ut ex arario nihil darent. Quod equidem miror satis, sed quinto in Verrem ita scripsit. A v d. Religiosum sæculum, præ nostro. sed quæ aut quanta illa multitudo hominum est, quam Tacitus retineri vult? L I P S. Haud difficilis collectu. Si enim latera pedum *ducentorum*, reddentur fientque in aræa pedes *quadraginta millia*. Da singulis insistentibus pedes *quaternos* (sufficiunt, cum miliri in acie locato & armato Polybius det non nisi *senos*) da inquam *quaternos*: nonne vides *decem millia* potuisse retineri? Sed tolle aliquid, si vis, in columnas & alium apparatus: largiter tamen supererit pro *octo millibus*. A v d. Hem! magna capacitas, & rara talia nostra templa. L I P S. Semel omitte de nostris: vincimur, si comparamur. Et tamen de mole aut magnitudine, tale aliquid esse potest, aut & excedere: de arte, materie, ornatu quæ potest? Sed Tacitus *Altitudinem* adiectam, super priorem, disertè scribit: quæ fuit? haud diuino: pro symmetriâ latitudinis oportet ingentem fuisse. Et Silius ita indicat, apud quem Iupiter prædicat de illo Domitiani:

Aurea Tarpeia ponet Capitolia rupe,

Et iunget nostro templorum CVLMINA CÆLO.

In cælum educit: sicut & Tertullianus, Apologetico: *Nam et si à Numâ concepta religio est, nondum tamen aut simulacris aut templis res diuina apud Romanos constabat. & nulla CAPITOLIA CÆLO CERTANTIA, sed temeraria de cespite altaria, & vasa adhuc Samia, & Deus ipse nusquam.* A v d. Et tu hæc recitas Lipsi? L I P S. Quid ni recitem? A v d. Et attendis? L I P S. Quidni? A v d. Atqui evertūt paulloantè à te dicta, de Capitolio Numæ. Nam quomodo illud sit, & cum tribus suis diis; si tunc
nulla

nulla templa, si nullæ statuæ? LIPS. Benè observaſti, & de induſtriâ plura illa verba (vide quàm fallere voluerim) adduxi. Adduxi, vt expedirem: & ecce. Non negat vlla Capitolia fuiſſe, ſed illa alta & *calo certantia*: noſtra humilia cur deſtruat? Nam vt dem ſtatuas nōdum fuiſſe (quod aſibi & Varro tradidit:) tamen de templis idem dicere anteps ſit, & Liuius, Dionyſius, Plutarchus reſellant. qui diſertè *Termino, Fidei, Veſtæ* templa à Numâ poſita adfirmant. Et verò ſi priuatæ domus, ſi curiæ publicæ, cur nō & ea diis eſſent? ratio videtur velle, præfertim apud homines cultui deorum ſic addiſtos. Sed de altitudine certiora non habeo: quæ minima eſſe potuit, fuit *pedum ducentorum*: ſicut in Panthéo Agrippæ, par item latitudo & altitudo. AVD. Heus tu, in loco Taciti etiam me tenuit, quòd ait *altitudinem adieſtam*: & debuiſſe, quòd *tanta vis hominum retineretur*. Quid ergo altitudo facit ad laxandum locum? non intellego, niſi ſi porticus aut inædificationes ſuperiores aliquę, vt hodie in quibuſdam templis. LIPS. Apage, nihil difforme in vniformi iſto opere: ſed Taciti mens, iuuiſſe & decuiſſe altitudinem vbi multitudo, vt aër laxior ac liberior, ad reſpirandum, ad refrigerandum. Alioqui, vbi arctatio & compreſſio, ſcimus quàm ſubitò animo malè fiat. Sed ab ædificiis iam ad Ornatum pergo: qui tamen varius in vario iſto opere. Quis in Tarquinij? aliquid è Liuiο haurire eſt ſparſim. vt libro x. *Fœneratores aliquot mulctati, & ex eo quod in publicum redactum eſt, ÆNEA in Capitolio LIMINA, & trium MENSARVM ARGENTEA VASA in cellâ Jouis, Jovémque in CULMINE cum QVADRIGIS Ædiles poſuerunt*. Iterum libro XXIX. *Quadrigæ AVREÆ eo anno in Capitolio poſitæ ab Ædilibus*.

bus. Et libro xxxv. *Ædiles multos pecuarios damnarunt. ex eâ pecuniâ clypea inaurata in fastigio Jovis adis posuerunt.* Denique libro xxxviii. *Seinges in Capitolio AVRATI ab Cn. Cornelio positi: Consulem dedisse, inscriptum est. Et duodecim clypea ærata (lego aurata) ab Ædilibus sunt posita ex pecuniâ quâ frumentarios damnarunt ob annonam compressam. Et duo item signa aurata.* Hæc ex Li-

Lib. xxxij.

uio: istud è Plinio, *post Carthaginem eversam, laquearia in Capitolio inaurata esse.* Nec plura, dici quidem digna, notavi. Quid iam in Catuli? omnia haud dubiè, in istis iam opibus, opulentiora: illud notabile reperio, quòd *sua ætas* (Plinij verba) *variè de Catulo existimaaverit, quòd TEGVLAS Capitolij ÆREAS INAVRASSET primus.* De quibus & in Senecâ patre: *Fastigiatis suprà tectis, auro puro fulgens, pralucet Capitolium.* Sanè hoc magnificum & verè splendidũ fuit: & quis ille fulgor, Sole irradiante? Fuit & ad firmitatem aptum æs, & contra æruginem aut rubiginem inductum aurum. Cetera donorum & ornamentorum varia, *Coronæ aureæ, Victoriæ aureæ, Candelabra, Vasa, & quæ tu tibi subiicias:* sed quod ex Dione omnino obseruandum, *omnibus his detractis, ex Ægyptiacâ prædâ alia victor Augustus reposuit: detractis ex Sc.^{is} & ut tam multis his novis & melioribus locus fieret.* Etsi quædam veterum retenta, non ambigo: sed ordine & iudicio Augusti disposita, ut apta & concors tota facies esset. Id verò ipsum tempus fuit, quo

Lib. ii.

* 1600000
Philipp.
* 1250000
Phil.

vnâ donatione in cellam Jovis Capitolini contulit * xvi. *millia pondo auri, & * quingenties HS. in gemmis:* quod in Suetonio leges. In cellam dico Iovis; quid censes in duas alias? nam & eas dona sua accepisse Dio disertim dicit. Et vel ex eo vno disce opes & ornatum Capitolinum.

Plera-

Pleraque tamen horum periêre incendiis, vt opinor: & videamus vltimum Domitiani. In eo *columnas Pentelicas* fuisse, quæ Athenis aduectæ item essent (vt & illæ Sullanæ) Plutarchus in Poplicolâ scribit: cum hoc iudicio, quòd pulchriores Athenis visæ sibi essent, quoniam Roma dum nimis secant & poliunt, nitorem addidissent, *symmetriam detraxissent*. Cetera quæ & quanta, ex eiusdem Plutarchi verbis suspicemur: qui ait *in solam inaurationem*, priuatum omnem modum excedentes opes impensas, nempe *supra duodecim millia talentorum*. Ea sunt nobis *septuagies bis centena millia Philippæorum*; siue *septem milliones*, & quod excedit. A V D. Hui! verberas me. L I P S. Semper tiro: mirum te viuere. A V D. Quid iam? L I P S. Nam assiduè vulnera accipis, & oportebat iam confectum. A V D. Tua hasta *Pelias* est, & vulnerat & sanat: perge. L I P S. Tanti igitur inauratio: quæ fuit primò in Tegulis æreis, vt illo Catuli: de quibus Epigramma Græcum in Anthologiâ, vbi *Æream domum in Palatio Byzantino* laudat:

Εἴζον δ' αἰετὲρ ἐγὼσι χάρις καπέτ' ἰδὼ αὐλῆς,
 Εἰ καὶ χαλκείων δ' ἔρ' φων ἀμαρύγματα πέμπεις:
Cede etiam melioribus ô Tarpeiia rupes,
Et si ex æratis iacis aurea fulmina tectis.

Et Procopius adnotauit, *Gi Zerichum* regem Vandalarum, cum alia decora Romana secum in Africam vexisse, tum & partem tegularum Jouis Capitolini inauratarum dimidiam. Nec tecta modò inaurata, sed ipsæ Fores auratæ, & crassis laminis obductæ: quæ mansêre ad Honorij Imp. æuum. Tunc in pecuniæ inopiâ, *Stilicho* mandasse perhibetur (scribit Zosimus) vt fores in Capitolio Romano, quæ auro MAGNI PONDERIS erant obductæ,

laminis iis spoliarentur. Cum autem qui hoc facere iussu erant, id agerent; in parte forium scriptum reppererunt, INFELICI REGI SERVANTVR. Quod euentus docuit. nam Stilicho paullo post infelicitate perijt. Ita Zosimus: nec velim nimis te, vt singularia, hæc mirari: puto in pluribus templis fuisse. Poëtæ sanè aurea templa non semel appellant: & auctor libelli De causis corruptæ eloquentiæ: Quid enim si infirmiora horum temporum templa credas, quia non rudicamento, & informibus tegulis extruuntur; sed marmore nitent, & aurora radiantur? Marmore in parietibus, auro in tectis. Ideò Micantia Rutilianus dixit:

*Confunduntque vagos delubra micantia visus,
Ipsos crediderim sic habitare deos.
Et de Templis in eâ laudatiunculâ concludam.*

C A P. VI.

Item de templo Panthei, Urbis, & Pacis.

AVD. Ego aperiam, & laxabo. Nam quid me tam amadidâ memoriâ censes, vt oblitus sim Ammianum plura laudasse? & nominatim *Panthéon, Urbis, Pacis*. Dic de singulis, nec excide tuâ lineâ, quam ipse duxisti. LIPS. Sed ex vno illo specimine, facile de aliis iudicare. Tamen fidei meæ causâ, cape. *Panthéon* ab Agrippâ genero Augusti structum fuit, & opus notum est, hodieque (etsi ornamentis omnibus spoliatum) ipsum corpus exstat. Struxit in tertio Consulatu suo, quod inscriptio frontis indicat: sed perfecit biennio post & dedicauit, anno vrbs dccxxix. vt est in Dione. Quæ causâ nominis, ipse Dio dubitat, & scribit: *Panthéon*

sic

sic fortasse dicitur, quia plures deorum imagines in simula-
 cris Veneris & Martis complecteretur; vel ut ego censeo, à
 formâ illâ deæ & rotunditatis, & quia calum referret.
 Prior explicatio pluribus placita, etsi non ipsi Dioni: &
 lego in Glossis illis priscis, $\pi\delta\theta\delta\epsilon\iota\omicron\nu$, omnium deorum. Sed
 & Athenis, atque alibi, τὸ κοινὸν τῶν θεῶν ἱερὸν fuisse, com-
 mune Deorum templum, ex Pausaniâ disco. Cui & origo
 esse apud Romanos potuit, ex communi deorum sacro:
 de quo Festus. *Pandicularis*, inquit, *dies dicebatur, idem*
& Communicarius, in quo omnibus diis communiter sa-
 crificabatur. Sed Dio tamen aliter: & mouit eum, credo,
 quòd pauca & certè in eo statuæ essent, neque diis com-
 munitè positæ. Fuit enim *Martis*, * *Veneris*, & *Cæ-* * In cuius
saris Julij: ipsius *Augusti* in vestibulo cum suâ posuit ^{auribus}
Agrippa. Ita Dio. quem miror *Jouis* omisisse: cùm ^{sectus fa-}
Plinius scribat, *Panthéon Joui Ultori ab Agrippâ factū*. ^{mosus}
 Itaque ille præcipuus, & præses ibi Deus, fuisse videtur. ^{ille vno}
 sed & plures alij, eoq̃ue nomine haud malè *Panthéon*, ^{Cleopa-}
 etsi Dio à cæli formâ magis petit; quoniam id scilicet re- ^{tra. Plin.}
 ceptaculum & sedes Deorum. Lego autem & *Pantheus* ^{Lib. xxv.}
 & *Panthea*, pro ipsis Diis: sed aliâ significatione, itemq̃.
 scripturâ; nec aliud est, quàm *omnino-Deus*, aut *Dea*.
 Idem Dio scribit, sororem Caligulæ *Drusillam consecra-*
tam ab eo, & *ab omnibus Pantheam dictam*. In lapide
 item veteri exstat: DIVO. PANTHEO. EX*. V. Sed * *Voto*.
 de nomine satis: in re ipsâ etiam quid me diffundam?
 nisi si lingua potest in istis, quod non oculus: atque ecce
 Romæ exstat, & imagines circumferuntur. A V D. Ita
 est. sed de ornatu tamen qui periit, ecquid habes? L I P S.
 Pauca. sed tamen hoc inter *pulcherrima operum* Plinius
 recensuit: quid mirum vel ab ipso isto corpore, sic spo-
 liato

liato & nudo? Nam artificium & symmetria per omnes partes maximas, minimas, in eo mirabilis; decor, ordo, deuinctio singularis; vt Sebastianus Serlius, vir peritissimus talium, habendum censeat hoc velut vnicū exemplar consummatæ Architecturæ. Latitudo atque altitudo par est, pedum CXLIII. Amisit de specie, quòd ruderæ locum sustulerunt, & gradibus in templum nunc descēditur: atqui antea ascendebatur. Tectum & ipsum æreis tegulis, quæ prægrandes aliquot in fornice reperiuntur: nec dubitandum & has auratas fuisse. Plura haud dixerim, & omnia membra eius descripsit & mensus est Serlius, quem fas videre. Admoneo exustum fuisse, magno illo incendio sub Tito, cū & Capitolium tertio arsit. Id ita in Dionis compendio scriptum: & refecit Domitianus. de quo Cassiodorus capiendus in Consulatu eius IX. *Insignissima Roma facta sunt, Forum Traiani, Therma Traiani, Meta sudans, & Panthéon.* Sed nec diu post, Traiani anno XII. (quod in Eusebij Chronico est) fulmine ictum conflagrauit: & ab Hadriano restitutum, Spartianus dixit in eius vitâ. Itaque non soli ij restituerunt, qui in fronte operis hodieque insculpti leguntur, *L. Septimius Severus, & M. Aurelius Antoninus*: sed iam dicti. Mutauit & transiit in melioris templi vsum: & à Venere ad nostram Virginem, faciente Bonifacio quarto Pontifice, sub annum Christi DCVII. Is petiit *Phocam*, ait Regino, *vt in veteri fano, quod Panthéon vocabatur, & à Domitiano fuerat exstructum, Ecclesiam sibi facere liceret; quod annuit Imperator.* Ista de Romano Panthéo. sed reperio & in prouinciis alibi, ad hoc exemplum. Sozomenus certè in pago *Betheliâ* (vnde ipse oriundus) *ditionis Gazensium,*
Pan-

Panthéon fuisse ait, *antiquum & apparatus templum*, quod in cliuo manufacto, velut in arce situm, totum pagum despectabat: atque addit arbitrari se Syricâ voce *Betheliam* inde dictam, quod Græcè *παιθεῖον* sonat, siue *θεῶν οἶκός τε*, *deorum domicilium*. Ita ille scriptor Eccles. Hist. lib. v. cap. xiiii. Sed transeo iam & lustro obiter templum *Urbis*. Quod istud est? inquires. nempe *Dominæ Urbis*, illius *Æternæ, & Cælestis*. O insaniam! ædificiis & inanimato corpori non vitam solùm adtribuere, sed numen! Atqui fecerunt, & vrbs hæc, in quâ sedes tanti imperij, tanquam in eâ potentia & diuinitas, sic culta. Prudentius meritò irridet:

-- colitur nam sanguine & ipsa

More Deæ, NOMENQVE loci, ceu NUMEN, adorant. Inuentio & adulatio à Græcis Asiaticis est: apud quos Smyrnæi (quod ipsi gloriantur, & Romanis imputant, apud Tacitum) * *primum templum VRBIS ROMÆ statuerunt*. Nec defuerunt alij sequi exemplum: statimq; Alabandenses in suâ vrbe struxêre. Quo fine? vt propitiam sibi non Urbem, sed Urbis incolas & rectores haberent. Itaque nolunt eos hoc nescire, & in Liuiio, apud Senatum *Alabandenses templum ROMÆ se fecisse commemorant*, & ludos anniuersarios instituisse ei *Dinæ*. Etiâ ne ludos? ita sanè, & isti sunt pulcherrimi, quos vel nunc in Senatu edunt. Quàm credis risisse quosdam Patrum, in his ineptis & verè Græcanicis adulationibus? ego haud minùs censeo, quam cùm Prusias rex ab illâ Asiâ, veniret ad curiam rasò capite, & pilleatus, limen curiæ oscularetur, adoraret Senatum, & *Libertum* se clamaret *populi Romani*. Ita igitur initium, sed in prouinciis. imò nec sub Principibus statim *Romæ*, in ipsâ Româ, tem-

V

plum.

111 Hist.
* Circâ annum vrbs
DLVIII.

plum. Lego in Hadriani rebus: *Ædem Bonæ deæ transfuit, & Colossus stantem atque suspensum, per Deme-
trium architectum, de eo loco in quo NUNC templum
VRBIS est, ingenti molimine, ita ut operi XXIII. elephan-
tes exhiberet. Ait, Colossus stetisse in loco ubi nunc Vr-
bis templum: non ergo tunc adhuc erat. Sed ille ipse ta-
men Princeps fecit: imò hanc causam arbitramur tras-
lati Colossi. In Dionis Compendio est: Hadrianum
struxisse Veneris & Romæ templum, atque eius designa-
tionem & diagramma missum ab eo ad Apollodorum in-
signem architectum (cui tunc offensior erat) ut ostenderet
& absque eo INSIGNE OPVS posse perfici. quæ sinit que
ecquid placeret structura? Ille verò liberè respondit, & de
Templo, quod sublimius & magis cauum capaxque fieri
deuisset: uti & in viam Sacram conspectius ex alto emi-
neret, & in cauum Machinas acciperet, quæ in occulto
ibi compactæ, subito & ex improviso in Theatrum induci
possent. Hæc ita in Græco. nam interpres, quod mirere,
solum Veneris templū posuit, Romæ omisit. Atqui iun-
ctæ deæ fuere: & sic Notitia imperij, Templum Veneris
& Romæ nominat. Prudentius:*

Atque Urbis Venerisque pari se culmine tollunt,

Templa, simul geminis adolentur thura deabus.

Nec ineptè Venus iuncta, Æneadum mater, cum suâ
prole. Vbi fuerit, ex Dione licet conicere, qui *Via Sa-
cre* adiungit: & Notitia in Regione templi Pacis ponit.
Claudianus in monte Palatino. Nam de illo capiendum
est, cum in laudibus Stiliconis facit Prouincias venisse,
& adisse supplices ipsam Romam:

*Conueniunt ad tecta Deæ, quæ candida lucent
Monte Palatino.*

Crederem igitur ad radices montis fuisse, circà aut in Comitio: & in diuisione tamen vrbis accensitum *Regioni Pacis*. De *Machinis* autem, quod in Dione est, ad *Pegmata* pertinet: de quibus in Amphitheatro olim scripsimus: & videntur in templis opportunis disposita, composita occultè (quò admirabilia ex inopinato essent) & sub tempore ducta. Sed sequitur nūc *Templum ipsum Pacis*. A V D. Paulisper mane. & nōne *Genij publici* templum etiam lego? L I P S. Legis, sed distinctum ab isto: & hoc verecundiùs paullò & minùs insolenter excogitatum. Nam *Genium* locis, regionibus, ciuitatibus tribui, satis est frequens & notum. Itaque in Dione *τοῦ τοῦ γένου τοῦ δήμου*, *templum Genij populi*, aliquoties nominatur: sed diu antè *Vrbis*, & quidem ab anno DCCXII. ante Principatum Augusti. Sed & *Antiochiæ*, *Alexandriæ*, atque alibi *Templum Genij* leges. A V D. Amplius etiam, ruminor Spartiani verba de Hadriano: qui *Bonæ deæ ædem transtulit, & Colossum*. Sed quæ ista *ædis translatio*? si communis, vt alibi dirutam poneret; quid miri aut narrandi est? siquid ab arte aut nouum latet, me doce. L I P S. Nescio. sed ædes totas transferri, mihi nouum non est, & in Batauis vidi factum. Quid, quod Tiberij æuo architectus fuit, qui *maximam porticum iacentem & inclinatam, lanâ & centonibus circumdatam* (credo, ne videri artificium posset) *funibus & machinis, multorumque hominum manibus admotis, in pristinum restituit, firmam & rectam*? Quod Tiberius aliique nimis mirati sunt: etsi ille inuidiâ motus, nec nomen quidem eius *Actis* inferi sit passus. Quod ad *Colossum* autem, nōne Roma nuper in Obeliscis simile vidit? Sed hoc hîc notabile, quòd iste architectus,

nec inclinauit eum quidem, sed *stantem*, vt ait, transtulit & *suspensum*. At tu extra oleas me ducis: *Pacem* autem ego iam afferebam, tu distulisti. A VD. Egone illam? ô vbi es, non Dea quidem, sed summum à Deo bonum! Veni, veni, reuise miseros Belgas, tot iam lustra ciuilibus exterisque bellis iactatos. LIPS. Iam venit, confide: sed Iuno aliqua eamducit aut præit. Hanc Vespasianus Romæ consecrauit, magnâ spe & animo mansuram, post ciuilia tunc quoque bella. Id à Claudio incohatum aliqui tradunt: sed abnuuit Suetonius, & *Fecit NOVA opera Vespasianus*, inquit, *templū Pacis, foro proximum*. Habes & locum: ac nunc vestigia exstant, & ex iis operis ipsius forma. Grande fuit, & longitudo *trecentos pedes attigit*, latitudo *ducentos*. Itaque meritò Herodianus id appellat μέγιστον καὶ κάλλιστον τῶν ἐν τῇ πόλει ἔργων: MAXIMUM & pulcherrimum omnium in vrbe operum. Additque: *ditissimum* item fuisse, *ornamentis auri & argenti excultum*. Fecisse id sub initia imperij, & post triumphum, ex Iosepho discas: cuius verba lubet dare, ad vniuersam eius notificationē. Libro VII. Excidij ait: *Post triumphos, & firmam imperij constitutionē, statuit templum facere Paci: fecitq; citò admodū, et pulchrius meliusq; omni opinione perfecit. Magnis enim opibus in hanc rem usus, & priscorū etiā præclara omnia adhibens, picturis & statuis pulcherrimis adornauit. OMNIA enim in hoc templum collata & disposita sunt, ob quæ homines, videndi cupiditate, antea per TOTVM ORBEM vagabantur. Posuit & hic è Iudaorum templo vasa aurea, in iis sibi placens: et si Legem ipsorum, & vela tabernaculi aurea, in Regiâ suâ posuerit, ibi custodienda. Hæc Iosephus; & Plinius consonat, qui passim pulcherrima aut rarissima operum ad-*
notat

notat fuisse in templo Pacis. Vno etiam loco scribit: *Ex omnibus quæ rettuli, clarissima quæque in Vrbe iam sunt, dicata à Vespasiano Principe in templo Pacis, aliisque eius operibus, violentiâ Neronis in urbem conuecta, & in sellariis domus aurea disposita.* Quod magis impressius-que refero, vt tristius damnum cognoscatur, quod factum est templi huius incendio sub Commodò. Tunc enim, vt Herodianus refert, leui terræ motu præuio, siue ictu fulminis, siue igne è terrâ exspirante, subitò & improuisò totum conflagrauit, itemque Porticus, & totius eius ambitus: malo sanè augurio, vt tunc Romani haud vanè interpretabantur, periisse sibi Pacem. Inter adiecta autem vel circumiecta, periit & Bibliotheca quæ in ambitu eius templi erat: cuius in A. Gellio memoria exstat.

CAP. VII.

Fora Romana descripta; & distinctè Romanum, Iulium, Augustum, Transitorium, Vlpium.

DE Templis peregrimus: ex eodem Ammiano *Fora* nunc excerpo. Quid opus est? inquires. aut quid magni operis in apertâ planicie? Hoc enim, pro nostris moribus hodie, tu aut alius dixerit: quia hæc Fora parum, aut nihil, ornati profectò habent. Area tantùm est, & ædificia cingunt, alta, humilia, splendida, vilia; denique vt priuatorum solent. Quàm aliud in Romanis Foris, sed & Græcis? de quibus Vitruuium licet audire: *Græci in quadrato* AMPLISSIMIS & DVPLICIBVS Li.v. cap.i. PORTICIBVS *fora constituunt, crebrisque columnis, & lapideis aut marmoreis epistyliis adornant, & suprâ* AMBVLATIONES *in contignationibus faciunt.*

Atque hæc ipsa, vt addit, Romani, nisi quòd non quadrata æqualiter, sed oblonga magis faciunt, nec nisi tertiâ latitudinis parte. Sed nec columnas tam crebras interponunt: & (vt ego hoc addam) Romæ etiam magnis circumpositis ædificiis, vt *Templis, Basilicis, Chalcidicis*, magis ornabant. Vt tamen formam aliquam capias, ambitus ipse Fori porticibus claudebatur, viis relictis & spatiis ad intrandum: exteriùs deinde, *Templa*, & quæ dixi circumponebantur, & latè super Porticus illas eminebant. In paruo exemplo, nōne *Bursam*, vt vocant, Antuerpiensium vidisti? fac maiorem, & oblongam esse: habes (quod ad Porticus attinet) imaginem prisce alicuius Fori. Sed membra singula iam videamus. Ait Vitruuius, *duplices Porticus* fuisse: in altitudinem, aut latitudinem? vtrumque potuit: sed credo magis in latitudinem fuisse, vt laxiùs inambuletur. Tamen nec de illâ nego, cùm satis clarè addat, & præcipiat: *vt superiores columna, quartâ parte minores, quàm inferiores constituentur: propterea, quòd oneri ferundo, quæ sunt inferiora, firmiora debent esse, quàm superiora*. Ergo & duplex columnatio in altum solita vsurpari: sed in latum sæpissimè, atque adèò triplex, quadruplex, quintuplex-que: quàm pulchrâ tot columnarum serie, & superbâ facie? Capitolinus in Galieno scribit: *quòd is Porticum Flaminiam, vsque ad Pontem Muluium parauerat ducere, vt tetrastiche fieret, aut etiam pentastiche*. Intellegit quaternos aut quinos istos ordines: qui tamen rari haud dubiè erant. Iam super istas Porticus, Ambulationes erant: quod ipsum in Antuerpiensi Bursâ. At reliqua iam, quam imaginem hodiernam admittunt, *Basilica & Templa*? nullam. Quid *statua*, & interior ille orna-

tus?

tus? nullam. Talia igitur Fora, vt communiter hoc premiserim : veniamus ad ea magis singillatim. Fora duorum generum Romæ : & in vniuersum xvii. numerant descriptores Vrbis. Erant *Ciuitia*, erant *Vænalia* : illa, in quibus res & lites agebantur; hæc, in quibus merces aut species certæ vænales. vt *Suarium Forum*, *Piscatorium*, *Pistorium*, *Boarium*, *Holitorium*, & talia. In vtrisque & cœtus, ac circuli, ac sermões hominum erant, vt solet in vacuis : sed magis in Ciuilibus illis. quæ scito olim fuisse tria, *Romanum*, *Iulium*, *Augustum*. Seneca ad hūc numerum : *Institationes, furta, fraudes, quibus trina non sufficiunt fora*. Martialis :

Atq; erit in triplici par mihi nemo foro.

Etsi idem Martialis quartum etiam vidit. Nam Domitianus Imp. incohauit *Forum*, quod *Transitorium* vocabant, & postea Nerua absoluit, ab eo *Nerua* etiam dictum. Quintum denique addidit *Traianus*, ab ipso sic appellatum. Labet breuiter lustrare singula, & quædam in iis, leui oculorum iniectu, præcipua obseruare. *Romanum* igitur est, quod *Vetus* appellant, ad spectu ad hæc posteriora; itemque *Magnum*, quia, vt videtur, spatio superauit. Id à Romulo institutum, inter Capitolinum & Palatinum montes, ad huius finem: sic vt templa Capitolina ei imminerent, Palatij variæ structuræ, & varia in ambitu templa. Sed hæc postea fuere: Romuli æuo, simplex planicies; L. Tarquinius Priscus postea exornauit, & *Tabernis ac Porticibus* cinxit. Alij deinde tam varia (quia quisque opus suum in conspicuâ maximè & celebri parte exstare cupiebat) addiderunt: vt multæ & curiosæ curæ sit singillatim recensere. & iam alij in parte maximâ fecere. Strabonis hoc audi. qui vbi *Campum*

pum Martium valde laudasset, addidit, *Quæ omnia si quis viderit, dicat censeat q̃ reliquam urbem, non nisi additamentum campi huius esse. At idem si in FORVM VETVS* deinde progressus, alia aliis hærentia & consequentia videat, Basilicas, Porticus, Templâ, tũ Capitolium ipsum, & in eo templâ, tum Palatium, & Liviæ Ambulacra: is facillè priorum obliuiscatur, & omnium quæ viderat extra urbem. Sed & Statius quædam recensuit, in Equo Domitiani. Ille enim ex ære colossæum illum, & se infessorem constituit in hoc Foro, narratq̃ & laudat pœta in primo suo carmine:

Quæ super imposito moles gemmata colosso

Stat Latium complexa forum?

Nam *Latium Forum*, hoc nostrum Romanum est: sed quæ *moles gemmata*? nam gemmas & lapides in ære isto fuisse, nugæ: an igitur, nitida & splendens? vt idē alibi:

- *nitidis gemmantia saxis Balnea*: & quasi gemmas referentia. An verius, *moles geminata*? iam diu censui, & de viro atque equo accepi. Nunc licet, & placet magis, *molem geminatam* explicare, ipsam crepidinem siue basim magnificam, *super quam impositus* (ita clarè verba) *colossus* iste equi virique. Atque ita moles duplicatur, alterâ illâ acceptâ. Sed reliqua etiam carmina poëtę notanda antiquariis, ad sedem certam aliquot hîc ædificiorum. Nam ait:

Par operi sedes. hinc obuia limina pandit,

Qui fessus bellis, asserta munere prœlis,

Primus iter nostris ostendit in athera Diuis.

At laterum passus, hinc Julia templa tuentur,

Illinc belligeri sublimis Regia Pauli,

Terga pater, blandoq̃ videt Concordia vultu.

A fron-

A fronte facit fuisse *Limina Julia*. nam de Iulio Cæsare hæc capienda quis ambiget, cùm à prole adoptiuâ consecratum, primum Cæsarium, dicat? Sed quæ ea *limina*, hæreo: non ipsum *Templum Iulij*, de quo mox sequitur: ergo *Basilica Julia*, nisi fallor. Ea ad lacum Seruilium sita, ex Festo. A latere deinde adiunxit, *Iulij adem*, & atrinsecus, *Basilicam Pauli*: à tergo *Concordiæ* templum, sub Capitolio, & *templum Patris*, nōne ipsius Vespasiani? Certè in Victore video, hac regione Fori, *Templum Tiri & Vespasiani*. Nam aliud ab isto est illud *Gentis Flaviæ*, vt puto: atque id alibi, & in vi. regione ponunt. Enimuerò hæc *Ædes Iulij* in medio circiter Foro fuit: quod etiam factum in aliis Foris, & vt medium aliquod templum decorè esset, mox disces. Adiungo *Iulium forum*, quod C. Cæsar, etiam priuatus, & Proconsul adhuc Galliæ concepit, atque ad eò cœpit. Nam locum & aream emit, ac purgauit. magno sanè, & Suetonius dignum notari putauit ipsum pretium: *Forum*, inquit, *de manubiis incohatum*, cuius area super HS. millies constitisset. Ea summa est nobis (repeto, etsi meminisse te æstimationes iam oportuit) *vicies quinquies ceterum millium*. Tantumne in solam aream? inquires. Tantum. nec mouet, quòd viri docti, sed trepidi in talibus, diffidunt & mutare aut minuere vellent: falluntur. Quid? Plinio non erit etiam fides, in eadem re sic numeranti? *Pyramides regum miramur opera, cùm solum tantum foro exstruendo HS. millies Cæsar Dictator emerit*. Nōne ipsâ narratione & comparatione ostendit ingentē aliquam, nec in simili re tritam summam? ostendit. Ne diffidamus, sed faueamus magno huic Cæsari, qui & antiquam tantus Cæsar, concipit hæc magna. Imò verò

Dictator tunc erat, dices: ergo iam Princeps. Nego fuisse. nec Plinij ea mense est, qui addidit quidem illum titulum, sed vt hominem designaret & discerneret, non vt emptionis tempus. Credamus Suetonio, palàm hoc inter Gallicanæ liberalitatis exempla referenti. Tunc igitur emit, sed bellis impeditus aut tardatus, non nisi post bellum Africum perfecit. Appianus: *Cæsar*, post triumphos, *Veneri Genetrici templum struxit*, quod vouerat in prælio Pharsalico: & aream circum templum addidit, ibiq; voluit Romanis Forum esse. non id quidem rerum, vanalium, sed ad LITES aut negotia conuenientium, sicut & Persis forum erat quoddam vel iuris petendi dicendiq; causâ, vel & discendi. Dio Cassius de eodem sub idem

11. Ciuil. Lib. XLIII. tempus narrat: *Cæsar forum*, quod ab ipso dictum est, *exstruxit*. quod PVLCHRVS ROMANO est, et si dignitas illius auxit ex isto, factumq; vt MAGNUM diceretur. Atq; hoc Forum, vnà cum ade *Veneris Genetricis*, auctoris sui generis, *dedicauit*. Nota in eius verbis, pulchrius Romano fuisse: quodequidem credo, vel quia à Cæsare, vel quia posteriora opera prioribus ferè antecellunt. Quod tamen ex Ammiano vix dixeris: qui *Iulium* hoc silet, *Romanam* extollit: & *priscæ potentie forum* appellauit, & *Constantij oculos in eo*, miraculorum densitate, *præstrictos*. Fuit autem hoc *Iulium* haud longè nimis à Romano, post templa *Pacis* & *Faustine*. Transeo ad *Augusti Forum*: quod nominatim Plinius inter maxima operum collocauit. Profectò gradatim scandimus, & meliora ac maiora in his damus. De isto Suetonius: *Forum cum ade Martis Vltoris struxit*. Causa exstruendi, hominum & iudiciorum multitudo, quæ videbatur, non sufficientibus duobus, etiam tertio indigere. Ergo *Mars* hic *ultor* in medio

medio, vt antè *Julius*, aut *Venus*. Ouidius *Bisultorem* cognominat: quia & ob vindicatā patris necē hoc cognomen Augustus imposuit; & ob Crassianam cladem, signis à Partho receptis. Porticus in eo, de more, ad latera: sed hoc in iis singulare, & ab Augusti inuento. quòd in alterâ, ordine omnes Latini reges à capite & principe Æneâ essent; in alterâ, Romani Reges, aut Duces clari, à Romulo ipso. Ouidius de Marte illo:

v. Fast.

Hinc videt ÆNEAN oneratum pondere caro,
Et tot IVLÆ nobilitatis auos.

*Hinc videt ILIADEN, * humero Ducis arma ferentē,* * *Tropæo-*
Claraq; dispositis ACTA subesse viris. *phorum,*
foliis

Ille ab utroque igitur latere hæc videbat: & de hac re Suetonius. Proximum à Diis immortalibus honorem memoria Ducum præstitit, qui imperium populi Romani ex minimo maximum reddidissent: & STATVAS OMNIVM, triumphali effigie, in VTRAQUE fori sui PORTICV dedicavit. Nam etsi Romanos Duces modò nominat, sanè & illos intellegi Latinos par est, & poëta iubet. Inter eos & ipse locum habuit, atq; eius Tituli & Acta. Velleius: *Diuus Augustus, præter Hispanias aliâsq; gentes, quarum TITVLIS FORVM EIVS prænitet. Ergo illic sub quoque viro aut statuâ, suæ res gestæ breuiter & Index; quod Acta poëta dixit. Atque istæ nouæ statuæ: quot deinde veteres, & priscæ raræque artis? Pausanias prodidit, Minervæ Alex signum, ex ebore totum, in aditu Fori* *In, Arcad.*
Augusti stetisse: additque in eâ occasione, & ipsum, & reliquos Principes, pleraq; ornamentorum talium undique auexisse, & ad opera sua ornanda traduxisse. Situm autem hoc forum, supra ipsum Romanum, ad latus Capitoliij, post ædem hodie Diæ Martine. Quartum iam
X 2 est,

est, *Nervæ*. quod Domitianus incohavit, iste perfecit & agnominavit. Suetonius in Domitiano: *Novâ adem in Capitolio excitavit Iovi custodi, & Forum, quod nunc Nervæ vocatur*. Quomodo igitur tunc? *Transitorium*, ut opinor. Nam sic Lampridius, in Alexandro: *Statuas colossas, vel pedestres nudas, vel equestres, Divis Imperatoribus in Foro Divi Nervæ, quod TRANSITORIVM dicitur, locavit: omnibus cum Titulis & Columnis ÆREIS, quæ gestorum ordinem continerent. exemplo Augusti, qui summorum virorum statuas, in foro suo, è MARMORE collocavit, additis GESTIS*. Locus & ad ista, & priora, notabilis. vidēsque imitari Augustum in ornâdo hoc Foro Alexandrum voluisse: quid imitari? vincere volui dicere. & cùm ille statuas non nisi è marmore fecisset, iste ex ære, cum titulis etiam & columnis. Quæ autem istæ columnæ? an quibus, loco basium, insisterent, & Acta inscripta essent? an & alias intellegit, quæ seorsum Porticus sustinerent? Non de nihilo ambigo, quoniam in Pausaniâ lego, de quibusdam edificiis ex ære solido, differente: lego, inquam, fuisse talia, ut Minervæ templum Spartæ, quod *Chalciacon* idèò dicitur, atque item alibi. Sed tum addit in fidem, præsentaneum & sui ævi exemplum. καὶ ῥωμαίσις, inquit, ἡ ἀγορὰ μεγέθους ὅνεκα, καὶ κατασκευῆς τῆς ἀλλης, θαῦμα οὖσα, παρέχεται τὸν ὄρθρον χαλκοδι: *Romanis Forum, quod & magnitudine & alio apparatu omni instar miraculi est, exhibet tectum & camerationem æream*. Quod istud Forum tectò æreo, vellem nominasset. nunc suspicari tamen fas est, de isto Nervæ capiendum: nisi de alio ædificio, quod *Chalcidicum* appellabant, quodque Foris solet adiungi. Istud est *Nervæ Forum*, inter Capitolinum & Quirinalem colles situm:

tum: dictumque ideò *Transitorium*, quod per id in alia
 opportunè velut transitus esset. An & quia Iani in eo
 templum? quod *quattuor portarum* ibi fuisse Seruius
 tradidit: & *fani* olim, *transitiones* dictæ, & re ipsâ erant.
 Quintum Forum, *Vlpium* siue *Traiani*. Quis fecit? ip-
 se Traianus: nec dabo hoc Cassiodoro, Domitianum
 vel coepisse. Nam is quidem in Domitiani ix. consula-
 tu, facit eum *excitasse opera, Forum Traiani, & Thermas* In Chron.
Traiani, voluit *Nerua* dicere: & iam à nobis demon-
 stratum. Quale autem hoc fuit? Ammianus paucis ver-
 bis dixerit, clamitans *singularē sub omni calo structuram*.
 Quid ampliùs? *etiam numinum assensione mirabilem*.
 Deus bone! an & cælites terrestria hæc mirentur? etiam
 timeant fortasse. nam addit, *GYGANTÆOS contextus*
*fuisse, nec relatu effabiles, nec rursus mortalibus** * Id est,
appetendos. imitandos. Satis ostendit victa hoc opere, omnia illa quæ inui-
 cta antea habebamus. Quid autem Cassiodorus? con-
 sentit. *& Traiani forum*, inquit, *vel sub assiduitate*
videre, miraculum est. Nihil potest efficacius dici aut
 concipi ad elegantiam, & raritatem: quæ rara scilicet &
 elegans esset etiam in assiduo aspectu. Hæc communiter
 adferre possum: quid per partes? *Apollodorum* archite-
 ctum fuisse, summum in arte virum, & quem Hadria-
 nus postea, liuore quodam ductus, occidit. Porticus &
 columnas fuisse, satis scitum est: & puto in altum plu-
 res. vnde enim alioqui *gygantas contextus* Ammianus
 diceret? Et sanè altitudo *Columna*, quæ in medio sita fuit,
 hodieque appâret, est pedum CXXVIII: cum inscriptio-
 ne, TANTÆ. ALTITVDINIS. MONTEM. ET. LO-
 CVM. TANTIS. OPERIBVS. ESSE. EGESTVM.
 Credo aut tam altas igitur, aut non longè infrà, Porti-

Lib. XIII.
cap. XIII.

cus fuisse. In earum fastigiis simulacra equorum, & signorum militarium. de quibus Agellius: *In fastigiis fori Traiani SIMVLACRA sunt sita, CIRCVM VNDIQUE, INAVRATA equorum, ac signorum militarium: subscriptumq; est, Ex manubiis.* Nota hæc omnia inaurata fuisse: & probabiliter etiam Statuas, quæ subter Porticus collocatæ. Quas M. Antoninus auxit: qui nobilibus viris (in Capitolino) bello Germanico defunctis, statuas in Foro Ulpio collocauit. Ibidem & Templum, & Equum aneum fuisse, Victor ostendit; & circum Bibliothecam, alij. Sed de Equo etiam Ammianus. cum scribit attonitum Constantium basisse, omni spe huiusmodi quidquam conandi depulsâ: *Traiani tamen EQVVM solum, in atrij medio locatum, qui ipsum Principem uehebat, imitari se velle dictabat.* Cui propè astans regalis Hormisdas, respondit gestu gentili, ANTE, inquit, IMPERATOR STABVLVM TALE CONDI IVBETO, SI VALES. Liberè hoc Hormisdas, & verè. quid autem posteri manibus tale aliquid conderent? vereor vt nos, & nostri architecti, vix mente.

CAPVT VIII.

De Balneis Thermisq; & breuiter de Rostris.

AVD. Profectò, Lipsi, oculos mihi aperis ad hæc suspicienda: quæ ego non in magno antea habebam. LIPS. Fortasse nec ea quæ de *Lauacris*, id est Balneis aut Thermis Ammianus adiunxit. AVD. Haud nego. magna fuisse, hoc ruinæ me docent; ornata valde aut magnifica, nondum agnosco. LIPS. Licet per me breuiter. Et de magnitudine quidem, nonne ea ipsa miranda

randa in tot partium ædificio & membrorum? Am-
 mianus ad eam, puto, respicit, cùm scribit *Lauacra in*
modum prouinciarum exstructa: & quasi quæ, non vr-
 bes, sed regiones totas æquent. Satis audax elatumque
 dictum, fateor: sed causam habuit. & Cassiodorus item
 signatè laudat & suggerit MIRABILEM MAGNITV-
 DINEM THERMARVM. Et vidisti illas parietinas ho-
 die *Antonini* Thermarum, aut magis Diocletiani? mi-
 ra laxitas: & addere debeas *Porticus, Nemora, Xystos,*
 & imaginem quasi regionum. In Olympiodori Ex-
 cerptis lego: *Lauacra publica* INGENTI MAGNITV-
 DINE erant, è quibus *Antoninianæ* dictæ, in vsum lau-
 antium habebant sellas mille sexcentas, easque è MARMORE
 POLITO factas. Verti ego Sellas, quod in Græco est,
 καθédρας: aptè, vt opinor, & sunt sanè à Soliis distinctæ.
 Sidonius de suo balneo: *Hinc Frigidaria dilatantur, ita*
ut ministeriorum sese non impediende famulatu, tot possint
recipere sellas, quot solij sigma personas. Ergo singulis per-
 sonis suæ Sellæ: & sic in illis Antoninianis lauati simul
 in Frigidario potuerint mille sexceti. Quid non ampliùs
 in Diocletiani, quæ ampliores? Magnitudinē agnoscis:
 ceteras partes, & illa Sidonij tibi dicent (lege, si lubido
 est) & Hieronymi Mercurialis, eruditi amici nostri, scri-
 pta *Gymnastica artis.* De splendore & paraturâ earum,
 audi hæc Senecæ: *Pauper sibi videtur ac sordidus, nisi pa-*
rietes magnis ac pretiosis ORBIBVS refulserint: nisi
ALEXANDRINA marmora NUMIDICIS crustis di-
stincta sint: nisi illis undique, & in PICTVRÆ modum va-
riata CIRCVMELITIO prætexitur: nisi VITRO conda-
tur camera: nisi PARIVS & THASIVS lapis, quon-
dam rarum in aliquo templo spectaculum, Piscinas nostras
 circum-

 Lib. 11.
 Epist. 11.

 Epist. 7
 LXXXVII.

circumdederit: nisi aquam ARGENTEA epitonia fuderint. Et adhuc plebeias fistulas loquor: quid cum ad balnea libertinorum pervenero? quantum STATVARVM, quantum COLUMNARVM est, nihil sustinentium, sed in ornamentum positarum, & impensa causâ? quantum AQVARVM per gradus cum fragore labentium? Eò deliciarum venimus, ut nisi GEMMAS calcare nolimus. Ea verò Senecæ increpatio aut delineatio, quàm clarè sub oculos dat & ponit, non Balneas aliquas, sed Principum dixeris Aulas? Et quædam ex istis Statius, in Balneo Etrusci:

*Nil ibi plebeium, nusquam Temesæa notabis
Æra, sed ARGENTO felix propellitur unda,
ARGENTOQ. cadit, Labrisq. nitentibus instat
Delitias mirata suas.*

Significat fistulas & canales argenteos fuisse, ipsa etiam Labra. Idem de Vitro:

*Effulgent camera, vario fastigia vitro
In species animosq. nitent.*

Lib. xxxij.
cap. xii.
* Fibulas
intellegit.

Quid autem Plinius? narrat & culpat cum Senecâ: *Jam verò padagogia ad transitum virilitatis* custodiantur argento; feminae lauentur, & nisi ARGENTEA solia fastidiant, eadèmq. materia & probris seruiat, & cibis. Videret hæc Fabricius, & STRATAS ARGENTO mulierum balneas, ita ut vestigio locus non sit cum viris lauantium.* Significat & totum *Solij sigma*, ut Sidonius appellat, ex argento fuisse, & ipsa pauimenta; ita ut nec insistere in iis & vestigium figere firmiter esset. Quod si Priuata hæc Balnea ita culta: credo equidem & Principes in suis, quæ publicabant, parcos aut sordidos non fuisse. Eiusmodi *Publica & Gratuita* balnea, duodecim.

P. Victor

P. Victor agnoscit Romæ fuisse : omitto alia *Publica*, quæ *Meritoria* licet agnominare. Nam paruo ære, & *Quadrante*, ad ea lautum ibant. Quid, quod Plinius scribit *M. Agrippam in Ædilitate suâ, gratuitâ præbuisse balnea centum septuaginta?* atque addit Plinius: *quia nunc* Lib. xxxvi.

Romæ ad infinitum auxere numerum. A V D. Hem! tot igitur & *Privata* & *Publica* balnea? & quo fine?

L I P S. Quæris? ad equitandum scilicet. & quis nescit, quòd ad lauandum? A V D. Ne sic increpa. ego hoc rogatum volebam, cur tam multa, & an tam assidua lautio? L I P S. Assidua. & cottidie, de more, lauabant ituriam ad cenam. Artemidorus scripsit, *Balneum nihil aliud suo auro fuisse, quàm transitum ad cenam.* Itaque qui sæpius etiam cibum capiebant, sæpius lauabant. Commodus Imp. notatur *septies aut octies in die lauisse.* Etiam inter Christianos, Sisinnius quidam Episcopus *bis in die*: non sine suspitione intemperantiæ & voluptatum. Sed ille diæterio culpantes elusit, rogatusque *Cur Episcopus cum esset, bis lauaret?* Quia ter, inquit, non possum. Significabat bis se comedere, bis igitur lauare, teriò non ferre valetudinem. A V D. Noua hæc nobis. L I P S. Noua, qui desimimus hunc morem: nec scio an rectè, quòd totum. Credam valetudini & vitæ profuturum, si in parte seruassemus, & cum modo: quem ingestum vetus Epigramma voluit, alibi in lapide sculptum.

* *B. U. U. corrumpunt corpora nostra,*

Conseruant eadem B. U. U.

Tria intellegit, quæ modicè habenda; aut cum damno habenda, vel non habenda. Sed Ammiano duce satis vidimus: abeamus. A V D. Maneamus. quid tu nescis, aut dissimulas, de *Theatro, Amphitheatro, Odéo, Stadio,*

* *Balnea,
Vina, Ven-
na.*

Suggestu consulari? LIPS. Scio, & memini: sed hæc per te satis te opinor scire. De *Amphitheatro* quidem seorsim libellum ego olim scripsi: idem in *Theatro* & *Circo* sit, si coner. Libri, inquam, res: quæso nunc omitte. Nec in *Odéo* aut *Stadio* multa dicenda: atque illud *Plutarchus* in *Pericle* tibi describet, ad *Musica certamina spectanda structum fuisse*, interiore formâ *sedilibus instructâ*, & multis columnis: *tecto declini*, & ad imaginem atq; *instar tabernaculi regis Persarum*. A VD. Non ausim ultra te ducere. LIPS. Nec debes, fatigor. A VD. Tamen de *Suggestu* tria verba. LIPS. *Rostra* intellegi arbitror; sed ea quæ *Iulia* dicebant, siue *Noua*. Nam *Vetera* illa non in tanto nunc honore, vel usu. Sed cur *Suggestum* ea dicit? à formâ, quam ostendit per gradus surrexisse, cum dicit *vertice scansili* fuisse. Dicit & *imitamenta priorum Principum portasse*: id est vultus & statuas eorum. quas equidem arbitror in gradibus, ad extrema latera, dispositas in ordine fuisse. Eorum basim, siue ima, *ornata rostris nauium*, ex *Ætiacâ victoriâ*, *Dio Cassius* me docuit: & inde igitur *Rostrorum* nomen. A VD. Sed *Consulum suggestum* cur appellat *Ammianus*? LIPS. Quia initio magistratus eò conscendere solent, & populum salutare: eodem iterum, cum deponerent magistratum. Mos ab antiquo mansit: qui & adire, & orare illuc ac gratias agere populo solent, pro honore. Sed inferiori & Principum æuo, nihil factum, nisi vt conscenderent, salutarerent, itemque iurarent, aut eiurarent. *Plinius* de *Traiano*: *Jam toties procedere in Rostra, hic suscipere, hic ponere magistratus, quàm dignum te fuit?* Præiuit etiam: *In Rostris, simili religione, legibus te subiecisti: iurasti in legem, attendentibus Diis*. Denique *Claudianus* de *Stili-*

Stilicone Consule, inter sollemnia ponit:

Circumfusa tua conscendant Rostra curules.

Ergo & sedisse illuc in Sella curuli videntur, & sic se ostendisse, quasi auspicii causâ.

CAPVT IX.

De Statuis, & earum custodelâ.

AVD. Ah, quàm iuuant me hi aspectus! quàm doleo ab Ammiano ductore, aut te doctore, deferri! LIPS. Vide benignitatem, da manum, porrò vel solus ego ducam. AVD. O hominem & verba mellea! non voluptatem meam te dicam, sed salutem. perge sic iuuare. LIPS. Vnum etiam in his omnibus operibus locisque monendum, de *Statuis*: quarum incredibilis multitudo, pretium, speciesq;. Nullum publicum opus, quodcumque nomines, nullus adeò locus publicus aut vacuus, vbi non hæc ornamenta. Earum originem & augmentum breuiter in Cassiodoro habes: *Statuas primum Tusci in Italiâ inuenisse referuntur, quas amplexa posteritas, penè PAREM POPVLVM vrbi dedit, quàm Natura procreauit.* Ludit in verbo eleganter: nec minore copiâ factos ab arte illos homines in vrbe fuisse vult, quàm istos à naturâ. Ludit in verbo, in re seriò dicit. & P. Victor in fine Descriptionis suæ claudit, TABVLÆ ET SIGNA SINE NUMERO. Nam ego tibi de *Tabulis* etiam oblitus eram dicere, sed hic monitor suggessit: quas scito magnorum illorum artificum fuisse, & ob quarum vnâ alteramque, vel Romam philocali & elegantes illi venirent. Iam de *Pretio* statuarum, quod tetigi, quis non vel è materie cernat? Omitto marmo-

Sueton.
cap. 13.

reas illas & æreas infinitas, dico, *Argenteas, Aureas, Eburneas* fuisse. Atque adeò Domitianus, ecce, *statuas sibi in Capitolio, non nisi aureas argenteasq; poni permisit, ac ponderis certi.* Nota materiem, nota pondus: & ex solido vtroque igitur metallo fuisse. Fortasse autem pondus in his Statianis versibus expressum:

Da CAPITOLINIS aeternum sedibus aurum,

Quoniteant sacri CENTENO pondere vultus.

Statuam Domitiani consecrari poniq;e vult in Capitolio, & eam *centum pondo.* At enim alię grauiiores, ne dubita. atque adeò Commodus Imp. *statuam mille librarum auream habuit, cum tauro & vaccâ, quasi urbis conditor:* quod in Dionis compendio est scriptum. Itaque nec pro magno aut vero satis habeam, quod est in Trebellij Claudio: *Populus Romanus, sumptu suo, in Capitolio ante Jouis Opt. Max. templum, statuam auream decem pondo collocavit.* Quid? Principi suo totus populus, & in tali loco, tantillam statuam ponat? Scribe, scribe, *∞. pondo:* id est mille, & hîc quoque nota *millenariam* notam in *Denariam* mutasse. Eidem Principi (idem Trebellius notat) *in Rostris posita columna est, & palmata statua superfixa; librarum argenti mille quingentarum.* Disce & hinc pondus grande in vtroque meliore metallo: quod crebrum omnino fuit, & crebrius etiam misceri, & æs vel argentum inaurari. Ammianus de vulgo Romanorum nobilium: *Ex his quidam æternitati se commendari posse per Statuas æstimantes, eas ardentè adfectant, atq; AVRO curant IMBRACTEARI. quod Acilio Glabrioni delatum est primò.* Inauratas intellegit, quod aliquoties in lapidum titulis expressum legi, *SVB. AVRO. STATVAM. PONI.* In eodem Ammiano

Lib. xvi.

miano vides studium in eâ re Romanorum. quod & ante illum Dio aperuit, & simul repressum ostendit. *Urbs*, inquit, *statuis implebatur. quia licebat cuique passim* Lib. vii. *in Tabulâ, Ære, Marmore, se publicare. quod Claudius Imp. vetuit, & plerasque iam positas loco movit & aliò transtulit; edixit q̄ ne quis in posterum PRIVATVS poneret, nisi Senatus permissu: excepto, si quod OPVS PVBLICVM faceret, resciceretve.* Coërcere igitur Princeps ille voluit, quia nimia iam copia, & urbem, vias, vicos, non ornabant, sed stipabant & arctabant. Atqui exceptio quam ponit, & permissio item à Senatu, fræna iterum laxant: & in vrbe qui non potuit, is se in villis aut agris publicabat. Ad summam, mi Auditor, hæc vna res ad Opes item est Romanas ostendendas: & maximè si varias species Statuarum cogitas, *Colosseas* quasdam, *Curules, Equestres, Pedestres*, & habitu variante & diuerso. A V D. At enim mihi hîc cogitatio, & pænè cupiditas. L I P S. Quæ? A V D. Improbula. nam cur non fas è statuis illis aureis argenteisq̄ue Deorum vel Principum, aliquid transeuntem abradere, vel rescicare? L I P S. Nefas homo, nefas. Tu è statuis Principum? capite luisses violata illa sacra. A V D. At quis sciuiisset, aut dixisset? de nocte. L I P S. Disce, imperitus es, custodiam & cautelam antiquam. Miles in vrbe excubabat, *Urbanus* ille & *Vigilum* ad templa, ad loca item publica: sed prætereà certus etiam Præfectus huic Statuarum custodiæ, & qui militem haberet. Vocarunt id officij, *Comitiuam Romanam*. & Formula eius hæc in Cassiodoro legitur: *Si clausis domibus insidiari solet nequissimum votû, quanto magis in Romanâ ciuitate videtur illici, qui in PLATÆIS pretiosum reperit, quod possit auferri? Nam quidam P O-*

PVLVS COPIOSISSIMVS STATVARVM, *greges etiam abundantissimi* EQVORVM, *tali sunt cautelâ seruandi, quali & curâ videntur affixi.* Tum verò addit: *Quare per indictionem illam* COMITIVÆ ROMANÆ *tibi concedimus dignitatem. Officium tuum, & MILITES consuetos, noctibus potiùs inuigilare compelle: in die autem ciuitas seipsa custodit.* Atque hic est qui *Comes Romanus* appellatus, qui Romam, & eius opera, seruabat.

CAP. X.

De Viarum magnis operibus, & nominatim de Appiâ.

AN & longiùs etiam eo? nec Romam solùm, sed quædam in eâ, & circa eam, ostendo? faciam, vt inter tantas Opes & animos, me quoque largum fieri videas & benignum. Tria occurrunt, præter Ammiano dicta, vel maximè ADMIRANDA, *Via, Aqueductus, Cloaca.* A VD. Non sustineo me, nec reprimò: tu *Cloacas* nobis inter magnifica, & sordes has inter illos splendorès? Hoc verè est, quod poëta dixit: *stellis nebulam spargere candidis.* LIPS. Non sic dices, vide & audi: imò & sub terrâ thesauros tibi ostendam, & latentium quorundam operum moles. Sed ordine videamus: & primò iudicium de his tribus Dionysij. Scriptor ille sub Augusto Romæ fuit, & per viginti annos circiter vixit: ergo benè eam vidit, nouit, & (vt viri ingenium) diiudicauit. Profert & eloquitur: *Ego sanè in tribus MAGNIFICENTISSIMIS operibus Romæ, & è quibus MAXIME APPARENT illius imperij OPES, pono AQUÆDVCTVS, VIARVM munitiones, CLOACARVM structuras.* Neque

*que id solum ad vtilitatem eiusmodi operum respiciens, sed etiam ad impendii sumptuumq; modum. Ecce, hæc tria vult velut specimen & argumentum esse Romanæ opulentiae & potentiae: siue ab usu consideres, siue ab impendiis & sumptu. Quod ille censuit, tu accensebis, cum singula dispicies & intentè lustrabis. Primæ sunt Viæ; quas illi non in Vrbe solum, sed extra eam, ad longissima spatia, plurimas, & plurimo opere, munierunt Stupor me habet, cum vel vnam Appiam considero: de quâ Procopium, non me, audi. Belisarius, inquit. *Lib. 1. de bello Gothi.*
*viâ Latinâ exercitum duxit, Appiâ ad laeuam dimissâ. Hanc Appius Romanorum Censor ante annos nongentos struxerat, & à se dederat nomen. Longitudinem eius quinque dierum spatium vir expeditus possit emetiri. Ab vrbe Româ Capuam pertinet, eâ latitudine, ut duo currus ex aduerso obuij, liberè queant peruadere & commeari. Et est sanè hæc via, præter ceteras, spectabilis. siquidem Appius ex aliâ & longinquâ tunc, ut reor, regione excisos lapides, & hos quidem siliceos, ac suapte ingenio durissimos, in hæc viam vehendos curauit. Quos planos deinde ac laues redditos, & quadratos incisione factos, iunxit & in ordine locauit, metalli nihil vel alterius rei inserendo. Sunt tamen ita cõnexi, & validè inter se hærent, ut speciem visentibus præbeant, non coniunctos ita, sed congenitos esse. Et quamuis tot iam sæculis atterantur, assiduis plaustris iumentisque: tamen neque serie suâ vel minimum exeunt, & dimouentur, neque franguntur, aut lauorem suum amittunt. Hæc Græcus ille scriptor, & oculatus arbiter, extra argumentum historiæ suæ accuratè inferuit, admiratione inductus, quæ stilum eò traxit. Examinemus, & libremus. Ait, Appium ante annos nongentos struxisse.] Imò octingentos quin-**

Lib. xli.

quinquaginta circiter, quod Fasti dicent. Si autem strauit lapidibus Appius: quid est, quod in Liuius legimus, *Q. Fuluium Flaccum & A. Postumium Albinum Censores, vias sternendas silice in urbe, & extra urbem glareâ substruendas, marginandasq;*, PRIMOS OMNIUM locauisse? Quomodo enim primi omnium, cum hi fuerint Censores anno Urbis DLXXX: at Appius aliquot ætatibus præcessit? Quid, quod *Flaminia* via diu antè strata, & sub bellum Punicum secundum? An hoc Liuius sensit, *glareâ* tunc primùm stratas? an potius, primos ipsos locauisse? an denique ad *Censores* iunctim refert? per otium examinandum sit. Obserua autem in Liuij verbis, duplicem rationem sternendi, vel *Glareâ*, vel *Silice*. Quæ vtraque & Tibullo notata, ad Messallam:

*Namq; opibus congesta tuis hîc GLAREA dura
Sternitur, hîc aptâ iungitur arte SILEX.*

Obserua amplius, *marginari* solere: quod caput sanè erat, & Agger ille viæ cum altiusculus, & instar puluilli esset (ita solet:) firmiter arctari & stringi lapidibus grandioribus ad oras debebat, ne difflueret & spargeretur. Hoc *marginari*: & ibidem etiam alij lapides duplices, & ad vsum duplicem. Priores, Cippi quidam eminentes, in quibus insidere fessis, onera reclinare, aut & ascendere ex iis in equum fas esset. Ij crebriores dispositi per totam viam: alteri autem rariores, qui vt Columellæ exstabant, & notis numerorum incisi, milliaria notabant. Vtrunq; hoc G. Gracchus instituit, Plutarcho notante: & gratum in vulgus fuit. Cur non esset? experti nos peregrinantes sumus, nihil magis ad tædium, & fatigationem ex eo esse, quàm ignaros spatiorum oberrare: & contrà, refici animum ac vires eâ signatione. Quintilianus

lianus benè: *Partitio reficit audientem, non aliter, quàm facientibus iter, multum detrahunt fatigationis* NOTATA INSCRIPTIS LAPIDIBVS *spatia*. Rutilius eodem pertinet:

Intervalla via fessis præstare videtur,

Qui notat inscriptus MILLIA multa Lapis.

Hinc ille mos per *Lapides* computandi: quos Græci ab hac notatione milliarium, *Σμύρια* vocant: id est *Signa*, siue *Notas*. Sed pergit Procopius, *Longitudinem via Appia, quinque dierum esse.*) Quid: vniuersæ eius Brundisium vsque? non opinor, nec res ita est: sed Capuam dumtaxat, quò & Appius produxit: nec vltrà. Notauit & Frontinus: *Appia aqua inducta est ab Appio Claudio Censore, qui & viam Appiam, à portâ Capenâ vsque ad urbem Capuam muniendam curauit.* Neque verò vltèriùs ille potuit, cùm nec vltèriores tunc Romani fines. Quis autem longiùs, & Brundisium vsque muniuerit, in obscuro est: munitam tamen id constat. Ecce Strabo, *Viam Appiam Tarracine facit mare primum attingere, & Brundisium vsque stratam esse.* Tacitus Libonem consultauisse: *utrum habiturus esset opes, quâs viam Appiam Brundisium vsque pecuniâ operiret.* Denique & Horatius:

Brundisium meliùs Numici via ducat, an Appi?

Producta igitur: an à Iulio Cæsare, quem Plutarchus scripsit, *Appia Curatorem factum, plurimum pecunie in eam impendisse*? an ab Augusto, qui plerasque omnes vias per Italiam ipse, aut per alios, muniuit? Nam Plinio accedere, siue is Nepos est, de *Viris illustribus*, non possum: qui *Appium viam Brundisium vsque Lapidibus strauisse* scribit, unde illa *Appia dicta*. Nam hoc sanè cer-

tum, loca ea id æui, hostilia aut aliena Romanis fuisse. Tota autem hæc longitudo est, *milliarium circiter CCCL*: nequis de *quinque diebus* Procopio dictum, huc trahat. A v d. Atqui nec Capuam vsque tanti sunt, nisi ignauo & parum accincto viatori. Lips. Fateor, sed flexus etiam suos & declinationes scito viam habuisse. Addit de latitudine, *ut duo currus peruaderent.*) Nescio, neque dimensus sum (alibi tamen potest, & exstat:) sed opinor igitur haud minus *viginti quinque pedes* patuisse. Amplius, de materie, *ex longinquâ regione lapides aduectos, eosq; siliceos.*) Silicem intellegit, durum asperumque lapidem, & è rupibus: non illum minutum & tenuem, quem vulgò vocamus, & qui in *Glaream* potius vênit. Illo modo Plinius, Liuius, atque alij locuti. Sed è quâ regione petiti? in viciniâ tales non esse, hoc Procopius indicauit. Onufrius Panuinus hoc amplius, *môtes ostendi duos, ad Sinuessam unum, alterum inter Puteolos & Neapolim, è quibus saxa ea, colore & duritie* FERRVM *referentia, videantur excisa.* Fides penes illum sit, rerû veterum tamen curiosum, & satis peritum. A v d. Quid, quod apud nos simile? Lips. Vbi? cupio audire. A v d. In *Hannoniâ*, ut nos vocamus (nam patres *Hainouiam* dicebant) ad opidum *Bauacum*. Columna illic milliaria in Foro medio est, ut illâ Romæ, ad quam viæ istæ finiuntur, siue ordiuntur. Sunt autem glareâ & minutis silicibus stratae, & ducunt in præcipuas Galliæ partes. Vestigia & reliquie multis locis cõparent. Quod autem dictû volebam simile, est non nihil dissimile: sed tamen & simile. Nam glareâ & lapilli vnde aduecta, difficilis indagatio est: cum in vicinis agris non gignatur. adeò ut Bouillus quidâ, qui vidit & inquisiuit, censeat *vel ab his-*

mo ebullisse silices, vel ab alto athere depluisse, vel deniq; non humanâ manu aduectos. Quod postremû & vulgus cēset, feruntq; magicū opus, & à reginâ Brunechilde exstructas: cuius & * nomen ferūt Lips. Ah, ignaros & incredulos ^{* vocatur} Romanorum operum ! qui hæc talia militari manu, & ^{Chaussées de Brune-} provincialiū item subsidio, supra omnem fidem patrabant. At in Procopio pergamus, qui addit, *Lapides planos quadratosq; fuisse.*) Conspiciuntur hodie tales, diuersâ magnitudine, *trium, quattuor, quinque* etiam pedum quaquauerfus. Cetera de *iuncturâ & firmitate*, utque *unum corpus* appareant: sunt miranda magis hodie, quàm imitanda. A V D. Certè mirifica hæc Via: sed tu nempe vnam & eximiam eligis, de quâ poëta,

Appia LONGARVM teritur REGINA viarum.
 aliæ non ad istam. Lips. Mihi crede, ad istam. etsi hæc celebritate, & longitudine eminuit: quia à Româ in Græciam, Asiam, & trans mare ducebat. Sed quid *Flaminia* via, an breuior ? quæ Româ Ariminum vsque, & inde porrò Aquileiam ducebat ? Nam quod ad munitionē, pleræq; similes: nec in Italiâ solum plurimæ, sed in provinciis ipsis. Isidorus scripsit : *Pænos primos lapidibus vias strauisse, quas postea Romani panè per TOTVM ORBEM disposuerunt.* Et quomodò ? excisis sæpe montibus, complanatis vallibus, ut æquabiles, & faciliores ita viæ essent. Strabo : *Εσρωσθη ἡ καὶ τὰς ὁδοὺς, ἀεὶ οὐκ εἰς τε ἐκκοπὰς τε λόφων, καὶ ἐγχαώσεις κοιλάδων, ὥς τε τὰς ἀρμαμάζας δέχεσθαι πορθμείων φορτία :* *Strauerunt & Vias, excisis montibus, vallibus repletis, ut currus vehere possint & suscipere nauium onera.* Habes vias, & ornatum : mentior, & itane præcipuum me fugiat ? præcipuum dico, si non in vsu, at splendore & voluptate. Id fuit, quòd monumen-

ta & sepulchra passim ad viam affita, & latus vtrumque prætexebant. Quàm pulcher ille aspectus viantibus? quanta & seriorum, & iocorū, materies? Illic illustrium ingeniorum, aut clarorum virorum memoria & inscriptio: alibi libertorum, seruorum, scortorum superba monumenta. Mirari, dolere, illudere, etiā detestari occasio erat: & quid in tot titulis & inscriptionibus pasci? Quædam à meliore ingenio, & scitæ; quædam aliquâ notâ aut inuentiunculâ spectabiles: & istæ quæ hodie exstant, dicent. A V D. Ita me Deus, iucundū aspectum! & ego si in tali via; remorer, subsistam, indormiam. L I P S. An non & hoc sapienter cogites, omnium illorum qui disparibus monumentis teguntur, parem in exitu sortem fuisse? *Æquat omnes cinis. impares nascimur, pares morimur.*

C A P. XI.

Aqueductum mira.

SED *Aqueductus* iam nostros videamus, & puluerem sordeſquæ, si quas è Viâ contraximus, abluamus. Quid in iis tamen hæream? Iulius Frontinus est in manibus, qui olim *Aquarum Curator*, pulcherrimos libellos duos de totâ re scripsit, & ad nos venerunt. Ex illo, aut aliis, quædam libabo. Diu igitur Roma sine *Aquæductibus*, & Tiberis, ac si qui fontes natiui erant, sufficiebant populo, sed nondum sic aucto. Vrbe dein magnâ, plenâ, aliunde *Auro melior aqua*, vt poeta canebat, quæſita, & per tubos ac canales, in fornicibus lateritiis, Romam aduecta. Id factum primò, anno Urbis CCCXLI. cùm Ap. Claudius Censor, idem qui Vias

ster-

Sed.

Pind.

sternere instituit, hoc quoque bonum inuenit. Ab eo est *Aqua Appia*, per milliaria circiter *undecim* deducta. Hoc initium: sed Deus bone, quæ mox incrementa? Nam egebat sanè ille populus aquis, non solùm ad potum, sed ad balnea, ad fullonicas, ad Naumachias & Circos. Atque ita vbertim inducta fuit, vt quisque domi, aut in vicino, haberet copiam: scribitque Strabo, FLUMINA per urbem & Cloacas videri fluere, atque VNAM QVAMQVE DOMVM propemodum habere fistulas & canales, quibus aquam inducat. De eadem re Plinius: Siquis diligentius aestimauerit AQUARVM ABUNDANTIAM in publico, Balneis, Piscinis, Domibus, Euri-
 ripis, Hortis, Suburbanis villis, spatioque aduenientium exstructos ARCUS, montes perfossos, conualles aquatas, fatebitur NIHIL MAGIS MIRANDVM fuisse in TOTO ORBE terrarum. Copiam habes; molem in adducendo habes, miraculum super omnia mira orbis, Plinio quidem iudice, habes. Quid Cassiodorus de istis? *Formas* ipse appellat hos Ductus, quod & Iurisconsulti, atque inferior ætas fecit. De iis igitur: *In Formis Romanis utrumque præcipuum est, vt & FABRICA sit mirabilis, & aquarum SALVBRITAS singularis. Quot enim illic FLUMINA quasi constructis MONTIBVS perducuntur? naturales credas alueos, soliditates saxorum: quando tantus impetus fluminis tot seculis potuit sustineri.* Credamus hoc ergo iam Frontino, paucis fideisque verbis effanti: MAGNITVDINIS Romani imperij, id PRÆCIPVVM esse indicium. Benè & verè. quia non Romæ tantùm, sed in coloniis plerisque, & maioribus opidis, hæc fuere. Sed norimus Romanos, & alios, ab his exemplis. Ij fuere in urbem perducti *quattuordecim* (vt Procopius eos

numerat) *coctili laterculo per priscos illos adificati, eâ LATITVDINE ac simul ALTITVDINE, ut vir eques commodè per eos possit incedere.* Vide an non verè aluei quidam fluminum dicantur, cùm tam magnis amplisque canalibus aquas vehant. Sed hæc altitudo, de ipsis modò est: quid Arcus & Fornices arbitraris? quos in quibusdam locis subleuatos centum nouem pedes, Iulius Frontinus affirmat. O rem stupendam! & magis, quòd à tot milliaribus continuo opere (etsi non vbique sic alto) perducebant. Reperies quosdam à QVADRAGESIMO milliari perductos esse: & nempe per valles, per montes, per tot inæqualia, supra, infra terram: ô iterum rem stupendam! & Rutilium audi:

Quid loquar AERIO pendentes fornice riuos?

Quâ vix IMBRIFERAS TOLLERET IRIS AQVAS.

Hos potius dicas creuisse in sidera MONTE S.

Tale GYGANTÆVM Gracia laudat opus.

Sunt certè, aut videantur, opera Gygantum, an Geniorum aliquis dicat? & mens obnubilat Architectis nostris, cùm vel reliquias paucas & ruinas vident. Exstant iuxta Sublaqueum *Aqueductus Claudiani* fornices, & ingentes pile sustinentes: quas Albertus Leander sedulo vidit & scrutatus est. erumpit deinde in hæc verba: *Fieri profectò non posse scio, quin omnino incredibilis sit, nisi oculis usurpetur, operis huius ratio ADMIRANDA. Nec enim MAIUS QUID QVAM excogitari posse HVMANO INGENIO arbitror, quàm quod hic Romani, effosis tanto spatio MONTIVM intimis visceribus, fecerunt. Ad quæ opera patranda NVNC TOTVS ORBIS infirmus futurus videatur.* Siquis veterum hæc dixisset, blanditus scilicet æuo suo aut suis fuisset: quid iste vir nouitijs? quid in tali-

talibus & curiosus vnicè, & peritus? Loquitur autem, ut dixi, de Claudij Aquæductu, de quo & Plinius: *Vicè antecedentes aquarum ductus novissimum impendium operis, inchoati à Caio Cesare (Caligulam intellegit) & peracti à Claudio. Quippe à quadragesimo lapide, ad eam EXCELSITATEM, ut in OMNES VRBIS MONTES leuarentur, influxere Curtius atq; Ceruleus fontes. Erogatum in id opus HS. ter millies. Notabile valdè, & utile, quòd in summos Urbis colles aqua inde & deriuari, & dispensari posset: adeò in altum edueta erat. Hoc ipsum Cassiodorus notat, Claudiam, per tantam fastigij molem, sic ad Auentini caput esse perductam, ut cum ibi ex alto lapsa ceciderit, cacumen illud excelsum, quasi imam vallem, irrigare videatur. De pecuniâ autem in id opus imputatâ (fuerunt, ex Plinio, septem nostri milliones & semis) valdè miror Budæum nutare, & pænè mutare. Per fidem, quæ caussa est? imò augendi caussa, si quis benè examinet: & planè, nisi aliqua militaris, aut & seruilis manus ad opera damnatorum, (ut Romanis mos) accessisset. Iure igitur, ut claudam, exclamat Frontinus: Tot aquarum, tam multis NECESSARIIS molibus, Pyramides videlicet otiosas comparem, aut cetera inertia, sed famâ celebrata opera? Non compares Frontine, minimè: hæc sunt, ut Plinius appellat, verâ estimatione INVICTA MIRACULA, & quibus alius orbis tam æquo animo victum se à Romanis, quàm armis, fateri debet. Dixi autem ex Procopio suprâ, Aquæductus istos XIIII. fuisse: sed auget P. Victor, & xx. numeravit. Plinius quædam de Lacubus aliisque additamentis Aquæductuum scripsit, non sine miraculo etiam audienda. Agrippa in Edilitate suâ, adiectâ Virgine aquâ, ceteris corruatis atque*

atque emendatis, LACVS septingentos fecit, prater eà SALIENTES centum quinque, CASTELLA centum triginta: complura etiam CVLTV magnifica. Operibus iis SIGNA trecenta area aut marmorea imposuit, COLUMNAS ex marmore quadringentas: eaq̃ omnia ANNO SPATIO. Hæc vnus Agrippa, & vno anno. O virū Augusto Principe dignū! ô virum vel Principatu dignum! & non credo benignius & publicè vtilius ingenium, non item modestius & Principi aptius exstitisse. Tales, tales sint vobis ô magni Reges consiliarij & ministri: qui opibus per vos aucti, eas in publicum refundant, & gratiam gloriamq̃ simul, operibus suis, apud posteros, imperij vestri propagent. At scripsit Plinius *Lacus septingentos* ab eo factos: rectè, *ab eo*: sed plures longè fuere in vniuersum, & *mille trecentos quinquaginta duos* Notitia imperij collegit. Isti non aliud, quam aquarum in publico receptacula: è quibus petere omnibus fas esset. Etsi gratior æstimatorq̃ue è *Salientibus* ipsis sumpta. Nota autem in Plinio, tot *Signa*, tot *Columnas*, ad ornatum *Lacuum*, *Salientium*, *Castellorum*: atque ea ab vno Agrippâ: quid arbitraris ab aliis prioribus & secutis fuisse? Atque alia etiam assidua multa impendia circa has aquas: quarum *Curatores* ab Augusto instituti, *cum lictoribus*, *seruis*, *scribis*, *librariis*, *accensis*, *praconibus*: vt Frontinus scripsit, ipse inter Curatores. Sed præcipuum, quòd familiæ & homines certi ad tuenda hæc opera, sumptu publico tolerati. Quod idē Frontinus ita prodidit. & Agrippam primò, *per seruos priuatos suos hæc fecisse*, eamq̃ *Familiam Augusto inorientem legasse*. *Augustum deinde publicasse*, & deinceps mansisse: atq̃ habuisse homines circiter CCXL. Erat autem & altera, inquit, *Familia*

milia Caesaris dicta, & numerus eius CCC LX. quam Claudius, cum aquas in urbem perduceret, instituit. Addit, in utrâque varia ministeria fuisse, Villicos, Castellarios, Curatores, Silicarios, Tectores, aliosque opifices. Habes igitur perpetuos homines sexcentos, ad Aquarum tuitionem.

CAP. XII.

Cloacarum mira.

QUAS Aquas nunc dimitto, & ad *Cloacas* te duco. Eas scito à Tarquinio Prisco rege structas, quo nemo Regum plura aut meliora. Structæ autem ad munditiem, quod clarum est, sordescque omnes vel ablundas, vel euehendas: sed & ad sanitatem, quæ illam amat. De magnitudine huius operis, quia mirabaris nos mirari, Plinij & Cassiodori verba dâda sunt: qui vterque satis firmiter dicet, quid magni rariq. in opere isto fuit. Ille igitur: *Cloaca*, inquit, OPERVM OMNIVM MAXIMUM, *suffossis montibus, atque urbe pensili, subterq. NAVIGATA. Fecit id Agrippa in Ædilitate, per meatus corruatis VII. amnibus, cursuq. præcipiti, TORRENTIVM modo, rapere omnia atque auferre coactis. Qui insuper mole imbrium concitati, vada ac latera quatunt. aliquando Tiberis retrò infusi recipiunt fluctus, pugnantq. diuersi aquarum impetus intus: & tamen OBNIXA FIRMITAS resistit. Trahuntur moles internæ tantæ, non succumbentibus causis operis; pulsant ruina sponte præcipites, aut impactæ incendiis; quatitur solum terra motibus: durant tamen à Tarquinio Prisco annis propè octingentis INEXPUGNABILES. Initio audis, operum omnium maximum fuisse: atque ego actu fortasse ridemus. A V D. Non audeo, etsi gestio: sed*

vereor turbare. LIP S. At aliâ atque aliâ causâ etiam rideamus. Tu, quia res vilis attolli videtur: ego, quia toties iam audio, *operum omnium maximum*, aut *maximè admirandum*. Quid? semper ista maxima? & tamen res sic habet: vt quidque in manus sumis & examinas, super omnia admiraris: & causas iudicij eius dones. Vno verbo, omnia miraculum: nostrum nunc videamus, & Plinij verba pensitemus. Ait, aut indicat, *nauigatas has Cloacas.*] Quid magni, si tam magnæ vt *vehemens onustam* largè transmitterent? Id enim non Plinius solum ita scripsit, sed & Strabo. cùm Romanos ait *trium maximè operum curam gessisse, quæ neglecta videbantur à Græcis: Viarum, Aqueductuum, Cloacarum.* Additque: *Cloacas istas, lapidibus sectis & ad normam positis suffultas, spatium etiam currui fœno onusto ad transitum præbuisse.* Enimuerò Marlianus, qui dimensus est, prodidit, *pedum xvi. latitudinem* se repperisse: de altitudine vellem etiam addidisset. nec minor sanè fuit. Dixit amplius Plinius, *Corrinatos vii. annes.*) Intellegi opinor, ipsas septem Cloacas præcipuas, tot quot sunt montes. Nam ex iis defluebant & deriuabantur aquæ ac sordes, & in magnam vnam confluebant. Quin enim plures minutæ fuerint, non ambigendum est: sed istæ tot fuere quasi flumina, & alueo grandiore, atque ex per plana urbis. Liuium sic interpretor, de Tarquinio Prisco: *INFIMA urbis loca circa Forum, ALIASQUE interiectas collibus CONVALLES, quia ex planis locis haud facillè euehebant aquas, Cloacis è fastigio in Tiberim ductis siccant.* Has olim per publicum ductas idem Liuius alibi scripsit: sed urbe inquit, incensâ à Gallis, festinatio curam exemit vicos dirigendi, atque ita CLOACÆ passim priuata etiam subeunt.

Lib. i.

Lib. v.

subeunt tecta. Pergit deinde Plinius firmitatem commendare. & causas concutientes quattuor commemorat: quarum vel singulæ firmissima opera euertant; at non labefactant istud. Sunt, Pugna aquarum & copia intus, Moles & columnæ vastæ, quæ per vias, & super illas, trahuntur; Ruinæ variæ & pondera incidentium ædificiorum; deniq; validi aliquot Terræmotus. Quidni igitur firmum & rarâ duritiæ opus, quod omnibus resistit? & id per tot sæcula? Etsi tamen repararunt, aut fulserunt interim, quod opus fuit. notatq; Liuius, *Cen-* Lib. xxxix
sores detergendas Cloacas, & in Aventino atque aliis partibus, quæ nondum essent, faciendas locavisse. Quàm sumptuosa illa, aut similis reparatio, dicit apud Dionysium C. Aquillius. qui scripsit, *neglectis aliquando cloacis, &* Lib. iiii.
non defluentibus, Censores in earum instaurationem mille talenta impendisse in redemptores. Ea sunt sexcenta millia Philippæorum: quid igitur & quanti paratio vniuersa, si tanti in partibus reparatio? Sed audiamus & Cassiodorum de istis, ac finiamus. SPLENDIDÆ Romanæ civitatis CLOACÆ, tantum visentibus conferunt STUPOREM, ut aliarum CIVITATVM possint MIRACULA superare. Videas illic FLUVIOS, quasi montibus concavis clausos, per ingentia stagna decurrere. Videas structis NAVIBVS per aquas rapidas, non minimâ sollicitudine, navigari, ne precipitatio torrenti, marina possint naufragia sustinere. Hinc ò ROMA SINGVLARIS, quanta in te sit potest colligi MAGNITUDO. quæ enim urbium audeat tuis culminibus contendere, quando nec IMA tua possunt similitudinem reperire? Pulchra conclusio, & in scito eo dicto conquiesco.

CAP. XIII.

Traiani Pons in Danubio.

AVD. Non patiar, & te excito. Quid enim? tu & ego destituamur in his Cloacis? quæ vt sint, magnæ, operosæ, mirabiles, tamen Cloacæ sunt, & oletum suum habent. Exime nos, & mundiùs alibi pone. LIPS. Hem! bona monitio. sequere me ad Danubium, & illîc in eius aquis lauemur. AVD. A Tiberi ad Danubium? bonus saltus, quis Pegasus nos vehet? LIPS. Ille Mentis: quæ momento summa, ima, propinqua, dissita, permeat & peruadit. Nec ad Barbaros tamen imus, ne metue. AVD. Ego verò metuo, & iam cor meum vasa colligat atque abiat. Nescis tu pugnas illîc cùm maximè nunc pugnari? & in quibus vita, libertas, religio aguntur? LIPS. Scio, securus esto. Romanus imperator, atque is Traianus, aderit, cum legionibus suis copiisq̃ue. Utinam nunc tales ibi decem, tali disciplinâ! ô quàm Victoria mox applaudat & circumuolet purpureis suis pennis? Sed ecce in Danubio *Pontem* libet memorare, quem dictus ille Imperator struxit: operum omnium, fortasse, arte & difficultate maximum, si non sumptu. Describit graphicè Dio Cassius, & gratia sectori eius Xiphilino esto, quòd hâc partem non recidit. O quàm pulchras valentesq̃ue ille alias? nihil pænè nos fugeret in rebus Romanis (tanta diligentia & accuratio fuit) si scriptor ille totus exstaret. Sed de Ponte, sunt verba è Compendio Dionis: *Traianus Imperator pontem lapideum super Istrum statuit, quem* EGO NEC DIGNE QUIDEM HABEO ADMIRARI. *Nam et si alia pulcherrima Principis eius opera exstant, tamen hoc est* SUPER

PER OMNIA. *Pila igitur eius sunt viginti, è lapide secto & quadrato, quæ altitudinem habent CL. pedum, latitudinem LX. Distant inter se CLXX. pedes, fornicibus deuinctæ. Quomodo autem non aliquis SVMPTVM in istas admiretur? quomodo non & destituendi firmandique modum? idque in flumine MAGNO ET VORTICOSO, & fundo ipso infido & limoso. nam nec auertere quidem cursum fluminis licuit vlllo modo. Nec verò de magnitudine fluminis ideò dixi, tanquam ibi maximum sit (imò verò alibi duplo maius est aut triplo, atque instar pelagi se diffundit:) sed quia locus ille arctissimus ibi locorum, & aptissimus ponte iungi, est tantus. Quo autem magis in arctum illud ex lato contrahitur, & rursum in latum se effundit, tanto nimirum & rapidius fluit, & profundius existit. Vt hoc quoque difficultatem atque arduum operis valde auxerit. Magnitudo igitur animi Traiani ex eo quidem constat, non tamen vsum nobis nunc præbet: sed pilæ dumtaxat stant, quasi in eum finem modo structæ, ut documento sint NIHIL ESSE QVOD INGENIO HVMANO NON POSSIT EFFICI. Additque deinde, Hadrianum Imp. metu ne Barbari eâ transirent, an æmulatione in Optimum Principem, iussisse superiora Pontis dirui: atque ita Pilas solas mansisse. Quid autem ego aut tu hîc dignè miremur? negat ab illo æuo Dio, se id posse. Atqui plura magna & magnifica viderat, quàm nos mente concipere aut deformare possimus. Putat tamen & censet, omnia ab hoc opere superata: quod leuiter adsistamus, & inspectemus. Ait, *Pilas viginti fuisse*: atqui Paulus Iouius, florentis ingenij & stili scriptor, dicit etiam nunc *triginta sex* exstare & conspici, in confinio Valachiæ & Transiluanix, ad opidum *Seuerinum*.*

Vtri credam? sanè si oculi nunc conuincunt ita esse, manus & herbam do; videant modò & dicant, qui adfident & vident. Sin rationem & scriptionem Dionis sequor, adseram audacter de *viginti*: quia signanter notat, fluuium ibi arctissimum (vt in iis locis) esse. Atqui descriptio ista *viginti* Pilarum, quæ *sexaginta pedes* latæ sint; quarum fornices, *centum septuaginta*: quid efficit & colligit, nisi fluuij latitudinē *quattuor mille septingentorū septuaginta* fuisse? id est, paullo minus, *vnus milliaris*. Si aliter, aut si grandius; videbunt ij qui accolunt & docebunt: tum nobis opus rescribere & reformare ipsum Dionem. Nam quod aliquis dicat eum nescisse, aut de opinione ista scripsisse; ipse opinetur & erret. cū vir ille insignis peritiā rerum & honoribus, in ipsis iis locis Præses fuerit Dalmatiæ, Pannoniæque. Itaque scire omnino potuit, & debuit, in curâ istā rerum scribendarum. Vereor vt Iouius sit, quod etiam alibi, auditio- num facilis, & parum diligens examinis aut veri. Sed vt dixi, vicini aut inspectores arbitrātor. Ait Dio amplius: *Pilarum intervallum fuisse centum septuaginta pedum.*) Ita me Deus (nam exclamo) grande hoc concameratio- nis spatium, nec efficiendum, nisi altitudo illa Pilarum accessisset, & tardè ac lentâ inclinationē fornix surrexis- set. Prætereà, *mirari se quomodo in tali profundo flumine, & verticibus Pile firmata.*) Ego tecum, ô Dio, miror: & maximè, cū neges auerti flumen potuisse aut deriu- atione exhauriri. Difficile omnino opus, & fundamen- torum molitio talis è lapide: si sublicarum & materiæ res esset, aliud esset. Sed heus tu Hadriane! si citare Impe- ratorem fas, dica & lis tibi apud me sit, fortasse & puni- tio: quòd talem pontem vix benè structum destruxisti.

Dicam

Dicam tibi verum vel mortuo? Inuidisti optimo maximoque Principi, & habere super omnes gloriam voluisti magis, quàm meruisti. Valetè *Opera publica*: quin tu etiam, mi Auditor, in crastinum vale aut salue.

CAPVT XIII.

Privatorum hominum Urbanae aut Rusticae aedes.

AVD. Ego verè nec valeo nec salueo (da veniam immodestiae:) nec amoliris me, nisi nomine plenè persoluto. An non, post *Publica opera*, pollicebaris *Privata*? & certè ita disponebas; nec tam madidâ memoriâ sum, vt hoc effluerit. LIP S. Disposui, haud nego: sed fatigor, nisi quòd in extremâ tamen calce, vt cursores, spiritus & vires excitabo adspectu ipso metæ. *Privatis* igitur *Operibus* duo nunc considero, *Domos* & *Villas*. Illæ fuerunt in tam splendidâ & nitenti vrbe, pro ipsâ vrbe, & vt pulchri corporis apta ac decora membra. Domus dico magnificæ, ornatae, instructæ, columnis, marmore, auro, statuis: & quidquid excogitare ambitio aut luxuria poterat. Sed eadem etiam laxæ, patentes: quod docuerint satis Valerij hæc verba, de Cincinnato, cui *quattuor sola iugera aranti nō solum* (vt inquit) *dignitas patrisfamiliae constitit, sed etiam Dictatura delata est*. Et tum comparatione quadam & indignatione addit: *Angustè se habitare nunc putat, cuius domus tantum patet, quantum Cincinnati rura patuerunt*. Nec est in sermone supergressio: reuera amplæ domus, & præsertim magnatium virorum procerumque. Quas & P. Victor ac Notitia imperij propriè *Domos* appellant, & ab *Insulis* distinguunt. Itaque computant, *Insulas*.

Lib. III. c.
cap. III.

*sulas totâ urbe quadraginta sex millia sexcentas duas, Domo mille septingentas octoginta fuisse: harum longè minore numero, vt quæ tanto grandiores, instructiores-
que essent. Sed de instructu, communiter ita Seneca:*

Epist. xcv.

Quid inter pueros & nos interest? nisi quod nos circa Tabulas & Statuas insanimus, cariùs inepti. Illos reperti in litore calculi laues & aliquid habentes varietatis delectant; nos ingentium macula columnarum, siue ex Aegyptiis arenis, siue ex Africa solitudinibus aduecta, porticum aliquam vel CAPACEM POPVLI canationem ferunt. Miramur parietes tenui marmore inductos, cum sciamus quale sit quod absconditur: oculis nostris imponimus. Et cum auro tecta perfundimus, quid aliud quam mendacio gaudemus? scimus enim sub illo auro fœda ligna latitare. Primum in ipsâ Domo est, Columnarum dispositio, & è longinquis petitarum: de quibus Plinij obiurgationes, si quis volet, legito; & de generibus pretiisque earum totus liber eius existit. Et quidem notat in vnâ Cœnatione Callisti, Claudiani liberti, triginta se vidisse, easque è Sudine lapide Germanico, cui ingens tunc pretium & nouitas. Idem, in atrio Scauri collocatas maximas, atque adeò duodequadragenûm pedum, Lucullæi marmoris. Vide hanc altitudinem in vno atrio, quam multæ domus totæ vix æquant. Alterum in Senecâ, Parietes marmore inducti: quod genus Incrustationes Latini, Græci Μαμυρῶδες dicunt. Primum autem Roma parietes crustâ marmoris operuisse totius domus suæ, in Celio monte, Mamurram equitem Romæ. Præfectum fabriûm Cesaris, Plinius tradidit auctore Nepote. Id non aliud fuit, quàm marmor in tenues crustas sectum parieti imponere scitè, & pro tectorio ei dare.

Lib. xxxv.

Lib. xxxvi.

Luca-

Lucanus: *Nec summis crustata domus sectisq; nitebat
Marmoribus.*

Declamator apud Senecam patrem : *In hos ergo exitus
varius ille secatur lapis, ut tenui fronte parietem tegat.*
Secandi autem ratio (in Plinio, & Isidoro) arenâ, & ser-
râ, in prætenui lineâ versante arenas, tractuq; secante. Et
nos in Italia hodie vidimus fieri. Tertium, *Auro tecta
perfundi.* Significat laquearia inaurari tota solere, quod
passim scriptores & tradunt & damnant. Musonius
apud Stobæum: τί δ' αἱ πρῆξις υλοῖ αὐλαί, τί δ' αἱ ποικίλαι χη-
σεις, τί δ' αἱ χρυσόφοροι σέγαί; *Quo pertinent hac atria Co-
lumnata? quò varia ista colorationes? quò aurata lacuna-
ria?* In secundo enim membro (ut mea versio est) χρῶ-
σεις legi cupiam, & ad marmora variegata parietibus
imposita referam, vel etiam ad Musium opus. Sed de
Lacunaribus, item Statius :

Lib. 1.

*Et nondum crasso laquearia fulta met allo,
Montibus aut altè Graiis effulta nitebant
Atria.*

Lucanus in Cleopatrarè regiâ:

*Ipse locus, templi (quod vix corruptior etas
Exstruat) instar erat, laqueataq; tecta ferebant
Diuitias, crassumq; trabes absconderat aurum.*

Quibus versibus tamen plusculum etiam latet, & tra-
bes quidem auratas fuisse vult: sed cameram gemma-
tam, eboratam. Vtrumque enim & horum fiebat, ad
splendorem & varietatem: præsertim in templis (cum
templo autem Lucanus comparat) ut quasi cælum imi-
tarentur. Arnobius de templis ipsis differens: *Sint ergo
hec licet aut ex molibus marmoreis structa, laquearibus
aut renideant aureis, splendeant hic gemma & sidereos*

*euomant variatâ interstitiōne fulgores : terra sunt
hac omnia, & ex face vilioris materia concreta. Et tu, mi
Auditor, obiter & hoc adde ad templorum suprà orna-
tum. De ebore autem, in Ciceronis Paradoxis : Tecta
ebore & auro fulgentia. In Propertio :*

*Quòd non Tenariis domus est mihi fulta columnis,
Nec camera auratas inter eburna trabes.*

Non leues porrò inductiones, aut vt poëta loquitur,
sputa fuisse, Panegyricus ostendit: qui SOLIDO AVRO
tecta laquearia commemorat, & poëte suprà, Crassum au-
rum, dixerunt. Hieronymus autē in Epistolâ quadam,
longiùs etiam hoc producit, & ad parietes ac colum-
nas. *Viuimus quasi alterâ die morituri, & edificamus quasi
semper in hoc seculo victuri. Auro parietes, auro laquearia,
auro fulgent capita columnarum.* Sed alia hîc etiam & in-
geniosa luxuria. nam lacunaria ista versatilia faciebant,
& aliâ atque aliâ subinde facie conuiuas delectabant.

Ad Gau-
dent.

Epist. xxi. Seneca alibi: *Versatilia canationum laquearia ita coag-
mentant, vt subinde alia atque alia facies succedat, & to-
ties tecta, quoties fercula, mutantur.* En, priuata ingenia
& luxuriam: quid existimas Principes tentasse & fecis-
se? Nero Cæsar in vestibulo ædium suarum Colossum
centum viginti pedum posuit. Hoc principium: deinde
porticus triplices milliaria; item stagnum, maris instar, cir-
cumseptum ædificiis ad Urbium speciem. Rura insuper, ar-
uis, atque vinetis, & pascuis, siluisq; varia, cum multitudi-
ne omnis generis pecudum ac ferarum. In ceteris partibus,
cuncta auro lita, distincta gemmis, unionumq; conchis erāt.

* Ita iam-
pridē publi-
cè legēdum
docuimus.

*Canationes laqueat a tabulis eburneis versatilibus, * vt flo-
res, & fistulatis, vt vnguenta desuper spargerentur. Præci-
pua canationum rotunda, quæ perpetuò, diebus ac noctibus,*

vice

vice mundi circumageretur. Ita verbatim ista Suetonius: multa ADMIRANDA, si tu singillatim explicas & in rem ducis. Sed vnum in hac Principum infaniâ (ita appellanda est) Plutarchi testimonium suffecerit, qui de Capitolij magnificâ & impendiosâ structurâ cum differuisset; addidit. *Quod si quis hunc Capitolij magnificum instructum miretur, idem si Domitiani in aulâ unam Porticum, vel Basilicam, vel Balneum, vel pellicum Dixerit viderit, exclamet cum Epicharmo,*

*Non liberalis aut benignus tu clues,
Profusione gaudes.*

Dicit satis clarè, omnia illa Capitolina (quæ & quanta, antè diximus) nugas & quisquilias videri præ vno membro aliquo Palatinæ domus. Quod mihi quidem stuporem incutit, non dissimulo: & iam lingua hæret.

A V D. Soluam eam quæstiunculâ. Dixti auro distincta vel ebore laquearia, an non & siluis? id est, an non ibi tales species, & intermixtæ veræ aues? Nam Rutilius Gallicanus hoc dicere videatur, in Romæ laudibus.

*Quid loquar INCLVSAS inter laquearia SILVAS,
Vernula quâ vario carmine ludit auis?*

LIPS. Poëtæ, aut poëtarum potiùs, vulgatam phrasim non attendis: nec *inter laquearia* propriè, sed *ovvendoxi-
nōs* inter tecta & domos includite eas silvas. Luci enim & arbusta in magnis istis ædibus erant: imò & super ædes, quod mireris, erant. Senecam auctorem do, qui, vt ^{Epist.} solet, castigans & increpans suum æuū: *Pomaria*, inquit, *in summis turribus serunt*, quorum *silvæ in tectis ac domorum fastigiis nutant, inde ortis radicibus, quò impro-
bè cacumina egissent*. Atque ego Bruxellæ meæ (quam vt alteram patriam colo) hoc vidisse memini, sponsione

ita factum, sed in breue aliquod tempus, & cùm domus oneri illi non diu esset. Satis de *Domibus* : ad *Villas* eamus. vtinam, vtinam! sed hæc pericula & latrocinia, domo & vrbe nos claudūt. O Iscanum meum, cur non liberè te fruor & interuiso? cur natali illo aëre & aquis non me recreo? Da deus hoc ante obitum, & pedem atque animum vagum per rura & hortos illos ferre. Sed *Villas* tamen Romanas animo & memoriâ lustremus, vt vel disposui antea, vel promisi. De iis hoc vniuersè Strabo pronunciat, vbi de Pisis & Liguriâ scribit: *Esse ibi lapicidas & materiem ad edificia vberem, sed quam Romani ad edificia ferè sua in vrbe aut & Villis consumunt*. *Villis*, inquit, in quibus velut more *Persarum* REGIAS QVASDAM *struunt*. En, Prætoria aut Villæ totæ eorum, *Regias*, & quidem *Persarum*, referunt: quid maius ampliusque in hanc rem dicam? Vis specimen tamen aliquod in vnâ Villâ? Capitolinum audi: *Exstat Gordianorum villa viâ Prænestinâ, DVCENTAS COLUMNAS uno peristylo habens, quarum quinquaginta Carysteæ Claudianæ, quinquaginta Sienitides, quinquaginta Numidicæ, pari mensurâ sunt*. In quâ BASILICÆ CENTENARIÆ tres: cetera HVIC OPERI CONVENIENTIA: & THERMÆ, quales, præter urbem, nusquam in orbe terrarum. Tu si lubet, per te singillatim lustra: ductorem me vtrâ non habes. Sed nec Hadriani Villam in Tiburtino ingero, cuius superbæ reliquię exstant: quid tot aliarum in solo Latio, & circa Romam? Vidimus ipsi circa Ostiam & Ardeam reliquias: & per silvas illas aut vepreta, quot Columnæ, aut earum fragmina, cryptæ, porticus, & disiecta ædium membra? O Deus, quæ mutatio? quàm hæc cogitatio me

me ad te trahit, infirma & incerta hæc omnia humana spectantem, & spernentem? Sed definimus de *Operibus*, & *Româ*: quam decoramus Constantij Imp. elogio, apud Ammianum. *Is enim visis plerisque cum STVPORE HORRENDO, de Famâ querebatur ut inuolidâ vel malignâ, quòd augens omnia semper in maius, ERGA HÆC EXPLICANDA, QUÆ ROMÆ SYNT, OBSOLESCIT.* Si fama non potuit adæquare, multiplici suo ore & linguâ: quid ego meo sermone tenui, sine sensuum subsidio, per tenues coniecturas eunte? Sed tu alii que, nec dicta suspicamini: & quidquid maximum conceperitis, fortasse nec id par erit. Philosophemur autem breuiter, duce Hormisdâ. qui regij Persarum sanguinis, à Constantio interrogatus in re præsentî, *Quid de Româ sentiret?* *Id tantum sibi placuisse dicebat, quòd didicisset IBI QVOQUE HOMINES MORI.* Mori mi Auditor, mori: & vbi hæc omnia præclara, ampla, ADMIRANDA? quæri vides. vbi qui fecerunt ea, aut moliti sunt? periisse vides. Cogita, & tibi applica. nos ipsi, qui hæc meditatur aut loquimur, post aliquot annos, dies, horas, puluis, vmbra, nihil. Nunc vale, & abi.

I. L I P S I
 D E M A G N I T V D I N E
 R O M A N A

LIBER IIII.

CAPVT I.

*Transitum ad Virtutem Romanorum, & ea in genere
 predicata.*



V D. Meridies abiit, ego me tibi sisto. L I P S. Video, sed quid ita tristiore vultu? A V D. Nec læta adfero. L I P S. Quæ? A V D. Tibi. L I P S. Quæ inquam? A V D. Vereor dicere. L I P S. Aude. nec ego ex his fatuis, qui ignorare mala, mederi censent. A V D. Obiit tibi ex amicis tuis. L I P S. Hem! ex amicis? effare. A V D. In Galliâ. L I P S. Quis ibi? A V D. Vir doctus. L I P S. Ede nomen. A V D. Et probus quoque. L I P S. Encas. etsi ab his notis propemodum iam scio *Petrum Pythæum*, esse. A V D. Diuinasti. obiit. L I P S. At tu me vulnerasti. sed quo fato? A V D. Suo, & illâ quam Augustus optabat, * *ὁ θάνατος* L I P S. Virum magnum Gallia amisit, & inter publicas clades aut iacturas hanc quoque licet ponas. Sed ab exemplo disce, quàm non temerè heri clauferim & monuerim de morte. A V D. Profectò præsagium fuit: sed tu perge ad nostra. L I P S. Inter hæc tristitia, ad illa amœna? durus es. A V D. Quid ergo? dum viuo, non vis me viuere? Et ego Pythæo nostro benè esse spero, & gaudere ac ridere in
 beatiss

* morte fa-
 cili.

beatis locis: cur doleam? Theodosius Imperator, qui variè in imperio iactatus, cùm mors instaret, inscribi sepulchro suo hoc vnum verbum iussit, Y F E I A: id est, *Sanitas*. Profectò illa medicina morborum, refugium & asylum malorum est: & in mundi his fluctibus portus, quem sapiens nunquam fugiat, & per hæc tempora (Deo vocante) totis velis in eum feratur. Tu autem hoc magis perge, quòd iam non amoëna, vt aiebas, sed potius vtilia aut sapientia dices; &, vt partitio erat, de *Viris* ac *Virtutibus* Romanorum. L I P S. Ita est, quartus hic noster limes: & libentiùs insistam ac decurram, quia tali argumento. Cur apud te dissimulem? finis & fructus mihi studiorum aut lectionum, hæc talia excerpere, & exempla aut dicta enotare ad sapientiam ac virtutem. Fabulemur autem, si placet, ambulantes. Amat valetudo, & lingua hæc magis soluitur in motu. Communiter igitur primùm (nec ordo hoc abnuìt) laudemus *Romanos*: tum & distinctiùs quædam addamus. Plinij enunciatio est: *Gentium in toto orbe præstantissima una, & in omni virtute, haud dubiè Romana exstitit*. Appellas ab hoc iudice, & suspectum de Romanis Romanum habes? Accipe Græcum, & Ammianus prodeat, qui breuib; sed grauib; verbis *Romam imperij virtutumque omnium larem*, dixit. Quid homo Gothici sanguinis, Cassiodorus? *Roma virtutum omnium latissimum templum*. Profectò sedes suas per aliquot sæcula ibi habuère, nec iniuriâ ipsi Romani templum struxère *Honori* pariter ac *Virtuti*. Vtramque colebant: sed & *Fortunam* etiam: id est (vt rectè interpretemur) Prouidentiam & Fata ab alto, quæ incredibile est, quàm presso nec tardanti pede secuta

secuta sint Virtutem. His duobus incrementa sua Roma debuit, his duobus statum suum & firmitatē. Nul-
lum imperium mihi dabis, & tam magnum simul, &
tam diuturnum. Iure igitur Ammianus: *Roma ut au-*
geretur sublimibus incrementis, fœdere pacis æterna VIR-
TUS CONVENIT atque FORTVNA, quarum si alte-
ra defuisset, ad perfectam non venerat summitatem. Con-
uenerunt autem ita, vt vtraque suum opus facere nite-
retur, & pænè dissidium esset in euehendo. Plutarchus
alibi hoc vbertim edisseruit: & breuiter ac neruose An-
næus Florus extulit, *Ad constituendum Romanum im-*
perium, VIRTUTEM ac FORTVNAM contendisse vi-
deri. Sed amica contentio fuit: in quâ tamen vicit, si Ru-
tilium iudicem capis, ipsa Virtus. Nam ille sic Romam
adfatur:

Quod regnas, minus est, quàm quod regnare mereris,
Excedis FACTIS grandia FATA tuis.

Pulchrè. & habuit igitur Fortunam, siue cœlitum illum
fauorem; sed habuit à caussis, quas iidem cœlites, per
virtutum gradus nexuq;, præstruxerunt. Vt id liqueat,
videamus primùm vniuersè qui *Viri* in imperio illo
fuerint, & tum quæ *Virtutes*.

CAPVT II.

Triplex ordo in populo ostensus, & quisque in suâ par-
te laudabilis.

Viros confidero dupliciter, & eos qui in Magistra-
tu, Imperiis, Consiliis fuerunt, id est *Capitare* pub-
lica: & parte alterâ, *minora* etiam *membra*, id est Popu-
lum & eos qui paruerunt. Dico vtrosque egregios fuis-
se,

se, nec quibus alia gens facîle aut ex vero (de Religione, hîc non est sermo aut quæsitio) comparetur. Primores igitur illi in duplici discrimine sunt, *Senatores, Equitèsque*. Illos si inspicias, qui propriè sedebant ad clauum: proh Deus, quanta grauitas, sapientia, maiestas? Vt qui ordinem eum *Ex REGIBVS constare dixit, vnus veram* Lib. ix.
eius speciem cepisse, Liuius videatur. Is fuit Cyneas legatus Pyrrhi regis: vir nec mentis nec oris egens, qui cùm urbem lustrasset, atque etiam blandiloquentiâ & munificentiâ variè tentasset, vndique repulsus, ad Regem rediit: & interroganti *Quid de hostium sede sentiret? Vr-* Flor. lib. 1.
bem TEMPLVM sibi visum, Senatum REGVM esse consessum fatebatur. Profectò talis fuit, & nec sub Principum imperio nimis degenerauit. Cassiodorus de suo æuo: *Vrbs ornata tot eximiis Senatoribus, beata tam nobilibus populis*: etsi tunc quidem fateor discessisse ab illâ præstantiâ, & vt grande ædificium, paullatim mole suâ defedissee, & mox ruisse. Erant autem in illo Senatu, vt cum Lucretio hoc dicam,

Ductores Danaum dilecti, PRIMA VIRORVM:
 eximij, inquam, ciuium, genere, censu, virtute. Nam hæc spectabant: nec temerè viles aut sordidos (etsi plebeios interdum, quos magna virtus eueheret:) inopes numquam, & improbos rarò admittebant, aut si tales, non tenebant. Censores enim (ô laudabile & diuinum institutum!) legebant hunc Senatum: atque iidem per singula lustra examinabant, ac relegebant: & si quis loco eo indignus, aut si quid in priuatâ etiam vitâ turpe aut maculosum, notabant & emouebant. Quomodo id fiebat? silentio, & sine accusatione vllâ, aut causæ apud iudices dictione. Dumtaxat in recitando Senatu, quod
 c publi-

publicè & sollemniter fiebat, nomen eius præteribant, quem motum Senatu vellent. Ita cùm in albo illo non esset, nec in Senatu censebatur. Causa quidem iis mouendi semper erat, & hanc subsignabant, & volentibus edebant: sed certare de eâ lite, nihil opus erat. iudicium sufficiebat: quod à tam grauib. viris (nā primores ferè Senatus erant) bonū meruisse, laus & approbatio habebatur; culpa & damnatio, triste. A v d. Pulchrum, bis pulchrum: sed cum eâ lege, si viri illi boni essent. quid si & per affectum iudicassent? LIPS. Rarè, aut vix euenisse legimus. Nam voces statim omnium damnasent, & exagitassent: & fac tamen semel iterumque euenisse, quid magni mali, præ magno illo bono, erit? Non enim alia poena, quàm Ignominia: facilè aut contemnenda, aut eluenda, qui publica iudicia aut testimonia pro se haberet. Denique alij Censores mox reponebant. Nam & hoc scire debes, non in grauib. & grandibus peccatis hanc Censuram interuenisse: ea enim legibus & iudiciis seruabantur: sed minoribus delictis, aut domesticis flagitiis. à quibus vacare & castos esse primos illos Ordines maximè volebant, & quorum vita erat in exemplum. A v d. Iterum exclamo, Pulchrum! Sed dic fodes, multi igitur isti tam electi in Senatu? LIPS. Initio à Romulo *centum* facti, & *Patres*, iidemque *Senatores*, vel à curâ, vel ab ætate dicti. Postea ad *trecentos* creuere, & in liberâ Republicâ sic mansere, vsque ad Liuium Drusum. Is in Tribunatu, cùm opes Senatus vellet extollere, eosdem iudiciis etiam præponere, numerum auxit, & ad *sexcentos* fecit. Mansisse ita ad Cæsarem opinor, qui per bella ciuilia non opes solum, sed honores multis largiturus, amplificauit, & vel ad *mille* allegit.

Dis-

Displicuit Augusto, & magnâ curâ, atque iteratâ aliquoties recensione, purgavit: & denique ad modum veterem, id est *sexcentos*, redegit. Qui sanè satis amplius numerus, etsi in amplo illo imperio: atque ex his plerique, non solum consiliis publicis semper adhibebantur, sed etiam in prouincias, ad imperia, aut exercitus mittebantur. Itaque curia hæc velut promptuarium erat, è quo statim Princeps caperet viros, ad omnia ciuilia aut militaria munia aptos, & suffecturos. Et hoc aspectu tenuerunt Senatum, grande vel vnicum fulcrum illius Principatus. Otho Imperator ipse, apud Tacitum: *Quid? vos pulcherrimam hanc urbem, domibus & tectis, & congestu lapidum, stare creditis? Muta istæ & inanima intercidere, ac reparari, possunt: ÆTERNITAS RE-
RVM, & PAX GENTIVM, & MEA CVM VESTRA SALVS, incolumitate SENATVS firmatur.* Et elogia ista de Senatu, res & veritas multis dictauit. Ita in Cicerone leges: *Senatum PRINCIPEM SALVTIS, PVBLICÆQVE MENTIS.* In Ammiano, *ASYLVm mundi totius.* In Cassiodoro, *Gloriosum Senatum, MORVMQVE LVMINA.* In Petronio, *RECTI BONIQVE PRÆCEPTOREM.* Iam in Tacito etiam dicitur, *CAPVT IMPERII, & DECORA omnium PROVINCIARVM.* Cur nominatim de *Prouinciis*? quia iam sub Principibus, ex omni regione capiebantur Senatores. Et vt ditissimi honestissimique Prouincialium ciuitate donabantur, Equites fiebant, ita & mox Senatores. Vtile inuentum, & ad populos sub vnum imperium firmiter colligandos. Symmachus eâ causâ scripsit: *Pars melior HVMANI GENERIS Senatus.* Cassiodorus: *Quidquid HVMANI GENERIS floris est, habere Curiam decet.*

deceat. Et Panegyricus scriptor : *Sensisti Romae te tandem arcem omnium gentium, & terrarum esse reginam, cum ex OMNIBVS PROVINCIIS, Optimates viros Curia tua pigneraueris; ut Senatus dignitas, non nomine quàm re esset illustrior, cum ex TOTIVS ORBIS flore constaret.* Alter ab hoc ordo est *Equitum* : qui & ipsi ab illis notis tribus probati, aut probandi. Nam de Genere, multi erant è Senatoribus & Patribus orti : & certè liberti aut libertini, nec si Censum haberent (nisi beneficio Imperatorum) in hunc ordinem veniebant. Quod inferiore etiam æuo Alexander Imp. seruauit, de quo Lampridius : *Numquam libertinos in equestrem locum redegit, asserens SENATORVM SEMINARIVM equestrem locum esse.* Erant tamen ex ingenuis multi, & ferè omnes qui Censum equestrem haberent. Is fuit *Quadringentorum* : id est, *decies mille* Philippicorum. Igitur latus hic ordo & amplus, vt tunc opes plerisque amplæ erant : & ideò quod ad Vitam, coërcendus aut recidendus. Apud veteres id quoque Censores fecère, siue in *Transuectione* (quæ tamen eorum modò erat, qui *Equum publicum* habebant) siue per lustra singula, cum ordines digerebant & recognoscebant. Nam hîc quoque Album erat, siue tabulæ, & recitabât : quique primus ex iis nominatus, *Princeps iuuentutis* dicebatur. Planè vt qui in Senatu primus recitatus, *Princeps item Senatus*, augusto titulo, dicebatur. Sed cur *Iuuentutis* ? an omnes iuuenes ? imò viri plures & senes erant : sed caussa & origo, quòd olim & primâ republicâ, pauci Equites, nec ferè nisi filij Senatorum. Creuit paullatim largiter numerus, & magnam ciuitatis aut ciuium partem comprehendit : sed nomen tamen *Iuuenum* mansit. A V D. Iam semel
ite-

iterumque de Senatorum filiis: non ergo ij Senatorij, aut Senatores? LIPS. Caue erres: distinctione hoc dicam. Aliud *Senatus*, si Principum tempora adspicias, aliud *Senatorius ordo*. Ille certo numero stetit, vt diximus, & intrà *sexcentos*, sub Augusto quidem: at iste, latius patuit, & iuuenes quoque ac Senatorum filij, sed & alij equites in eum cooptati. Censebantur enim Senatorij, qui ius laticlaui à Principe impetrassent: id est, insigne ipsum Senatorum. & in Senatum quidem ij veniebant, sed sententiæ ius fuisse non putabis. Institutum enim Augusti fuit, quod ipsis Suetonij verbis dicam: *Liberis Senatorum, quò celerius reip. assuescerent, protinus à virili togâ latum clauum induere, & Curia interesse permisit*. Hoc ita Augustus, sed restrictè, in *Senatorum libe-* Dio LIX.
ris: postea Caligula etiam aliis quibusdam equitibus permisit. Permisit dico, aliique Principes, sed sic vt ab ipsis peteretur. Talis est ille Iulius Montanus apud Tacitum, *Senatorij ordinis, sed qui nondum honorem capeisset*. Hos ipsos *Senatores* interdum dici reperio. vt in Tacito: vbi Togonius Gallus censet, *Principem diligere Senatores viginti, sorte ductos, ad custodiam sui*: & Tiberius custodes oblatos hos amolens, *Nam quos omitti posse, quos eligi? honoribus perfunctos, an iuuenes?* Intellegit hos nostros *Iuuenes*, qui nondum propriè Senatores, sed, vt ita dicam, *Senaturiebant*. Hi sunt, qui *Illustres equites* à Tacito eodem, atque aliis, ad discrimen dicuntur: & palàm ipse Tacitus cum Senatoribus iungit, aut coæquat. *Augustus*, inquit, *inter alia dominationis arcana, seposuit Ægyptum, vetitis ingredi, nisi permissu, Senatoribus, aut illustribus equitibus Romanis*. Sed ne abducamur à nostris Equitibus: genus igitur diffusum, & in vario dis-

crimine: erant qui *Equo publico*, erant qui *Iudices*, erant communi nomine *Equites* dicti. Illi qui *Equo publico*, tempore Dionysij Halicarnassæi, id est Augusti, ad *quinque millia* erant, aut supra, vt ipse vidit ac numerauit. Qui in Iudiciis, haud pauciores: imò plures ex Plinio, scribente, *Judicium non nisi quattuor Decurias fuisse primò, vixq; singula millia in Decuriis, nondum prouinciis ad hoc munus admissis*. Quâ adiectiunculâ notat, largiter plures suo æuo fuisse: cùm & Caligula *Quintam Decuriam* addidisset. Quid iam dicemus in reliquâ classe eorum, qui immunes, fuisse? Atque isti Equites. quos Perseus rex apud Liuium ita laudat & insignit:

Lib. XLII. *Equites enim illis, PRINCIPES iuventutis; equites SEMINARIUM Senatus; inde lectos in Patrum numerum, Consules, inde Imperatores creant. Quæ omnia satis clara tibi, ex iis quæ dixi. Superest tertius ordo Plebis. de quo quid singulariter dicam, nisi triplici discrimine fuisse, Ingenuos, Libertinos, Libertos? Et in militiâ discrimen erat ab hoc Genere, itemque à Censu, sicut & in aliis muniis, si qua publicè subirent. Vita etiam Censuræ permissa: quâ tamen neglexisse postea (malo sanè publico) Imperatores video, cõtentos duplicem illum priorem ordinem recognosse. A V D. Satis decora & utilis tota hæc Ordinum distinctio: sed vulgò & in occurso poterântne agnosci? L I P S. Poterant, & statim quidem, ab habitu. Nam etsi toga communis omnium ciuium vestis esset: tamen discrimina alia, ab aliis notis. Vt solis Senatoribus, aut istis quasi senatoribus, ius *Lati clauis* gestandi erat: quod non aliud, quàm velut bullæ è purpurâ, & capita clauorum intexta aut inserta. Equitibus autem Aurei annuli, qui hunc ordinem, vt Plinius ait,*

ait, à plebe distinguebant. Qui his duabus notis carebant, Plebs erant.

CAPVT III.

Iustitia & Clementia in bellis.

VIROS igitur communiter iam vidisti, & in classes suas distinctos : ire per Magistratus & officia Ciuilia aut Militaria, longum sit, nec nostri nunc sermonis. Etsi omnia ea optimè & prudentissimè instituta, siquâ vnquam in Republicâ : sed omittantur, & quod propositum, de *Virtutibus* addamus. Nam viros illos laudabiles, vel potiùs ADMIRABILES fuisse dico, idque à duplici virtute, *Militari* vel *Ciuili*. Illam in imperio & republicâ iure considero, vt tutelam eius, imò augmentum : sine quâ frustrâ aliquis status aut commune se iactet. Præmitto igitur, & duo hîc in Romanis, *Iustitiam* ac *Fortitudinem*, miror. Quod ad illam, nescio an alia gens consideratiùs, & caussis in Rationis trutinâ libratis, bellum suscepit, quàm ista. Nam plerique, aut Regum suorum arbitrio arma induerûnt, aut primorum aliquot in Republicâ, qui decernebant. Hîc aliter. & nec Senatui, nec populo toti, plenum hoc ius ; nisi cognitio & iudicatio sacerdotû publicorum interuenisset, quos *Fetiales* dicebant. Eorum arbitrio sumpta arma, posita arma : & religio, non solùm iustitia, ea temperabat. Laudat & probat hoc vnicè Dionysius : & *Gracos suos caruisse* eo dicit : & *se se ideò obiter expositurum*, quid muneris & iuris habuerint : vt, inquit, quibus ignota habetenus fuit Romanorum IN BELLIS RELIGIO, mirari desinant felices euentus plerumque habuisse. Nam omnium,

nium bellorum initia & caussas, apparebit iustas fuisse: atque ideò Deos meritò propitios sensisse & fauentes. A V D. Prudens & pia scriptio Dionysij, fateor: sed an vera Lipsi? Itane omnia bella iusta, & à talibus caussis? Mirum sanè. cùm video tot regna aut regiones bello petitas, & subiectas; atque adeò in paucis annis, cùm extra Italiam pugnare cœperunt, domitum pænè vniuersum orbem. Singularis hæc occasio vel opportunitas, si omnes sic ordine læserunt aut lacefferunt: & planè ponenda inter tua ADMIRANDA. Quin, quod res est, dicimus? Bella quædam iusta, non nego: plura à duobus malorum stirpibus nata, Ambitione & Auaritiâ. quod nec ipsi Romani scriptores negent. Vis Sallustium audire? *Romani arma in OMNES habent, in eos acerrima, quibus victis SPOLIA maxima sunt.* Et iterum: *Romanis cum nationibus, populis, regibus cunctis, VNA & VETVS bellandicaussa est, CVPIDO profunda IMPERII & DIVITIARVM.* Quid Tacitus tuus, ille iudicij consideratus simul & liber? *RAPTORES ORBIS, postquam cuncta vastantibus defuere terra, & mare scrutantur. Si locuples est hostis, AVARI; si pauper, AMBITIOSI. quos non ORIENS, non OCCIDENS satiauerit.* Audis, Lipsi, præclara hæc elogia? & ab ipsis quidem Romanis: nec tu veste aut colore aliquo sermonis facilè hæc teges. L I P S. Suauiter rideo. A V D. Ita video, cur autem in re seriâ? L I P S. Nam tuam hanc malitiam (imperitiam dicere non possum) quâ non rideam? qui verba te dare mihi censes, in his quasi Romanorum verbis, quæ reuera hostium esse non ignoro. Nonne priora illa Mithridates apud Sallustium profert, altera Galgacus apud Tacitum? Mirum autem, si ij benè honesteq;
de

de Romanis loquantur aut sentiant, qui viris & equis expugnatum eos eunt & euersum. O tuam dissimulationem! quasi nescias decorè hæc historiis inferi, non quia probè aut verè, sed quia probabiliter ab iis dicta. Nam talia non desunt, nec vnquam deerunt, magnis imperiis obiectari. Miserabiles enim ferè victi sunt, & fauemus imbecillis, & passi iniuriã videntur, quia non fecerunt. Atqui terras eorum inuaserunt, & ceperunt. Quid ergo? liberè & impunè læsisse vis? incipere bella, in alienâ manu est: non ponere cùm lubet, & vt lubet. Amittere sua non iniuste incipit, qui aliena aut alios iniuste læsit. Sed enim ordo iste mirificus, & inter mea ADMIRANDA referendus, vt aiebas. Ego tecũ hoc sentio, & arripio: & admirabilem planè hîc habeo Prouidētiam diuinam. Itane serie quadam bellâ ex bellis nata, prouinciæ ex prouinciis subactæ? Illa causas dedit, aut permisit: & semper duplici hoc titulo Romani vsi, vt aut pro *Salute* arma caperēt, aut pro *Fide*. Pro illâ, vbi res eorũ ageretur; pro istâ, vbi Sociorũ. Et hoc de Sociis latè patuit, & est illa catena, quæ bellâ & terras cõiunxit aut subiunxit. Cicero verè & liberè: *Noster populus, sociis defendendis, TERRARVM OMNIVM poritus est.* Verè inquã: & vis pauca exempla? Ecce Carthaginenses validi sunt, imò æmuli virium Romanarum. obstant crescentibus: quid fit? remouendus ille obex, & causam ipsi præbebuut. Siciliam inuadunt, & Mamerminos: isti ad Romanos appellant, vt Socios. Veniunt, subueniunt, pellunt eos, & quæ sita iam ipsis ad se trahunt. Fit pax, & Sardinia etiam Siciliæ adiicitur, concessu ipsorum. Vides augmentum? Sed enim iam sistimus, & illi manent ac florent? non. in Hispaniam malâ

d cupi-

cupidine transcendunt, arma etiam Saguntinis inferant, & amicum sociumque Romanis opidum euerant. Bellum ergo iterum iustum: quo fine, & fructu? Victi illi, & in Africam compulsi, Hispaniâ aucti Romani. At enim Græcia & Macedonia iam desunt. Vis iustè dari? Philippus Macedo foedus cum Annibale cohibet, Romanos & Græcos simul laceffet: atque isti eos aduocabunt, & sibi primùm, mox & Macedonibus, imponent. Talia in Antiocho, Iugurthâ, ipso Mithridate, qui sceleratissimus non regum, sed mortalium, quid de fraude vel iniustitiâ Romanorum queritur? ut volet; ipse ab illis & nobis audiet, *Va victis*. Non dicam pereant, sed tamen pareant, qui vincere aut quiescere non potuerunt. A V D. Hem! acriter tu pro Romanis: sed ex animi tui sententiâ? L I P S. Ex sententiâ: saltem de antiquis illis Romanis, & ante Sullam ciuili bello nondum infectis &, ut sic loquar, decoloratis. Pleraque omnia tunc pura & iusta: & liceat cum Rutilio, verè de Româ dicere,

IUSTIS BELLORVM *caussis*, nec PACE *superbâ*,

Nobilis ad SYMMAS gloria venit OPES.

At postea degenerarunt, Auaritia & Ambitio quædam dictarunt, ad hoc Rationis examen non dirigenda.

A V D. Iam remissiùs, & laudo. quid tamen in Rutilio audio, nec *Pacem superbè* dedisse? Imò rarò dedit, aut impotenter & superbè dedit. L I P S. Neque id tibi dabo. Quosdam populos puniuit, fateor; sed non nisi imperio suo, & stipendiario illo iugo. Quàm multis autem & pacem indulsit, si uti eâ potuissent, aut voluissent? Ipsi Carthaginensibus bis: Philippo etiam, & Antiocho, & Tigrani: atque hos omnes cùm pellere terris in eorum

rum manu esset; contenti fuerunt restringere, & vt imagine hac vtar, pennas incidere, ne temerè & lasciue sic euolarent. Sed satis super Iustitiâ:

CAP. IIII.

Fortitudo Romanorum militaris.

Fortitudinem in militia nunc consideremus. Quid tamen hîc diffundar? nonne satis in ROMANA MILITIA meâ feci? Opinor: sed argumenti & contextus etiam causâ, pauca dicantur. Aio igitur & *Milites* & *Duces* præstantissimos huic genti fuisse, & in omni quo ADMIRANDOS. Vide mihi legiones illas, quæ binæ iunctæ, & cum totidem Sociis, equitatu autem *mille octingentorum*, ad quæcumque bella & hostem ibant: ibant, sed & victrices ferè redibant. Tota autem ea manus, quid amplius quàm *octodecim millium* erat? Iam si decem legiones iungeres, quod item factum: quid nisi Hirtij verbis dicam, *vel calum diruere* eas potuisse? Ecce gygantes nouos, & veros, nec è fabulis petitos. An non tales tibi videbuntur, si in *Opere*, *Agmine*, *Acie*, paulisper eos consideras? Quod ad Opus, fodiebant, vallum & fossas ducebant; aggerem, testudines, turres struebant: omnia celeriter & industriè, vt fidem superet paucos homines tanta, in tantulo tempore, struxisse. In

* *Poliorceticis* meis dedi exempla. Iam de *Agmine*, quid istud est? arma omnia peditem ferre, cibos semestres aut menstruos, utensilia, & septenos aut plures interdum vallos. Iumentum ita oneres, negabis par futurum. Adde ordinem in toto incessu, à signis non discedere, pari passu omnes ambulare, decurrere etiam, cùm

* Itemque
in *Militia*,

Lib. IX.

opus esset, in plenis armis. Denique in acie quis par Romano miles erit? nam non fuisse quidem, id constat. Cum omnibus gentibus, omni genere armorum aut pagnarum, concurrerunt: ecquando victi sunt ignaviâ suâ aut culpâ? nam hoc addendum est: & optimus ille miles semper potior, nisi mens & directio impediret imperiti aut temerarij Ducis. Liuius gloriatur: *Ab sit inuidia verbo, & ciuilia bella sileant, numquam ab EQVITE hoste, numquam à PEDITE, numquam APERTA acie, numquam aqvis utique locis laborauimus.* Vera dictio, & trophæa victarum gentium adstipulantur. Græcos aut Macedonas aliquos mihi compones? Pyrrhus ipse Macedo refutabit: & cùm Romanæ militiæ periculum, sed cum suo periculo fecisset, vocem è pectore emisit: *O quàm facile erat orbis imperium occupare; aut mihi Romanis militibus, aut Romanis me rege!* Atqui si quisquam Regum bono & veterano milite instructus fuit, is fuit. Quid autem mirandum tales fuisse, apud quos, à primâ adolescentiâ, vita omnis in armis, honos omnis ab armis erat? Nemo honestiorum ad remp. accedere, aut magistratus capere poterat, nisi decem annos militasset. Et pedestris ipsa militia, viginti annorum decursu denique terminabatur. In ipsâ pace, an quietem egisse censes? exercitia assidua erant, vel in Campo illo Martio, vel in ipsis alibi castris. Aristidem operæ pretium est in hac re audire: *Quinetiam in militari disciplinâ vos, ô Romani, omnium aliorum inscitiam coarguistis. Nec enim contrâ hostes dumtaxat milites vestros ac Duces, sed inter se primum committitis & exercetis. Ita fit ut COTTIDIE STENT IN ACIE, nec vnquam quisquam LOCO CEDAT, sed ut in aeterno & caelesti choro, quisque*

que stationem suam cognoscat & seruet. Reuera ita est: & de *statione* quod ait, quis nescit locum in acie, vel in præsidio, militi seruandū, vel moriendum fuisse? Leuiter ab eo discedere, à vitâ erat abire: vt seueritas quidem volebat saluberrimæ illius Disciplinæ. Inde cōtemptus periculorū & hostium: & in medios illos vel exiguam manum si Dux misisset, quis nō sine cunctatione parabat? Exemplum illustre & notum, sed ADMIRABILE est, in bello Punico primo. Consul parum prouidē suos ductans, in locum humiliorem, & collibus vndique cinctum, insinuarat. Hostes aditus infederant, & sine ferro confectum bellum videbatur. Ibi Tribunus consilium suppeditat: *Consul, inquit, vides tu collem illum, ab hostibus nondum occupatum? illuc censeo mittendam cohortem aliquam militum, si te & alios vis saluos. Hostes enim in illos irruent; interea tu, si vir es, te explicabis, & peruades.* Placuit Consuli sententia, & vera erat: nec de militis obedientiâ dubitabat, sed *Ducem, inquit, illum, qui in certam mortem eat, quem habemus? Me ipsum, ait, ille.* Dictum, factum, quadringenti ad moriendum profiscuntur, & cadunt: solus Tribunus inter mortuos, semimortuus ipse, repertus conualuit, & sæpe vtilem operam reipublicæ postea nauauit. Viros istos tali robore, tali obedientiâ, alibi mihi dabis? Spartanos tamen excipio, solos dignos qui cum Romanis comparentur, si vires & copix maiores fuissent. nam alia non degenerant. Sed hæc infelix audacia: illa lætior. cum Punico item bello, fugientem eorum classē, pedites in mare se coniicientes & natantes, quasi in camporum firmitate aggressi, manibus suis in litus retraxerunt. Paullo vetustiora ista sunt: ecce magis noua exempla. Bello Afri-

cano ciuili, Centurio Cæsaris cum aliquot veteranis in mari captus, ad Scipionem aduersariū Ducem perductus fuit. Ibi Scipio clementer vitam statim offerre & honorem, si deficere à Cæsare, & pro se stare vellet. Ille autem contrà, hortari vt ipse desisteret, neu contrà tam inuictum virum & copias pugnaret: *Qua, inquit, cuiusmodi sint, si minus antea expertus es, licet nunc cognoscas. Elige ex tuis cohortibus vnā, quam putas esse FIRMIS-
SIMAM, & constitue contra me. ego autem ex meis commilitonibus, quos nunc in tuā tenes potestate, NON AMPLIUS DECEM sumam: tum ex virtute nostrā intelleges, quid ex tuis copiis sperare debeas.* Ita Hirtius, siue Oppius, siue Balbus, castè & puriter hæc narrauit. A V D. Légi equidem, & meminī: sed quid nisi militaria & vana hæc verba sunt? Nam vt *decem* contrà *quadringentos* consistant, nulla ratio aut exempla dicent. L I P S. Rationem nunc omitto, etsi ea quoque in veterano isto robore est: sed exemplis hoc firmari potest. Non tu in eodem Hirtio legisti, *Numidarum copias, in corona modum, Cæsaris copias cinxisse? Cæsariani interim, inquit, NON AMPLIUS TRES aut QUATTUOR milites veterani si se conuertissent, & PILA VIRIBVS CONTORTA in Numidas infestos coniecissent, AMPLIUS DVORVM MIL-
LIVM, AD VNVM terga vertebant.* Hoc etsi mirum, tamen verum est: & nisi fallor, ipso illo scriptore arbitro & inspectore gestum. Sicut quod idem eodem bello, de Gallis nostris tradidit: *Accidit res incredibilis, vt equites MINVS TRIGINTA Galli, Maurorum equitum duo millia loco pellerent,urgerentq; in opidum.* Vis nominatim & L. Sicinium aliquem citem, qui *centies & vicies* in aciem descendit? *sex & triginta* spolia ex hosti-

hostibus rettulit? octo ex prouocatione occidit? *quinque*
 Et *quadraginta* vulnera pectore excepit, tergo nullum?
 Vis Cassium Scæuam? qui in Britannico litore, cùm
 quattuor commilitonibus in scopulo relictus, cùm ma-
 ri abeunte hostibus adire fas esset, atque ij confertim
 irruerent; desertus ab aliis, solus impetum sustinuit,
 multos deiecit aut occidit, denique armis suis onustus,
 solo scuto abiecto, in mare se dedit, & ad Cæsarem na-
 tauit. Qui stupens ad viri virtutem, laudare parabat, at
 ille disciplinæ memor, *Da veniam Imperator*, inquit,
quòd scutum reliqui. O dictum, factis illi si ipsi laudabi-
 lius! & quid à tali animo, non enim iam manibus so-
 lum, non speres? Idem Pompeiano bello, ad Dyrrha-
 chium castello præpositus, solus in portâ consistens,
 contrà Romanas, Romanas dico legiones & copias, id
 seruauit. Quo tempore oculus ei effossus, humeri traie-
 cti & femur, scutum *centum triginta* ictibus perfora-
 tum. Fabellas recitare hodiernis militibus videamur:
 sed nos res dicimus, tam hercules quàm cum *Onera aut*
Opera narramus, adeò non imitanda, vt nec credenda.
 Sed in victoriâ quid milites istos miror? magis pænè in
 clade & morte. Miles in Cannensi proelio, cùm vulne-
 ribus confectus, manus etiâ mutilatus esset, spoliare se
 conantis Numidæ ceruicẽ brachiis inuadens, ad se tra-
 xit, & naribus atq. auribus corrosis (cùm alia tela non
 essent, aut tractare nō posset) deforme cadauer aspicien-
 tibus reliquit. De vno loquor: sed *quânam illi viri fuerūt*
 (Flori verba dabo) *quos ab elephantis obrutos Pyrrhi præ-*
lio accepimus? omnium vulnera in pectore, quidam hostibus
suis immortui, omnium in manibus enses, & relicta in vul-
tibus mina, & in ipsâ morte ira vivebat. Vide mihi istos,
 non

non homines, sed Martes, si fas dicere: & nec victos quidem, vincendos. Satis de Militibus, transeo ad Duces: etsi quomodo non isti omnes Duces? Imò quod Thucydides de Lacedæmoniis scitè dixit, ὅτι ἄρα, πλὴν ὀλίγων, τὸ στρατόπεδον αὐτοῖς ἀρχοντες δεχόντων εἴσι: quòd, paucis exceptis, exercitus eorum DVCES DVCVM essent: id profectò in Romanos conueniebat. Sed tamen Duces etiã aliqui eximij: vt parens ille *Romulus*, vt *M. Furius Camillus*; vt *L. Papirius Cursor*, quem vel *Alexandro* parem (si venisset) *Liuius* opponit; vt *M. Claudius Marcellus* igneo impetu; vt *Q. Fabius Maximus*, salubri tarditate; vt *P. Scipio Africanus* prior, diuinâ felicitate; & posterior, diuina virtute; vt denique (nam omnes quis numeret?) caput & culmen *C. Iulius Cæsar*: fortunâ, peritiâ, magnitudine & celeritate animi, super omnes qui arma tractarunt, aut tractabunt. Sed concludimus: si post Cæsarem, tamen vnum addidero, alterius Cæsaris ô fidum vtilemq. ministrum! Is *M. Vipsanius Agrippa* fuit, vir bello prouidus & fortis, & vel caussa victoriarum Augusti, vel instrumentum. Nec post eum, flaccescente iam Romanâ indole, quos mirer habeo, nisi fortè *Germanicum Cæsarem*, sed properata mors eripuit; aut magis certè *Traianum*, suo & proprio elogio OPTIMUM MAXIMUMQVE.

CAPVT. V.

Pietas, Probitas, Constantia Romanorum.

SEd ad *Ciuilem* iam Virtutem venio, domi & in togâ spectandam. Eam per omnes ordines diffusam triplicem maximè reperiò, *Pietatem, Probitatem, Constantiam*

stantiam. Pietas eminet, vana illa quidem dixerit aliquis, sed tamen in assiduo Numinis cultu (pro ipsorum captu) reuerenter occupata. Incredibile est, quàm omnia publicè & priuatim religiosè cœpta, administrata, patrata: vt totam ciuitatem sacris operatâ & addictam possis arbitrari. Atque id secundùm vetera instituta, nec nouitati aut mutationi dabant hîc locum. Miratur hoc Dionysius: *quòd quanquam sexcentæ nationes panè in urbem fluxerant, quibus singulis sacra sua ritusq; patrij essent; tamen ad suum auum* (inquit) *nulla peregrina religio publicè suscepta; aut si qua oraculorum monitu introducta, ea ipsa Romano more culta, abdicatis fœdis vanitatibus, aut fabularum portentis.* Quò valdè faciebat, quòd Sacris præessent, & ipsi non interpretarentur solùm, sed administrarent, viri in Republicâ primi, honoribus honesti: qui & exemplo plebem eò trahebant; & prudentiâ ac maturitate, noua aut nocitura spernebât. Ab hoc deinde capite alia Virtutum membra: & in primis illa *Probitas*, quam nominaui, id est animi morumque integritas quædam & candor. Sine fuco, sine fallaciâ diu mores illi fuerunt: & in prouerbiū abierat, *Homo Romani ingenij, Romana simplicitas, & Romana fides.* Quâ in re alienum testimonium audiamus, & Polybij, id est hominis Græci. Deus bone, quàm ille dilaudat, & suæ genti præfert! *Apud nos, inquit, si cui talentum concreditum sit, & exstent decem syngraphæ, decem signa, bis tot idem testes; tamen fidem vix est seruare. apud Romanos autem, cum in Imperiis aut Legationibus plurimum pecuniæ in manibus habeant & dispensent, tamen officium & fides constant, solâ iurisiurandi religione inductis.* Vides Probitatem in hac parte? sed & in bello candor is fuit, & rarò

astu aut fraudibus victoria quæsitâ aut parta. Tangit grauitè M'. Aquillium Imperatorem noster Annæus Florus, quòd is bello Asiatico veneno fontes miscuisset, ad deditiõem quarumdam vrbiũ. *Quares, inquit, ut maturam, ita infamem fecit victoriã. quippe cùm contra fas Deũ, MORESQUE MAIORVM, medicaminibus impuris, in id tempus SACROSANCTA Romana arma violasset.* Iam & huic Probitati *Abstinentia*, siue etiam *Continentia*, adhærent: non foedè aut iniustè appetere alienum, parcè & modicè suo vti. Et illius quidem (*Abstinentiæ*, dico) quàm pulchrum, nec iactatum nimis, exemplum fuit ab vniuerso populo editum, Marianâ & Cinnanâ proscriptione? Quippe cùm ij hostium suorum penates, omnibus opibus, aut elegantissimos, vulgi manibus diripiendos vtrò obiecissent: nemo inuentus est, nemo, qui iniustam hanc prædam è ciuibus peteret, caperètve: sed, tanquam à sacris ædibus, omnes manus & cupidinem abstinerunt. Et quid in togâ miramur hæc exempla; cùm in ipso bello, & inter hostes, prædæ abstinentia fuerit? quæ non nisi permissu capta, & sic quoque tota ad Duces relata. Iam in *Continentiã* quàm laudabiles, si cibum, vestem, aut externa alia spectes? Plinium & Plautum testes habemus, populum Romanum per aliquot sæcula, non nisi farre & pulte vulgò vsum. Quòd si nuptiæ, festiuitas, aut lætius conuiuium esset; pro magno pauci pisciculi, & porcinæ aliquot pondo, in obsonium adiecta. Similis in vestibus frugalitas: & omnium, ditium pauperumque, è lanâ: atque eâ natiui & albidus coloris. nisi quòd ditiorum splendentes paullo magis & nitidæ à fulloniâ arte essent. Nam Sericum, Holofericum, ipsa Lintea, serò in-

notue-

notuerunt, & timidè etiam in vsum paucorum venerunt. Adderem Modestię laudem, & reuerentem Senatus & procerum suorum populum: nisi Tribunicie interdum procellæ turbassent, quam ego pestem vnicam & labem reperio in re Romanâ. Denique & tertiam virtutem *Constantiam* feci: ô verè ADMIRANDAM in hac gente! Nam in aliis pares alios habeant: in hac nec comparandos. Mucius ille olim oraculum protulit: *Et facere, & PATI FORTIA, Romanum est*: quasi hæc in malis magnis Patientia (quæ ipsa est Constantia) peculiaris eorū virtus esset. Et tu dispice. Vnquàmne vnum aliquem hominem, plus inuicti, & obnixi in omnes casus, roboris ostendisse, quàm populū hunc vniuersum? Exemplis doceatur. Pyrrhus ille in Italiam venerat, cū noui generis gentisque copiis, & inprimis inaudito terrore elephantum. Victor grandibus præliis erat, Italiam percurrerat, & à trigésimo panè lapide Romam prospexerat. Quid Romani? trepidant scilicet, & pacem petunt? Imò oblatam vltro respuunt, & legatos eius cum animoso hoc responso dimittunt: *Pyrrhus Italiâ cum copiis excedito. ubi excesserit, de pace si volet, agito. Ni excesserit; arma & viros, & aciem expectato. Neque destituros ab incæpto se, etiamsi SEXCENTOS LÆVINOS* (ea verba Plutarchus posuit) *pugna vicisset.* Qui animi isti, aut verba sunt? non contra Pyrrhum, sed contra fortunam, & penè dixerim cælum, dimicantium. Etsi mos ille eorum semper in bellis (notandus & ADMIRANDVS) nihil largiri armato hosti: sed vbi ea posita, & obsequiosi aut flexibiles illi visi, tunc denique conditiones ferre & æquas, & sæpe nec expectatas. Generosorum hoc est: ire in aduersos, parcere aut abstinere

Dionys.
lib. vii.

iam abiectis. Fructus autem Constantiæ in Pyrrhum fuit, sponte Italiâ illum fugere, ipsos eius dominos & potentes fieri. Vide & bellum Punicum primum. quot ibi clades, raræ aut nouæ? Rara in Africâ ipsâ, cùm Atilius Regulus Consul, cum toto exercitu oppressus, & viuus venisset in hostium potestatem. Nouæ aliquot in mari: cuius antea expertes & imperiti, classes plures vel naufragio vel pugnâ amiserant. Polybius scribit, & ipse miratur, *septingentas quinquereemes eo bello amissas fuisse*. Satis autem iacturam eam æstimas aut intellegis? in quaque earum (Polybio sic ordinante) *trecenti* remiges ferme erant, milites *centum viginti*. Hostu si vnâ computas & colligis, videbis paullo minus *trecētis hominum millibus* periisse. Et qui Romani tunc erant? nec totâ etiam Italiâ plenè adhuc potiti. O constantiam, ô robur, & ô fortunâ! nam hæc se vertit, & puduit tam merentibus non se dare. Iam ad mortem plaga, Punicum bellum tertium. Annibal summus ducum in Italiam ipsam venit, siluam exscindere parat, in quâ stabulabantur Martiales isti lupi: & pænè fecit. Tribus proeliis magnis victor; & vltimo illo Cannensi, quid nisi totum virilem sanguinem Romanum exhaustit? Heu cladem! *quinguenta millia* selectorum militum, vnâ cum altero Consulum, cùm tot Tribunis & Centurionibus, tot Senatoribus & Equitibus Romanis iacent: & tu Roma adhuc spiras? quibus frera? senibus, puerisque, & feminis, quos solos pænè reliquos habes? Spiro, inquit, imò alta & vetera spiro. De pace nulla mentio: veniat, vel Romam Annibal, arx & Capitolium nos defendet, & è cinere isto suscitabuntur *rerum domini Romani*. O insanas, dixerit aliquis, cogitationes! sed res & exitus docuit

docuit, constantes & felices. *Magna populi Romani fortuna* (ait Florus) *sed SEMPER IN MALIS MAIOR, resurrexit*: & pueros, senes, vinctos, seruos armauit: & imbecillo aut fœdo exercitu victrices illas copias profligauit. Plura possem. nam in omni Romanâ historiâ propriæ huius virtutis exempla sunt: sed quid maius istis possum? Claudianus concludat:

NVMQVAM SVCCVBVIT DAMNIS, & *territa nullo*

Vulnere, post CANNAS MAIOR Trebiamq, fremebat.

Et Liuius: MAGNITVDINEM populi Romani, aduersis propè rebus ADMIRABILIOREM, quàm secundis esse.

AVD. Atqui vnum miror, & pænè doleo, à te omitti.

LIPS. Quod illud est? AVD. De Varrone. nam quid admirabilius, quàm cùm ille auctor & caussa tantę cladis (nec falsò) diceretur: Romam redeunti obuiam itum ab omni ordine & populo, & *Gratias actas, quòd de Republicâ non desperasset?* Siqua alia hæc plebs fuisset, itane gratias funesto & furiali capiti? sputa, saxa, tela, nec vnam mortem. Illi fecerunt. quia hoc quoque Constantiæ propriũ, mederi malis potiùs, quàm irasci.

LIPS. Est & minutum aliud. Nam cùm vrbem ipsam Annibal obsideret, & terrêret: fundus, in quo castra eius posita, publicè sub hastâ Romæ vœniit: nec minoris, quàm si liber, nec infessus ipse aut Italia ab hoste essent. Item alterum. eodem illo tempore, cùm ad vnam portam Annibal pugnaret & inuaderet, alterâ militem & auxilia in Hispaniam emiserunt. Fiducia hæc, vt verum dicam, humana non fuit: à Deo inspirante vênit.

CAP. VI.

*Contrà Probitatem & Abſtinentiam dicta & ob-
ducta quadam.*

ET hæc ſufficiunt, mi Auditor, de Virtute Ciuili: cuius custodes & ſacerdotes ſi viritim recenſeam, quando finiam? te, & certè me, fatigem. A V D. Numquam me, nec ſi Iliadem ſermonis tui texas. Sed tamen ſi arbitrari me dicta tua vis, non ſolùm audire: habeo quæ ſpecioſè aut firmiter obducamiis & opponam. Itane Virtutem hanc attollis? Pietatem omitto: etſi ea externa tota, & miſeratione magis, quàm refutatione digna. Sed de candore & fide adiunxiſti: an non ipſo animo tuo alibi retinente, aut refragante? Proh ſancta Fides, quæ igitur lego alibi aut video, contra tuum nomen aut nomen admiſſa? *Caucae* populus Hiſpaniæ ſatis potens & notus fuit. qui cùm pares Romanorum armis & violentiæ non eſſent, legatos ſupplices in caſtra ad Lucillum Imperatorem miſerunt, pacem & foedus quacumque lege facturos. Ille obſides imperat, & argenti ſtatim talenta centum, equites auxiliares certo numero. Omnia fiunt ſedulò & obnoxiè. Imperat tum amplius, vt *duo millia* militum in urbem ſuam accipiât, præſidij cauſâ. Id quoque factum. Sed illis occultò mandatum, vt muros portasque occuparent: atque ita Lucillus reliquum exercitum induxit, & tubâ ſignum datum, vt ſine discrimine, ſenes, pueri, viri, feminæ interficerentur. Ita opidum direptum, deletum: ipſa *viginti millia* hominũ, per ſummũ ſcelus, interempta. O candorem, ô ſimplicitatem! & ecce aliam, in eâdem Hiſpaniâ, ſimilem. Sulpicius Galba Luſitaniam hoſtiliter ingreſ-

gressus vastabat, mirantibus illis nec causæ aut culpæ satis consciis. Legatos mittunt, fœdera priora renouant: illo recipiente, & vtrò miserante, quòd sic affligerentur. *Sed, inquit, egestas fortasse vos impulit preda agere, & belli speciem præbere: medebor. Tripartitò vos diuidam, & in agro ac solo pingui collocabo, ubi reliquum beati ac tuti agatis. Venite cum vxoribus, cum liberis: in talem vallem, talis illa pars. adsignabo.* Veniunt miseri, læti ac securi, & in triplici regione distincti. ad quorū primos cū accessisset, arma ponere quasi amicos sociosque iussit: & iis positis, milites immisit, & fidem ac deos implorantes, ad vnum omnes occidit. Idem alteris, tertiisque celeriter factum, & priusquam fama prioris facinoris ad eos venisset. Aspicio te Lipsi, & oculis vultum ac pectus verbero, si tale aliquid infidū & barbarum, in vllâ barbarie factum? Atqui nouitia hæc sunt, dices, & reipublicæ inclinantis. Non nimis, nec longè à bello Punico secundo, cū Respublica moribus legibusque vel maximè floruisse censetur. Sed vis igitur antiquiora? accipe. Aufonum gens in Italiâ fuit, vno tempore, nullo satis certo crimine, excisa. Liuius ipse narrat, suspectos & delatos à paucis, quasi deficere ad Samnites vellent: preuentos autè à Romanis, qui occultè submissis militibus, quibusdā & togatis, portas trium opidorū occuparunt: & eadem horâ, cædibus promiscuè factis, vrbes & gentem deleuerunt. Audis tu mi doctor? quid istis hominibus probius aut candidius? cedunt Gallicanæ nostræ niues. Iam & *Abstinentiam* ac *Continentiam*, laudasti: & vt leuissimè dicam, subrisi, aut & irrisi. Nam quæ, aut vbi, hæc Abstinentia? Romæ, & inter ciues fortasse? credo, & ex veteri dicto, *Coruus coruo oculum*

*non eruit. Sed an eadem in prouinciis, & vbi occasio aut facultas peccandi? O dij deæque (si fas sic exclamare) quæ illic occulta aut aperta furta, libidines, nundinationes, raptus? Poëtæ Harpyas aliquas finxerunt, quæ contactu & vnguibus omnia diriperent, aut foedarent: in re, isti Romanorum Præsides fuerunt. Optimus & bellissimus quisque ita se gerebat, vt bella omnia domum auferret. Demades olim dictitare solitus, cùm ad Tribunal aut Magistratum iret, ad *Auream messem se ire*: mihi crede, isti ibant, & Colchos quisque Iason sibi spondebat. Legisti tu Ciceronis illa de vno Verre? pleraque talia in aliis, & miseri prouinciales nō nisi præda & spoliū Præsilibus suis erant. Quòd si in pace talia: per bellum & arma quid suspicamur fuisse? & tu tamen illic quoque Abstinētiā eorum laudas. O iustē, ô meritò! & tuā veniā, dabo exempla. Ecce L. Sulla in Asiā, cùm communiter *viginti millia talentū* exegisset, priuatim edixit, vt hospes militi apud se diuertēti *sedecim drachmas* in diem daret; cænam insuper ipsi, & sodalibus quot vocasset; Centurio autem acciperet in diem *quingenas drachmas*, vestem prætereā duplicem Domesticā & Forensē. Hæc Sulla, inquires, homo nequam, & natus ad Disciplinā militarem dissoluen-
dam. Benè est, accipio excusationem: quid ergo L. Paulus qui Macedoniam vicit, inter optimos ciuium? Destinatum ei Epirum totam diripere, & in prædam militibus dare, quia cum Perseo rege sensissent. Quid facit? ipsis Liuij verbis, *Centuriones in singulas vrbes submittit, qui se dicerent ad præsidia deducenda venisse, vt liberi Epirota, sicut Macedones essent. Denos principes è singulis euocauit ciuitatibus. Quibus cùm denunciasset, vt aurum**

Et argentum in publicum proferretur; per omnes ciuitates
 cohortes dimisit, sic ut vno die in omnes peruenirent. Edicta
 Tribunis Centurionibusq, erant, quæ agerentur. manè om-
 ne aurum argentumq, collatum: horâ quartâ signum ad di-
 ripiendas vrbes datum est militibus: tantaq, prada fuit, ut
 in equitem* quadringenti Denarij, peditibus duceni diui-
 derentur. Centum quinquaginta millia capitum humano-
 rum abducta. Muri deinde direptarum urbium diruti sunt:
 ea fuere opida circa LXX. Quibus auribus tu candoris,
 tu abstinentiæ mirator, hæc audis? Centuriones submit-
 tit, per speciem liberandi; decem primos euocat, ut con-
 silio & ducibus spoliaret: ô candidum factum! Milites
 deinde immittit, diripit, cædit: ô clemens abstinentisq,ue
 factum! Sed pulcherrima clausula, tot millia capitum
 abducta: nec finis, in miseros muros & tecta sæuitum,
 & dirui ea iussa. In vicinâ Græciâ, quid Hortensius Præ-
 tor patrauit? Legati Abderitæ in ipsâ Româ audiantur,
 (Liuij item verbis) *Flentes ante Curiam, querentesq, opidum suum ab Hortensio expugnatum direptumque esse.*
Causam excidij fuisse, quòd cum centum millia denarium,
& tritici quinquaginta millia modium imperaret, spatium
petierant, quòd de eâ re ad Hostilium consulem, & Romam,
legatos mitterent. Vix dum ad Consulem se peruenisse, &
audisse opidum expugnatum, principes securi percussos, sub
coronâ ceteros vanisse. In ipsâ Italiâ, Locrorum opido
 Q. Pleminius, Legatus Scipionis Africani, cum milite
 præfuit. Sed quomodo? Liuius iterum dicit: *In COR-*
PORA, in LIBEROS, in CONIVGES, INFANDÆ
contumeliæ editæ. Libidines, & non dicenda habes: iam,
auaritia (inquit) ne sacrorum quidem spoliatione abstinuit.
nec alia modo templa violata, sed Proserpina etiam intacti
 f
 omni

* Quadra-
ginta Phœ-
lippici.

Lib. xlii.

Lib. v. 1. ad
Attic.

omni etate thesauri. En religionem & pietatem, quam laudabas. Et quid ego Consules, Prætores, Legatos, nomino aut conquiro? ecce pusillus vnus Præfectus equitum, titulo tenus, Scaptius, cùm pecuniam deberi sibi à Salaminis diceret, illi ad Senatum appellarent, eiusque consultum: homo probus & iustus, *quinquaginta equites* ab Appio Proconsule impetrat, *inclusum in Curia Senatum* habet in multos dies, adeò vt interierint nonnulli fame. Hæc Cicero ita narrat, & simul equabile illud ius inter prouinciales & Romanos ostendit. Quid plura addo? claudat mihi Polybius testium agmen. qui scribit Scipionem, captâ Carthagine Nouâ, *omnes obuios occidi iussisse, nec vt ulli parcerent.* Tum addit, sollemnem hunc morem Romanis fuisse: *Videntur enim, inquit, terroris gratiâ hoc illi facere. Itaque frequenter videre est, quando Romani ciuitates capiunt, non homines modo occidi, sed etiam canes dissecari, & aliarum animantium membra truncari.* Heu, heu clementiam, candorem, probitatem, & omnia, quæ dixi, inter A D M I R A N D A!

C A P. V I I.

Pariter contra Continentiam; & de luxu Romano.

IAM tu *Continentiam*, etiam laudabas, in Victu & Veste: voluntate tuâ, aliquid opponam? L I P S. Valdè interest scilicet quid velim: tu mihi videris, vt Mithridates aliquis, non libero, sed hostili ore & animo, inuehi in Romanos. A V D. Non ita est: sed falsa si dicam, vterque parati erimus, tu refellere, ego refelli. Hoc iam agis, video: sed prius & istæc audi. *Continentiam* igitur & frugalitatem veterum illorum, sed planè veterum,

rum, si laudas: ego succino, & Fabricios, Curios, Quintios tecum miror. Sin longiùs trahis; vt non ego, lectio tua & obseruatio tacitè refellent. Quid? leges illę Sumptuarię ab antiquo latę, & sub bellū Punicum secundum, non ostendunt morbos in eâ parte fuisse, cū ad publica hæc remedia decurrendum? Ipsę cænę, & lautitię quę narrantur, non id clamant? Reminiscere Pontificię illius cænę apud Macrobiū, vbi incognita & nobis quęrenda ciborum genera: reminiscere & Salustij verborum de Metello Proconsule, in Hispaniâ:

Cænæ, ultra Romanorum, ac mortalium etiam, morem curabantur, exornatis adibus per auleas & insignia, scanisq; ad ostentationem histrioniam fabricatis. Simul croco sparsa humus, & alia in modum celeberrimi templi. Præterea, sedenti in transfennâ demissum Victorię simulacrum, cum machinato strepitu tonitruum, coronam ei imponebat: tum venienti thure, quasi Deo, supplicabatur. Toga picta plerumque amiculo erat accumbenti. epula verò exquisitissima, neque per omnem modò prouinciā, sed trans maria, ex Mauretaniā volucrum & ferarum, incognita antea, plura genera. Considera cænaculi apparatus, cenantis habitum aut honores, cænę ipsius exotica fercula: quis ganeonum & lurconum, possit vel ausit imitari? Quis nostrū hodie aues aut feras trans mare, cænę causā, conquirat? Atqui olim non Metellus solū aliquis, sed iam vulgus lautiorum. Petronius Arbiter:

*Ingeniosa gula est, Siculo scarus aquore mersus
Ad mensam vini deducitur. inde Lucrinis
Eruta litoribus vendunt conchyliæ canis,
Ut renouent per damna famem. iam Phasidos vnda
Orbat a est aibus, mutoq; in litore tantum.*

Sola desertis adspirant frondibus aure.

Confol. ad
Helu.

Pulchrè & floridè, sed an poëticè & elatè? non opinor, imò Seneca, acer ille talium quæsitòr & censor, auget & attollit. *Non est necesse* (inquit, ad sæculi sui mores) OMNE perscrutari profundum, ac strage animantium ventrem onerare, nec conchylià VLTIMI MARIS ex ignoto litore eruere. *Dij deaq; istos perdant, quorum luxuria tam inuidiosi IMPERII FINES transcendit. Ultra PHASIM capi volunt, quod ambitiosam popinam instruat: nec piget à PARTHIS, à quibus pœnas nondum repetiimus, aues petere.* Vides affectum & stomachum viri, & sine bile hæc nec in sermone quidem vsurpantis. Quid Latinus Pacatus, in Panegyrico? Laudat Theodosium Principem, quòd nihil tunc opus esset, *ad penum regiam flagitare remotorum litorum piscem, peregrini aëris volucrem, alieni temporis florem.* & tum addit imaginem prioris sæculi: *Nam delicati illi ac fluentes, & quales sæpè tulit Respublica, parum se lautos putabant, nisi luxuria vertisset annum, nisi hibernæ poculis rosæ innatassent, nisi estiuâ in gemmis capacibus glacie falerna fregissent.* Horum gula angustus erat orbis noster. namque appositas dapes, non sapore, sed sumptu æstimantes, illis demum cibis acquiescebant, quos EXTREMVS ORIENS, aut positus extra Romanum COLCHVS imperium, aut famosa naufragiis maria mississent. Ecce vitia & prodigiosum luxum, omnia fastidientem, nisi remota & sumptuosa. Sed inferioris tantum illa æui? imò verò, vt tetigi, à bello Punico secundo, aut circà: cùm ecce Cato Censorius publicè questus, *Non posse saluam esse urbem, in quâ piscis plaris, quàm bos, vaniret.* Attende mi Lipsi. hocne nostro æuo sit? & tamen in luxum inuehimur, nec immeritò: at ego tibi di-

co, pluris quàm decem boues vèniisse vnum piscem: piscem? pisciculum addo. Nulli in quo tunc pretio? putantur fuisse, quos *Barbos* hodie, aut *Regulos marinos* vocamus: sed quidquid fuit, pisciculus, & vix quinque, aut sex librarum. O non delicias, sed insanias! vnum ex iis quinque, sex, octo, decem millibus *hs.* reperio emptum. Seneca iocosè narrat de Tiberio, seuero Principe, & luxui nec duce nec fautore. *Mullum ingentis formæ* (quare autem non pondus adiicio, & aliorum gulam irritò? quatuor pondo & selibras fuisse aiebant) *Tiberius Cæsar misit sibi, cum in macellum deferri & vanire iussisset: Amici, inquit, omnia me fallunt, nisi istum mullum aut Apicius emerit, aut P. Octavius. Ultra spem illi coniectura processit. Licitati sunt: vicit Octavius, & ingentem consecutus est inter suos gloriam, cum *hs.* * quinque millibus emisset piscem, quem Cæsar vendiderat, ne Apicius quidem emerat.* Notetur hîc, quæso, non pretium solum piscis, sed Tiberij mirabilis continentia, qui in tantis opibus nec edere piscem voluit, nec donum alteri tradere, sed pretium ex eo fecit. quod sordes hodie aliquis fortasse (nescio an recto iudicio) interpretetur. At in Plinio, *Asinius Celer, è consularibus, hoc pisce prodigus, vnum mercatus est* * octo millibus. Atque id quasi summum pretium Plinius habet, cum tamen in Suetonij Tiberio sit, Principem eum grauiter questum, tres mullos triginta millibus nummum vanisse. Si numeri recti, certum est excessisse, & singulos ducentis quinquaginta Philippicis stetisse. An falsus aut mendax ergo fui, de bobus vel decem? Iam alia si conquiram, vereor non longus solum, sed vanus esse. Dicam tamen, vel tui iudicij explorandi causâ, & corriges, sicubi ego, aut testes mei, extra fines veri ibunt.

Epist. xcv.

* centum viginti quinque Phil.

* ducentis Philipp. cap. lxxiiij.

De Apicio, quem iam nominaui, res nota est, hominem perditæ gulæ fuisse: de quo, vt alia sileantur, mors sola iudicabit, quam Senecæ verbis dicam. *Apicius*, inquit, *nostrâ memoriâ* (sub Tiberio) *vixit*, qui *scientiam popinæ professus in eâ urbe*, è quâ quondam philosophi pulsi fuerât, *disciplinâ suâ seculum infecit. cuius exitum nosse, operæpretium est. Cùm HS. millies in culinam congesisset, arē alieno oppressus, rationes suas tunc primum coactus inspexit. Superfuturum sibi HS. centies computauit, & velut in ultimâ fame victurus, veneno vitâ finiuit.* Quam luxuriam, & quam effusam vitam priuati hominis hanc fuisse putamus, cui centies HS. (id est, ducenta quinquaginta millia Philippæorum) paupertas & desperatio fuit? O quàm multorum millium improba vota hodie sint, vel quinquagies habere? Sed hunc omitto, & duos eodem nomine alios, qui in exemplar & nomen transierunt huius vitij: Claudium Æsopum addamus, histrionem. De eo Plinius: *Maximè insignis est in hac memoriâ, Clodij Æsopi, tragici histrionis patina, sexcentis HS. taxata. in quâ posuit aues, cantu aliquo aut sermone humano vocales, millibus sex singulas coemptas, nullâ aliâ inductus voluptate, nisi vt in his imitationem hominis manderet.* Benè hæc postrema fortasse: sed an non acrius, *imitatione hominem manderet*? Anthropophagum facere hunc Æsopum vult, qui aues comederet, cùm hominem non posset, humanas. Æstimatio autem ea vnus patinæ est, quindecim millium Philippæorum. Atque iste etiam est (alij ad eius filium referunt) qui *margaretas sorbere solitus aceto solutas. O scelus, in mare deportandum!* LIPS. Ne nimis, ne nimis: & an me eò vis? nam ne nescias, & ego margaretas, vel potius margaréticas, arte liquefa-

etas

Etas soleo sorbere. Nec res magna aut impendiosa est.
 A v d. At ego pretiosas aio, & mens eorum est, qui scri-
 psere. Tu autem vel aurum & gemmas sorbe, vt viuas.
 Sed quod ad illos gulones, de M. Antonij & Cleopatraz
 sponsione nō meministi, cūm hæc se *centies* HS. vnâ cæ-
 nâ diceret absumpturâ? Ille negare, & rem *ἀδύνατον* cen- <sup>que fieri
non possit.</sup>
 fere: ad summū, iudex & sculna captus Munatius Plan-
 cus. Res non differtur, sequenti die illa cænam apparat
 pollucibilem, siquis vnquam, & denique vt Cleopatra,
 & Ægypti regina. Nihil mirari Antonius, & calculos
 ad extremum poscere: cūm illa arridens, Vnum, inquit,
 ferculum rem confecerit. & simul ex composito, illatâ
 phialâ acris aceti plenâ, vnctonem quem aure dextrâ ge-
 stabat, singulare nature opus, detractum in phialam de-
 misit. eumque, vt natura est, statim liquefactum absor-
 buit: parata & in alterum, quem sinistrâ gerebat, ma-
 num iniicere, ni prouidē & properē Munatius, victum
 Antonium clarē pronuntiasset. Quidni victum? cūm
 sola ea gemma vel *centies* HS. esset? siue, vt nostra æsti-
 matio, *ducentis quinquaginta millibus* Philippæorum.
 Atque illa igitur arte hoc consecuta est, vel astu: an re
 ipsâ & simpliciter Caligula, de quo Seneca? *C. Cesar*, <sup>Consol. ad
Helu.</sup>
*quem mihi videtur Natura edidisse, vt ostenderet quid
 summa vitia in summâ fortunâ possent, centies HS. canauit
 vno die, & in hoc omnium adiutus ingenio, vix repperit,
 quomodo prouinciarum tributum vna cæna fieret.* Nam si
 margeretæ vel lapilli absumendi, quid ingeniis magnis
 aut inuentis opus? via strata & nota iam erat, per vesti-
 gia Cleopatraz. In Suetonio tamen sic lego, de ipso isto
 Caligulâ: *Commentus est portentosissima genera ciborum;
 unguentis calidis frigidisque lauabatur, pretiosissimas mar-*
gare-

*garetas, aceto liquefactas sorbebat; conuiuiis ex auro panes
 & obsonia apponebat. Quid iam Vitellius, ille helluo-*
num omnium altissimus gurgis? de quo Plinius: Vi-
tellius in principatu suo decies HS. (ita libri veteres) con-
dedit patinam, cui faciendæ fornax in campis exadificata
erat. Ego mallem (sed tu iudica) condiit patinam: quia
non de ipsâ lance, etsi grandi & pretiosâ, sed de instru-
cto eius & obsonio est sermo. Scripsit autem Suetonius:
in hac scarorum iocinera, phasianorum & pauonum cere-
bella, linguas phœnicopterum, murenarum lactes à Carpa-
thio usque, fretoque Hispania, per nauarchos ac triremes
petitarum, eum commiscuisse. Vbi optimus quidam li-
ber à Parthiâ usque (non à Carpathio) habet: & confi-
derandum est, ex Senecæ & aliorum suprâ verbis. Etsi
tamen structura videtur hæc ad Murenarum lactes re-
ferre. Idem verò Vitellius, non ipse solùm prodigus, sed
alios impellens, indicebat aliis eâdem die, ientacula, pran-
dia, canas, comissiones, ipse omnibus sufficiens, vomitandi
consuetudine. Quod Suetonius cùm rettulisset, ita ad-
dit: nec cuiquam minus singuli apparatus, quadringenis
millibus nummum constiterunt. Heu illusum vel abu-
sum, in alienis opibus! nam ea sunt decem millia Philip-
picorum, siue ipse census equester. Super hæc nihil re-
perio, nisi in Latini Panegyrico obscure quosdam Prin-
cipum perstrictos: Ut taceam, inquit, infami dilectu
scriptos in prouinciis aucupes, ductasq; sub signis venato-
rum cohortes, militasse conuiuiis: nonne cognouimus cuius-
dam retrò Principis non prandia sæpe, sed fercula, HS. mil-
lies aestimata, patrimoniorum equestrium pretia traxisse?
Nec satis scio, quem aut quos tangat: an Vitellium iam
dictum? an potius Heliogobalum? de quo in Lampri-
dio

dio est : *Numquam minus centum HS. canasse, hoc est argenti libris xxx. Aliquando autem tribus millibus HS. canasse, omnibus supputatis quæ impendit. Cenas verò Vitellij & Apicij vicisse.* Sed hunc aut alios; tamen in Latini eius verbis legendum, * *HS. mille æstimata.* Quis enim millies credat, quod nec tres Cleopatraz, & totidem Caligulæ ac Vitellij, absumpserint? Denique magis quadrabit aptumque erit ad id consequens, de *pretiis patrimoniorum equestrium*: quæ paullo plus quam bis in millenis illis continentur. Iam in ipsis Lampridij verbis, non *argenti libras xxx* legi calculus vllus admittit, vt paries cum *centum HS.* sed potiùs *ccl.* quæ pura veritas esset. Sed monstra omittimus: aliquid ad communem morem quærimus, à quo non nimis Philippus, Hortensius, Lucullus, & hi tales, lumina reipublicæ, abiuerunt. Piscinæ & viuaria istorum nota sunt: cænæ, ex vnâ hac Lucullianâ. In famâ homo erat lautitiarum, & quòd esset *non ganeo & profligator*, vt plerique *sua haurientium*, sed *erudito luxu*. Cepit cupido Ciceronē & Pompeium cognoscendi, sed inopinatò, & vt serìò discerent quomodo in dies viueret. Inueniunt in foro, salutant, cænam indicunt: Sed *heus tu*, aiunt, *eâ lege nequid pramandes. nam sumptû sumi in nos, non placet.* Ille tergiuersari primò per simulationem, & Cras potiùs, inquit: cùm negarent, *Ergo nec hoc licet*, inquit, *famulo dicere in quo triclinio canaturi simus?* Permittunt. Ille altâ voce, *Abi, dic in Apollinis canaturum.* Mox sequuntur: omnia lauta, splendida, regia, cum stupore duorum conuiuarum. Sed causam nesciebant scilicet, & totam vim habuerat ad apparatus, vnum illud *Apollinis* verbum. Nam homo ita disposuerat, vt cænacula suis nominibus distin-

* Id est xxv. millib. Phil.

Tacit. de Petronio.

Et essent; & in quoque tales cibi, & impendia. Eminēbat autem illud Apollinis: atque ita cū Dispensator aut Coquus audissent id nomen, sciebant statim quid, & quantum, opus esset. Summa enim taxata huic cænaculo, ait Plutarchus, *quingenta millium drachmarum*, erat: quæ sunt *quinque millia Philippæorum*.

Quid plura ego adferam? vnum hoc Senecæ, ad xui sui mores aptum: *Quid est sumptuosâ cenâ flagitiosius,*

Et equestrem censum absumente? Et tricies tamē HS. *adiiciales cenæ frugalissimis viris constituerunt.*

Hic vnus ictus, Lipsi, te conficit: vulgò census equestres insumpti: & ab ipsis *frugalissimis* viris, *tricies* HS. Quantum hoc postremum est? colligit *septuagintaquinque millia Philippæorum*. O frugalitas in vno conuiuio ADMIRANDA! & quis Principum hodie vel in nuptiali epulo tantum prodigit? Silebam Lipsi, & stupebam: nisi quòd de *Veste* etiam aliquid sit addendum. Sumam

à Censore nostro Senecâ: *Quidquid est boni moris, extinguimus leuitate Et politur à corporum.* Muliebres *mundicias antecessimus, colores meretricios, matronis quidem, non induendos, viri sumimus.* Tenero Et molli ingressu suspendimus gradum; non ambulamus, sed incedimus. Exornamus anulis digitos, in omni articulo gemma disponitur.

Ista de viris: quid de iuuenibus? Pater illius Senecæ: *Torpent ecce ingenia desidiosæ iuuentutis, nec in ullius rei honestæ labore vigilatur. Cantandi saltandique obscœna studia effeminatos tenent: Et capillum frangere, Et ad muliebres blanditias vocem extenuare, mollitie corporis certare cum feminis, Et immundissimis se excolere mundi-*

ciis, nostrorum adolescentium specimen est. Quis equalium vestrorum, quid dicam satis ingeniosus, satis studio-

sus,

Epist. xcv.

Lib. vii.
Nat. Quest.

l. Corro.

sus, imò quis satis vir est? Emolliti enervésque, quod nati sunt, inuiti manent, expugnatores alienæ pudicitia, neglegentes suæ. Dei fidem! luculenter vtramque ætatem, ab utroque scriptore, laudatâ! Fortasse de feminis addam, quas scimus cum veniâ peccare, vbi viri gradû struunt? Tamen quid Propertius?

Matrona incedit census induta nepotum.

Seneca iterum: *Video uniones non singulos singulis auribus comparatos: iunguntur inter se, & insuper alij bini superponuntur. Non satis muliebris insania viros subiecerat, nisi BINA AC TERNA PATRIMONIA auribus singulis pependissent. Ille de auribus queritur: alius de toto corpore. vt Manilius:*

Pérque caput ducti lapides, per colla, manúsque,

Et pedibus niveis fulserunt aurea vincla.

Pedibus etiam aurum, vt ait, sed & gemmæ: ac Plinius scribit, non crepidarum tantum obstragulis, sed & totis focculis addi. Neque enim (inquit) gestare iam margaritas, nisi calcent, ac per uniones etiam ambulent, satis est. Addit pro fastigio infantiæ, *Visam à se Lolliam Paulinam, ne seriò quidem ac sollenni carimoniarum aliquo apparatu, sed mediocrium etiam sponsalium canâ, smaragdis margaritisque opertam, alterno textu fulgentibus, toto capite, crinibus, spiris, auribus, collo, manibus, digitisq. quæ summam quadringenties HS. colligebant, ipsâ confestim paratâ mancipationum tabulis probare. O monstra! ô aruspice, non te vindice Lipsi, digna! Vna mulier, in vno cultu decies centena millia Philippicûm habeat? habuit: & pauca hæc satis ad Vestem & cultum. Nam cingi te iam aut suspicor, aut vereor: neque fortasse deceat nos iuuenes non dicam tam liberè, sed tam*

liberaliter, nec in vos, sed apud vos loqui. At tu si peccavi, puni: quomodo? contemptu & silentio, quæ poena maxima mihi erit.

CAPVT VIII.

Excusati Romani à prioribus: & primum in Raptu vel Sautiâ, obiter.

NEVTRVM ego faciam, ô mi Auditor. Contēnam vel te, vel tuum hoc discendi studium? nam ita oppositionem hāc interpretor. Vel fileam etiam? quod non aliud sit, quàm caussam non solum perdere, sed prodere: quod esse non potest, nisi aut improbi, aut diffidentis. Atqui non est magnum hoc opus, ne erra: quæ tu coaceruasti, vnius alteriusque manus impulsu deruam, nec machinâ aut ariete alio adhibito cadent infirmi isti muri. Triplex accusatio à te structa, in Probritatem, in Abstinētiā, in Continentiam: & videamus. Fraudulenti quidam aut perfidi fuēre, rapaces quidam aut crudeles, luxuriosi in cibis aliqui aut veste: sed quidam, sed aliqui: & hæc prima responsio sit, & scutum pro me firmum. Quid pungis aut inuadis gentem totam, ob pauculos à te, tot sæculis, alios vitiososque nominatos? Fuisse non miror: nec id prodigium aut monstrum, vt tu aliquoties dixisti; imò esset, si non fuissent. An tu in hac facie nostrâ hominum, puram meramque virtutem aliquam vis? soles nobis imperiorum lucere, sine nube, aut tonitru, aut procellâ? nec fuēre ista, nec erunt: & Deus in superis illis locis & liquido æthere, ferenum hoc habet, & seruat, cetera omnia inferiora, miscentur, & turbant. Galbam aut Lucillum aliquem in Hispa-

Hispaniâ nominas; Hortensium, aut Pleminium alibi: quid ista sunt, in tot millenis Præsidibus, qui boni & innoxij fuerunt? Vt si guttas aliquot aceti in magnum vas aquæ mulsæ iaciam, non ipsum corrumpam, sed gratiâ fortasse magis ab acore aliquo addam: sic in magnis istis imperiis, magis sentitur bonorum bonitas, si pauci interueniant, acidi aut amari. Vis tibi Taciti mei verbis hoc dicam? Cerialis apud eum rebelles Gallos sic mitigat & componit: *Quomodo sterilitatem aut nimios imbres, & cetera natura mala; sic luxum, vel auaritiam dominantium, tolerate.* VITIA ERVNT DONEC HOMINES: *sed neque hæc continua, & meliorum interuentu pensantur.* Hæ sunt non Cerialis, aut Taciti, sed Sapientiæ voces: tu, & alij isti queruli, audite. Atque hæc si locum in exiguo aliquo nec diti imperio habeant (cotidie enim occurrunt:) quidni magis in illo amplo, diffuso, opulento? Magna peccandi materies & illecebra erat, & quòd procul ab vrbe dominâ & Senatu, & vbi vix cerni vel nosci vitia sua posse arbitrabantur. Et tamen (quæ altera responsio) aduersa sæpe fuere, atque etiam animaduersa. Hoc excuset Senatum & imperij præsides, quòd legibus pœnas dederunt, quicumque conuicti sunt leges alibi violasse. Nónne id in Galbâ, Hortensio, Pleminio, Verre, & talibus? Nec Romanis igitur vniuersis fraudi aut culpæ sit, peccasse aliquos, sed impunè & liberè peccasse. Paullum Æmilium mihi etiam attulisti, magnum virum, fateor, & vno illo vel colore culpæ, non enim culpâ, indignum. Cur tamen cùm inuidiosè rem totam narras, hoc callidè siles, Senatum ei iussisse? Ex præscripto id fecit: & qualecumque est, non iam ipse, sed Senatus potius accusetur. Cur ta-

men veliste? audi & disce. Epirotæ illi omnes firmiter pro Perse steterant, Romanos oppugnauerant: quæ iniuria est, si hostes hostium pœnas luant? At nimias, inquires. Nollem factum, si me consulis, & clementia placeat: sed ad coërcendas rebelliones aut defectiones, talia quædam à modestissimis Regibus aut Rebus publicis facta, possim docere. Addis sollennem sæuitiam Romanorum, vt putas, in expugnatione opidorum: homines occidi, canes dissecari, animantes truncari. Miseranda sunt, non nego: nec tamen, vt tu censēs, referenda inter mea ADMIRANDA. Quid dissimulas? non herè & hodie hæc fiunt in puberes & viros omnes, vbi vis vltima expectata? Et causā aliqua huic rei est, *Terror*, quod Polybius dixit: & non facile alioqui manum & finem bellis imponere, nisi hæc interdum, frangendę pertiniacię, vsurpentur. At canes etiam dissecti. ô ridiculum te, si in canes non licet, quod in homines! & amo ego quoque hoc genus, sed absit vt supra nostrum genus. Hæc dici & excusari possunt, & verè possunt: non infiteor tamen, sub Sullâ aliquo, Mario, aut Cæsare, & præsertim per ciuilia bella, ius omne & fas neglectum aut calcatum: sed mox attollendum ab Augusto, aut si quem bonum Principem Deus dedit. Illo medico opus fuisse fateor Rep. iam tam laxâ & opulentâ: & inter pares, seueritas aut terror esse nō poterat ad satis reprimendum. Leges erant: sed *inualidum earum auxilium*, ait Tacitus: *quæ vi, ambitu, postremò pecuniâ turbabantur*. Itaque sub Principe status iam melior, maximè quod ad Prouincias attinet: nec eæ auaritiā aut rapinas Præsidum sic impunè sentiebant.

CAPVT. IX.

Factum idem in Luxu mensarum, aut vestium.

SATIS, quod ad priora duo attinet, excusavi: venio ad *Continentiam* asserendam, in quâ conuellendâ valdè te iactasti. Argumenta in eam præcipua duo erât, Leges Sumptuariæ ab antiquo latæ; & Exēpla aliquot luxus. Quod ad Leges, vide quàm ego à te abeam: aio & adfirmo, non firmitus pro frugalitate argumentum esse. Nam quod ex coërcent aut emendant, quale est? ex emendatione apparet, quam videamus. *Fannia* ecce lex, sub bellum Punicum tertium lata fuit, in hanc sententiam: *permitti diebus festis centenos aris; ceteris, denos.* O verè ADMIRANDA æui continentia, cui satis esse potuit finitio iam dicta! Nam attendisti hoc mi Auditor? *centeni* illi æris, decem drachmas nobis reddunt, *deni*, vnam. O nuptias, repotia, natales, apparatu celebri, quibus Philippæus vnus sufficeret in potum, in cibum! Quis de viâ aut ponte mendicus pænè, non plus hodie absumpserit? Atqui Respublica tunc satis opulenta & florens erat: & maximè autem sub Sullâ. Tunc & Græcanicę, & Asiaticę delicię cognitæ: videamus igitur, & laxè lauteque iam epulemur. Ita opinor. nam ecce tulit Sulla, vt *feriis sollennibus triginta sestertios* liceret *insumere; ceteris diebus, ternos.* Hem, hem, hem quid istud est? itâne regredimur, & recidimus? ego autem iure progredi, & accedere aliquid debere cēsebam. *Triginta HS.* sunt, meo calculo, *septem* drachmę & semis; id est, nondum Philippicus: *terni* autem, nec drachma. A V D. Ego hæc non credo Lipsi, nec fero: ridenda & explodenda sunt. Tales leges, tam arctas, ferat ille, qui sic copiosè vixit?

vixit? LIPS. Rem habes, & verba ipsa apud Agellium: tu vide. AVD. Corrigenda sunt: & HS. *trecentos* legendum, non *tricenos*. LIPS. O bonum promptumq. Criticum! sagacitas magna est, viceris vel Luceium. Sed define, define homo: & manum tuam coërceat lex Licinia quæ præiuit, in quâ non nisi *triginta asses* (tres denarij) *permisi diebus festis*. Laxauit igitur & auxit Sulla. Sed quid hîc sistimus? Augustus ille, qui Romam opibus & gazâ Ægyptiâ repleuit, & sub quo illa in ipso flore, Cibariam legem hanc tulit: *quâ profestis diebus ducenti sestertij, Kalendis, Idibus, & aliis quibusdam festiuis, trecenti; nuptiis autem & repotiis, milleni finiuntur*. Sunt *quinque* Philippæi, *profestis; festis, septem cum dimidio; nuptiis, vigintiquinque*. Quid tu, cùm hæc legis, non cogitas, tot illos illustres Equites & Senatores, & censum eorum vel Principum opibus hodie comparandû? Atqui quàm coërceantur, vides: & ego tibi hodie adfirmo, rarò sollennius paullò conuiuium dari, quod nuptialem illam summam non excedat. En, abi nunc, & luxum obiice: quem totum satis reieci argumento ipso tuo legum. quia (vt veterum aliquis ait) *indiciu[m] sobriij sæculi est, ubi tali præscripto legum, coërcetur expensa canarum*. Atquin Apicios, Lucullos, Caligulas, aut Vitellios adduxisti. Quid ad me? cùm Rempub. laudaui, plurimos in eâ laudaui; nec adspicere debui, siquæ in tanto & tam vberi agro malæ alibi & nocentes herbę. Non obstant, quo minùs hæc seges vber & laudabilis sit: nec tales certè mihi dabis ante labentem Remp. id est Sullanum æu[m]. AVD. Imò dedi Lipsi. nōne Cato de pisce exclamauit supra bouem? nōne *frugalissimis etiam viris, vt Seneca dixit, cænæ*

tricies constiterunt? Hæc purganda sunt, si potes: aut labitur tuum illud legibus folis nixum. LIPS. Vah, quomodo potero? quò me vertam? Bos ille Catonis occur-
sat: & planè, ex Græcorum verbo veteri, *Bouem nunc habeo in linguâ*. Sed audi quod verum est, nec nimium in boue te iactes. Bos & alia, minimi tunc pretij, nec credo equidem vñiisse vltra *quaternas aut quinas* drachmas. A VD. Totum bouem? LIPS. Totum. A VD. Quaternas? LIPS. Ipsas. A VD. Si hoc doces, tum ego dixerim vel me bouem esse. LIPS. Quid si amplius doceo, & ad Drachmam vnam te duco? A VD. Habebo hoc caput & culmen inter omnia hodie, heri, & nudius tertius, quartusque, ADMIRANDA. LIPS. Da te mihi, disces, & credes. Plinius ita scribit. nam ipsa verba recitanda sunt: *M. Varro auctor est, cum L. Metellus in triumpho plurimos duxit elephantos, ASSIBVS SINGVLIS farris modios fuisse, item vini congios, sicique sicca pondo triginta, olei pondo decem, CARNIS pondo duodecim*. Hoc ille bono auctore, & omnis antiquitatis indagatore, Varrone protulit: & obseruasti? A VD. Nihil respondeo, stupeo: & tamen nihil etiam de boue. LIPS. Vel maximè, sed non attendisti. Nam ait, *Carnis pondo duodecim, singulis assibus vñisse*: & fac igitur bouem pependisse quadringentas aut quingentas libras: quid erunt nisi *quaternæ* aut circiter drachmæ? Sed illa nimis vetera sunt, inquires. Nec id quidem, sed bello * Punico * Anno Vr-
bis DCL. primo euenerunt: haud longè à Catonis æuo. Et demus postea aliquid mutasse, paulatim tamen nec enormiter: & hoc Polybius nobis dicet. Ille, ipso Catonis æuo, scribit de fertilitate & copiâ Galliæ Cispalinæ: *suis etiam* Lib. I. n.
sæpe temporibus, medimnum frumenti Siculum, quattuor
h obolis

obolis vānīsse; hordei, duobus; metretam autem vini, tantidem quanti hordeum. Ista magis mira ADMIRANDA sunt, medimnum Siculum (sex modios continet) non nisi duabus Drachmę partibus vānīsse; metretam vini (*duodecim congiij sunt, si Atticam, quod opinor, intellegit) tertiā parte. Addit etiam facetum corollarium, *Viatores in iis locis, nihil cum diuersitore aut hospite pacisci, sed benè & lautè habitum, abeuntem soluere dimidiatum Assem.* O si nobis peregrinari ita fas! tota iuuentus dilabatur, & abeat in beatas illas oras. Sed ego tibi promissum meum plenè soluam, & bouem reducam ad Drachmam. Factum bello Mithridatico, cū Lucullus prædas è Ponto egit, sic abundanter, vt *mancipium quattuor drachmis vānale esset; bos, vnā; capra, oues, vestes, alia, pari vilitate.* In Appiani Mithridatico hoc leges. Quid tu iam? A V D. Sileo, & bos à tuā linguā transiit in meam. L I P S. Imò tu, vt volebas, in bouem. Nec tamen, vt seriò loquamur, sentio vel assero, tam grandem vilitatem hanc semper fuisse: sed analogiā talem, & quā leges illæ Sumptuarię satis ostendunt. Absque eā enim, quid nisi irrisio & illusio eę sunt? Facit huc, quod de Pomponio Attico, insigni viro & prædiuite, ac digno cui Agrippa gener esset, & è posteris Tiberius Princeps, Cornelius Nepos in vitā eius scribit. *Cū, inquit, in primis lautus esset eques Romanus, & non parum liberaliter in domum suam omnium ordinum homines inuitaret, scimus non amplius quā terna millia aris, per aquē in singulos menses, ex ephemeride, eum expensum sumptui ferre solitum: atque hoc non auditum, sed cognitum prædicamus.* Hæc notanda profectò. Atticus inter planè diuites erat, inquit, idem inter liberales, & domus eius

* Libræ mē-
surales 120.

eius ac mensa cottidie omnibus patebant, etiam è Senatu: & tamen non plus in mensem, quàm *tria millia aris* absumpsit. Sunt *triginta Philippici*: ergo in diem, *Philippicus unus*. Hec in florentissimâ re Romanâ facta: & quid vltra addam? Vnum etiam, ne subterfugere videar de *Frugalissimis tuis viris*, qui *Tricies* absumpsere. Sed heus tu, satin' plenè & ex fide Senecæ verba attulisti? Ego faciam, & pluscula recitanda sunt, vt de sententiâ constet. Ait, contra luxuriam differens: *Non in factolause est, sed in eo, quemadmodum fiat. Quid est cana sumptuosâ flagitiosus, & equestrem censum consumente? Quid tam dignum censoriâ notâ, siquis, vt isti ganeones loquuntur, sibi hæc & genio suo præstet? & tricies tamen* HS. *adiiciales cana frugalissimis viris constiterunt. Eadem res si gula datur, turpis est; sin honori, reprehensionem effugit.* Mens huius viri, non in re peccatum sæpe esse, sed in causâ & fine. Tu epulum sumptuosum das, sed gulæ aut vanitatis causâ: alius dat, sed legis & moris causâ: ille peccat, hic minimè, quia non cupidini, sed consuetudini est obsecutus. Sicut, inquit, in *Adiicialibus epulis*, viri etiam frugales multum impenderunt, sed quia debebant. Totum in eo, vt sciamus seriò, quæ sint istæ *Adiiciales*: ego nullas arbitror (pace eorum, qui aliter) & *Aditiales* omnino scribo. Intellego eas, quæ in *aditu honoris*, & auspiciis quasi primis, etiam nunc dari solent: sed olim maximè Sacerdotiorum. Inde *Pontificia, Saliaræ, Augurales, Diales cana*, prouerbiis celebratæ: & Seneca de *Aditilibus* scripsit, *honori eas dari*. Talis illa apud Macrobiū, ex Indice Metelli Pontificis transcripta: *Ante diem ix. Kal. Septembres, quo die Lentulus FLAMEN INAVGV RATVS est.* Datæ igitur

in ipsâ inauguratione & aditu, vt dixi: & quidni sic *Aditiales*, vt *fnitiales*? Ne aliò igitur traxeris ea Senecę, nec à sollennibus sacrisque epulis, ad communem sæculi luxum. Sed addidisti etiam in fine de Vestibus, & viros feminasque lasciuiisse. De his, non nimis nego, nec excuso: concessu omnium peccet in nugis ille sexus, ad seria non aptus. Sed viri, parum aut nihil in veteri Republicâ: sub Principibus cœpere, nec Principibus ipsis inuitis. Frangi aut mitigari altos & generosos animos, vestium, conuiuiorum, ludorum, deliciis aut remissionibus, haud abs re eorum est: nec Augustus & sagaciores illi ignorarunt. Itaq. Tacitus scripsit, *Luxus mensa, à fine Actiaci belli, vsque ad arma, quīs Ser. Galba rem Romanam adeptus est, per annos centum, profusis sumptibus exercitos fuisse*. Sed antea negamus: & cum Liuius totum hoc de Virtute claudimus, *Nulla unquam Respublica nec maior, nec SANCTIOR, nec BONIS EXEMPLIS ditior fuit: nec in quam tam SERÆ Auaritia Luxuriæque immigrauerint; nec ubi tantus, ac TAM DIU Paupertati ac Parcimonie honos fuerit.*

CAPVT X.

Doctrina studia Romæ, & Salaria in Doctores.

AB SOLVI igitur de Virtute, nisi placet ornamentum vel adiumentum eius me adtexere *Doctrinam*. Nam & ea Romæ viguit, atque adeò à conditâ ipsâ vrbe; si Dionysio & Plutarcho credam, *Romulum, & Remum litteris & omni liberali doctrinâ institutos Gabiis fuisse*. Cur verò non credam? opera & facta non abnegant expolitum Romulum fuisse, & sequen-
tes

tes item Reges : & multa Græcanica instituta in moribus, verba ipsa in linguâ comparent. Eterat transfusa ipsa Græcia in magnam Italiæ partem, cui & nomen reliquit. Exoleuisse tamen hæc paullatim, fateri debemus, & vsque ad bellum Punicum secundum, raras Romæ vel elegantias, vel litteras fuisse: Mars & horrida virtus omnia obtinebant. Postea intrata & capta ipsa Græcia, victores iterum cepit, & feliciter artes suas intulit & diffudit. Magno gradu tunc itum ad variam doctrinam, sed primò ad Eloquentiam maximè: vt quæ coniuncta cum rebus gerendis, & aptissima gubernantibus esset. Mox & Historia successit, & Philosophia, & quidquid ad animos moresque colendos, aut honestè oblectandos, facere videretur. O hanc quoque curam laudabilem! & maximè, quia cum modo & temperie fuit: quod nec omnes passim se darent, nec nimis etiam darent. Non omnes, sed primores ferè & ij qui vel erant in Republicâ, vel ad eam se præparabāt. E triplici illo ordine, Plebs ad militiam adspirabat, neque erat harum rerum; Senatus & Equites, præter illam, animi cultum adsumebant, & mente non manu solùm conspici volebant. Modum etiam plerique seruabant, nec vt mancipia quædam litterarum essent; sed vt quatenus opus, haurirent, & ad rem atque vsum transferrent. Talis Scipio ille posterior, talis Cornelius Sulla, Pompeius, Lucullus, Cæsar, alij vno verbo, quicumque in Rep. eminentes postea fuerunt. Quod Thucydides Athenienses suos profiteri facit: φιλοκαλοῦμεν τε μετ' ὀ-
τελείας, καὶ φιλοσοφούμεν ὥστε μαλακίας: *Elegantes sumus, sed cum parcimoniâ; philosophamur, sed sine mollitie*: id, inquam, cōuenientissimè Romani veteres sibi vindica-

Lib. 11.

Sueton.

Suet.

rint. Itaque studium hoc Doctrinæ publicè viguit, & doctores paullatim, in priuatis primò Principum ædibus, mox & in publico, ac stipendiis publicis, auditi vel conducti. Quis nescit C. Cæsarem *omnes liberalium artium Doctores, qui Roma essent, ciuitate donasse*? Qui summus extero honos, & nullâ pecuniâ æstimandus. Et si nec hæc defuit, primò quasi è priuatis loculis data: mox è fisco annuatim appensa. Primus id Vespasianus instituit: qui *Latinis Græcisque Rhetoribus annua centena constituit*. Ea reddunt *bis mille quingentos* Philippæos: vbi hodie *veleximiis* doctoribus largiendos? At qui & medicis *quingena* HS. mercedem annuam fuisse Phinius docuit: quæ sunt *duodecim millia & quingenti* Philippæi: cur non igitur admittam vel *sexcenta* excellenti alicui data fuisse? Imò fuerunt *Eumenio Rhetori*, & doctori in scholis Augustoduni: quem Constantius princeps sub Augustis Diocletiano ac Maximiano *salarium in sexcentis millibus nummum accipere iussit*. Ita ipse semel iterumque profitetur in Oratione, quæ exstat: nec *sexagena* rescribi mihi aliquis persuadebit. Scilicet alienum nimis à MAGNITVDINE ROMANA est, *quindecim millia* Philippæorum, singulari doctori, & qui Magister Palatij fuisset, dari: nihil est: & credere audeant, si qui non audent sperare.

CAPVT XI.

*Diuturnitas Romani imperij, & in occasione de
patriâ Constantini.*

SE D peregisse cursum meum sermonis videor, & vela colligo, & nauigo in portum. Vidisti quàm magnum hoc imperium à *Finibus, Copiis, Opibus, Operibus, Virtutibus Virisq;* fuerit: & potuissem à *Tempore* addere, ac diuturno statu. Nam quod alibi imperium, modicè magnum, tamdiu perseuerauit? Atque istud maximum, tot sæcula stetit: & reliquæ eius cum nomine, etiam nunc in Germaniâ & AVSTRIACA domo feliciter ecce viuunt. Itaque Plutarchi verba liceat vsurpare: *Cum Fortuna alata sit ac vaga, & modò Assyrios, Medos, Persas, Macedonas, Carthaginenses lustrauerit, eosdè quæ reliquerit: videtur ad Tiberim alas posuisse, volubilem globum reliquisse, & urbem quasi perpetim inhabitatura intrasse.* Quid Homeri iam olim vaticinium, quàm mirabile est?

Νῦν ὃ δὴ αἰνείας βῖν τεύχος ἰδὼν ἄρξει,

Iliad. γ.

Καὶ παῖδες παίδων, τῶν τε μετόπισθε γένωνται.

Nunc autem Troiana Æneas sceptrum tenebit,

Et nati natorum, & qui nascentur ab illis.

Ille verò tenuit, & nati eius; inter quos Romulus primus Regum, ex eo sanguine; & ô occultam decreti vim! primus Imperatorum, Cæsar. Etsi autem mutatio aliqua status interuenit, tamen imperium mansit: primò sub Regibus, tum Consulibus, tum Principibus: & sub istis, scissum diuulsumque; & caput alterum in Thraciam aut Græciam translatum. Constantinus id fecit, quod non ignoras: & causam dedit ruinæ aut incli-

inclinationi deinde rerum. A V D. Oro temi doctor, benignè & honestè de hoc viro loquamur, & qui vt sidus illustrauit vicinam nostram terram. L I P S. Ego verò loquor in omni aliâ re: & præsertim quæ sacra & pietatem tangit. Quis nescit illum, Deo duce, depulisse tenebras, quæ orbem terræ densâ superstitionum nube obsidebant? Ille dissipauit, lucem intulit, templa nobis & Christo aperuit, vanis cultoribus & diis clausit. Magnus igitur laudatusque vir; sed quid tamen ea lux propriè ad vicinam nostram terram, vt dicebas? A V D. Nam quis nescit in Britaniâ ortum hunc esse, & gloriâ etiam redundare ad natalem terram? L I P S. Ego verò nescio, & ambigo, & propior sum vt negem. A V D. Tûne, contra eruditissimis viris nuper asserta? & clarum hunc etiam Panegyrici scriptoris locum? Nam ille apud ipsum Constantinum hæc profert: *Pater tuus liberauit Britannias seruitute, tu etiam nobiles illic oriendo fecisti.* Quod os tuum erit, contra verba tam expressa, euntis? Nisi hoc dices, æui eius oratorem nescisse Principis sui patriam, & in re tam nobili, ignauè & fædè apud ipsum errasse. L I P S. Hoc non dicam, & os non abdicabo, imò nec perfricabo quidem. Fides apud me esto Panegyristæ: sed quid dicit igitur? *Ortum illic Constantinum:* at non in tuam sententiâ fortasse, sed meam dicit. Ea est, non ipsum ibi, sed imperium eius ortum: nō Constantinum, sed Principem. Verè tibi dico, (siste, nec resiliās) hæc eius mens est: *Tu nobiles fecisti Britannias, quòd illic ortus factusque es Imperator.* Prima imperij tui lux illic, & illinc, fulsit. Nec dissimile nimis in verbo, quod paullo ante idem Orator dixit, *Constantine oriens Imperator.* A V D. Percussisti me nouâ interpreta-
tione:

tionem: sed quid tu tamen contra communem omnium assensum? LIP S. Nego, communem: imò nemo veterum hoc scripsit. Mediæ aut nouellæ ætatis hæc assertio est, nec nisi ab illo imperij ortu orta. Quid? nōne Nicephorus, Ecclesiasticæ historiæ scriptor, de Bithyniâ palam affirmat? *Nam patrem eius Constantium, cum ad Persas legatus iret, Drepanum Bithyniæ venisse, diuertisse, Helenam hospitæ sui filiam nouisse, Constantinum hunc genuisse.* Cur autem ille hoc tam constanter, tam nihil ambigens, aut de varietate inferens, si variatum tamen fuit? Atque ego arbitror, verissima Nicephorum tradidisse. Quo teste? quem nemo respuat, veteri, & ab ipso Constantini æuo. Is est Iulius Firmicus, qui Martheon libros scripsit: & in eorum primo, hæc verba. *Dominus & Augustus noster ac TOTIVS orbis Imperator, Pius, Felix, ac Præuidus Princeps CONSTANTINVS scilicet MAXIMVS, DIVI CONSTANTII Filius, augustæ ac venerandæ memoriæ Principis. qui ad liberandum orbem à TYRANNICIS immoderationibus, & ad comprimenda domestica mala, favore propitiæ maiestatis electus est, APVD THARSVM GENITVS, à primo ætatis gradu gubernacula imperij retinens, quæ prosperis nactus fuerat auspiciis, ROMANVM ORBEM salubri gubernationis moderamine sustentat.* Ea de Constantino nostro accipienda esse, primùm doceo, tum de re meâ addo. Aliquis enim dixerit *Constantinam eius filium* capiendum; quoniam in libris vulgatis legitur, *Diui Constantini filius*: sed profectò id improbum est, & *Constantij*, ut recitavi, legendum. Multa docent clarè. primùm quòd ait, *Totius orbis Imperatorem* fuisse. atqui Constantinus ille, inter tres Constantini Magni filios, forte duntaxat Gal-

Lib. vii.
Ecc. Hist.
cap. xvi. i.

lias, Hispanias, Britanniasque habuit. Item, quòd *Maximum* agnominat: quòd, *Tyrannos* ab eo extinctos, & quòd *Romanum* orbem salubriter facit gubernantem. Atqui partem modò, vt dixi: nec eam ipsam diu tenuit, intra triennium occisus. Quid, quòd disertè mox idem Firmicus, *Constantinum maximum Principem, & eius INVICTISSIMOS LIBEROS, Dominos & CÆSARES* appellat? Certè non habuit tales minor ille Constantinus, & palàm ad nostrum hunc spectant. Ista præmissi, si quis (vt sunt mores, aut ingenia) refragari vel calumniari vellet: nunc ad rem aptemus. Ait igitur, Constantinum illum suum Principem *apud Tharsum* genitum. Quæ illa est? an nobilis in Ciliciâ? non est, sed in Bithyniâ ego eam inuêni. Nam Stephanus de Urbibus, Nicetas, Porphyrogennêta, *Tarsum* hanc (ita scribunt, sine adspirante litterâ) in Bithyniâ signatè ponunt, iuxta Nicomediam ipsam. Ego verò aio & infero eandem cum *Drepano* esse, quod Nicephorus nominauit. Quo argumento? quòd apud Nicomediam sinus & curuatura maris est, quæ loca talia communi nomine *Drepana* Græci, quasi *Falces*, à similitudine, vocabant. Inde passim *Drepani* hoc nomen in maritimis, & Ortelium nostrum vide. At proprium eius loci opidiq̃ue nomen, & magis restrictum, *Tarsus* fuit. Mea hæc coniectatio est: nec moueor, si posteri, aut Britanni scriptores, aliter de totâ re tradiderunt. Multo minùs Georgio Cedreno aurem præbeo, scribenti natum Constantinum *περὶ τῆς τῆς δακίας πόλιν*, circa urbem *Dacia*. Corrupta, aut falsa sunt: & quoties vanitatum manifestus ille auctor? Pro nobis etiam validè facit, quòd ipsum istud Drepanum, *Helenopolis* appellatum postea, in honorem mar-

tris; & Pontus vicinus Polemoniacus, item *Helenopontus*: sed & sedes imperij in viciniam translata, nōne affectū in patriam testatur? Ipsum denique æuum Constantini adiuuat, si consideras natum eum circa annum ∞ XXIII vrbis conditæ: quo tempore quæta adhuc Britannia, & turbæ pōst motæ, & pater ad eas sedandas missus. Ergo verius antè, & alibi, natum esse. Sed tu, aut alius, vt volent: ego sine fraude censui, & Sermonem meum totum finiui.

CAPVT XII.

Conclusio, & Laudatio magni Imperij.

AVD. O sermonem æternū mihi vtilem, & iucundum! & clarâ voce fateor, nunc denique admittere & concipere me cogitationes tanto illo imperio dignas. Inter quas tamen & istam: Fueritne vtile gentibus sub tam magno illo esse? an non nimia & aspera ista seruitus, sine vindice & domino quem appellares? LIPS. Haud inepta nec importuna quæstio: & scio esse, quæ illud damnare aut certè accusare possint, sed plura ac grauiora, quæ absolvere & alleuare. In primis quanti facias, sub magno tali imperio pacem ac quietem gētium vbique fuisse? Nusquam arma, hostis, prædo; arabant, ferebant, metebant; conuiuia, coniugia inibant; liberos gignebant, educabant: omnia securè, & nec auribus quidem læsis rumore belli. Nam si quod tale erat; cum barbaris nempe & longinquis, & quod velut ludicrum aut fabellam, tuti limitibus & præsidiis suis, audirent. Pulchrè Aristides: *Bella verò vix vnumquam nunc creduntur exstitisse, ac pro commentis habentur*

à plerisque. Quod si alicubi ad limites confictus fuerit, (ut in magno & immenso imperio facile fit, ob Getarum insaniam, vel Afrorum miseriam, vel rubri maris accolarum infelicitatem, qui commodis bonisque suis nescierunt uti) mox ista, tamquam fabula, cum omni memoriâ euanuerunt. Tanta pax apud vos viget, ô Romani, et si militiam bellumq; habetis inter patria instituta. Atque iterum idem (quomodo enim melius certiusque vetera repræsentē, quàm veteris scriptoris verbis?) idem in eam laudem: Uniuersus orbis sub vobis, tamquam festum diem agitando, quos olim gerere solebat gladios deposuit, ad conuiuia autem & reliquam omnem latitiam liberè se conuertit. Et aliæ quidem contentiones aut certamina vrbes reliquerunt; vnum omnes habet, ut earum quæq; pulcherrima & iucundissimo aspectu appareat. Itaque omnia plena gymnasiis, fontibus siue aqueductibus, porticibus, templis, tabernis, scholis: ut aliquis verè dixerit inclinantem & labantem mundum, restitutum à vobis esse. Nec vrbes solum splendore & decore lucent, sed tota adeò terra, instar horti aut paradisi, conspicitur exculta. Ut miseratione planè digni videantur, siqui imperio vestro non subiacent, (qui pauci tamen sunt:) ut qui tantis bonis careant. Hæc verè & floridè dicuntur, & capiunt me recitantem: etsi non minus vno ictu penetrat Cornelij nostri breuiloquium: Quippe immota, aut modicè lacescit a pax: quod ille de Principum æuo scripsit. Iam verò alterum bonum, quanti est, Communicatio inter se hominum & rerum, viis vndique liberis commerciisque? In animo tuo cogita, si tutò nunc Byzantium, Persarum aut Sinarum regionem videre liceret: quàm tu ipse fortasse atque alij libenter & auidè iretis? per tot terras & maria

oculo

oculos pedesque ferretis? AVD. Affectum meum tangis. capior vnicè peregrinatiunculis, & animum inno-
uat ac vires nouitatum ille aspectus. LIPS. Optimus
quisque in hac cupidine: & alti æthereiq; animi, vt ip-
se æther, gaudent motu. Sed sub tali igitur imperio,
quàm id licuit? tutiùs quàm hodie, non dicam ab vrbe
ad urbem, sed pænè per urbem aut circa eam ire. Visere
illíc licebat magna aut nobilia illa opida, clara & incly-
ta ingenia: Athenas, Alexandriam, Rhodum, ad alia
terrarum se conferre, disciplinæ aut cultus causâ. At
mercatores, & quibus aliarum opum cupiditas, ij per
maria omnia nauigabant, ij per terras circuibant: vni-
cos prædones aut piratas placantes, siue metuentes, Pu-
blicos. Sed vno & certo pretio placantes, nec eo gra-
ui sub Principe aliquo moderato & æquo. Itaque res
longinquæ aduehebantur, ignotæ antea ostendebântur:
& totus orbis eâ communione, quasi vna ciuitas, fie-
bat. Quid dicam artes barbaris traditas aut inuectas?
quid elegantiam, litteras, & cultum animorum? Cùm
etiam omnes linguis diuisi, vnâ Romanâ iungerentur,
atq; ea cum imperio quaquauersum se propagaret. Pli-
nius hæc grauitè & meritò attollit, in Italiâ dilaudan-
dâ: *Numine Deum electa, quæ calum ipsum clarius face-*
ret, sparsa congregaret imperia, ritusq; molliret, & tot po-
pulorum discordes ferasq; linguas sermonis commercio con-
traheret ad colloquia, & humanitatem homini daret: bre-
uitérque, vna cunctarum gentium in toto orbe patria fie-
ret. Iterumque alibi idem: *Videmus, inquit, alia*
aliundè, ultrò citròque, humana saluti (nam de herbis &
re medicâ illíc loquitur) *in toto orbe portari,* IMMENSA
ROMANÆ PACIS MAIESTATE, NON HOMINES

Lib. I.
cap. V.Lib. XXV.
cap. I.

MODO, DIVERSIS IN TERRIS GENTIBVSQVE, *verumetiam* MONTES & *excedentia in nubes iuga*, PARTVSQVE eorum & *herbas quoque inuicem ostentante*. Nec minùs Strabo : *Romani multas gentes antea feras, ob montes aut locorum naturam asperam, aut ob frigus aliãve causam, sub imperium assumentes; eas ipsas exdisiunctis & insociabilibus, unà commercii iunxerunt, & pro agrestì vitã, ciuilem agere docuerunt*. Sed & Claudianus, de Romã :

*Huius pacificis debemus moribus omnes,
Quòd veluti patriis regionibus utitur hospes,
Quòd sedem mutare licet; quòd cernere Thulen,
Rursus & horrendos quondam penetrare recessus.
Quòd bibimus passim Rhodanum, potamus Orontem,
Quòd CUNCTI GENS VNA SVMVS.*

O verba & res pulchrę! & potestne maior esse voluptas, aut commoditas? Omitto gubernationem & leges ferè eadem; pondera, & mensuras, & numos: & plura, quorum bonorum sensus etiam hodie aliquis in Turcarum imperio est; & esset maior, si leges & politia illi meliores. At nostra Europa misera, quàm iam à multis sæculis expers eorum est? iactatur assiduis bellis aut dissidiis. quare? quia regna aut dynastiæ paruis aut modicis finibus inclusæ, semper in vicinò causam habent timendi vel sperandi, querendi vel vlciscendi. Idem & ante Romanum imperium erat: quod Plutarchus asseruit, & pulchrâ imagine addidit, *Isud velut ANCHORAM fuisse fluctuanti mundo*. Quid propriè de nostrâ Galliã triplici Cerialis apud Tacitum? *Regna bellaque per Gallias semper fuere, donec in nostrum ius concederetur*. Fuere mi Auditor, & nunc erunt, donec talis

talis aliquis euentus. AVD. Per ignem sermones tui eunt, & vide ne amburare. LIPS. Ego verò apud te liberè, & vt Philosophi in scholis, de Republicâ dissero: neque sunt ista, neque erunt fortasse, & (dicet aliquis) nec debent. Deo euentus permitto: ego arbitror & ad Religionis vnitatem, & ad subditorum omnium vsum, & denique contra communem Turcarum hostem fore, potens & validum caput vnum. Tu Deus SALVS ET TVTELA RERVVM, da quod expedit; da, si non imperio, saltem foedere coire ac iungi, da lætos & pacatos ad læta & pacata loca tua venire. In quo finio, & te mi Adolescens, dimitto.





NOTÆ EIVSDEM I. LIPSI

IN LIBRVM I.

CAPVT I.



Προσέμειπται.) Pro versu melius, χρυσήν μίτραν diuisim: etsi aliquis fortasse obliquam illud excuset. Quod autem sequitur, *de incolatu Olympi in ipsâ terrâ*, id verò pulchrè ad splendorem & decorem vrbis Romæ refertur, quæ fuit velut cælum in terris. Et est affatus ad ipsam ROMAM vt diuam, & quæ urbem eam templum aut sedem haberet. Pagina 5.
linea 2.

CAP. V.

Forum Iulij in Galliâ Narbonensi.) Classis igitur illa seruiit & vsui fuit non Galliæ solùm, sed Hispaniæ & toti tractui ad fretum Gaditanum. Pag. 24.
lin. 28.

Sed ubi, ignoro.) Ego verò nondum repperi, etsi Theodosiæ, in Bosphoro, portum fuisse vel centum nauium capacem Strabo affirmet lib. vii. Sed an ibi, an alibi (nam plures etiam portus) siquis eruit, ostendet. Pag. 25.
lin. 7.

CAP. VII.

Huius Principis plurimæ colonie.) In solâ Italiâ duodeviginti eum collocasse Suetonius scripsit: & plurimas alibi terrarum, cum Nummi sub eo cusi, tum agnomina ab illo ostendunt. Pag. 30.
lin. 29.

Sed nec Velleij iudicium valdè probo.) Cui tamen causam aliquam esse, etiam hodie Hispani experiuntur: sed non illam propriè, quam Velleius suspicatur aut timeret. Hoc vsus docuerit, longinquas aut externas colonias, si coniugiis misceantur cum indigenis, paullatim ipsos aut posteros transire in mores & affectus eius regionis. Cauere hoc malum vis? vnica ratio, à coniugiis, & (si potest) à mixtione arcendi: quod Iudæi olim & nunc seruant. nec alia magis intima & vera causa, cur & crescat assiduè ea gens, & in veteri lege & institutis, aliena à populis, perseveret. Pag. 31.
lin. 5.

LIB. I I.

CAP. II.

In agros, & in corpora eorum.) Illud ipsum conqueritur & exaggerat sic Bōundica regina Britannorum, in Dionis Nerone: *ὃς ὡρὸς τῶν ἄλλα πάντων καὶ νέμειν καὶ γεωργεῖν ἐπέειπε, καὶ τῶν σωματῶν αὐτῶν δασμὸν ἐτήσιον φερόμενοι;* Nonne, prater cetera omnia, & pascitis & aratis illis (Romanis) & corporum etiam ANNVM tributum pendentes? Notetur de Anno, vt in Appiano: etsi alibi de menstruo etiam est lectum: sed nempe ratione anni. Pag. 41.
lin. 26.

CAP. III.

Hoc totum pro priorî sententiâ magis sit.) Nimirum quia *Censum* appellat, & *Numisma census*, apparet ex ipsâ voce censuram & æstimationem opum interuenisse. Multa de his capitibus: & ego ad Taciti i. librum, &

eruditissimus Brissonius De significatione verborum quædam adnotauit: sed veritas, opinor, est indictiones fuisse in capita, pro modo opum, cuiusmodi hodie *Tailles* Galli, nos *Impositiones* aut *Estimationes* vocamus.

I C A P I T U L U M X I

Pag. 73.
lin. 20.

Et si non ad vsum tales.) Sicut & in torque aureo, quem *centum pondo Divo Augusto Galli dederunt*, ut est in *Quintiliano*. Hæc in speciem tantum: imò plerumque nudo nomine, Pecunia ipsa data.

Pag. 74.
lin. 7.

Hoc prætextu rapinas extorsionesq. usurpatas.) Ita & *Plinius* igitur in *Traiani* laudibus ponit, *non spoliis provinciarum, & extorſo sociis auro, sed hostilibus armis, captorumq. regum catenis triumphum grauem*. Nec aliud ab hoc coronario auro intellegit.

C A P I T U L U M X

Pag. 32.

Quæ in fine huius paginæ & deinceps dissero super Frumentationis magno modo, maiora vero & æquo quibusdam videantur fortasse: & nos hæremus. Nixi tamen sumus auctoritate *Sex. Victoris* & apertis in *Augusto* verbis, ex quibus hæc summa conficitur. Et verò cogitandum est, nec maximos Romanos Modios fuisse: definitque *Plinius*, *lenissimi tritici modium libras viginti pendere, grauiſſimi vigintiſeptem*. Sed libras Romanas & *xii. vnciarum* nempe accipe, hodiernis valdè minores. Quid, quòd nec id frumentum totum in plebem datum præsumendum est? *Aula* & *Palatini* omnes suas Annonas delibabant, in vrbe omnes Milites: credo & in classe ad *Misenum*. Ea profectò magna ratio est, & reliquum deinde plebi cessit. Hæc excusent aut approbèt: sed quid si in *Victore* tamen vitium est, & rescribimus annua centies centena millia? Ea triplicata profectò fecerint aut acceſſerint ad Canonem illum diurnum *Seueri lxxv. millium*, etsi paullo plus etiam reddant. Ita in *Spartiano* nihil mutemus: & inclinare huc incipio, quia certò colligo sub *Seueri* æuum, frumentantium numerum non plus ducentis millibus hominum, aut circiter, fuisse. Nam *Dio Cassius* in *Seueri* liberalitatibus scribit, *decem aureos vritum dedisse populo frumentario, & Prætorianis suis: atque eam donationem ascendisse ad bis millies Hs.* Æstimationem hanc pecuniæ si in capita sua redigas, per denos cuique aureos: reperies iustè ducenta quinquaginta millia accipientiũ fuisse. Atqui inter eos ipsos & Milites fuère, ut scripsit: qui ferè quinquaginta illa redundantia millia reddant. In hac autem computatione Aureos Romanos scilicet accipimus, qui *xxv. drachmas* reddunt. Cùm hæc de *Româ* veteri dixerim, subit & de *Nouâ* dubitare. Enimvero si octoginta millia in diem accipis modiorum, ut ex *Socrate* adstruxi, ingens largitio est. Sin cum *Nicephoro* tot millia medimnorum in annum; exiguum fortasse nimis efficitur, & vix quattuordecim millibus hominum alendis. Valdè etiam illatio *Ægypti* imminuta sit, si ad hunc modum redacta. Dubito, & velim alios cogitare. *Theodericum Gothum*, *Italæ* Regem, hunc morem in parte seruasse, memoriæ de eo tradunt, & in *Ricobaldo* quodam scriptum: *A Romanis cum gaudio susceptus est, quibus ille ad subsidium, tritici singulis annis cxx. millia modiorum concessit*. Sed hæc largitio tam longè à priscâ, quàm ille à priscis.

NOTÆ.

LIB. III.

CAP. III.

Orbis compendium & epitome.) Quod dictum Polemoni sophistæ tri- Pag. 128.
lin. 3.
buitur à Galeno.

Ita in uniuersum sunt quatuor.) Tot illi milliones hominum si nimij videantur, alius recidito pro suo captu: me magnitudo Romæ infixæ animo ad magna omnia duxit. At hodie quàm longè absumus? Paullus Iouius in Leonis Decimi rebus, quo tempore vrbs florentissima, verbatim ita scribit: *Censebantur eo tempore cinium & inquilinorum octogintaquinque millia, ut hinc quoque clades nostras non iniquâ aestimatione desleamus, cum ad triginta duo millia capitum urbem redactam proximi Censores in annonæ caritate reppererint.* Heu, quid hæc ad illam veterem? imò quid ad aliam aliquam non inter primas? Cæsarea Cappadociæ ad *quadringenta millia* incolarum habuit: quod disertim Iohannes Zonaras in Valeriano scripsit. Mediolanum quàm multos, argumento sit Procopij scriptio, asserentis *Gothos, cum id cepissent, trucidasse illic trecenta virorum millia, feminas autem abduxisse captiuas.* Atqui nec omnes viros deletos par est: & quantum feminarum puerorumque fuisse? Sed alibi etiam hæc talia videbimus, & vetera non fuisse ad nostros modulos liquebit. Ad magnitudinem autem & multitudinem Romæ veteris, egregius etiam Lucani locus est lib. i.

— *urbem populis victisq; frequentem*

Gentibus, & GENERIS, cœat si turba, CAPACEM

HUMANI.

Totum genus humanum capi eâ potuisse quàm ineptè aut stultè dixerit, si nihil supra hodiernum ambitum fuit?

Ut paulatim Italia pene deserta esset.) Nam & Varronis tempore iam in Pag. 132.
lin. 12.
urbem ex agris influebant, & quod ipse queritur, manus in theatro mouere, quàm in aratro, malebant. At Lucanus iam plenius:

At nunc semirutis pendunt quod mœnia tectis

Urbibus Italiæ, lapsisq; ingentia muris

Saxa iacent, nulloq; domus custode tenentur,

Rarus & antiquus habitator in urbibus errat:

Horrida quod dumis, multosq; in arata per annos.

Hesperia est, desuntq; manus poscentibus aruis.

& plura quæ addit; etsi causam conicit in ciuile bellum. Idem alibi:

— *videmus*

Tot vacuas vrbes. generis quod turba redacta est

Humani? toto populi qui nascimur orbe

Nec muros implere viris, nec possumus agros,

VRBS NOS VNA CAPIT.

Quod postremum epiphonema valdè est pro ingenti etiam meâ Româ.

CAP. VII.

An quia & Iani in eo templum.) De quo Martialis capiendus lib. x. epigram. xxviii. Pag. 65.
lin. 2.

NOTÆ.

*Peruius exiguos habitabas antè penates,
Plurima quàm medium Romaterebat iter,
Nunc tua Casareus cinguntur limina donis,
Et fora tot numeras lane, quot ora geris.*

Significat inter exiguas ædes antea fuisse id templum, nunc cinctum à Cæsare porticibus, statuis, & alio fori ornatu: ac videre tot fora, quot haberet ora, id est quaterna. nam quadruplex iste Ianus fuit.

CAP. VIII.

Pag. 167. *Verti ego Sellas.*) Alius tamen aliquis *Solia*: sed ista Græci ἐμβάτας vel
lin. 17. ἐμβάτους magis nominant, ab ingressu in ea & descensu, quàm καὶ δὲ παρ. Addo vix videri tot *Solia* in vllis Thermis fuisse, quot hâc numerantur. Nam & sanè satis grandia, nec aliud quàm *Aluei* quidam (ita Vitruuius atque alij nominant) in quæis calidâ lauarentur, & sæpe plures vnâ. Ex Martialis aliquot Epigrammatis apparet: tum & ex Sidonij aliis verbis, eâdem epistolâ, quibus nominat *Solij capæcis hemicyclum*. *Capax* ait, ergo magnum est: *hemicyclum* ergo ipsum vetus Sigma est. Vt non assentiar iis, qui in Sidonij verbis legunt, *quot solet sigma personas*: nec de mensali Sigma hâc est sermo. Enimuerò in ipsis ruinis Thermarum Romæ hæc hemicycla palàm apparent: & credimus *Solia* fuisse. Quidquid tamen sit, capacia ea fuere: & inde *Oceani solium*, magni maris nomine dictum.

CAP. IX.

Pag. 172. *Argenteas statuas.*) Quarum si non origo, tamen crebritas maxima sub
lin. 1. Augusto fuit. quod Plinius, sed & Suetonius ostendunt.
Ibid. lin. 2. *Domitianus statuas sibi in Capitolio.*) De quibus Plinius in Panegyrico: Itaque tuam statuam in vestibulo Iouis opt. max. vnâ alterâmqve, & hanc aream cernimus: at paullo antè aditus omnes, omnes gradus, totaq; area hinc auro, hinc argento relucebat, seu potius polluebatur, cum incesti Principis statuis permixta Deorum simulacra sorderent.

CAP. XIII.

Pag. 193. *Et ad marmora variegata referam.*) Quod approbent Mamertini hæc
lin. 14. in Gratiarum actione Iuliano Principi: Neque ei comparanda sunt PICTURATÆ marmorum crusta, & solido auro tecta laquearia, qui maiorem anni partem in nudâ humo cubant. Notes & *Solidum* illîc laquearium aurum, de quo mox sequitur: vt & in Statio,
*Pendent innumeris fastigia nixa columnis,
Robora Dalmatico lucent satiata metallo.*
Vbi sociata veriùs putem, quia solidum ita aurum inductû iunctumque.

LIB. IIII.

CAP. IX.

Pag. 241. *Astibus singulis farris modios, item vini congios.*) Non nimis abit, præ-
lin. 17. sertim in viño, quod de suo æuo Martialis scribit:


Amphora vigessis, modius venit ære quaterno.

Nam Amphora XLVII. sextarios continet: ergo Congius eâ ratione astium duorum & semis.

INDEX

INDEX CAPITVM

LIBRI PRIMI.

 CCASIO & ingrefſio ſermonis. Cap. I.	Pag. 1.
Communiter Roma & eius Potentia laudata, per elo- gia pauca veterum. Cap. II.	3.
Fines imperij Romani; quando maximi; & Prouinciæ breuiter adnumeratæ. Cap. III.	7.
De copiis & præſidiis ſparſim circa limites, itemque in ipſâ urbe. Cap. IIII.	13.
De Copiis in mari aut fluminibus; de Clafficis variis earumque ſedibus. Cap. V.	21.
De Coloniis, & modus fructusque deducendi. Cap. VI.	28.
Multitudo Romanorum, & ratio adſciſcendi gentes, aut transferendi. Cap. VII.	32.

LIBRI SECVNDI.

De Priſcis populi Romani vectigalibus, Decumis, Quintis, Scripturâ, Portorii. Cap. I.	Pag. 38.
De Tributis & Capitatione. tum in quiſitum in Modum vectigalium, & quid videantur reddidiſſe. Cap. II.	41.
Inquiſitum item in Capitationis modum, & penſum vniuerſorum Tri- butorum. Cap. III.	47.
De Aerario militari, & Vigefimâ, Vigefimaquintâ, Centefimâ ad id explendum. Cap. IIII.	54.
De Metallis, & argenti, auri, aliarumque rerum fodinis. Cap. V.	58.
De Vrinario vectigali & Chryſargyro, item de Meretricio. Cap. VI.	60.
De opibus Byzantini imperij: & clauſula ac finis Tributorum. Cap. VII.	63.
Pecunia è Triumphis, & aliquot eorum inſpecti æſtimati que. Cap. VIII.	66.
De Auro Coronario, & Coronis dictum. Cap. IX.	72.
Impenſæ publicæ in Militem, Magiſtratus, Populum: & de Frumen- tatione. Cap. X.	77.
Impenſæ in Ludos obiter oſtenſæ. Cap. XI.	85.
Dona Principum effuſa, & primò Iulij Caſaris. Cap. XII.	89.

<i>Augusti Principis dona. Cap. XIII.</i>	Pag. 94.
<i>Aliorum Principum dona. Cap. XIII.</i>	101.
<i>De priuatorum aliquot opibus, & materie huius finis. Cap. XV.</i>	104.

LIBRI TERTII.

<i>Ad Opera Romana transitum, & primò de ligneis aut temporariis dictum. Cap. I.</i>	Pag. 110.
<i>Diuturna opera, & caput omnium Roma. De situ eius, & in primis de magnitudine indagatum. Cap. II.</i>	115.
<i>Magnitudo Suburbiorum Romæ, & hominum in totâ Româ multitudo. Cap. III.</i>	125.
<i>De ædificiis vrbis Romæ communiter, & eorum altitudo. Cap. IIII.</i>	132.
<i>Decor & ornatus ædificiorum. Excerpta quedam, & primò de templo Capitolino exactius dictum. Cap. V.</i>	135.
<i>Item de templo Panthei, Urbis, & Pacis. Cap. VI.</i>	150.
<i>Fora Romana descripta, & distinctè Romanum, Iulium, Augustum, Transitorium, Ulpium. Cap. VII.</i>	157.
<i>De Balneis Thermisque, & breuiter de Rostris. Cap. VIII.</i>	166.
<i>De Statuis, & earum custodelâ. Cap. IX.</i>	171.
<i>De Viarum magnis operibus, & nominatim de Appiâ. Cap. X.</i>	174.
<i>Aquæductuum mira. Cap. XI.</i>	180.
<i>Cloacarum mira. Cap. XII.</i>	185.
<i>Traiani pons in Danubio. Cap. XIII.</i>	188.
<i>Priuatorum hominum Urbanae aut Rusticae ædes. Cap. XIII.</i>	191.

LIBRI QVARTI.

<i>Transitum ad Virtutem Romanorum, & ea in genere prædicatâ. Cap. I.</i>	Pag. 198.
<i>Triplex ordo in populo ostensus, & quisque in suâ parte laudabilis. Cap. II.</i>	200.
<i>Iustitia & Clementia in bellis. Cap. III.</i>	207.
<i>Fortitudo Romanorum militaris. Cap. IIII.</i>	211.
<i>Pietas, Probitas, Constantia Romanorum. Cap. V.</i>	216.
<i>Contra Probitatem & Abstinenciam dicta & obducta quedam. Cap. VI.</i>	222.

<i>Pariter contra Continentiam, & de Luxu Romano. Cap. VII.</i>	226.
<i>Excusati Romani à prioribus : & primum in Raptu vel Sæuitia, obiter. Cap. VIII.</i>	236.
<i>Fuſtum idem in Luxu menſarum, aut veſtium. Cap. IX.</i>	239.
<i>Doctrinæ ſtudia Romæ, & Salaria in Doctores. Cap. X.</i>	244.
<i>Diuturnitas Romani imperij, & in occasione de patriâ Conſtantini. Cap. XI.</i>	247.
<i>Concluſio, & Laudatio magni Imperij. Cap. XII.</i>	251.

APPROBATIO.

Quatuor hos I. Lipſij de Magnitudine Romana libros, prælo dignos cenſeo, quòd eruditi ſint, & pulchra varietate mirificè afficiant oblectentque, nec non ad illuſtationem antiquitatum plurimum conferant, nihil interim continentes quod Catholicæ fidei aduerſetur.

*Guiliel. Fabricius Nouiom. Apoſtolicus ac
Regius librorum Cenſor.*



PRIVILEGIUM CÆSAREVM.

RVDOLPHVS SECVNDVS diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatiæ, Sclauoniæ Rex, Archidux Austriæ, Dux Burgundiæ, Stiriæ, Carinthiæ, Carniolæ & Wirtembergæ, &c. Comes Tirolis, &c. Nostro & Sacri Imperij fidei dilecto IUSTO LIPSIO gratiam nostram Cæsaream. Postquam inter alia, quæ DEVS immortalis hominibus liberali manu dedit dona, illustria inprimis illa & quasi diuina sunt, quæ in litteris liberalibusque disciplinis consistunt, quibus scilicet homines non tantum ab animalibus ceteris rationis expertibus, sed à rudi etiam & imperito hominum vulgo ita distinguuntur, ut tanquam Dij quidam splendescere in terris videantur: rem sanè præclaram teque dignam illi præstant, qui diligentem iis ipsis in literis ac disciplinis operam ponunt, præclarissimam verò & Reipub. vtilissimam, qui eas ita excolunt, ut aliorum menti docendo, scribendo lumina præferant, eosque ex ignorantia tenebris quasi manu educant. Quos excitare, quos amare atque animare ad dignitatis nostræ munus, ad quod Diuino vocati beneficio, concessuque sumus, inprimis pertinere existimamus. Cum itaque ab iis, quorum nobis spectata fides, qui que iudicare de Literis possint, acceperimus, insignes te animi ingenii que tui dotes tibi à natura insitas à primis temporibus ætatis tuæ ita literarum ac disciplinarum studiis excoluisse atque exornasse, ut olim iuuenilibus adhuc annis præclara florescentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituisisti, dum vetusta Latinæ antiquitatis rudera in nouam subinde structuram singulari artificio eleganter conuertisti: ad exquisitam adedò & ratam doctrinam, quæ magnam de te apud doctos quosque viros opinionem excitaret, peruenisse, eamque variis abs te libris acri & graui cum iudicio scriptis atque in lucem editis ostendisse, ut in eo quod tam feliciter tractes scriptionis genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. vtilia scribere, quæque à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortis, in quibus assidue verferis, flores colligere, concinnare, quibus Lectores mirifice recrees, & eorum pectus ad prudentiam, probitatemque informes: haud quaquam prætermittere voluimus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animandum magis patricinioque nostro defendendum pro benigna nostra in te susciperemus voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, accepimus, Diplomate hoc nostro privilegioque te & Typographum tuum aduersus quorumcunque fraudem, qui lucri causa, quod fieri solet, eadem excudere aut typis imitari forrè velint, munitos cupimus. Quamobrem pro auctoritate nostra Cæsarea decernimus, statuimus, vetamusque, ne quis Typographorum, Bibliopolarum,

aut

aut aliorum, qui librariam negotiationem exercent, eos libros, quos tu editurus es, quocunque modo, charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq. ac Dominiorum nostrorum hæreditariorum fines triginta annis proximis à primo editionis die computandis, absque tuo tuorumve hæredum consensu audeat: Hac autem lege addita, uti tria ut minimum cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, eum non solum eiusmodi libris, tibi, hæredibusque tuis, auxilio Magistratus, vbicunq. reperti fuerint, vendicandis, priuari, sed triginta etiam Marcharum auri puri multa, cuius semissis quidem Fiscus nostri Procuratori, fraudis vindici: alter verò semissis, tibi hæredibusque tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quam Politicis, cuiuscumque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiamque exercent, ne quemquam hoc Priuilegium nostrum impune violare, spernere aut negligere patiantur: Sed, si quos contumaces compererint, constituta à nobis multa, eos puniri & quibuscunque modis coerceri curent, ni & ipsimet grauissimam nostram in se conuertere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti. Anno Domini Millesimo, Quingentesimo Nonagesimo secundo. Regnorum nostrorum Romani decimo septimo, Hungarici vigesimo, & Bohemici itidem decimo septimo.

Subsign.

RVDOLPHVS.

Iacobus Curtius à Senftenaw.

Ad mandatum sacra Cæsarea M^{ti} proprium.

Io. Baruitius.

Additum sigillum Cæs. M^{ti} in cera rubrà.

SVMMA PRIVILEGII REGII.

PHILIPPVS Dei gratia Hispaniarum &c. Rex Catholicus, diplomate suo sanxit, ne quis, Iustus Lipsij Historiarum in alma Vniuersitate Louanienfi Professoris, & item Historiographi sui libros quoscunque, à Censoribus legitimis approbatos præter ipsius, heredumve eius, voluntatem, intra triginta annos à primasingulorum librorum editione computandos imprimat, aut alibi terrarum impressos, in has inferioris Germaniæ ditiones importet, venalesve habeat. Qui secùs faxit, præter librorum confiscationem triginta marcharum auri puri illatione mulètabitur. Vt latius patet in litteris, datis Bruxellæ XIV. Feb. M. D. XCVII.,

Signat.

Verreycken.

Tibi JOANNES MORETE, pro amicitia qua mihi cum Plantino (heu, quondam meo) & Plantinianis est ac fuit, tibi, inquam, permitto, uti hos DE MAGNITVDINE ROMANA libros quattuor, typis tuis excudas ac diuulges. Ne quis alibi alius præter te, cupio sine iubeo, ex lege quam magnus Cæsar & Rex meus dixerunt.

Iustus Lipsius.

ANTVERPIÆ,
EX OFFICINA PLANTINIANA,
APVD IOANNEM MORETVM.


M. D. XCVIII.

A. N. T. V. E. R. B.

EX OFFICINA PLANTINIANA

ATVD IOANNEM MORETVM

M. D. XCIII



SPECIAL

87-B

12076

DG

14

176

15

